

শহরতলি

প্রথম পর্ব

এক

এদিকের শহরতলিব এই অঞ্চলে বড়ো রাস্তায় বিদ্যুতের আলো আছে,—অনেকটা দূবে দূবে। ছোটো গলিতে আলকাতরা মাগানো কাঠের থামের মাথায় আজও টিমটিমে তেলের বাতি জ্বলে। কোনো বাড়িতে ভাড়াটে কেবানিবাবুর বউ অপরিচ্ছন্ন কিন্তু বিদ্যুতের আলোয় আলোকিত রান্নাঘরে উনানে ভাতের হাঁড়ি চাপাইয়া চামচ দিয়া কণ্ঠার নীচে ঘামাচি মারেন, রাত্রে খোকা কাঁদিয়া উঠিলে বেডসুইচ টিপিয়া বদলান তার কাঁথা ; হযতো ঠিক পিছনেই আরও বড়ো বাড়ির রীতিমতো বড়োলোক মালিকের রান্নাঘরে ডিবার বাববার বাতাসে নির্ভিয়া যায়, রাত্রে খোকা কাঁদিলে টর্চ হাতড়াইয়া হাতড়াইয়া খোকার মা প্রায় কাঁদিয়া ফেলেন নিজেও।

একটু বেশি রাত্রে আর রাত্রির শেষভাগে ট্রামের আওয়াজ কানে আসে, বন্ধ ঘরের বাহিরে ঝড়ের অন্তিম অবস্থাব হা-হুতাশ ভরা একটা অস্বস্তিকর একটানা আহ্বানের মতো। মোটরের হর্ন দূরেও বাজে, কাছেও বাজে, সময় অসময় নাই—কেবল সময় বিশেষে বাজে বেশি, সময় বিশেষে কম। পথের দুপাশে সচ্ছলতা ও দাবিদ্রোর, স্বাচ্ছন্দ্য ও দুর্ভোগের, বুচি ও অবুচিব, সুন্দর ও কুৎসিতের, পবিচ্ছন্নতা ও নোংরামিব, সম্মুখ ও পিছনের, অতীত বর্তমান ও ভবিষ্যতের (যথা—গৃহ-নির্মাণ-সংস্কারের সমাবেশ) কত যে আশ্চর্য সমন্বয় ও গলাগলি ভাব ! নাম লেখা গেট, বাগান ও লন, আধুনিক ফ্যাশানের সুদৃশ্য দোতলা বাড়ি, বিচিত্র শাড়ি, সুন্দরী নারী, রেডিয়োর গান, ইট বাহির কবা পুরানো একতলা বাড়ি, সামনে সিমেন্ট-ফাটা বোয়াকে ছেঁড়া ন্যাকড়া, কাগজের টুকরা, আধাপোড়া বিড়ি, কোমরে ঘুনসি বাঁধা উলঙ্গ শিশু। পথের এদিকে ছবির মতো সাজানো মনিহারি দোকান—সাবান, কেশতৈল, পাউডার, স্নো, ক্রিম, ঠাসা ; পথের অপব দিকে নিছক একটা কয়লার আড়ত, খুচবা ও পাইকারি বিক্রয় হয়, মালিক শ্রীভূষণচন্দ্র নন্দী। তিনটি মহিষের গাড়ি কয়লা আনিয়া আড়তে জমা করে, পুর্বীষ ও পাকের কোমল গভীর স্নেহে দেহেব ভাব নামাইয়া এই তিন জোড়া মহিষ অবসর সময়টা জাবব কাটে আড়তেব ঠিক পিছনে—বাস্তা হইতে অনেকটা চোখে পড়ে, গন্ধও পাওয়া যায় কিছু কিছু। কাছেই ডাইমন্ড বাস্টনান্ট ; ফাস্টকে... চা বুটি মাখন চপ কাটলেট ডবল ডিমের মামলেট (মাত্র তিন পয়সা) ইত্যাদি পাইবেন বলিয়া বাণেশ্বরের বাধানাত দে স্বহস্তে সাইনবোর্ড লিখিয়া বাখিয়াছে। এক রকম গা ঘেষিয়াই টিনের চালাব নীচে লোচন সাউয়ের মুড়িচিড়ার দোকান, কাচ বসানো টিনের পাত্রে বাতাসা, দড়িতে ঝুলানো তিলুড়ি, এক ছড়া চাঁপাকলা...। ছোটো স্যাকরার দোকান, কামারের দোকান, টিনের মগ-বালতি তৈবি আর ঘটবিাটি ঝালাই করার দোকান, সাইকেল মেরামতেব দোকান এ সবও আছে।

আর কিছু দূবে আছে বড়ো বড়ো কারখানা।

হাপরের দড়ি টানিতে টানিতে তিনু, বক্তবর্ণ লোহাব পাতে হাতুড়ি পিটাইতে পিটাইতে বিশু, আর অবাধ্য লোহার পাতকে মনোমতো আকৃতি দিবার চেষ্টা করিতে কবিতে বেন্দা যখন হাঁপাইয়া পড়ে, তখন বেন্দাই হযতো চোখ তুলিয়া তাকায় সেইদিকে, যেদিকে আরও বড়ো বড়ো কারখানাগুলি। প্রকাণ্ড একটা লাল দালানের লাগাও বিরাট একটি টিনের শেড আর তিনটি মোটা মোটা চোঙা পরিষ্কার দেখা যায়, অন্যগুলি একটু আড়ালে পড়িয়াছে। একী কাণ্ড, আঁা ? কত বিঘা জমি জুড়িয়া না জানি কারখানাগুলি গড়া হইয়াছে ? নিবিড় কালো কী ধোঁয়াটাই উঠিয়া যাইতেছে চোঙাগুলি দিয়া আকাশের দিকে। বেন্দা জানে, বিদ্যুতে যেমন কাচের ভিতরে অবিরাম শিখাহীন আলো জ্বলে, তেমনই অবিরাম কলও চলিতে পারে, সব কল ধোঁয়া ছাড়ে না। কিন্তু উর্ধ্বমুখী চোঙা দিয়া যে ধোঁয়া বাহির হয়, বেন্দার কাছে তাই কেবল কলকারখানার প্রতীক।

যশোদা যখন একসঙ্গে তিনটি বড়ো বড়ো কয়লার উনুনে আঁচ দেয় তখনও বড়ো কম ধোঁয়া হয় না। শীতকালে ধোঁয়াটা যেন যশোদার বাড়ি ছাড়িয়া নড়িতে চায় না, যশোদার বাড়ির ছোটো উঠানে, ইট আর টিনের ছোটোবড়ো কাঁচাপাকা ঘরগুলির মধ্যে স্থায়ীভাবে আটকাইয়া থাকিতে চেষ্টা করে। কিন্তু এখন, বৈশাখের প্রথমে, অনেক দূরের সমুদ্র হইতে ফুরফুরে বাতাস আসিয়া সকাল সন্ধ্যায় খনি-গন্ধি ধোঁয়া উড়াইয়া লইয়া যায়।

এ বাড়িতে অল্প জায়গায় যশোদা অনেকগুলি ঘর তুলিয়াছে, অনেকগুলি মানুষকে থাকিবার জায়গা দিতে হয়। আগে কেবল পাঁচটি ইটের ঘর ছিল, তখন উঠানটিও ছিল মস্ত বড়ো। পশ্চিম কোণে কল আর চৌবাচ্চার কাছে খানিকটা স্থান ছিল বাঁধানো, বাকিটা কাঁচা। তারপর দুটি টিনের ঘর তুলিবার ফলে উঠান তার এক রকম অদৃশ্য হইয়া গিয়াছে, আছে কেবল ওই বাঁধানো স্থানটুকু। কয়েক বছর কাটিয়া গিয়াছে কিন্তু এখনও উঠানের সংকীর্ণতা যশোদার অভ্যাস হইয়া যায় নাই, মাঝে মাঝে পীড়ন করে। দু হাতে জলভরা প্রকাণ্ড দুটি বালতি বুলাইয়া উঠানে দাঁড়াইয়া আকাশের দিকে মুখ করিয়া সশব্দে তাকে নিশ্বাস ফেলিতে দেখা গিয়াছে, ফাঁপব ফাঁপব লাগিলে মানুষ যেমন করে। বোঝা গিয়াছে, ফাঁপব ফাঁপব লাগাটা যশোদার মানসিক, বালতি দুটি ভারী বলিয়া নয়। এ রকম দু-চারটি জলভরা বালতির ভাবে কাবু হওয়ার মতো শরীর যে যশোদার নয়, দেখিলেই সেটা বোঝা যায়। সাধারণ বাঙালি ঘরের গোটা কয়েক পরম স্বাস্থ্যবতী যুবতিকে অনায়াসে গড়া চলিত এতখানি মালমশলা দিয়া ভগবান তাকে সৃষ্টি করিয়াছেন।

নিজের বা নিজের ভাইয়ের জন্য আজ এ বেলা যশোদার উনানে আঁচ দিবার দরকার ছিল না, পাড়ায় বউভাতের নিমন্ত্রণ আছে। কিন্তু আরও যে বিশ-বাইশজন লোক বাড়িতে আছে তাদের জন্য যশোদাকে রাঁধিতে হইল। এরা সকলেই ভাড়াটে এবং পোষ্য। কারণ অনেকে নিয়মমতো ভাড়াও দেয় না, ভরণপোষণের খরচও দেয় না—দিতে পারে না। এতগুলি লোককে উপবাসী বাখিয়া ভাইকে নিয়া কি নিমন্ত্রণ খাইতে যাওয়া চলে ?

সকাল সকাল যশোদা রান্না শেষ করিয়া ফেলিল। বড়ো গরম পড়িয়াছে আজ। রাঁধিবার সময় ঘামে যশোদার ভালোমতোই স্নান হইয়া গিয়াছিল, রান্না শেষ করিয়াই তবু একবার স্নান করিয়া নিল। শরীরের ঘাম না শুকাইয়া স্নান করিলে অসুখ হয়, এ সব যশোদা মানে না, অত তুচ্ছ কাৰণে অসুখ হইবে এমন শরীর যশোদার নয়। তাছাড়া, ঘাম ধুইয়া ফেলাব জনাই স্নান করা, ঘাম শরীরে বসিয়া গেলে আর স্নান করিয়া লাভ কী ?

তখন সন্ধ্যা পার হইয়া গিয়াছে। তাড়াতাড়ি রান্না শেষ করাব ব্যস্ততায় সময়মতো সন্ধ্যাদীপ জ্বালিয়া শাঁখে ফুঁ দেওয়া হয় নাই বলিয়া যশোদার মনটা খুঁতখুঁত করিতে থাকে। শাঁখ বাজাইয়া সামনে ভাইকে দেখিয়া বলে, হ্যারে নন্দ, কোথায় থাকিস সারাদিন ? বাবুটি সেজে ঘুরে বেড়ালেই তোর দিন কাটবে ?

নন্দকে দেখিলে যশোদার ভাই বলিয়াই মনে হয় না। বাইশ-তেইশ বছর বয়স, অপরিপুষ্ট শরীর, মুখে মেয়েদের মতো তেলতেলা ধরনের কোমলতা। পাশে না বাড়ুক উপরের দিকেও যদি ভালোরকম বাড়িয়া উঠিত তবু আশা করা চলিত, এককালে মোটােসোটা হইয়া যশোদার ভাই হিসাবে মোটামুটি মানানসই হইলেও হইতে পারে ছেলেটা। কিন্তু এ রকম একটা আশা পোষণ করার সুযোগও সে রাখে নাই। মতি নামে একজন ভাড়াটে আছে যশোদার, বয়স পঞ্চাশের কাছে গিয়াছে কিন্তু মানুষের সঙ্গে ভাব করিয়া তাদের সঙ্গে সে পেশাদার রসও পান করে রসিকতাও করে। একদিন নুতন বন্ধু সুধীরের কানে কানে সে বলিয়াছিল, ওই যে ওরা দুজন যশুদা আর নন্দ, এক মায়ের পেটের ভাইবোন না হয় হল, কিন্তু বাপ কী ওদের একটা রে দাদা !

সেই দিন যশোদা ও নন্দের তফাতটা ভালোভাবে খেয়াল করিয়া সুধীরের মনে সতাই খটকা লাগিয়াছিল যে, কথটা কী তবে সত্যি নাকি, কে জানে।

নন্দ একগাল হাসিয়া বলিল, বউ দেখতে গিয়েছিলাম দিদি। সুন্দব বউ হয়েছে—এইটুকু বাচ্চা !

সত্যি ?

যশোদা ভাবিতেছিল, যারা বাড়ি ফিবিয়াছে তাদের ভাত দিয়া বউ দেখিতে যাইবে কি না, নন্দের মুখে নতুন বউয়ের নৃপবর্ণনা শোনান পব আর ধৈর্য ধরা গেল না !—তোর ধনাদাকে ডাক তো নন্দ।

ধনঞ্জয় আসিলে যশোদার ঘরখানা যেন ভবাট হইয়া গেল। নন্দের বদলে যশোদার ভাই হইলে তাকেই মানাইত ভালো। মাস দুই আগে ধনঞ্জয় দেশ হইতে চাকরির খোঁজে আসিয়া যশোদার বাড়িতে ডেরা বাঁধিয়াছে। প্রথম দিন সাবান-কাস লালচে ধূতির উপর গৈয়ো ধোপার সাফ করা অতিরিক্ত নীল লাগানো শার্ট গায়ে দিয়া, বগলে ময়লা শতরঞ্চি মোড়া বিছানা আর রংচটা টিনের বাক্সো হাতে করিয়া সে যখন বাড়িতে ঢুকিয়াছিল, মনে হইয়াছিল একটা দৈত্য আসিয়াছে। বুড়ো মতি তাকে এখানে আনিয়াছে, মতির সে দেশের লোক।

সেই দিন সুধীরের কানে কানে মতি বলিয়াছিল, যশোদা একলাটি থাকে, ওর দুঃখু আর সময় না মাইরি, তাই ধনাকে নিয়ে এলাম। দুটিতে মানাবে ভালো, আঁ ? রসিকতা করিয়া মতি নিজে প্রাণপণে হাসে, সেদিনও হাসিয়াছিল। কিন্তু এমন একটা লাগসই রসিকতাও সুধীরের ভালো লাগে নাই দেখিয়া হাসিটা তার খামিয়া গিয়াছিল হঠাৎ।

যশোদা দুটি কাজের খোঁজ দিয়াছে, কিন্তু একটিও ধনঞ্জয়ের পছন্দ হয় নাই। লোকটার উপর যশোদা সেই জন্য বিশেষ খুশি ছিল না। গরিবের এত বাছবিচাব থাকিলে চলিবে কেন, পেটের ভাত যখন তাকে জোগাড় করিতেই হইবে ?

ধনঞ্জয় আসিলে যশোদা বলিল, একটা উপকাব করবে আমাব ? রেঁধে বেড়ে রেখে দিইছি, সুধীকে ডেকে দুজনায় মিলে সবাইকে পরিবেশনটা করবে ? এঁটো বাসন তুলবখন আমি এসে। তিনটে থালা কম পড়বে—তিনজনকে পাতায় দিয়ো, কেমন ?

ধনঞ্জয় রাগে আগুন হইয়া বলিল, সবাইকে ভাত বেড়ে দিতে বলছ আমায় ? আস্পর্ধা তো কম নয় তোমার ! মাইনে করা বামুন নাকি তোমার আমি ?

শুনিয়া যশোদাও বাগিয়া গেল।—ও বাবা, একটা কাজ করো বললে এ যে দেখি ফৌস করে ওঠে। এ কোন দেশি নবাব বাদশা রে বাবা ! যাও বাবু তুমি, যাও, বসে বসে বিড়ি টানো গে।

ধনঞ্জয় গটগট কবিয়া চলিয়া গেল। নন্দ বলিল, ও বাড়ি থেকে চাঁপার মা নয় কুমুদ মাসিকে ডেকে আনব দিদি ?

যশোদা বলিল, কেন ? ও বাড়ির মানুষকে আবার টানাটানি কী জন্যে ? এতগুনো মন্দ পুরুষ রয়েছে এ বাড়িতে, একটা বেলা কেউ ভাত বেড়ে দিতে পারবে না কটা মানুষকে ? গলায় দড়ি অমন 'মকস্মার ধাড়ীদের ! দূর করে তাড়িয়ে দেব সবকটাকে বাড়ি থেকে। মতি আর সুধীরকে ডাক দিকি।

মতি আর সুধীরকে বলামাত্র তারা রাজি হইয়া গেল। সুধীর একটু বেঁটে, ঘাড়ে গর্দানে জড়ানো শক্ত মজবুত শরীর, গুস্তার মতো দেখিতে। পরিবেশনের ভার পাইয়া অতিমাত্রায় খুশি হইয়া সে বলিল, একটু সেজেগুজে বউভাতে য়ো কিম্বু চাঁদের মা।

যশোদা বলিল, তামাশা রাখো তো বাবু তুমি। কচিখুকি নাকি যে সাজব গুজব ?

কচিখুকি না হোক, সাজগোজের সমস্যাটা একটু বিপদে ফেলিয়া দিল বইকী যশোদাকে। সাজগোজের ধার সত্যই যশোদা ধারে না, সে বয়সও নাই শখও নাই, বয়স থাকার সময়েও শখ ছিল কিনা সন্দেহ। তবু নিমন্ত্রণ বাড়িতে একখানা ভালো কাপড় তো অস্তুত পরিয়া যাইতে হইবে ? ভালো কাপড় কি ছাই আছে যশোদার ! বাক্সো খুলিয়া অনেক দিনের পুরানো খান তিনেক রঙিন শাড়ি

নাড়াচাড়া করিতে করিতে যশোদা যেন ফাঁপরে পড়িয়া গেল। কোনো বিষয়ে মনস্থির করিতে যশোদার সময় লাগে না, দ্বিধা করিতে হয় না, কোন শাড়িখানা পরিবে ঠিক করিতে গিয়া তার যেন আজ মাথা ঘুরিয়া গেল। সস্তা দামের শাড়ি, চাকচিকা নাই, তবু তো রঙিন ! রঙিন কাপড় পরা কি তার ঠিক হইবে ? কী রকম অদ্ভুত খাপছাড়া না জানি দেখাইবে তাকে ! এমনি তো যে চেহারা তার।

কোনটা পরি বল তো নন্দ ?

আমি কী জানি ?

বাক্সের তলায় একখানা ফিকে রঙের শাড়ি পাওয়া গেল। যশোদা যেন হাঁফ ছাড়িয়া বাঁচিল। একদিকের আঁচলের কাছে একটু ছেঁড়া আছে। তা হোক।

সত্যপ্রিয় মিলস এবং আরও কতকগুলি ব্যবসার মালিক সত্যপ্রিয় এদিকে শহরতলির একপাশে প্রকাশ্য বাগানবাড়িতে বাস করে। সত্যপ্রিয়ের প্রচার বিভাগের পরিচালক জ্যোতির্ময়ও এ পাড়াতে বাস করে, যশোদার বাড়ির কাছেই। সম্প্রতি জ্যোতির্ময় অপরাজিতা নামে একটি মেয়েকে হঠাৎ বিবাহ করিয়া বসিয়াছে। এই নতুন বউটিরই আজ বউভাত।

আপিসের অনেককে বলিতে হইয়াছে, বন্ধুবান্ধব আত্মীয়স্বজনকে বলিতে হইয়াছে। জ্যোতির্ময়ের বাড়িতে লোক গিজগিজ করিতেছিল। আয়োজন ভালোই হইয়াছে, চাকুরে জামাইকে টাকা মেয়ের বাপ ভালোরকমেই দিয়াছেন, সুতরাং আয়োজন খারাপ হওয়ার কথা নয়। বউ দেখিয়া যশোদা খুশি হইতে পারিল না। বউ বাচ্চাই বটে, পনেরোর বেশি বয়স হইবে না। বয়সের চেয়ে ঢের বেশি কচি দেখায়, কারণ শরীরে পুষ্টি হয় নাই। জ্যোতির্ময়ের বয়স ডবলেরও বেশি, এতটুকু মেয়ে কি তার সঙ্গে মানায় ?

নিজের ইচ্ছায় নয়, বাড়ির লোকের অনুরোধে নয়, জ্যোতির্ময় নাকি সত্যপ্রিয়কে খুশি কবিত্তে বিবাহ করিয়াছে। সত্যপ্রিয়ের একটা মত আছে, বিবাহ না করিলে দায়িত্বজ্ঞান জন্মায় না। দায়িত্বজ্ঞান জন্মায় নাই যার চাকুরির উন্নতি দূরে থাক চাকুরিটা বজায় রাখাই কি তার পক্ষে কঠিন নয় ? সুতরাং—

একদিন যশোদাকে জ্যোতির্ময় নিজেই এই ধরনের কথা বলিয়াছিল, মেয়ে খোঁজার সময়।

বিয়ের জন্য কর্তা বড়ো খোঁচাচ্ছেন চাঁদের মা। কেবলই বলছেন, এবার একটা বিবাহাদি করে ফেলুন জ্যোতির্ময়বাবু, বিবাহাদি না করলে কি দায়িত্বজ্ঞান জন্মায়, দায়িত্বজ্ঞান না জন্মালে কী—

যশোদা হাসিয়া বলিয়াছিল, তা বিয়ে করুন না, ভালো কথাই তো বলছেন উনি, খোঁটা ছাড়া কি পুরুষ মানুষের চলে ?

তুমিও ওই দলের চাঁদের মা ? কর্তার মতামত জান না কিনা, তাই বলছ। ওর মতে বিয়ে করতে হলে কী করতে হবে জান, একটি সাত বছরের খুকিকে বিয়ে করতে হবে।

শেষ পর্যন্ত তাই করিয়াছে নাকি জ্যোতির্ময় ? সত্যপ্রিয়কে খুশি করার জন্য একটি খুকিকে বউ করিয়া আনিয়াছে ? যশোদার বড়ো আপশোশ হয়। একটি বড়োসড়ো মেয়ে হইলে কেমন মানাইত জ্যোতির্ময়ের সঙ্গে ! মনিবকে খুশি করিতে কেউ যে ইচ্ছার বিরুদ্ধে বিবাহ করিতে পারে, তাও এমন বেমানান একটি মেয়েকে, যশোদা কল্পনাও করিতে পারে না। তবে হয়তো সত্যপ্রিয় নিছক মনিব নয় জ্যোতির্ময়ের। সে নাকি জ্যোতির্ময়কে খুব স্নেহ করে। সত্যপ্রিয়র মতো ধনী স্নেহের মূল্য জ্যোতির্ময়ের মতো মানুষেরা হয়তো এইভাবেই দেয়। এই সব লেখাপড়া শেখা ভ্রমলোকদের রকমই আলাদা।

জ্যোতির্ময়ের বোন সুবর্ণ জিজ্ঞাসা করে, কেমন বউ হয়েছে যশোদাদিদি ?

তা মন্দ কী।

সুবর্ণের বিবাহ হয় নাই, কিন্তু এমন সাজাটাই সে সাজিয়াছে যেন বিয়ের কনেটি, আজিকার উৎসবটি যেন তারই বিবাহের ভূমিকা—সাজগোজেই যেখানে যত বর আছে সকলকে আজ সে আয়ত্ত করিয়া রাখিবে। আনন্দে ও উত্তেজনায় মেয়েটা ফাটিয়া পড়িবার উপক্রম করিতেছিল, যশোদার জবাবে একটু দমিয়া গেল।

বউ বুঝি তোমাব পছন্দ হয়নি যশোদাদিদি ?

এত বড়ো মেয়ের ন্যাকামিতে যশোদার গা জুলিয়া যায়। সে বলিল, আমার পছন্দ অপছন্দ কী বোন, আমি তো বিয়ে করিনি ? তোমার দাদার পছন্দ হলেই হল।

দিদির পিছনে পিছনে আরও একবার বউ দেখিতে আসিয়া নন্দ হাঁ করিয়া সুবর্ণকে দেখিতেছিল, এবার সে যশোদাব কথার প্রতিবাদ করিয়া বলিল, কেন, বউ তো সুন্দর, আমার খুব পছন্দ হয়েছে।

যশোদা মুখ ঘুরাইয়া বলিল, ফোড়ন না কেটে তুই যা তো এখন থেকে নন্দ, এত বয়স হল তোর কথা বলতে শিখলি না এখনও ?

অন্যায় কথাটা কী বলিয়াছে বুঝিতে না পারিয়া নন্দ মুখভার করিয়া সরিয়া গেল।

বউকে দেওয়ার জন্য যশোদা একখানা সস্তা রঙিন শাড়ি আনিয়াছিল, শাড়িখানা বউয়ের হাতে দিতে একটা অদ্ভুত মুখভঙ্গি করিয়া সুবর্ণও সরিয়া গেল। কেবল সুবর্ণ নয়, আরও অনেকের মনে হইতে লাগিল, বউয়ের জন্য উপহার আনিয়া এবং এমন সস্তা একখানা শাড়ি বউয়ের একেবারে হাতে দিয়া, যশোদা সকলকে অপমান করিয়াছে।

একে দূয়ে আসিয়া সকলে বউ দ্যাখে। কেউ একখানা বই দেয়, কেউ সিঁদুরের কৌটা, কেউ কিছুই দেয় না। জ্যোতির্ময়ের দিদি আর বউদিদি মেয়েদের অভ্যর্থনা করেন, পুরুষদের অভ্যর্থনা করেন জ্যোতির্ময়ের কাকা এবং দাদা। জ্যোতির্ময় নিজে একটি মটকার পাঞ্জাবি পরিয়া এখানে ওখানে ঘুরিয়া বেড়ায়, সহকর্মী আর বন্ধুদের সঙ্গে একটু হাসি-তামাশা করে, কিন্তু ক্ষণে ক্ষণে সদরে গিয়া দাঁড়ায়, রাস্তায় চোখ পাতিয়া রাখে। বড়ো অনামনস্ক মনে হয় জ্যোতির্ময়কে, বড়ো চঞ্চল মনে হয়।

একজন বন্ধু জিজ্ঞাসা করে, সত্যপ্রিয় আসবে নাকি হে ?

জ্যোতির্ময় চমকাইয়া বলে, আঁ ? কে, কর্তা ? হ্যাঁ, আসবে না।

ঠিক অবহেলা নয়, স্পষ্ট বোঝা যায় সত্যপ্রিয়র আগমনের আশায় অথবা আশঙ্কায় জ্যোতির্ময় কারও দিকে ভালো করিয়া চাহিয়াও দেখিতে পারিতেছে না। আপিসের লোকেরা ব্যাপারটা বুঝিতে পাবে, অন্য সকলে বুঝিতে না পারিলেও খানিক খানিক অনুমান করিতে পারে।

তারপর সতাই সত্যপ্রিয় আসিল।

সত্যপ্রিয় এত বড়ো ধনী, যত না ধন তার আছে মানুষের কল্পনায় তার পরিমাণটা এত বেশি বাড়িয়া গিয়াছে যে, সাধারণ লোকের বাড়ি সামাজিক নিমন্ত্রণ রাখিতে গেলে, সকলে অতিমাত্রায় ব্যস্ত ও বিব্রত হইয়া পড়ে। এই জন্য এই সব বাড়িতে নিমন্ত্রণ রক্ষা করিবার একটি সুন্দর পদ্ধতি তার নিজেই ঠিক করিয়া লইতে হইয়াছে, সকলের আদর, অভ্যর্থনা ও ভদ্রতা করিবার ব্যাকুলতাকে লোকটা এমন কৌশলে নিজেই খানিক খানিক পরিচালনা করে বলিবার নয়। যেখানে প্রতিনিধি পাঠাইয়া কাজ সারা যায়, সেখানে অবশ্য সত্যপ্রিয় কখনও যায় না, সকলকে সামলাইয়া চলিবার হাঙ্গামাও পোহাইতে হয় না।

মস্ত মোটর আসিয়া থামে, সত্যপ্রিয় নামিয়া আসে—খালি হাতে। জ্যোতির্ময়ের বউয়ের মুখ দেখিবার জন্য উপহার একটা সে আনিয়াছে, কিন্তু এত বড়োলোক সত্যপ্রিয়, সে কি উপহার হাতে করিয়া নামিতে পারে ? উপহার হাতে থাকে ভূষণের, সে সত্যপ্রিয়র আত্মীয়, বন্ধু, চর বা অনুচর একটা কিছু হইবে। মঞ্চমলে মোড়া দামি সুদৃশ্য একটি বাক্সো, দেখিলেই বোঝা যায় ভিতরে দামি কিছু আছে।

সত্যপ্রিয় নামিবামাত্র কয়েকটি চাপা গলায় উচ্চারিত হয়, ওই যে উনি, ওই যে উনি—কর্তা এসে গেছেন। জ্যোতির্ময়ের কাকা আর জ্যোতির্ময় অভ্যর্থনা করিবার জন্য আগাইয়া যায়। আর হাসিমুখে অগ্রসর হইয়া, নিজের আগমনটা সহজ করিয়া দিবার জন্য, নিজে তিনি যে কতদূর নিরহঙ্কারী সরল সহজ মানুষ এটা প্রমাণ করার জন্য, সত্যপ্রিয় বলে, না, না, আপনারা ব্যস্ত হবেন না। আমারই তো অপরাধ হয়ে গেল, আমাদের জ্যোতির্ময়বাবুর বাড়ির কাজ, প্রথম থেকে এসে আমারই তো সব দেখাশোনা করা উচিত ছিল—বড়ো দেরি করে ফেললাম। তারপর জ্যোতির্ময়ের দিকে চাহিয়া, কেমন লাগছে জ্যোতির্ময়বাবু নববিবাহের স্বাদ ? মা-লক্ষ্মীকে দেখতে পাব তো ?

বেশিক্ষণ থাকা তো উচিত হবে না, তাই ধীরে ধীরে সত্যপ্রিয় উপরের দিকে অগ্রসর হইতে থাকে, কিন্তু সমস্তক্ষণ হাসিমুখে এদিকে ওদিকে চাহিয়া দ্যাখে, নিরুদ্বেগ শান্তভাবে এর সঙ্গে ওর সঙ্গে কথা বলে, যেন শাড়াহুড়া কিছুই নাই, সে বহুক্ষণ থাকিবে। পিছনে পিছনে উপহার হাতে চলিতে থাকে ভূষণ।

উপরে উঠিয়া নতুন বউয়ের সামনে দাঁড়াইয়া সানন্দ কণ্ঠে সত্যপ্রিয় বলে, বাঃ বাঃ, সুন্দর মুখশ্রী, চমৎকার লাভণ্য। বঁচে থাকো মা, সুখী হও। বলিয়া ভূষণবাবুর হাত হইতে মখমল মোড়া কেসটি লইয়া অপরাজিতার হাতে দেয়।

এবার প্রত্যাবর্তনের পালা, অথচ ব্যস্ততা দেখাইলে চলিবে না। সুতরাং দূরের একজন পরিচিত ব্যক্তির দিকে চাহিয়া সত্যপ্রিয় উচ্চকণ্ঠে বলে, আমাদের জ্যোতির্ময়বাবুর কেমন ঘরটান হয়েছে দেখেছেন যোগেনবাবু ? আর কি আমরা জ্যোতির্ময়বাবুর দেখা পাব ? ঘরের টানে চাকরি ছেড়ে আমাদের না ডুবিয়ে দেন !

পরিহাসের সুরে কথাগুলি বলিতে বলিতে সিঁড়ির দিকে আগাইয়া গিয়া তেমনই নিরুদ্বেগ, অচঞ্চল মস্তুর গতিতে অবতরণ।

কিছু খেতে হবে ? আপনি তো জানেন জ্যোতির্ময়বাবু, আমরা সেকলে বামুন, সন্ধ্যাহ্নিক না করে কিছু খাই না। যে ভিড় কাজের, কখন বা বাড়ি ফিরি কখন বা সন্ধ্যাহ্নিক করি। বেশ তো বেশ তো, সে জন্য কী, পাঠিয়ে দিন না বাড়িতে কী খাওয়াতে চান। সেকলে মানুষের খাওয়াও জানেন তো—যাই পাঠান, দু-চার মনের নীচে যেন না নামে, দেখবেন। হাসিতে হাসিতে সত্যপ্রিয় গাড়িতে উঠিল, গাড়ি ছাড়িয়া দিল।

সত্যপ্রিয়র নিমন্ত্রণ রক্ষার এই পদ্ধতির সঙ্গে জ্যোতির্ময়ের পরিচয় আছে, আরও দু-একটি বাড়িতে প্রায় এই রকমভাবেই সত্যপ্রিয়কে সে নিমন্ত্রণ রাখিতে দেখিয়াছে। কিন্তু একটা ব্যাপার সে আগে দ্যাখে নাই, সত্যপ্রিয়র এত দামি উপহার দেওয়া, কর্মচারীর বউকে। একটু পরেই তার কানে আসিল, সত্যপ্রিয় একটি নেকলেস দিয়া বউ দেখিয়াছে। চোখ ঝলসানো নেকলেস, হাজার দেড়েকের বেশিই দাম হইবে। বিস্ময়ে, আনন্দে অভিভূত হইয়া জ্যোতির্ময় নিজের চোখে দেখিতে গেল। দেখিয়া আরও বেশি অভিভূত হইয়া গেল। এ কী আশ্চর্য ব্যাপার !

সুবর্ণ আবার প্রায় আশ্বহারা হইয়া বলিল, দেখেছ যশোদা দিদি, দেখেছ ?

যশোদা সংক্ষেপে বলিল, দেখেছি।

সোজাসুজি চেনা না থাক, সত্যপ্রিয়র পরিচয় যশোদা কিছু কিছু জানে। এত দামি জিনিসের দাম না তুলিয়া কি সত্যপ্রিয় ছাড়িবে ? হয়তো ইতিমধ্যেই কিছু দাম তুলিয়া নিয়াছে। যে খাটুনিটাই জ্যোতির্ময় খাটে, মানুষ হইয়া গাধার মতো।

সকাল সকাল খাইয়া যশোদা বাড়ি ফিরিবে ভাবিয়াছিল, কিন্তু সেটা সম্ভব হইল না। মেয়েদের খাইতে বসানোর সময় এমনই বিশৃঙ্খল দেখা গেল চারিদিকে যে কখন মেয়েদের দেখিয়া শুনিয়া খাওয়ানোর ভারটা যশোদার ঘাড়ে আসিয়া চাপিয়া গেল সে নিজেই টের পাইল না, যশোদাকে

দেখিয়া মেয়েদের মধ্যে ফিসফাস গুজগাজের অন্ত ছিল না, মাঝে মাঝে হাসাহাসিও চলিতে লাগিল, কোন ফাঁকে কোথা হইতে একটা ফাজিল মেয়ে ডাকিয়াও বসিল, ওগো হিড়িষা, এদিকে একটু চাটনি।

এ সব যশোদা গায়ে মাখে না, অভ্যাস আছে। যেদিক হইতে ডাক আসিয়াছিল, সেদিকে মুখ ফিরাইয়া হাসিমুখে সে বলিল, খুকি-পুতুল কে চাটনি চাইলে গা ? পাপড় নেবে ?

অনেক রাত্রে নিজের অন্ধকার ঘুমন্ত পুরীতে ফিরিয়া যশোদার কিন্তু কেমন একটু অস্বস্তি বোধ হইতে লাগিল। হিড়িষা ? হিড়িষাব মতো দেখায় নাকি তাকে ? আলো জ্বালিয়া যশোদা আয়নায় নিজের মুখখানা একবার দেখিল, কিন্তু এতটুকু আয়নায় শুধু নিজের মুখ দেখিয়া কি বোঝা যায় তাকে হিড়িষার মতো দেখায় কিনা ! আয়নাটি দেয়ালে লটকাইয়া দিয়া বাহিরে আসিয়া যশোদা এঁটো খালা আর পাতা গুনিয়া দেখিল। একজন খায় নাই। ধনঞ্জয় নাকি ?

ভাবিতে ভাবিতে ধনঞ্জয় কোথা হইতে সামনে আসিয়া দাঁড়ায়। বলে, শোনো বলি, চাঁদের মা, কাল ভোরে আমি দেশে ফিরে যাব।

বটে নাকি ? তা বেশ তো।

কত পাবে বলো দিকি, পাওনাটা মিটিয়ে দিই তোমার।

পাওনা মিটিয়ে দেবার জন্যে না খেয়ে রাত দুটো পর্যন্ত জেগে বসে রয়েছে ? মাথা খারাপ নাকি তোমার ?

ধনঞ্জয় একটু দমিয়া যায়, এদিক ওদিক চাহিয়া বলে, ভোর ভোর রওনা দেব কিনা, তুমি আবার এক রাত জাগলে উঠতে তোমার বেলা হবে কিনা, এই জন্যে।

আমার চেয়ে ভোরে উঠবে তুমি ? কখন উঠে উনুনে আঁচ দিই টের পেয়েছ একদিন ?

ধনঞ্জয় আবও দমিয়া গিয়া বলে, রাত জাগলে কিনা—

এক রাত জাগলে আমরা কাজে ঢিল দিই না, তোমাদের মতো নবাব বাদশা তো নই আমরা ? তা ভাত খেলে না কী জন্যে ? পরিবেশন করতে বলেছিলাম বলে অপমান হয়েছে বুঝি ?

ধনঞ্জয় চূপ কবিয়া থাকে, যশোদা কড়াদৃষ্টিতে তাব বিরাট দেহটা দেখিতে দেখিতে অবজ্ঞা মেশানো কড়া গলায় বলে, রোজগার করতে এসে লেজ গুটিয়ে দেশে পালাচ্ছ, ধিক তোমাকে। এত বড়ো দেহটা রেখেছ কী জন্যে, কাজের নামে যদি শিউরে ওঠে, দুটো পয়সা যদি না উপায় করতে পার ? রোগা প্যাটকা এইটুকু টুকু বাচ্চাগুনো পর্যন্ত চানাচুর খাওয়ার কাগজ বেচে পয়সা কামাচ্ছে শহরে, তুমি পারলে না ?

এবার ধনঞ্জয় রাগ করিয়া বলিল, তোমার অত মূর্খবিশ্বাসনা কী জন্যে শূনি ? মানুষকে মানি করে কথা কইতে না পার, চূপ মেরে থাকো।

যশোদাও রাগ করিয়া বলিল, কাজের মুরোদ নেই, তেজ তো আছে দেখি ষোলোআনা ? যেয়ো তুমি কাল সকালে দেশে ফিরে, আমাব কী !

পরদিন সকালে ধনঞ্জয় দেশে চলিয়া গেল।

কেবল যশোদার উপর রাগ করিয়া নয়, শহর আব শহরতলি তার সহ্য হইতেছিল না। আরও বেশি সহ্য হইতেছিল না চাকরির জন্য চেষ্টা করিতে গেলে যা সব সহ্য করিতে হয়।

দুই

যশোদার বাড়িটি যেখানে, তারই কাছাকাছি শেষ হওয়া উচিত ছিল শহরতলির। কিন্তু শহরতলি যেন নিজেকে ডিঙাইয়া কোথায় চলিয়া গিয়াছে। শহর যেন নিজেকে ছড়াইয়া দিয়াছে দূরে, বহু দূরে— শহরের দিকে পিছন করিয়া চলিতে আরম্ভ করিলে ক্রমে ক্রমে পথের, পথের দুপাশের বাড়িঘর

মাঠ-পুকুর ঝোপঝাড়ের, পথচারী মানুষের মুখের ভাব ও আলাপের শহুরে ভাবটা কমিয়া আসিতে থাকে বটে, কিন্তু একেবারে লুপ্ত যেন হয় না। ধনঞ্জয় একদিন প্রায় দশ-বারোমাইল হাঁটিয়া গিয়াছিল ঝোঁকের মাথায়, যশোদার সঙ্গে ঝগড়া করিবার পরেই যে ঝোঁকটা আসিয়াছিল ; চলিতে চলিতে তার মনে হইয়াছিল, শহরের শেষ চিহ্নটুকু পিছনে ফেলিয়া যাইতে হইলে তিনশো মাইল তফাতে তার গ্রামের নদীটি পর্যন্ত তাকে হাঁটিতে হইবে, তারপর সাঁতার দিয়া পার হইতে হইবে নদী, নদী যাতে তার দেহলগ্ন শেষ শহুরে ধূলিকণাটি ধুইয়া মুছিয়া লইতে পারে। যশোদার সঙ্গে কলহের পরেই শহরের উপর ধনঞ্জয়ের বিতৃষ্ণা বাড়িয়া যাইত। একটু বসিয়া থাকিতে দেখিলেই যশোদা যে তাকে খোঁচায় এটাও ধনঞ্জয় শহুরে অমানুষিকতার পর্যায়ে ফেলিয়াছিল। যশোদা যে তার চাকরি জুটাইয়া দিবার জন্য চেষ্টা করিয়াছিল, দুটি কাজ জোগাড়ও করিয়া দিয়াছিল, এ জন্য ধনঞ্জয় কিছুমাত্র কৃতজ্ঞতা বোধ করে নাই। যাদের দেওয়ার ক্ষমতা আছে, তাদের কাছ হইতে যশোদার ভাড়া আর খাওয়ার খরচ আদায় করিবার কড়াকড়িতেও সে স্তম্ভিত হইয়া যাইত। যাদের কাজ গিয়াছে, কাজের খোঁজে আসিয়া যারা কাজ পাইতেছে না, তাদের যে যশোদা বিনা পয়সায় থাকিতেও দেয়, বাইতে পরিতেও দেয়, এতটুকু অবহেলা দেখায় না, চেষ্টা করিয়া কাজও জুটাইয়া দেয়, এদিকটা সে সময় ধনঞ্জয়ের খোয়ালও হইত না, তার শুধু মনে হইত, শহুরে মেয়েমানুষ কী ভয়ানক ! তবু যশোদার সঙ্গে কলহ করিলে মনটা বড়ো খারাপ হইয়া যাইত ধনঞ্জয়ের ; যশোদার সঁাতসঁতে বাড়ির মধ্যে থাকিতেও তার দম আটকাইয়া আসিত, বাড়ির বাহিরে শহরতলির আবেষ্টনীতেও ফাঁপর ফাঁপর লাগিত।

জ্যোতির্ময়েরও মাঝে মাঝে এ রকম হয়, কারও সঙ্গে কলহ না করিলেও। শহরের চেয়েও এখানকার শহরতলির জীবনের গতি তার যেন মনে হয় অনেক বেশি উর্ধ্বশ্বাসী। কাছাকাছি অনেকগুলি কলকারখানা থাকার জন্য নয় কেবল, কাছাকাছি অনেকগুলি কলের চাকা ঘুরিতেছে বলিয়াই মানুষ জীবনের গতি বাড়ায় না, কলের চাকার গতিবেগ হাজার মাইল দূরে মানুষের জীবনেও সঞ্চারিত হইতে জানে। দুপুরবেলা বড়ো রাস্তায় গাড়িগুলি যেভাবে পরস্পরের গতিবেগ সংঘত করে, থামিয়া থামিয়া যেভাবে অগ্রসর হয় স্তম্ভগতিতে, তাতে বরং মনে হওয়ার কথা জীবনের গতি এখানে কলকারখানার কল্যাণেই বৃদ্ধি মছুর। কিন্তু জীবনের গতি তো চলাফেরা ছুটাছুটি নয়, বিমানে যে বৌ করিয়া পৃথিবীটা পাক দিয়া আসিল জীবন হয়তো তার অলস ও শান্ত, ছোটো একটি ডিঙি ভাসাইয়া গা এলহিয়া পৃথিবীটা পাক দিতে জীবনের বেশির ভাগ ব্যয় হইয়া গেলেও হয়তো তার কিছু আসিয়া যায় না। শহরের চেয়ে শহরতলির মানুষের জীবনীশক্তি বেশি, কাম, ক্রোধ, লোভ, মোহ, মদ, মাৎসর্যের উগ্রতা বেশি, অভাবও বেশি। বাস্তব অভাব, পার্থিব অভাব, রক্তমাংসের মানুষের জীবনকে যে অভাব করিয়া দেয় একেবারে অভিশপ্ত। অভাবের তাড়নায় শহরের চেয়ে শহরতলির সমবেত জীবনীশক্তি অনেক বেশি তাড়াতাড়ি নিজেকে ক্ষয় করিয়া ফেলে। নূতন জীবন সে ক্ষয়ের পূরণ করিয়া চলে ক্রমাগত, সে নূতন জীবন এখানে যত-না সৃষ্টি হয় তার চেয়ে ঢের বেশি পরিমাণে আসে বাহির হইতে, নিকট ও দূর হইতে।

ধনঞ্জয় চলিয়া যাওয়ার পর আরও দুজন বৈশাখ মাসের মধ্যে চলিয়া গেল যশোদার বাড়ি হইতে ; একজন দেশে আর একজন স্বর্গে অথবা নরকে মৃত্যুর যদি অন্য কোনো দেশ থাকে সেইখানে। সত্যপ্রিয় মিল এবং আরও কয়েকটা মিলে বড়ো রকমের একটা ধর্মঘটের উপক্রম হইয়া থামিয়া গেল। পাড়ায় ছেলোদের ‘মডার্ন ক্লাব ও লাইব্রেরি’র প্রতিষ্ঠা দিবসের উৎসব হইয়া গেল, সত্যপ্রিয় আসিয়া একটি স্বলিখিত প্রবন্ধ পাঠ করিল। আমাদের দেশের আগেকার অবস্থার সঙ্গে বর্তমান অবস্থার তুলনা করিয়া কত যে তাতে হা-হুতাশ আর বার তিনেক ইংরাজের সঙ্গে ঝগড়া না করিয়া দেশের প্রকৃত উন্নতির চেষ্টা করিবার প্রয়োজনীয়তার উল্লেখ। ‘মডার্ন ক্লাব ও লাইব্রেরি’র পক্ষে

প্রবন্ধটি একটু খাপছাড়া হইল বটে, কিন্তু পাঁচশত টাকা দান করিয়া যিনি প্রেসিডেন্ট নির্বাচিত হইয়াছেন, তাকে নিজের ইচ্ছামতো প্রবন্ধ পাঠ করিতে না দিলে তো চলে না। তাছাড়া মতামত যেমনই হোক, আগাগোড়া দেশের জন্য কী গভীর মমতা প্রবন্ধটিতে প্রকাশ পাইয়াছে ? দেশের দুরবস্থার, বিশেষত যুবকগণের বেকার সমস্যার যে শোচনীয় বর্ণনা আছে, শুনিতে শুনিতে কী গভীর হতাশায় মন ভরিয়া যায় ? কেমন একটা প্রেরণা জাগে মনের মধ্যে যে অন্য চিন্তা চুলোয় পাঠাইয়া হাসিমুখে আদর্শের জন্য প্রাণ বিসর্জন দেওয়ার মতো বাজে গোঁয়ারতুমি ভুলিয়া গিয়া, বড়ো কিছু করা আর বড়ো কিছু হওয়ার মরীচিকাকে প্রশ্রয় না দিয়া, ভবিষ্যতে যাতে কোনোরকমে খাইয়া পরিয়া সুখে থাকা যায় প্রথম বয়স হইতেই প্রাণপণে সেই চেষ্টা কবা কর্তব্য ?

নন্দ উৎসবে গিয়াছিল, বাড়ি ফিরিয়াই বলিল, একটা চাকরি না হলে আর চলবে না দিদি।

রাত তখন দশটা বাজিয়াছে। যশোদা বলিল, তুমি যদি চাকরি করবে তো কেমন গেয়ে দিন কাটাবে কে ? কাল সকালতক সুবুদ্ধি টিকবে না, টেকে তো কাল সকালে চাকরির ভাবনা ভাবিস। এখন খেয়ে নিয়ে আমায় ছুটি দে তো, গরমে সিদ্ধ হলাম।

ভাইকে ভাত বাড়িয়া দিয়া বলিল, মতি, বড়ো আর সুধীর এখনও ফেরেনি। জ্বালিয়ে খেলো দুটোতে আমাকে—চাকরানি পেয়েছে আমায়। কাল যদি না তাড়াই দুটোকে—

আজ গুমোট দিয়া এমন গবম পড়িয়াছে যে, রাত্রে ঘরের মধ্যে যশোদার ঘুম আসিল না। ঘণ্টাখানেক এপাশ ওপাশ করিয়া আর প্রাণপণে হাতপাখা চালাইয়া সে উঠিয়া গেল ছাতে, ভাবিল বাকি রাতটা ছাতেই মাদুর পাতিয়া শুইয়া থাকিবে। ছাতে গিয়া দ্যাখে কী, তিল ধারণের স্থান নাই। দশ-বারোজন মানুষ এলোমেলোভাবে মাদুর আর ছেঁড়া শতরঞ্চি বিছাইয়া সমস্ত ছাতটি দখল করিয়া আছে, কেউ ঘুমাইয়া পড়িয়াছে, কেউ বসিয়া বসিয়া টানিতেছে বিড়ি।

দু-চারজন মানুষ হইলে যশোদা হয়তো গ্রাহ্য করিত না, একপাশে মাদুর বিছাইয়া শুইয়া পড়িত। কিন্তু এতগুলি পুরুষের সঙ্গে ঘেঁষাঘেঁষি করিয়া মেয়েমানুষ কি ঘুমাইতে পারে ?

মতি আব সুধীর খানিক আগে ফিরিয়া আসিয়াছে, ঘরের ভিতর হইতেই যশোদা সেটা টের পাইয়াছিল। কিছু না বিছাইয়াই দুজনে একপাশে শুইয়া পড়িয়াছে, বোধ হয় যশোদাকে ছাতে আসিতে দেখিয়া। দুজনে নেশা করিয়া আসিয়াছে সন্দেহ নাই, কিন্তু রাত বারোটা বাজিতে না বাজিতে ফিরিয়া আসিয়াছে কেন ? কী কাণ্ড করিয়া আসিয়াছে দুজনে কে জানে ?

আলিসায় বসিয়া একজন বিড়ি টানিতেছিল, বলিল, বড়ো গরম, না চাঁদের মা ?

যশোদা ঠাहर করিয়া দেখিল, তার অন্য বাড়ির ভাড়াটে জগৎ। একটু আশ্চর্য হইয়া বলিল, তুমি এ বাড়িতে ঢুকলে কখন ?

জগৎ বলিল, মতি আর সুধীর দরজা খোলার জন্যে ডাকছিল, শুনতে পেয়ে বেরিয়ে এলাম ঘর থেকে। ভাবলাম কী, তোমার এ বাড়ির ছাতে যদি একটুকু হাওয়া পাই, তা শালার হাওয়া কই। ই কী গুমটো গরম গো চাঁদের মা, অ্যা ?

যশোদা কাছে আগাইয়া গেল, গবম তো বটে, কিন্তু তোমার কি চোখে ঘুম নেই, রাতদুপুরে বসে বসে বিড়ি টানছ ? সকাল সকাল যেতে হবে না কাজে ?

ঘুম না এলে করব কী বলো ? ঘরে গরমে সিদ্ধ করে দিল, ছাতে এলাম, তা এখানে যেমনই গরম তেমনই মশা।—বিড়িটা ছুঁড়িয়া ফেলিয়া কাঁধের কাছে সশব্দে চড় মারিয়া জগৎ মশা মারে ; গরমটা যশোদা নিজেও অনুভব করিতেছে, মশার উৎপাতও যে কম নয় তারও তো একটা প্রমাণ দেওয়া চাই ! আলিসায় ভর দিয়া যশোদা কিন্তু ভাবে যে, কে জানে গরম আর মশাই তোমায়া জাগিয়ে রেখেছে না কান্নুর কথা ভেবে তোমার চোখে ঘুম নেই !

দেশে মশা নেই তোমাদের ?

আছে না ? মানুষ টেনে নিয়ে যেতে পারে এমন মশা।

আমায় টেনে নিতে পারবে না, কী বল ? তেমন গতর আমার নয়। বলিয়া আলিসায় ঠেসান দিয়া যশোদা একটু হাসিল। মাঝে মাঝে সম্পূর্ণ অকারণে নিজের দেহের বিপুলতার কথাটা যশোদার মনে পড়িয়া যায়। ক্ষীণ চাঁদের আলোয় ঘুমন্ত মানুষগুলিকে আবছা দেখা যাইতেছিল। সকলেই ঘুমের মধ্যে অল্প-বিস্তর নড়িতেছিল, কেবল মতি আর সুধীর মটকা মারিয়া থাকায় দুজনে হইয়াছিল কাঠের মূর্তির মতো স্থির।

গতর বড়ো হলে গরমটা বেশি লাগে, না জগৎ ? সবাই ঘুমুচ্ছে দ্যাখো, আমার গরমে প্রাণটা বেরিয়ে গেল।

গতরের জন্যে নয়, গরমটা সতি যেন কেমন খারাপ হেথা, গায় সয় না। দেশের গরম এমন নয়।

যশোদা তা জানে। যারা অল্পকাল শহরে আসিয়াছে দেশ ছাড়িয়া, দেশের গরমটা পর্যন্ত তাদের ভালো লাগে। তা না হইলে ধনঞ্জয় অমনভাবে দেশে পলাইয়া যায় ?

আচ্ছা, একটা কথা তোমায় শুধেই জগৎ, ঠিক মতো জবাব দিয়ো, মন রাখা কথা বোলো না, অ্যাঁ, আমি খুব মোটা, না ?

মোটা ? উঁহুঁ, মোটা তো তুমি নও চাঁদের মা ? একটু বাড়ন্ত গড়ন তোমার, বাস ?

শুনিয়া খুশি হইয়া জগৎকে শুইয়া পড়িতে বলিয়া যশোদা নীচে নামিয়া গেল। ঘরের মধ্যে প্রাণপণে পাখা নাড়িতে নাড়িতে এক সময় ঘুমাইয়াও পড়িল।

সকালে কলতলার কাজ সারিয়া রামাঘরে জলের বালতি দুটি নামাইয়া রাখিয়া যশোদা আবার ছাতে গেল। প্রায় সাতটা বাজে, জ্যোতির্ময়ের দোতলা বাড়ির পাশ কাটাইয়া যশোদাব ছাতের অর্ধেকটাতে রোদ আসিয়া পড়িয়াছে। রোদের মধ্যেই এখনও পড়িয়া ঘুমাইতেছে তিনজন— জগৎ, মতি আর সুধীর। জগৎ মন কেমন করায় রাত জাগিয়াছিল, অন্য দুজন কপিয়াছিল নেশা। দরদ অথবা মদ, যে নেশার ফলেই হোক মানসিক কোমলতা আনিবার কী সুন্দর আরামজনক পরিণাম ! যশোদা প্রথমে মতি আর সুধীরকে ঝাঁকানি দিয়া তুলিয়া দিল, তাবপব ডাকিয়া তুলিল জগৎকে।

মতি আর সুধীর হাই তুলিয়া গা-হাত মোড়া দিয়া বিড়ি ধরাইয়া একটু আবাম কবিতো যাইতেছিল, যশোদা বলিল, তোমরা দুজনে ভাত পাবে না এ বেলো। চানটি করে নিয়েই দৌড়ে কাজে চলে যাও। ছুটতে ছুটতে গেলে ঠিক সময়ে পৌঁছতে পারবে।

দুজনেই বিড়ি কোমরে গুঁজিয়া উঠিয়া পড়িল। মতি একটু ইতস্তত করিয়া বলিল, ভাত হয়নি যশোদা ? খিদেয় নাড়িতে পাক দিচ্ছে।

যশোদা ছাতে ছড়ানো মাদুর ও চাটাইগুলি একটি একটি করিয়া গুটাইয়া তুলিতেছিল। সোজা হইয়া দাঁড়াইয়া একগাল হাসিয়া জিজ্ঞাসা করিল, যশোদা কে গো মতিবাবু মশায় জিজ্ঞেস করি তোমাকে ?

মতির চুল প্রায় সাদা হইয়া আসিয়াছে, কুলিমজুরও তাকে ঠিক বলা যায় না, কারণ সত্যপ্রিয় মিলে গাঁটের উপর আলকাতরা দিয়া সংকেত, অক্ষর ও সংখ্যা আঁকিয়া দেওয়া তার কাজ। সে নাম ধরিয়া ডাকিলে যশোর রাগ করা উচিত নয়, সব সময় রাগ সে করেও না। কিন্তু যশোদার মেজাজ বোঝা ভার। হাসি ও প্রশ্নে মতি কাবু হইয়া পড়ায় যশোদা নিজেই আবার বলিল, আমাকে ডাকছ নাকি যশোদা বলে ? কাল একপেট গিলে সাহস বেড়ে গিয়েছে নয় ? সবাই চাঁদের মা বলে, তুমি না হয় তাই বললে। একবার বলো তো কেমন গোনায় দেখি ?

মতি ভয়ে ভয়ে বলিল, ভাত হয়নি চাঁদের মা ?

যশোদা বলিল, ভাত হবে না কেন, তোমরা এ বেলা পারে না ভাত। চান করে মাথা ঠান্ডা করে নিয়ে ছুটে যাও দিকি কাজে, কাজে না গেলে একটি বেলাও ভাত জুটবে না মতি।

কাজ গেলে যে যশোদাই তাকে দুবেলা ভাত জোগাইবে যতদিন আবার কাজ না হয়, মতিও তা জানে যশোদাও জানে। তবে সেটা তর্কের বিষয় নয়, মতি ও সুধীর কথা না বলিয়া নীচে চলিয়া গেল। এখানে বাস করিলে মদ খাওয়া চলিবে না। এ ধরনের একটা নিয়ম যশোদা করিয়া রাখিয়াছে কিন্তু নিয়মটা ভাঙিলেই সে যে সব সময় শাস্তির ব্যবস্থা করে তা নয়। এদের জীবনের সঙ্গে যশোদার পরিচয় আছে, জীবনের যে স্তরে যে পারিপার্শ্বিক অবস্থার মধ্যে এরা বাস করে তাও তার অজানা নয়। কঠোর নিয়ম করিলে চলিবে কেন ? কে সে নিয়ম মানিয়া চলিবে ? কী দরকার সে নিয়ম মানিয়া চলিবার জীবন যাদের সব দিক দিয়া ফাঁকিতে ভরা ? কেবল একটা বিষয়ে সাধু হইলেই কি দিনগুলি ওদেব সুখে আর আরামে ভরিয়া উঠিবে ! অতিবিক্ত অবিশ্রাম খাটুনি, পেটভরা খাদ্য আব বিবাম ও আরামের অভাব, সমস্তই যাদের বিষের সমান, দু-এক চুমুক বাড়তি বিস পান করিলে, তাদের কী আসিয়া যায় ! কেবল বাড়াবাড়িটা রদ করিবার জন্য যশোদা মাঝে মাঝে রাগ দেখায়, শাস্তি দেয়, তবে শাস্তিটা হয় একটু খাপছাড়া ধরনের, যেন দূরন্ত ছেলেকে শাসন করিতেছে এমনি।

নীচে নামিয়া রান্নাঘরে ঢুকিয়া যশোদা ডাক দিল, নন্দ, একটু পরিবেশন করবি আয় দিকি দাদা।

নন্দ আসিলে ভাত বাড়িতে বাড়িতে যশোদা বলিল, কাল তো বলছিলি চাকবি নইলে চলবে না। স্নান যা না একবার জ্যোতিবাবুর আপিসে ?

কী হবে গিয়ে ? কাজ দেবার মতলব ওদের নেই।

যশোদা রাগ করিয়া বলিল, কাজ দেবার মতলব কার থাকে বে ছোঁড়া ? কাজ আদায় করে নিতে হয়। যা চেহারাটি করেছ নিজের, ভরসা করে কে তোমাকে কাজে লাগাতে চাইবে ? জ্যোতিবাবুকে বলছি গিয়ে আর একবার, দুপুর বেলা একবার যাস। পয়সা চেয়ে নিয়ে যাস ট্রামের।

নন্দ চূপ করিয়া দাঁড়াইয়া পাঁচটি থালায় যশোদার ভাত বাড়া দেখিতে লাগিল। দরজা দিয়া দেখা যায় খাইতে বসিয়াছে তিনজন, পাঁচ থালা ভাত বাড়িবার দরকার ? চাকরির সমস্যার চেয়ে এই সমস্যাটাই যেন নন্দকে পীড়ন করিতে লাগিল বেশি। শেষে থাকিতে না পারিয়া যশোদার ভুল সংশোধনের জন্য বলিল, পাঁচ থালা বাড়ছ যে ? তিনজন বসেছে মোটে—কেষ্ট যতীন আর বলাই।

য থালা বাড়ি তোর তাতে কী ? তিনজন বসেছে তো আর কেউ বসতে জানে না ? থালায় ভাজা, আলুসিদ্ধ আর চচ্চড়ি সাজাইয়া দিয়া যশোদা বাহির হইয়া গেল। রান্নাঘরেই যে কথা নন্দকে অনায়াসে বলা চলিত, উঠানে দাঁড়াইয়া সেই কথাগুলি পাড়াসুদ্ধ লোককে শুনাইবার মতো জোর গলায় বলিল, যার যা লাগে দিস রে নন্দ, আমি বাজারে গেলাম।—মতি আবার একটু কানে কম শোনে, ঘণ্টাখানেকের মতো যশোদা বাড়ি ছাড়িয়া গিয়াছে না জানিলে তাভাতাড়ি দুটি ভাত খাইয়া কাজে যাইবাব সাহস বুড়োর হইবে না।

বাজারে যশোদা যায় বটে, এ সময় কোনোদিন যায় না। এত সকালে বাজারও ভালো রকম বসে নাই, বাড়িতেও দুয়ে-চারে উনিশটি মানুষকে ভাত দিবার হাঙ্গামা। নন্দ একা কেন সামলাইতে পারিবে ? তবু যশোদা বাড়ির বাহির হইয়া গেল। পেট ভরিয়া দুটি ভাত-তরকারি খাইতে পাওয়া যাদের জীবনের চরম বিলাসিতা, পেট ভরিয়া কাজে গেলেও দিনটা অর্ধেক কাবার হইতে না হইতে যাদের পেটে আবার ক্ষুধার আগুন জ্বলিতে থাকিবে, নিজে ভাত বাড়িয়া তাদের খাওয়ানোর দায়িত্বটা যশোদা হঠাৎ যেন ভুলিয়া গিয়াছে !

যশোদার এ বাড়ির সদর দরজাটি সবু ও সঁাতসেঁতে গলিতে, দুপাশে টিন আর খোলার বাড়ি। আরও একটি বাড়ি আছে যশোদার, কতগুলি টিনের ঘরের সমষ্টি। গলিটি হাত তিনেক চওড়া, যশোদার বাড়ি দুটির মধ্যে ব্যবধানও হাত তিনেক, দুটি বাড়ির সদর দরজাও প্রায় মুখোমুখি।

ও বাড়িটাকে যশোদা চিড়িয়াখানা বলে, এই চিড়িয়াখানায় জীবগুলির বাস করিবার ব্যবস্থা প্রধানত স্ত্রী-পুরুষে জোড়ায় জোড়ায়। মাঝে মাঝে জোড় ভাঙিয়া যায়, যশোদার চেঁচাতেও আর জোড়া লাগে না, মাঝে মাঝে নতন জোড়া বাস করিতে আসে পুরানো জোড়া বিদায় নেয়। জোড় ভাঙিয়া হোক, এক সঙ্গে হোক, বিদায় যারা নেয় হয়তো পাড়াতেই কোনো বাড়িতে তাদের দেখা যায়, হয়তো কোনোদিন আর তাদের পাশাও মেলে না। শহরের চারিদিকেই শহরতলি, একদিকের শহরতলি হইতে আর একদিকের শহরতলিতে গেলেও দূরদেশে যাওয়ার মতোই মানুষ হারাইয়া যায়।

বাড়িটাতে ছেলেমেয়ে আছে এক গাদা—বাহির হইতেই নানা বয়সের ছেলেমেয়ের হইচই হুল্লাড় ও কান্না শুনিতে পাওয়া যায়। একখানা ঘর আর রান্নার জন্য আনাচেকানাচে একটু জায়গা, এই তো রাজ্য এক একটি ভাড়াটের, এত রাশি রাশি ছোটোবড়ো ছেলেমেয়ে কোথায় গুদামজাত করা থাকে ভাবিলে সত্যই বিস্ময় বোধ হয়।

আগে, দুটি বাড়িই যশোদা স্ত্রী-পুরুষ নির্বিচারে ভাড়া দিত, ভাড়াটেরা কী করে না করে সে বিষয়ে মাথা না ঘামাইয়া মাসে মাসে ভাড়াটা পাইলেই খুশি থাকিত। অভিজ্ঞতা জন্মিতে জন্মিতে ক্রমে ক্রমে যশোদার জ্ঞান হইয়াছে যে, সংসারে যত গন্ডগোলের গোড়া মেয়েমানুষ। জ্ঞান জন্মিবার পর এদিকের বাড়িটাকে ঘরোয়া মেস বা হোটেল বা ওই ধরনের একটা কিছুতে পরিণত করিয়া স্ত্রীলোকের প্রবেশ নিষেধ করিয়া দিয়াছে।

বলিয়াছে, না বাবু, সুখের চেয়ে আমার স্বস্তি ভালো।

কোনটা যে তার সুখ ছিল আর কোন স্বস্তিটা যে তার ভালো হইয়াছে, দু-বাড়ির আবহাওয়ার পার্থক্যই সেটা পরিষ্কার ঘোষণা করিয়া দেয়।

এ বাড়িতে দুখানা পাকা ঘর সে নিজের দখলে রাখিয়াছে। একটি ঘরে থাকে তার আসবাবপত্র, অন্য ঘরটিতে থাকে সে আর তার ভাই নন্দ। ঘর দুখানা একটু পিছনের দিকে, মাঝখানে সিঁড়ির নীচে একটা দরজা আছে সেটা বন্ধ রাখিলে বাড়ির সঙ্গে ঘর দুখানার আব যোগ থাকে না। আগে যশোদা দরজাটা নিয়মমতো বন্ধ করিত, আজকাল গ্রাহ্যও করে না। এর দুটি প্রধান কারণ আছে। প্রথমত তার গায়ে এত জোর যে এ বাড়িতে এমন একটিও পুরুষ নাই যে, তার হাতের একটা চড় খাইয়া দাঁড়াইয়া থাকিতে পারে, দ্বিতীয়ত নিজে সে যে স্ত্রীলোক এটা তার সব সময় খেয়ালও থাকে না।

শেষোক্ত কারণটা যশোদার শত্রুও স্বীকার করে। যশোদার সবচেয়ে বড়ো শত্রু তার ছেলেবেলার সখী কুমুদিনী, পাড়াতেই স্বামীপুত্র সংসার লইয়া সে বাস করে। যশোদাব কথা উঠিলেই তাকে বলিতে শোনা যায় : ওটা কি মেয়েমানুষ ? ও মেয়েমানুষের বাবা ! আরও অনেক কথা সে বলে, বলিতে বলিতে ক্রুদ্ধ ও উত্তেজিত হইয়া উঠে। তারই সংজ্ঞা অনুসারে যশোদা যে মেয়েমানুষ নয় মেয়েমানুষের বাবা, এ কথাটা ভুলিয়া গিয়া নাক সিঁটকাইয়া তীব্র আবেগের সঙ্গে সে আবার বলে, পুরুষের গাদি বাড়িতে, তার সবকটা হয় মাতাল নয় গুন্ডা, মেয়েমানুষ হয়ে কী করে যে ওদের মধ্যে থাকে, মাগো !

একটু খাপছাড়া জীবনযাপন করে বইকী যশোদা, একটু অনন্যসাধারণ হয় বইকী তার রীতিনীতি চালচলন, কিছু খুব বেশি বেমানান যেন তার পক্ষে হয় না। এ রকম অবস্থায় অন্য কোনো স্ত্রীলোক হয় পুরুষের আশ্রয় খুঁজিত, নয় মানুষের মতবাদ ও নির্দেশের চাপে ধ্বংস হইয়া যাইত, যশোদা কিছুই করে নাই। জীবনযাপন করে সে স্বাধীন, কারও কাছে তার কোনো প্রত্যাশা নাই, নিন্দা-প্রশংসা সে গ্রাহ্য করে না, কারও দরদের জন্য কাঁদিয়াও মরে না। বিপদে-আপদে তারই কাছে মানুষ উপকার পায়, পুরুষের কাছে যে কাজ পাওয়া কঠিন যশোদার কাছে তাই পাওয়া যায়। লম্বা-চওড়া শক্ত-সমর্থ শরীরটাতে তার নারীসুলভ লাবণ্য ও কোমলতার চিরদিন এমন অভাব যে, বয়স যখন আরও কম ছিল তখনও কোনো পুরুষের সঙ্গে তার বৈধ বা অবৈধ প্রেমের সম্পর্ক থাকিতে পারে এ কথাটা মনে আনিতেও লোকের কেমন সংকোচ বোধ হইত, মনে হইত, না, তা হয় না।

একটা গুজব শোনা যায়। দশ-বারোবছরের আগেকার কথা, যশোদা যখন সবে ভদ্র-অভদ্র নির্বিশেষে ঘরভাড়া দিতে আরম্ভ করিয়াছে। সত্যপ্রিয়র বাগানবাড়ীটা তখন নাকি কেবল ঝোপঝাড়ে ভরা বাগান ছিল, চারিদিকেব প্রাচীর ছিল ভাঙা। বাগানের মধ্যে গাছপালার আড়ালে একটা আখড়া ছিল কুস্তির এবং সেই আখড়ার ওস্তাদ ছিল কেদার নামে একটি মাঝবয়সি লোক। মাথা গিয়া ঠেকিত ঘরের ছাতে, দরজা দিয়া যাতায়াত করিতে হইত পাশ ফিরিয়া, বাস্তায় ষাঁড়কে সরাইয়া সে পথ চলিত। মানুষ যে অমন জেগয়ান হয় তাকে যারা চোখে না দেখিয়াছে তাদের কি তা বিশ্বাস হয় ? বৃককথার বাজপুত্রের মতো কোথা হইতে আসিয়া দু-একটা বছর ও পাড়ায় বাস কবিয়া, পাড়ার ছেলোদের কুস্তি শিখাইয়া, পদক্ষেপে দুপাশের বাড়ি কাঁপাইয়া পথ দিয়া হাঁটিয়া কে জানে আবার সে কোথায় চলিয়া গিয়াছে ! সে চলিয়া যাওয়ার পর বিশ্বসংসারে যশোদা নাকি আর পুরুষ দেখিতে পায় না, সকলে তার কাছে শিশু। আজও যশোদা তার সেই ভালোবাসার লোকটির পথ চাহিয়া আছে।

যশোদা শুনিয়া হাসে—তা নয় ? চেয়ে চেয়ে চোখ ভেবে গেল সত্যি। ইবারে যদি না চশমা লি—

অনেকেই মনে মনে বলে, মরণ তোমার বেহায়া । কিন্তু দু-চাবজন ভাবপ্রবণ যাবা আছে তারা মনে মনে বলে, আহা ! ব্যাকুল আগ্রহে তারা যশোদার মুখে একটু বেদনার ছাপ খোঁজে, চোখের দৃষ্টিতে একটু বাথার আভাস দেখিতে চায়। কিন্তু হায় রে যশোদার হাতিব দেখে হাতিব প্রাণ, এক মুহূর্তের জন্য যদি তার চোখেমুখে স্বপ্নময় ব্যথিত বেদনার ছাপ দেখা গেল !

বাঃ দুটিতে যশোদা যদি কেবল গরিব ভদ্রগৃহস্থদের ভাড়াটে বাথিত তবে কোনো কথা ছিল না। প্রথমে কিছুকাল ওই রকম ভাড়াটে যশোদা ঝঁজিত, মাল সরকার, ট্রামের কন্ডাক্টর, প্রেসের কম্পোজিটর এই শ্রেণির ভাড়াটের নীচে সে নামিত না। তারপব সমস্ত বাছবিচার তুলিয়া দিয়াছে। ভদ্রলোকেরা নাকি বড়ো বেশি ছোটোলোক, যারা পুবো ভদ্রলোকও নয় খাঁটি ছোটোলোকও নয়, তারা নাকি একটু অদ্ভুত অপদার্থ জীব। তাব চেয়ে কুলিমজুর ভালো। বাবুদের চক্ষুলজ্জাও আছে, কুলিমজুরের ভয়ডব আছে, কিন্তু না-বাবু না-কুলিমজুরদের চক্ষুলজ্জাও নাই, ভয়ডবও নাই। সাহসের অভাব হইলে যে ভয়ডব হয় সে ভয়ডরের কথা যশোদা বলিতেছে না, ও বকম ভয়ডব এ শ্রেণির লোকগুলিব পুরামাত্রাতেই আছে, সে হিসাবে ওবা সব কেঁচোব মতো অপদার্থ জীব, ওদের ভয়ডব নাই ধর্ম ও ঈশ্বর সম্বন্ধে, তিল তিল কবিয়া আত্মহত্যা কবা সম্বন্ধে আর ওদের উপর যাদের বাঁচিয়া থাকা নির্ভব করে তিল তিল করিয়া তাহাদেরও হত্যা করা সম্বন্ধে। কেমন যেন চালচলন ওদের, কেমন যেন ভালোমন্দ পাপপুণোর হিসাব, কোকেনগোবদের মতো। মা বোন যখন খাইতে পায় না, বউ যখন জুরে ধুকিতে ধুকিতে বায়া কবে, পথা না দিয়া ছেলেকে কেবল ওষুধ খাওয়াইতে হাসপাতালের ডাক্তার যখন বাবণ করিয়া দেন, তখনও সকলের কথা তুলিয়া গিয়া বাহিরে পুবুযমানুষের স্মৃতি কবিবার ব্যাপারটা যশোদা বুঝিতে পারে। কিন্তু তখন দৃশ্চিন্তায় মুখ পাংশু করিয়া কপাল চাপড়াইতে চাপড়াইতে অদৃষ্টকে গাল দিয়া চকচকে জুতাটি পরিয়া চুলে সিঁথি কাটিতে দেখিলে যশোদার রক্তে আগুন ধরিয়া যায়। সাজিতে পার, হাসিতে পার না লক্ষ্মীছাড়া ? গুনগুন করিয়া গান ধরিতে পার না আপনজনের রোগ দুঃখ দুর্দশাকে উপেক্ষা করিয়া ? তবে তো যশোদার কিছুই বলিবার থাকে না। সর্বাপে বাবুদের ৩: ১১সকে আমল দিয়া দোকানঘরের সাইনবোর্ডের মতো কেবল মুখে দুর্ভাবনার বিজ্ঞাপন লটকাইয়া আবার কোন দেশি দরদ দেখানো ?

বাজারে যশোদা গেল না, এ বাড়ির সদর দরজা দিয়া বাহির হইয়া ও বাড়িতে ঢুকিয়া পড়িল। ঢুকিয়াই মনে হইল যেন নূতন জগতে আসিয়া পড়িয়াছে। স্ত্রী-পুরুষ একসঙ্গে বাস করিলে আর

সৃষ্টিরক্ষায় মন দিলেই কি তাদের জগৎ এমনভাবে বদলাইয়া যায় ? এই সকালবেলাই ছেলেমেয়ের কলরবে আর স্ত্রী-পুরুষের কলহে বাড়িটা সরগরম হইয়া উঠিয়াছে। কলতলাতে মেয়েদের মধ্যেই ঝগড়া বেশি। পিছনের ছোটো পুকুরটি বুজাইয়া দিবার পর আজকাল উঠানে কলের জলের জন্য রীতিমতো মারামারি হয়। চার-পাঁচজন ছাই দিয়া প্রাণপণে বাসন মাজিতেছে, একজন কলসিতে জল ভরিতেছে, দুজন দাঁড়াইয়া আছে স্থান খালি হইবার প্রতীক্ষায়। আর একটা কল এ বাড়িতে করিয়া না দিলে চলিবে না। দরখাস্ত যশোদা অনেকদিন আগেই করিয়া রাখিয়াছে, কিন্তু কী যে হইয়াছে তার দরখাস্তের, আর কোনো পাত্রই মিলিতেছে না। তাগিদ দিতে গেলে প্রকাণ্ড আপিসের এ বলে ওর কাছে যাও, ও বলে তার কাছে যাও, ভালো করিয়া কথার জবাবটাও দিতে চায় না কেউ। একটা জলের কল বসাইবার অনুমতি চাহিয়া এত হাঙ্গামা সহিতে হয়, কে জানে শহরের জলের দেবতার। এমন উদাসীন কেন।

এ বাড়িতে ঢুকিলেই একটা ভাপসা ধোঁয়াটে দুর্গন্ধ যশোদার নাকে লাগে। একা মানুষ যশোদা কিন্তু একাই সে তার ও বাড়িটি পরিষ্কার পরিচ্ছন্ন করিয়া রাখে, এ বাড়িতে মেয়েমানুষ দুগ্ভার কম নয়, কিন্তু নোংরামি কিছুতেই ঘুচিতেই চায় না। উঠানের একপাশে একগাদা আবর্জনা জমিয়া আছে, রাস্তার একটা লোমওঠা কুকুর কোন ফাঁকে ভিতরে ঢুকিয়া আবর্জনা ঘাঁটিয়া খাবার খুঁজিতেছে, কারও সেদিকে নজর নাই।

ওদিকের ভিজা রোয়াকে চিত হইয়া পড়িয়া পরেশের সাত মাসের ছেলেটা হাত-পা ছুঁড়িয়া চৈচাইতেছে, তার দিকেও নজর দিবার কারও অবসর নাই। কাছেই তার মা পরেশের বাঁ পায়ের হাঁটুর নীচে মস্ত একটা ঘায়ে মলম লাগাইয়া ময়লা ন্যাকড়া জড়াইয়া দিতেছে। মাসখানেক শয্যাগত থাকিয়া পরেশ এখন খোঁড়াইয়া খোঁড়াইয়া হাঁটিতে পারে। মোটরের ধাক্কা লাগিয়া পড়িয়া গিয়া নাকি ঘা হইয়াছে। কথটা যশোদা বিশ্বাস করে নাই। বছর দুই আগে ঠিক এই রকম অকস্মাৎ একবারে পরেশের একটা হাতও ভাঙিয়াছিল, শহরের অপরদিকের শহরতলিতে প্রাচীর ডিঙাইয়া একটা বাড়িতে চুরির উদ্দেশ্যে ঢুকিবার জন্য কয়েক মাস জেলও হইয়াছিল। তারপর এতদিন যশোদার এখানে থাকিয়া নিয়মমতো কাজে গিয়া ভালোভাবেই সে দিন কাটাইতেছিল ; হঠাৎ আবার চুরি করার ঝোঁক চাপায় বোধ হয় এই দুর্দশা হইয়াছে। লোকটার সম্বন্ধে কী যে করিবে যশোদা ভাবিয়া পায় না। চোরকে বাড়িতে থাকিতে দেওয়া কি উচিত, আরও কতগুলি পরিবার যে বাড়িতে থাকে ? চুরি করিতে গিয়াই হাঁটুর নীচে ঘা হইয়াছে এটা নিশ্চিতভাবে না জানিয়া ছেলে-বউসুদ্ধ একটা লোককে তাড়াইয়া দেওয়াও কি উচিত ? বিশেষত এক মাস ঘরে বসিয়া থাকার জন্য লোকটার যখন চাকরি নাই ?

তোমার পা কেমন আছে পরেশ ?

সংকোচ ও অপরাধ ভরা হাসি হাসিয়া পরেশ বলিল, একটু ভালো চাঁদের মা। আর সাতটা দিন, তারপর—

নিজে তো ন্যাকড়াটা জড়িয়ে নিতে পার পায় ? হাত দুটো তো যায়নি তোমার ? ছেলেটা চৈচিয়ে মরল, কোলে নাও না খোকার মা ? কী যে তোমাদের কাণ্ডজ্ঞান বাছা বুঝিনে কিছু।

পরেশ তবু হাসে, আরও বেশি সংকোচ, আরও বেশি অপরাধভরা হাসি। মানুষের কাছে এই একটিমাত্র মুখভঙ্গি পরেশ করিতে জানে, তার বড়ো বড়ো টানা চোখ দুটির খাপছাড়া সৌন্দর্যের মতো এ মুখভঙ্গি অর্থহীন।

ওদিকের কোণের ঘরে নদেরচাঁদের বউ অনেকদিন জুরে ভুগিতেছে। তার খবরটা জানিবার জন্য যশোদা পা সবে বাড়াইয়াছে, কলতলায় এক কাণ্ড হইয়া গেল। জগতের বোন কালো একটু স্থান করিয়া বাসন মাজিতেছিল, কোথা হইতে নদেরচাঁদের মেয়ে চাঁপা আসিয়া তাকে ধাক্কা দিয়া সরাইয়া দিয়া নিজে সেখানে বসিয়া পড়িল।

আমি আগে বাসন রেখে গেছি।

কালো মুখ কালো করিয়া বলিল, ধাক্কা দিলে কেন ? মুখে বলতে পারতে না ?

কালোর স্বাস্থ্য ভালো, চাঁপার মতো সে রোগা নয়। কিন্তু শহরতলিতে সে আসিয়াছে অল্পদিন আগে দেশের গাঁ হইতে, এখনও শহরতলির শহুরে মেয়েদের সঙ্গে কলতলার যুদ্ধে আঁটিয়া উঠিতে পারে না। মুখভার করিয়া সে একপাশে দাঁড়াইয়া রহিল। বাসন মাজিতে আরম্ভ করিয়া চাঁপা মুখ ফিরাইয়া বলিল, রাগিস কেন ? কতখন লাগবে এ কটা বাসন মাজতে ?

ধাক্কাটা যে চাঁপা শুধু আগে বাসন মাজিবার সুযোগ পাওয়ার জন্য দেয় নাই, যশোদা তা জানে। একবার ভাবিল চাঁপাকে ধমক দেয়, তারপর ভাবিল, কী হইবে ধমক দিয়া ? শব্দ সমর্থ যে মেয়ে মুখ বৃজিয়া এমন ধাক্কাটা সহ্য করে, তার হইয়া কিছু করিতেও যশোদার ভালো লাগে না। কালোর উপর চাঁপার বড়ো দ্বেষ, কোনো দোষ নাই কালোর, তবু চাঁপা তাকে দেখিতে পারে না। প্রকারান্তরে দোষ আছে কালোর, চাঁপার সুখের পথে সে কাঁটা হইয়া আছে। চাঁপার মা ক্রমাগত জুরে ভোগে, চাঁপার বাবা নদেরচাঁদ নেশার ফাঁদে পড়িয়া অকালে বড়ো হইয়া পড়িয়াছে, বড়ো কষ্টে দিন কাটে চাঁপার। এতদিনে একটু সুখের সম্ভাবনা ঘটিয়াছে চাঁপার। জগৎকে সে কী করিয়া বাগ মানাইয়াছে সেই জানে, বোধ হয় সেও অল্পদিন শহরে আসিয়াছে বলিয়া শহুরে মেয়েটাকে আঁটিয়া উঠিতে পারে নাই। মাস ছয়েক আগে জগতের বউ মরিয়া গিয়াছিল, তার তিনমাস পরে সকলে জানিয়াছে, চাঁপার সঙ্গে জগতের বিবাহ হইবে।

এক কালে বিবাহটা হইয়া যাইত, ও ঘর হইতে জগতের এ ঘরে আসিয়া জগতের রোজগারে ভাগ বসাইয়া আরামে চাঁপা দিন কাটাইতে পারিত, পোড়ারমুখি কালোর জন্য সব আটকাইয়া আছে। কালোর বিবাহ না দিয়া জগৎ নিজে আবাব বিবাহ করিতে পারিতেছে না। একদিকে বাধা দিতেছে তার আধ-পাগলা মা, অন্যদিকে আটকাইতেছে টাকায়।

তোর মা কেমন আছে লো চাঁপা ? যশোদা জিজ্ঞাসা করিল।

জুর নেই গো যশোদাদিদি।

চাঁপার মার ঘরে উঁকি দিয়া যশোদা জগতের ঘরে গেল। ঘরের কোনায় ময়লা ছেঁড়া কাপড়ে নতুন বউটির মতো মস্ত ঘোমটা টানিয়া জগতের মা বসিয়াছিল আর আপনমনে বিড়বিড় করিয়া বকিতেছিল। বউ সাজিবাব পাগলামিটাই জগতের মাব কেনি পাব।

দবজার কাছে বসিয়া হুঁকা টানিতে টানিতে খোলা দব- দিয়া জগৎ চাহিয়াছিল কলতলার দিকে। যশোদাকে দেখিয়া দৃষ্টিও সরাইয়া নিল, একটু ভিতরের দিকে সরিয়াও বসিল। চাঁপাকেই দেখিতেছিল বোধ হয় এতক্ষণ। সকালবেলা কোথা হইতে একটা কলকে ফুল জোগাড় করিয়া খোঁপায় গাঁজায় জগতের চোখে চাঁপার বুপটা বোধ হয় আজ বাড়িয়া গিয়াছে।

জগৎ বলিল, কালোকে কেমন ধাক্কা দিয়ে সরিয়ে দিল, দেখলে চাদের মা ?

যশোদা বলিল, তুমি তো দেখেছ ? তাতেই হবে।

কালোর সঙ্গে মোটে বনিবনা নেই চাঁপার।

কার সঙ্গে বা আছে ? যা স্বভাব মেয়ের।

চাঁপার নিন্দায় ক্ষুব্ধ হইয়া জগৎ মুখভঙ্গ করিয়া থাকে আর তার মুখের দিকে চাহিয়া যশোদা মনে মনে বলে, ধিক তোমাকে। বোনটাকে অমন করে ঠেলে সরিয়ে দিলে, একটু কালের জন্যে না হয় একটু তুমি বিরাগ হতে চাঁপার ওপর ?

ফিরিয়া যাওয়ার সময় যশোদার চোখে পড়ে, তখনও কালো মুখভার করিয়া কলতলার একপাশে দাঁড়াইয়া আছে। এ রকম নীরব দুর্বল অভিমানও যশোদা দু-চোখে দেখিতে পারে না। কার উপর তুই মুখভার করিয়া আছিস ছুঁড়ি, কে তোর মুখভারের মর্যাদা রাখিবে ?

নিজের বাড়িতে যশোদা ঢুকিল না, মতি আর সুধীরকে ভাত খাওয়ার জন্য আরও একটু সময় দেওয়া দরকার। গলি ধরিয়া যশোদা আগাইয়া গেল। একটু গেলেই এ পাড়ার রাজপথ, দুটি গাড়ি পাশাপাশি চলিতে পারে এতখানি চওড়া, পিচচালা এবং বিদ্যুৎবাহী তারের থাম বসানো। গলির ভিতর হইতে এ রাস্তায় পা দিলেই যশোদার মনে হয়, ভিজা কাপড়ের মতো সর্বাঙ্গে ল্যাপটানো একটা অশুচি আবরণ খোলা আলো-বাতাসের স্পর্শে খসিয়া গেল। তবে আরাম যশোদার হয় না, খুশিও সে হইতে পারে না। এই রাস্তাটি তৈরি হইয়াছে বলিয়াই তো তাহার বাড়ি দুটি এমনভাবে আড়াল পড়িয়াছে, সংকীর্ণ গলির স্থানটুকু বাদ রাখিয়া দুপাশে এমন ঘিজ্জিভাবে টিন আর খোলার বাড়ি উঠিয়াছে। বছর দশেক আগে এখানে পথও ছিল না, গলিও ছিল না, দূরে যে রাস্তা দিয়া আজ ট্রাম আসিয়া ঘুরিয়া যায়, সেই রাস্তা পার হইয়া আসিলেই মানুষ ছড়ানো বাড়িগুলির আনাচকানাচ দিয়া, কলাবাগান ভেদ করিয়া পুকুরের পাড় ঘুরিয়া যেদিকে খুশি চলিতে পারিত। দশ বছরে শহরতলির শহুরে ভাবটা কী হু হু করিয়া না বাড়িয়া গিয়াছে।

জ্যোতির্ময়কে নন্দের চাকরির কথাটা মনে করাইয়া দিয়া যশোদা বাড়ি ফিরিবে ভাবিয়াছিল। জ্যোতির্ময়ের বাড়ির পাশ দিয়া যশোদার বাড়ির ছাতে রোদ আসিয়া পড়ে বটে, যাইতে হয় একটু ঘুরিয়া। যাওয়ার সময় চোখে পড়ে সত্যপ্রিয়র বিরাট বাড়ির বিরাটতর বাগানের পিছন দিকের খানিকটা প্রাচীর। এতবড়ো বাগানের ফুলফল আর কৃত্রিম নির্জনতার শোভা একটি পরিবারের কী কাজে লাগে কে জানে।

জ্যোতির্ময় রান্নাঘরের বারান্দায় খাইতে বসিয়াছিল। খানিক দূরে বসিয়া ভাইয়ের খাওয়া দেখিতেছে জ্যোতির্ময়ের দিদি, ঘরের মধ্যে গলা সাধিতেছে সুবর্ণ। পরিবেশন করিতেছে বামুন। বিবাহ উপলক্ষে যে সব আত্মীয়স্বজন আসিয়াছিলেন তাঁরা চলিয়া গিয়াছেন।

এসো চাঁদের মা।

জ্যোতির্ময়ের আহ্বানটি মিষ্টি। গোলগাল তামাটে রঙের মানুষ সে, মুখের চামড়া মসৃণ ও কোমল। দেখিলেই মনে হয় লোকটি বৃষ্টি তাদেবই একজন, যারা শাস্ত ও সহিষ্ণু, ভীৰু ও সাবধান, ভোঁতা ও হিসাবি। কিছুক্ষণ আলাপ করিলেই কিন্তু এ ধারণায় গোল বাধিয়া যায়। মনে হয়, মানুষটা সে চালাকচতুরও বটে, জ্ঞান ও অভিজ্ঞতা, তেজ, অহংকার আর একগুঁয়েমি যেন আছে। মনটা কোমল কিন্তু মায়ামমতা যেন বড়ো কম। এই বৈশিষ্ট্যগুলি সাময়িক প্রেরণার মতো জ্যোতির্ময়ের কথাবার্তা চালচলনের মধ্যে ভাসিয়া ভাসিয়া আসিয়া উঁকি দিয়া আবার কোথায় হারাইয়া যায়, ব্যাপারটা ঠিকমতো বুঝিয়া উঠিতে পারা যায় না, কেমন একটা অবিশ্বাস ও সন্দেহের ভাব জাগে। অবিশ্বাস ও সন্দেহকে প্রশয় দিতেও কিন্তু ইচ্ছা হয় না। ভয় আর দুর্বলতা, সাহস আর তেজ, বিষাদ আর হাসিখুশি ভাব, ভোঁতাগামি আর ধারালো বুদ্ধি, এলোমেলোভাবে এ সমস্তের ভাসা ভাসা আবির্ভাব অস্থিরচিত্ততার মতোই লাগে বটে, কিন্তু এমন একটা সংযম আর আন্তরিকতার প্রচ্ছন্ন আবরণ সব সময় তাকে ঘিরিয়া থাকে যে, অতিরিক্ত উদারতার সঙ্গে তাকে বিচার করিতে বড়ো ভালো লাগে মানুষের।

তোমার ভায়ের চাকরি চাঁদের মা ? চেষ্ঠা তো করছি, দেখি কী হয়।

নন্দকে আজ একবার পাঠিয়ে দেব আপনার আপিসে ?

পাঠিয়ে দেবে ? তা দিয়ো। বলিয়া জ্যোতির্ময় একগ্রাস ভাত গেলে, গিলিয়াই চিন্তিতভাবে বলে, আজকেই পাঠাবে ? কদিন পরে পাঠাতে পার না ?

ভাইয়ের জন্য চাকরি ভিক্ষা করিতে আসিয়াছে যশোদা, জ্যোতির্ময় যেন একটি অনুগ্রহ ভিক্ষা করে যশোদার কাছে, দয়া করিয়া যশোদা কি আজ তার ভাইকে আপিসে না পাঠাইয়া পারে না ? যশোদা বলে, তা আপনি যদি বলেন—

জ্যোতির্ময় সঙ্গে সঙ্গে খুশি হইয়া বলে, হ্যাঁ, সেই ভালো, আমি এদিকে কর্তাকে বলে কয়ে রাখি একটু, তারপর একদিন তোমার ভাইকে নিয়ে যাব, কেমন ?

বলে কয়ে রাখবেন তো ঠিক ? না ভুলে যাবেন ?

ভুলব কেন ? আমি সহজে কোনো কথা ভুলি না চাঁদের মা। তুমি যে আগে একদিন বলেছিলে, আমি কি ভুলে গেছি ? ভুলিনি। তোমাব আসবার কোনো দরকার ছিল না, তোমার ভায়ের চাকরির জন্যে প্রাণপণে চেষ্টা করছি, মনে না করিয়ে দিলেও চেষ্টা করতাম।

কথা শুনিয়া মনে হয়, নন্দর একটা চাকরি করিয়া দিবার চেষ্টায় জ্যোতির্ময়ের দিনে বিশ্রাম নাই, রাত্রে ঘুম নাই। সেই যে কবে একদিন যশোদা তাকে এ বিষয়ে অনুরোধ জানাইয়াছিল, তারপর হইতে জ্যোতির্ময় বাঁচিয়াই আছে এই একটিমাত্র উদ্দেশ্যে নিয়া—নন্দর একটি চাকরি।

বিরক্তির সঙ্গে যশোদার কৌতুক বোধ হয়, কৌতুক বোধের সঙ্গে একটু দরদও জাগে। নিজের কোনো একটা সমস্যা নিয়া বেচারি হয়তো দিবারাত্রি ব্যতিব্যস্ত হইয়া আছে, এখনও হয়তো সেই কথাই ভাবিতেছে, এই সব জমা করা চিন্তা আর উদ্বেগ যশোদার মন রাখার ব্যাকুলতায় কেন্দ্রচ্যুত হইয়া কিছুক্ষণের জন্য নন্দর চাকরির দুর্ভাবনায় দাঁড়াইয়া গিয়াছে, অতিমাত্রায় ভঙ্গি নিয়া মানুষ যখন মন্দিরে ঠাকুরকে প্রণাম করিতে যায়, পথের ধারে ফেলিয়া রাখা পথ বাঁধানোর বাড়তি পাথরটাকে ব্যাকুল আগ্রহে প্রণাম করা তার পক্ষে সম্ভব হইকী।

যশোদাকে পিঁড়ি পাতিয়া জাঁকিয়া বসিয়া জ্যোতির্ময়ের সঙ্গে আলাপ জুড়িতে দেখিয়া তার দিদি গম্ভীরমুখে কোথায় উঠিয়া চলিয়া গিয়াছিল, এতক্ষণে একটা কলাইকরা প্লেটে আম কাটিয়া আনিয়া সামনে রাখিল। নাম তার সুধীরা। গান্ধীর্ষ ও ধীরতায় তার সতাই তুলনা নাই।

যশোদাকে সে পছন্দ করে না, আমলও দেয় না—আমল পাওয়ার জন্য যশোদার কিছুমাত্র চেষ্টা না থাকায় যশোদাকে সে আরও বেশি অপছন্দ করে। এককালে একজন আধা-হাকিমের গৃহিনী ছিল এখন বিধবা হইয়াছে। বিধবাও হইয়াছে প্রায় পাঁচ-সাতবছর, কিন্তু গিনি গিনি ভাবটা এত বেশি বজায় আছে বলিবার নয়। বাড়াবাড়িটা বোধ হয় এই জন্য যে আসল যা ছিল তার ভিতরটা হইয়া গিয়াছে ফাঁপা, বজায় আছে শুধু ভাবটুকু ফাঁকি ফাঁকিতে সেটা উঠিয়াছে ফাঁপিয়া।

যশোদা বলে, নতুন বউকে দেখছি না, আসেনি বউ বাপের বাড়ি থেকে ?

পাখা নাড়িয়া আমার মাছি তাড়াইতে তাড়াইতে মুখ না ! পরাইয়াই সুধীরা সংক্ষেপে বলে, এসেছে।

ওমা, কবে এল ? জানি না তো !

পরশু এসেছে।

যশোদা উঠিয়া দাঁড়াইয়া বলে, ওপরে আছে বুঝি ? যাই, চেনা করে আসি।

সুধীরা অসম্ভুষ্ট হইয়া বলে, নতুন বউয়ের সঙ্গে আবার চেনা করবে কী বাছা ?

এ সব বিকারগ্রস্ত মানুষের অপমান যশোদা সহজে গায়ে মাখে না, সে হাসিয়া বলে, নতুন বউ বলেই তো চেনা করা। ভয় নেই গো দিদি, বউকে তে মাদের চুরি করে নিয়ে পালাব না।

যশোদা উপরে উঠিতে থাকে, সুধীরা বোনকে ডাক দিয়া বলে, সুবর্ণ, ও সুবর্ণ ? —ও বাড়ির যশোদা বউ দেখবে, নিয়ে যা তো সঙ্গে করে উয়ের কাছে।

যশোদা কতবার এ বাড়িতে আসিয়াছে, পথ চিনিয়া সে কি যাইতে পারিবে না উপরে, দোকলার দুখানা ঘরে খুঁজিয়া পাইবে না নতুন বউ অপরাজিতাকে ? সাজা-গৃহিনীদের গিম্পিনার মানে বৌকা সতাই কঠিন।

বাড়ি ফিরিয়া যশোদা দেখিল, মোটে তিনটি এঁটো থালা পড়িয়া আছে, আরও দুজন খাইতে বসিয়াছে এবং তাদের জন্য নতুন করিয়া ভাত বাড়িতে নন্দ একেবারে গলদঘর্ম।

আরে নিষ্কর্মার টেকি, হাতায় করে হাঁড়ি থেকে ভাত তুলে খালায় দেবে, তাও পার না ? পালা তুই, ভাগ।

নন্দকে রেহাই দিয়া যশোদা জিজ্ঞাসা করিল, কে কে খেয়েছে রে নন্দ ?

নন্দ গড়গড় করিয়া বলিয়া গেল, কেউ, বলাই আর যতীন।

যশোদা একটু আশ্চর্য হইয়া বলিল, মতি আর সুধীর খায়নি ? কী হল তবে আর দু-খালা ভাত, বেড়ে যে রেখে গেলাম পাঁচ খালা ?

নন্দ বিব্রত হইয়া এদিক ওদিক তাকায়, ওই তো খেয়ে গেল ওরা !

কারা ? মতি আর সুধীর ?

হুঁ।

এঁটো খালা গেল কই ?

যশোদার জেরায় কাবু হইয়া এবার নন্দ সব বলিয়া ফেলে। মতি আর সুধীরের ভাত খাওয়া শেষ হওয়া মাত্র সুধীর তাড়াতাড়ি এঁটোকাঁটা সাফ করিয়া খালা দুটি মাজিয়া ধুইয়া রাখিয়া গিয়াছে আর নন্দকে বলিয়া গিয়াছে অনেক করিয়া যে, যেন যশোদাকে না বলে।

খুব বুদ্ধিমান তো সুধীর ! —তুই না বললেও টের পেতে যেন আমার বাকি থাকত। বলিয়া যশোদা হাসিল।

তারপর গণ্ডীর হইয়া ভর্ৎসনার সুরে বলিল, পেটের জালায় ওরা না হয় বারণ না মেনে খেয়ে গেল, বলবি না বলে তুই যে আমায় বলে দিলি বড়ো ? ধিক তোকে বিশ্বাসঘাতক। বিশ্বাসের মান যে রাখে না মানুষের মধ্যে তাকেই বলি সবচেয়ে হীন, চোর-জোচ্চোর ভালো তার চেয়ে।

এ রকম সময়ে যশোদাকে বড়োই দুর্বোধ্য মনে হয়। কী যে তার মনের ভাব, রাগ সে সত্যই করিয়াছে না সবটাই তার ভান, কিছুই বোঝা যায় না। হাসি-তামাশা করা চলে এমন একটা তুচ্ছ ব্যাপারে কথা দিয়া কথা রাখে নাই, তাও যশোদারই জোরালো জেবার ফাঁদে পড়িয়া, এটা কখনও নন্দর এতবড়ো অপরাধ বলিয়া যশোদা ভাবিতে পারে ? মুখ দেখিয়া কথা শুনিয়া মনে হয় কিন্তু তাই সে ভাবিতেছে !

নন্দ ভয়ে ভয়ে বলে, তুমি যে জিজ্ঞেস করলে ?

জিজ্ঞেস করব না ? জিজ্ঞেস তো আমি করবই—আমি কি গুনে জানি একজনের কাছে তুমি পিতিজ্ঞে করেছ আমায় কিছু বলবে না ? চূপ করে থাকতে পাবতে না তুমি ?

চূপ করে থাকলেও তো তুমি বকতে।

বকতাম তো কী হয়েছে ? পিতিজ্ঞে রক্ষার জন্যে মুখ বুজে একটু বকুনি যদি না সইতে পার, তুমি মানুষ কীসের শূনি ?

এক জায়গায় কাজ করে বটে, তবু মতিব সঙ্গে সুধীরের বন্ধুত্ব হওয়াটা সত্যই বড়ো খাপছাড়া ব্যাপার। মতির চূলে পাক ধরিয়াছে, মানুষটা সে শাস্ত, ভীৰু এবং একটু মতলববাজ। সুধীরের বয়স ত্রিশেরও কম, বেঁটে আর চওড়া শরীরটা তার লোহার মতো শক্ত, যেমন অশাস্ত তেমনই নিষ্ঠুর তার প্রকৃতি এবং পৃথিবীর সকল গোঁয়ারের মতো সে বোকা। তবু মতির সঙ্গেই সুধীর ভিড়িয়া গিয়াছে, দুজনে একসঙ্গে হাসি-তামাশা গল্পগুজব করে, নেশা আর আমোদ করিতে যায়—দুটিতে যেন সমবয়সি ইয়ার।

রাস্তায় পা দিয়াই সুধীর একগাল হাসিয়া বলিল, চাঁদের মাকে ফাঁকি দিয়ে কেমন দুজনে পেট-পুজাটি সেরে এলাম মতিদা !

ফাঁকি না তোর মাথা। আমরা যাতে খাই তাই জন্যে তো ও ঘর ছেড়ে বেরিয়ে গেল, তাও বুঝিস না পাঁঠা ?

বটে নাকি, হ্যাঁ ?

সুধীর বিষ্ময়ে অভিভূত হইয়া গেল। এমন খাপছাড়া প্যাঁচালো দরদের ব্যাপারগুলি সে ভালো বুঝিতে পারে না। পবেব সুখদুঃখের কথা যে সংসারে কেউ ভাবে এ ধারণাটাই তার কেমন অদ্ভুত ও অসম্ভব মনে হয়, জীবনের অভিজ্ঞতার সঙ্গে খাপ খাইতে চায় না। তার সমস্ত জীবনটাই একটা একটানা পেষণের ইতিহাস, পরের আশ্রয়ে মানুষ হইয়াছে, পরের অবজ্ঞা, উপেক্ষা, অন্ধ স্বার্থপরতা ও ক্ষমাহীন নির্মমতাকে জানিয়াছে সংসারের স্বাভাবিক নিয়ম, সুস্থ শরীরে খাটিতে পারিলে খাইয়াছে, অসুস্থ শরীরে খাটিতে না পাবিলে উপবাস করিয়াছে, ভিক্ষা করিয়াছে, চুরি করিয়াছে, জেলেও গিয়াছে। একবার অনেক কষ্টে কিছু টাকা জমাইয়া বিবাহ করিয়াছিল, দু-মাসের মধ্যে বউটা একজনের সঙ্গে উধাও হইয়া গিয়াছে। তাব আগে এবং পবে যে কয়েকটি স্ত্রীলোকের সঙ্গে সে বাস করিয়াছে, তাবা যেমন তাব কাছে প্রাণপণে আদায় করিয়াছে সেও তেমনি তাদের কাছে প্রাণপণে আদায় করিয়াছে। মানুষের সঙ্গে মানুষের যেভাবে হোক নিজের প্রাপ্য আদায় করার সহজ সরল সম্পর্কটা সুধীর বুঝিতে পারে, আর কিছু তার মাথায় ঢোকে না। নিজেও সে চিরদিন নিজের সুখদুঃখ ভালোমানদের হিসাব ছাড়া আব কোনো হিসাব কবে নাই, অন্য কেউ এই হিসাব লইয়া মাথা ঘামাইবে এ আশাও করে নাই। জীবনে যে কারও অকাবণ দরদ পায় নাই এ জন্য তাব তাই কোনো আপশোশও নাই। হয়তো কখনও পাইয়াছিল দরদ, হয়তো মানুষকে দরদি করিবার সুযোগ আসিয়াছিল, কিন্তু সে বুঝিতেও পারে নাই কী পাইতেছে, কীসের সুযোগ আসিয়াছে।

কেহ তাহাকে কোনোদিন বুঝাইয়াও দেয় নাই, বুঝিতেও দেয় নাই।

চলিতে চলিতে নানা কথা মনে হয় সুধীরের। একটি দুটি কবিতা যশোদার কতগুলি কাজের কথা মনে পড়ে, আজকের আশ্চর্য ব্যবহারের সঙ্গে যার কেমন যেন একটা মিল আছে। কিছুদিন আগে তার ছুব হওয়া যশোদা তাব সেবা করিয়াছিল, খুবই সাধারণ সেবা, মাথাটা ধোয়াইয়া মুছিয়া দেওয়া, জোব কবিতা বার্লি আর ওমুখ খাওয়ানো, আর কিছু নয়—তবু ও বকম সেবাও কি সুধীরকে কোনোদিন কেউ কবিতায়ে ? মাঝামাঝি করায় একবার পঁচিশ টাকা জরিমানা হইয়াছিল সুধীরের, যশোদা জবমানাটা না দিলে জেলে যাইতে হইত। তারপর দু-একটাকা করিয়া মাস তিনেকের মধ্যে যশোদা প্রায় দশ-বারোটাকা আদায় করিয়া নিখাছে বটে, কিন্তু গাচিয়া জরিমানার টাকা দিয়া কেউ কি সুধীরকে কোনোদিন জেল হইতে বাঁচাইয়াছে ?

সত্যি বলছ মতিদা ?

কী সত্যি বলিয়াছে মতি ? অ, যশোদার কথা ! সত্যি বইকী, যশোদাকে তো চেনে না সুধীর, ও সব সে বুঝিবে না। মেজাজটা একটু যা খাবাপ যশোদার, চেহারাটাও হাতিব মতো, কিন্তু সকলের জন্য বড়ো মায়া যশোদার, অমন মেয়েমানুষ হয় ? —একটা বিড়ি দে তো। গাটা কেমন করছে সুধীর, কালকের নেশাটা এখনও কাটেনি।

বিড়ি নেই।

দে না একটা ? কেমন ধারা মানুষ যেন তুই সুধীর।

সুধীর বিরক্ত হইয়া বলিল, নেই তো সব কোথা থেকে ? গড়াব ?

একটা বিড়ির জন্যই দুজনের মধ্যে যেন মনোমালিন্য ঘটিবার উপক্রম হয়। মতি খানিক আগে আর সুধীর খানিক পিছনে চলিতে থাকে।

এত সকালেই বড়ো রাস্তায় গাড়ি আর মানুষের ভিড় হইতে আরম্ভ করিয়াছে। দশটা এগারোটার সময় এ রাস্তায় চলাই দুধর হইয়া পড়ে। ঠেলা গাড়ি, মহিমের গাড়ি, লরি আর বাসের সংখ্যা বাড়িতে বাড়িতে এমন হইয়া দাঁড়ায় যে থাকিয়া থাকিয়া মোটরগাড়িকেও গোরুর গাড়ির সঙ্গে

সমান তালে শামুকের গতিতে চলিতে হয়, মাঝে মাঝে জমাট বাঁধিয়া সমস্ত গাড়ির গতিই কিছুক্ষণের জন্য একেবারে স্থগিত হইয়া যায়। তখন পথের দিকে চাহিলে মনে সংশয়ই জাগে, এ কী শহরতলির পথ না শহরের কেন্দ্র ? সংশয় দূর হয় যখন মনে পড়ে শহরের কেন্দ্র এ রকম অপরিচ্ছন্ন নোংরা নয়, সেখানে পথের ধারে বৃদবৃদ তোলা পচা পঁাকে ভরা ছোটোখাটো খালের মতো এ রকম নর্দমা নাই, গৈয়ো ধরনের দোকানপাট আর সেকালের ধরনের আড়ত নাই, এত বড়ো বড়ো মিল নাই, এ ধরনের মালবাহী গাড়ি সেখানে এভাবে জড়াজড়ি করে না, সেখানে দামি ও সুদৃশ্য প্রাইভেট কারের স্রোত কেবল রঙিন বৈদ্যুতিক আলোর ইঞ্জিতে কিংবা ট্রাম বাস প্রভৃতি মানবজাতীয় মালবাহী গাড়ি আর মানুষের ভিড়ে গতিহীন হয়, সেখানে পথের ধারে প্রত্যেকটি বাড়ি রাজপুরী, প্রত্যেকটি দোকান শুধু এই বাণীর রূপক যে ধনী ছাড়া পৃথিবীতে মানুষ নাই, থাকা উচিত নয়।

কারখানায় গিয়া মতি সবে থাকি শাটটি খুলিয়া রাখিয়া আলকাতরার বালতি আর বুরুশটি তুলিয়া লইয়াছে, মাল চালানোর কুলিদের সর্দার ভরদ্বাজ আসিয়া বলিল, ওই বিশটো গাঁটেম কাল লিখা নাই কাহে ? ভরদ্বাজ চমৎকার বাংলা বলিতে পারে, কিন্তু রাগের সময় বলে না।

সব গাঁটেমে তো কালকে আমি লিখেছি ?

লিখেছো ? তোমার মুন্ডু করিয়েছো। কাল চালান বরবাদ গেল, কাশীবাবু হামাকে দুশছে। কাম যদি না করবে শালা, চলা যাও না কাম ছোড়কে ?

বুরুশটা ছিনাইয়া লইয়া মতির গালে আঘাত করিয়া ভরদ্বাজ গজরাইতে গজবাইতে চলিয়া গেল। আঘাত যত না লাগিল মতির, আলকাতরা লাগিল তার চেয়ে অনেক বেশি। সাদা চুল আর কালো গালের রং দেখিয়া আশেপাশে যারা কাজ করিতেছিল তারা হাসিয়া বাঁচে না।

গালের আলকাতরা মুছিতে মুছিতে মতি ভাবিতে থাকে কাশীবাবুর কাছে গিয়া নালিশ জানাইবে কিনা। কিন্তু গাঁটে লেখা হয় নাই বলিয়া কাশীবাবু নিজেই যদি চটিয়া থাকেন, নালিশ জানাইয়া লাভ কী হইবে ? কাশীবাবু হয়তো অন্যগালে আলকাতরা মাখাইয়া দিবেন।

কিন্তু এই গাঁটগুলি কোথায় ছিল কাল ? এখানে যে ছিল না মতির তাতে সন্দেহ নাই, এতকাল সে এ কাজ করিতেছে একেবারে কুড়িটা গাঁট বাদ পড়িবার মতো ভুল কি তাব হইতে পারে ? তা ছাড়া, কালই যদি গাঁটগুলি চালান দিবার এত বেশি দরকার ছিল, আগে এইগুলিতে লিখিবার জন্য তাকে নিশ্চয় বলিয়া দেওয়া হইত—চিরকাল যেমন বলা হইয়াছে। একটা ধাঁধায় পড়িয়া যায় মতি, ব্যাপারটা ঠিক বুঝিয়া উঠিতে পারে না। সে কয়েকটা আলকাতরার দাগ আঁকিয়া দেয় নাই বলিয়া একেবারে চালান বরবাদ হইয়া গেল ?

ভাবিতে ভাবিতে সমস্যাটা মতির কাছে জল হইয়া যায়। দোষ তার নয়। হয় কাশীবাবু নয় ভরদ্বাজের গাফিলতিতে কাল গাঁটগুলি চালান দেওয়া হয় নাই এবং চিরদিনের রীতি অনুসারে যারা উপরে থাকে তাদের ঘাড় হইতে পিছলাইয়া দোষটা আসিয়া চাপিয়াছে তার ঘাড়ে। দোষ দিতে ছুতোও তো চাই একটা ? কী চালাক কাশীবাবু আর কী শয়তান ভরদ্বাজ ব্যাটা !

গালে আলকাতরা মাখাইয়া দেওয়ার জন্য একটু রাগ আর একটু দুঃখ মতির হইয়াছিল বইকী, তবে আঘাত আর অপমান সম্বন্ধে অনুভূতিগুলি তার অনেকটা ভোঁতা হইয়া আসিয়াছে কিনা, রাগ দুঃখ অপমান অভিমান খুব সহজেই সে ভুলিয়া যাইতে পারে। এমনকী, আসল ব্যাপারটা বুঝিয়া এবার একটু কৌতুকও মতির বোধ হয়। দোষ ঘাড়ে চাপানোর জন্য এতগুলি লোকের ভিতর হইতে তাকেই বাছিয়া নেওয়া হইয়াছে, এ জন্য একটু গর্বও কি মতি বোধ করিতে আরম্ভ করে ?

মেখে হইতে বুরুশটি তুলিয়া বালতির উপর আড়াআড়িভাবে রাখিয়া গাঁটগুলিতে কী অক্ষর আর কী নম্বর লেখা হইবে তার নমুনা আনিতে ভরদ্বাজের কাছেই মতি যাইবে ভাবিতেছে, সুধীর আসিয়া হাঙ্গামা বাধাইয়া দিল।

প্রথমটা খুব একটোট হাঙ্গল সুধীর, তারপর ব্যাপারটা শুনিয়া রাগিয়া হইয়া গেল আগুন। খানিক তফাতে কোথা হইতে কী কাজে ভরদ্বাজ কোথায় যাইতেছিল, সুধীর গিয়া তাকে টানিয়া হাঁচড়াইয়া এদিকে নিয়া আসিল, গালাগালি চোটপাট চলিল মিনিটখানেক, তারপর আলকাতরার বালতিটা সুধীর কাত করিয়া দিল ভরদ্বাজের মাথার উপর।

একটা হইচই বাধিয়া গেল। কাশীবাবু ছুটিয়া আসিল এবং গোলমালের মধ্যে কাশীবাবুর গায়েও কী করিয়া যে আলকাতরা লাগিয়া গেল খানিকটা ! ভরদ্বাজের একজন পার্শ্বচরের সঙ্গে তখন সুধীরের মারামারি চলিতেছে এবং আট-দশজন তাদের ছাড়াইবার চেষ্টা করায় মনে হইতেছে মারামারি বৃদ্ধি বাধিয়াছে দশ-বারোজনের মধ্যে। কাশীবাবু কার গালে যেন একটা চড় বসাইয়া দিল। বোধ হয় যাকে সামনে পাইল তারই গালে। ঠিক তার পরেই পিছন দিকে না চাহিয়া একজন দু-পা পিছু হটায় আসিয়া পড়িল একেবারে কাশীবাবুর ঘাড়ে। মনে হইল, একজনের গালে চড় মারার শোধটাই বৃদ্ধি আর একজন নিয়াছে।

গোলমাল থামিবার একঘণ্টার মধ্যে মতি, সুধীর এবং আরও আটজন শ্রমিক বরখাস্ত হইয়া গেল। অন্য আটজনের অপরাধ ? প্রকাশ্য অপরাধ কারখানার মধ্যে মারামারি করা, যা তারা কেউ করে নাই। ওদের মধ্যে পাঁচজন তো যেখানে গোলমাল চলিতেছিল তার ধারে কাছেও ছিল না। গোলমাল থামিবার পরে তারা আসিয়াছিল, যোগ দিয়াছিল শুধু জটলায়। কিন্তু কিছুদিন আগে সত্যপ্রিয় মিলে যে ধর্মঘট হওয়ার উপক্রম হইয়াছিল, সেই সময় এই আটজনের নাম উঠিয়াছিল মিলের পক্ষে অবাঞ্ছিতদের লিস্টে। আজকের গন্ডগালের সুযোগে মতি আর সুধীরের সঙ্গে এদেরও কাশীবাবু তাড়াইয়া দিল। ওরা মারামারি করে নাই ? কাশীবাবু নিজের চোখে ওদের মারামারি করিতে দেখিয়াছে, আলকাতরার জন্য ভরদ্বাজ চোখের পাতা ভালো করিয়া খুলিতে পাবিতেছিল না, তবু সেও দেখিয়াছে, কাশীবাবুব আরও কত পার্শ্বচরও যে দেখিয়াছে তার হিসাব হয় না।

দশজনের কাজ গেল। কাশীবাবুব কড়া হুকুমে মিলের মধ্যে কর্মব্যস্ততা আবার চরমে উঠিয়া গেল, মানুষ আর যন্ত্র সমানে কাজ করিতে লাগিল। কী যেন একটা উদ্দেশ্য সাধন করিতে হইবে কিন্তু হাতে যথেষ্ট সময় নাই, তাই উর্ধ্বশ্বাসে কাজ করা। এত ব্যস্ততার মধ্যে একটুও আবেগ নাই, ব্যাকুলতা নাই, নাকেমুখে ভাত গুঁজিয়া কারখানার দিকে ছুটিবার সময় একজন মাত্র মানুষের মধ্যে যতখানি আবেগ আর ব্যাকুলতা সৃষ্টি হয়, এখানে এতগুলি মানুষের সমবেত ব্যস্ততার মধ্যে সেটুকু ভাবোচ্ছ্বাসের ছন্দও নাই।

তবু মানুষ তো যন্ত্রের অধীন নয়। যন্ত্রই মানুষের অধীন, প্রভুত্বটা এখনও ঠিকমতো আয়ত্ত হয় নাই মানুষের, এই যা আপশোশ। তাই, টিফিনের ছুটির সময় কারখানার প্রাঙ্গণে দশজন বরখাস্ত শ্রমিককে ঘিরিয়া সকলে জটলা করিতে লাগিল, একটু বক্তৃতাও বৃদ্ধি করিল দু-একজন। টিফিনের সময় শেষ হওয়ার পরেও থামিল না। মিলের কাজ বন্ধ হইয়া রহিল। কাশীবাবু ভড়কাইয়া গিয়া ক্রমাগত ফোন করিতে লাগিল হেড আফিসে আব সত্যপ্রিয়র কাছে।

কিন্তু কিছুতেই এবার ধর্মঘট ঠেকানো গেল না। যে দশজনকে বরখাস্ত করা হইয়াছে তাদের আবার কাজে না নিলে কেহ কাজ করিবে না। হেড আফিসে ফোনটা সত্যপ্রিয়র কানেই প্রায় লাগানো ছিল, সমস্তক্ষণ, মিনিটে মিনিটে খবর যাইতেছিল। মন্তব্য প্রায় কিছুই করিতেছিল না, কেবল শুনিতেছিল। একবার শুধু বলিয়াছিল : ব্যাখ্যা আপনাকে করতে হবে না কাশীবাবু, যা ঘটেছে তাই শুধু বলে যান। না, এখনও পুলিশ ডাকবেন না, আর একটু দেখা যাক। ভয় পাবেন না মশায়, পুলিশ রেডি হয়েই আছে, ডাকামাত্র পাঁচ মিনিটের মধ্যে হাজির হবে। অনাথ পৌঁছয়নি ? দেখুন তো।

অনাথ সত্যপ্রিয়র সেক্রেটারি। কাশীবাবু দেখিয়া আসিয়া জানাইল, অনাথবাবু ওদের বোঝাবার চেষ্টা করেছেন, কিন্তু ওরা তাকে কথাই বলতে দিচ্ছে না, হইচই করছে। একজন একটা টিল ছুঁড়েছে অনাথবাবুর দিকে, গায়ে লাগেনি।

জবাবে সত্যপ্রিয় বলিল, আপনি একটি আস্ত গর্দভ কাশীবাবু ! ওই দশজনকে দাঙ্গা করার জন্য পুলিশে দিলেই চুকে যেত—বরখাস্ত করে ছেড়ে দিলে ওরা মিলেব মধ্যে এসে গোল বাঁধাবে এটুকু বুঝবার মতো বুদ্ধিও আপনার ঘটে নাই। শুধু বরখাস্তই যদি কবাবেন, এতকাল করতে পারতেন না, সুযোগের জন্য অপেক্ষা করার কী দরকাব ছিল ?

আজ্ঞে অনাথবাবুকে ফোন করলাম, অনাথবাবু বললেন—

অনাথ আপনার মতোই গাধা। ডেকে আনুন অনাথকে, বুঝিয়ে আব কিছু হবে না। পুলিশকে খবর দিচ্ছি, পুলিশ এলেই মিল খালি করে গেট বন্ধ করে দেবেন।

সন্ধ্যাপ পর মতি, সুধীর আর ওই দশজন বরখাস্ত শ্রমিকের সঙ্গে প্রায় শ-দুই শ্রমিক যশোদাব বাড়িতে আসিয়া হাজির। উঠানে স্থান হইল ত্রিশ-পঁয়ত্রিশজনের, বাকি সকলে সব গলিটুকুর মধ্যে গাদাগাদি করিয়া আর গলিব মোড়ে রাস্তায় ভিড় করিয়া দাঁড়াইয়া বহিল। সুধীর খুব লাফালাফি করিতেছিল, যশোদাব ধমকে থামিয়া গেল। খুস্তি হাতে রান্নাঘরের দরজায় দাঁড়াইয়া প্রথমে যশোদা এক রকম হুড়মুড় কবিয়া বাড়িব মধ্যে ঢুকিয়া পড়ার জন্য একচোট গালাগালি দিল সকলকে, তারপর মন দিয়া ব্যাপাবটা সব শুনিল, তারপর আবার গালাগালি দিয়া বলিল, তোমরা সবাই পাঁঠা, এক ফোঁটা বুদ্ধি নেই তোমাদের কাবু ঘটে। দল বেঁধে হুলা করলেই হবে ? দু-নম্বরে মিলে ছুটে যেতে পারলে না সবাই মিলে, সেখানেও ধর্মঘট কবাবে পারলে না ?

তাই তো বটে—এটা তো খেয়াল হয় নাই কাবও। কী কবা যায় এখন ?

কী আবার করবে ? পাঁচ-দশজন মিলে খুঁজে বাব করো গে দু-নম্বরের যতজনকে পাব। কাল ভাব না হতে তোমরা সবাই গিয়ে দু-নম্বরে ধবনা দেবে। এবাব ভাগো সবাই আমাব বাড়ি থেকে, দম আটকে মাববে নাকি ?

বাছিয়া বাছিয়া কয়েকজনকে একটু বসিয়া যাইতে বলিয়া বাকি সকলকে যশোদা বাড়িব বাহিব করিয়া দিল। তারপর ওই বাছা বাছা কয়েকজনের সঙ্গে পবামর্শ কবিল দু ঘণ্টা ধবিয়া।

পরদিন দুপুরবেলা ডাক আসিল যশোদাব, মিলে মজলিশ বসিয়াছে, একবাব যাইতে হইবে যশোদাকে। কাশীবাবু নিজে গাড়ি নিয়া আসিয়াছে।

আমি গিয়ে কী করব ?

আপনি মাতিয়ে দিয়েছেন ওদের, আপনি না গেলে ওরা কারও কথা শুনবে না।

যশোদা উদাসভাবে বলিল, ওদের দাবি মিটিয়ে দিলেই কথা শুনবে।

সেই তো সমস্যা দাঁড়াইয়াছে এখন। ইতিমধ্যে শ্রমিকের দাবি বাড়িয়া গিয়াছে, দশজন বরখাস্ত শ্রমিককে ফিরাইয়া নিলেই আর চলবে না, আগের বার যে সব দাবি উপলক্ষে ধর্মঘট বাধিবার উপক্রম হইয়াছিল সেইগুলিও মিটাইয়া দেওয়া চাই।

আপনার পরামর্শে এটা হইয়েছে।

আমার পরামর্শ কি ওরা শোনে ? শুনলে কি আর এ দুর্দশা হয় ওদের ? কত বলি যে কাজকর্ম যখন থাকে, পয়সা জমা দুটো, অসময়ে কাজে লাগবে। কানেও তোলে না কেউ আমার কথা।

গাড়িতে উঠিয়া বসিয়া গভীরভাবে যশোদা মাথা নাড়ে, কথায় বলে না অভাবে স্বভাব নষ্ট, তাই হয়েছে ওদের। মজুরি হাতে পেলেই আর ছেঁড়া ন্যাকড়াটি পরা চলবে না, নতুন একটি কাপড় কেনা চাই। একটি গামছা কেনা চাই, জলপানি খাওয়া চাই, গায়ে তেল মাখা চাই—

যশোদা তামাশা করিতেছে কিনা কাশীবাবু ঠিক বুঝিতে পাবে না, দ্বিধাভরে বলে, তাড়ি খেয়ে খেয়েই ওদের যত দুর্দশা।

তাড়ি খেয়ে ? তাড়ি না খেলে ওরা বাঁচত ! খাওয়ার মধ্যে খায় তো শুধু একটু তাড়ি, নয়তো একটু দিশি, তাও যদি না খাবে, গিদে-তেস্তা মিটবে কীসে ? শুনিয়া সেই যে কাশীবাবু চূপ করিয়া গেল, আর কথাটি বলিল না। মিলের সামনে পাঁচ-ছশো শ্রমিক এলোমেলোভাবে ভিড় করিয়া আছে, যশোদাকে দেখিয়া তাদের কী উৎসাহ। ধর্মঘটের চেয়ে আজ সাবানিন যশোদার কথাই তাবা বেশি আলোচনা করিয়াছে। মুখে মুখে কত কথাই যে বটিয়াছে যশোদাব সম্বন্ধে !

মিলের ভিতরে আপিসঘরে বৈঠক বসিয়াছে। বৈঠকে অনাথ, হেড আপিসের আবও দুজন বড়ো কর্মচারী এবং শ্রমিক সমিতির দুজন প্রতিনিধি আছে। একটি চেযাবে যশোদাকে বসিতে দেওয়া হইল। এমন অবস্থি যশোদা জীবনে কখনও ভোগ করে নাই। তাবপর কত কথা আব কত আলোচনাই যে আরম্ভ হইল, যশোদা কিন্তু শুনিল বেশি, কথা বলিল কম।

শ্রমিক সমিতির একজন প্রতিনিধি অনুযোগ দিয়া বলিল, আমাদের না জানিয়ে ধর্মঘট আরম্ভ করা কি আপনাব উচিত হয়েছে ?

যশোদা বলিল, ধর্মঘট আবম্ভ করাব ধ-ও জানি না আমি। সে হোক, শেষ পর্যন্ত আপনাবা তো জেনেছেন ?

কিন্তু এ রকম জানায় তাবা খুশি নয়, শ্রমিকেরা ধর্মঘট কবিয়াছে বাটে, ধর্মঘটটা আসলে যেন যশোদার। এতক্ষণ আলোচনা করিয়া একটা মিটমাট হইয়াছিল, শ্রমিক সমিতি মীমাংসাটা মানিয়া লইয়াছে, কিন্তু শ্রমিকবা মানিতে চাহিতেছে না। এ ভাবে ডিসিপ্লিন নষ্ট হইলে—

মীমাংসাটা কী হইয়াছে ? দশজনের মধ্যে ন-জন বরখাস্ত শ্রমিককে ফিবাইয়া নেওয়া হইবে, আবও পঁচিশ জন নতুন শ্রমিক নিয়া কাজের চাপ কমানো হইবে, কিন্তু কাজের সময় আর মজুরি সম্বন্ধে অন্য যে দাবি করা হইয়াছে, সেগুলি মেটানো হইবে না।

শুনিয়া যশোদা বলিল, তবে তো খুব হল !

তবু এই মীমাংসাই যশোদা মানিয়া নিল, নতুন লোকের সংখ্যাটা কেবল পঁচিশ হইতে চল্লিশে উঠিল এবং ঠিক হইল এব মধ্যে ত্রিশ জনকে যশোদা সিক কবিয়া দিবে। মানিয়া নেওয়া ছাড়া উপায়ও ছিল না। যশোদা জানিত এ ধর্মঘট টিকিবে না, তাই অসময়ে ধর্মঘট আবম্ভ হইয়াছে, ঐকটা কাটিয়া গেলেই অনেকে কাজে যোগ দিতে চাহিবে, অনেকে নিরুপায় হইয়া কাজে যোগ দিবে। যশোদা তো জানে ওদের অবস্থা।

দশজনের মধ্যে বাদ যাবে কে ?

অনাথ বলিল, সুধীর। ওকে নেওয়া চলে না। আমাদেরবও তো প্রেস্টিজ আছে একটা। প্রেস্টিজ মানে—

যশোদা একটু হাসিল। প্রেস্টিজ শব্দটা এত বেশি কানে আসে !

যশোদা শর্ত মানিয়া নেওয়ামাত্র অনাথ ফোনটা দুঃখিয়া নিল। সত্যপ্রিয় সংবাদের প্রতীক্ষায় বসিয়া আছে। সত্যপ্রিয় মিলে আসে নাই, কোনোদিন এ সব ব্যাপারের ধারে কাছেও সে আসে না, শ্রমিকদের সে বড়ো ভয় করে। সেই তো মালিক মিলের, উত্তেজিত অবস্থায় সকলে মিলিয়া তাকে যদি আক্রমণ করে, যদি প্রথমে গায়ের জামাকাপড় টুকরা টুকরা করিয়া ছিঁড়িয়া তারপর তার দেহটাকে ছিঁড়িতে আরম্ভ করে ঠিক ওইভাবে ? এই কল্পনা আর সেই সঙ্গে গভীর একটা আতঙ্ক সত্যপ্রিয়ব মনে স্থায়ীভাবে বাসা বাঁধিয়া আছে।

রাত্রে সকলে খাইয়া গেল, সুধীর আসে না। নন্দকে দিয়া ডাকিয়া পাঠানো হইল তবু আসে না। সন্ধ্যার পর বাড়ি ফিরিয়া সে ছাতে গিয়া গুম খাইয়া বসিয়া আছে। শেষে যশোদা নিজেই ডাকিতে গেল।

যশোদা কাছে আসিয়া দাঁড়ানো মাত্র, সুধীর গটগট করিয়া নামিয়া গেল নীচে। কিন্তু যশোদাও ছাড়িবার মেয়ে নয়, সেও পিছুপিছু ধাওয়া করিয়া সুধীরকে পাকড়াও করিল তার ঘরে।

ভাত খাবে না ?

সুধীর কথা বলে না, চৌকিতে বসিয়া চূপচাপ দেয়ালের দিকে চাহিয়া থাকে, যেখানে একটা টিকটিকির লেজ শিকার করিবার উত্তেজনায় এ-পাশ ও-পাশ নড়িতেছিল। সহজ রাগটা সুধীরের হইয়াছে যশোদার উপর ! আজ সকালে যে যশোদার দরদের পরিচয়ে তার মাথা প্রায় ঘুরিয়া গিয়াছিল, সেই যশোদাই শেষ পর্যন্ত তার এমন সর্বনাশ করিল।

দশজনের মধ্যে আর সকলকে ফিরাইয়া নেওয়া হইল, বাদ পড়িল শুধু সে ! মতির হইয়া সে লড়াই করিয়াছে, মতির কাজটা পর্যন্ত বজায় রহিল, বরখাস্ত করা হইল একা তাকে !

মাথা গরম কোরো না বাবু ছেলেমানুষের মতো। মাথা গরম করে কাজটির মাথা তো খেলে নিজেই। খোঁচা না দিলে সুধীরের মুখ খুলিবে না জানিয়াই যশোদা খোঁচা দিয়া কথা বলে। সুধীর মুখ ফিরাইয়া বলে, আমি খেলাম না তুমি খেলে ?

মারামারি করলে তুমি, চাকরি খেলাম আমি ? বেশ তো বিচার তোমার বাবু ?

যশোদা হাসে, গলা নামাইয়া গোপন কথা বলার মতো সুরে বলে, তবে কী জান, শুনে আমি বড়ো খুশি হয়েছি—সত্যি বলছি তোমায়। মতি চূপচাপ সয়ে গেল কথাটি কইলো না, ছিছি, ওটা কি মানুষ ? ভীরা অপদার্থ ওটা। তোমার সাহস আছে, তুমি তাই বুখে দাঁড়ালে—আর কেউ পরের অপমান গায়ে মেখে নিত অমনি করে ?

শুনিতে শুনিতে বাতাসে মেঘ উড়িয়া যাওয়ার মতো সুধীরের মুখের উপর হইতে রাগ দুঃখ অভিমানের ছায়া মিলাইয়া যাইতে থাকে। একটু নরম গলায় সে বলে, তুমি বললেই ওরা আমায় রাখত।

তাতে লাভটা কী হত বলো ? এরপর ওখানে আর কাজ করতে পারতে তুমি ? ও কাজ গেছে যাক—আমি তোমায় ভালো কাজ জুটিয়ে দেব। বেশি মাইনে, কম খাটুনি। মানুষের মতো তেজ আর বুকুর পাটা কটা লোকের থাকে ? তোমার তা আছে জেনে ভাবলাম তুমি আরও ভালো কাজের যুগ্য—এইসব ভেবে আর বললাম না তোমায় ফিরিয়ে নিতে।

বড়ো শ্রান্তি বোধ হইতেছিল যশোদার। যতবড়ো শরীর হোক, সহ্যের তো একটা সীমা আছে ? ঘরের কাজে যশোদাকে যে সাহায্য করিতে আসে, অসুখ হইয়া তিনদিন সে আসে নাই। ঘরে বাহিরে কী খাটুনি আর হাঙ্গামাই তাকে পোয়াইতে হইতেছে। তার উপর আবার এই বোকাহা বা ধাড়ি শিশুকে বুঝাইয়া শাস্ত করিবার দায়িত্বটা পর্যন্ত তার। চৌকির একপাশে বসিয়া হাই তুলিয়া যশোদা আবার বলে, কাজ গিয়ে শাপে বর হল তোমার।

সুধীর অভিভূত হইয়া যশোদাকে দেখিতে থাকে, সে দৃষ্টিতে অন্য কারও হয়তো রোমাঞ্চ হইত, যশোদা দেখিয়াও দেখে না। আবার হাই তুলিয়া বলে, এবার ভাত খাবে চলো—দুটি খেয়ে নিয়ে রেহাই দাও আমায়।

সুধীর মিনতি করিয়া বলে, একটু বোসো চাঁদের মা, একটু গল্প করি তোমার সঙ্গে।

কী বললে ? গল্প ? বসে বসে গল্প করব তোমার সঙ্গে ? খাবে তো খেয়ে যাও সুধীর, নয়তো উপোসে রাত কাটবে বলে রাখলাম।

তিন

প্রচার বিভাগটা সত্যপ্রিয়র ব্যাবসার উন্নতির নাম করিয়াই খোলা হইয়াছে বটে, বড়ো বড়ো বিজ্ঞাপনও দেওয়া হইতেছে সত্য, কিন্তু জ্যোতির্ময়ের আসল কাজ সত্যপ্রিয়র নামও প্রচার করা। সত্যপ্রিয়র এমন ব্যাবসা নয় যে পেটেন্ট ওষুধের মতো তাব জন্য বিজ্ঞাপন দিয়া দেশ ছাইয়া ফেলা প্রয়োজন, সাময়িকপত্রে সত্যপ্রিয়র প্রবন্ধ আব বক্তৃতার রিপোর্ট প্রকাশ করিবার মূল্যস্বরূপ বিজ্ঞাপনগুলির ব্যবস্থা করা হইয়াছে। সত্যপ্রিয়র প্রত্যেক প্রবন্ধ আর বক্তৃতায় ভারতবর্ষের শোচনীয় অধঃপতনের জন্য কী হা-হুতাই থাকে আর সমাজ, ধর্ম ও দেশকে সুনিশ্চিত সর্বনাশের হাত হইতে রক্ষা করিবার জন্য কী ব্যাকুলতাটাই প্রকাশ পায়—তবু যে প্রবন্ধ আব বক্তৃতার রিপোর্ট প্রকাশ করিবার জন্য প্রকারান্তরে মূল্যের ব্যবস্থা করিতে হইয়াছে, এও কি দেশের অধঃপতনের একটা জ্বলন্ত দৃষ্টান্ত নয় ! কেবল কি তাই ? কতকগুলি কাগজ আছে মূল্য দিয়াও তাদের বাগানো যায় না।

এ সব পাগলামি আমাদের কাগজে ছাপানো চলবে না মশায়।

ঠিক পাগলামি নয়, একটু খাপছাড়া মতামত আছে মাঝে মাঝে, সেটা মিথ্যা নয়। কিন্তু মুশকিল হয়েছে কী জানেন, লেখাটা না ছাপলে উনি হয়তো চটে যাবেন, বিজ্ঞাপনের কনট্রাক্টটা—একটু হানে জ্যোতির্ময়—বোঝেন তো সব ? যার যেদিকে খেয়াল চাপে। তা ছাড়া, ওঁর নাম দিয়ে ছাপা হবে, মতামতের দায়িত্ব তো আপনাদের নয়।

মতামতের দায়িত্ব না থাক, মতটা প্রচারের দায়িত্ব তো আছে ? দেশের জন্য যারা জীবন উৎসর্গ করেছেন, অর্ধেক জীবন জেলে কাটিয়েছেন, তাঁরা সবাই ভুল করে দেশকে টেনে নিয়ে যাচ্ছেন সর্বনাশের দিকে, আর টাকার গদিতে শুয়ে আপনার পাগলা জগাই আবিষ্কার করছেন দেশোদ্ধারের একমাত্র উপায়। দু-জায়গায় লিখেছেন, গভর্নমেন্টের সঙ্গে বিবাদ করা অন্যায্য, আর এক জায়গায় লিখেছেন, প্রকৃতির নিয়মে যখন যে জাতি রাজপদে অধিষ্ঠান করে তাদেব প্রাপ্য রাজসম্মান না দিলে দেশের কখনও উন্নতি হবে না ! রাজার জাতিতে বাজসম্মান দিতে থাকলে প্রকৃতির নিয়মে আমরা একদিন নিজেরাই রাজার জাত হতে পারব, নয় তো কোনোদিন পারব না। এ সব কোন দেশি কথা মশাই ?

যুক্তিও তো দিয়েছেন।

যুক্তি ? অমন যুক্তি আমরাও দিতে পারি শুনবেন ? দেয়ালটা সাদা দেখছেন তো ? আপনি ভুল দেখছেন। বিজ্ঞানে বলে, সবগুলি রং মিশে সাদা হয়, বিজ্ঞান অবশ্য সত্যকে বিকৃত করে দেখে, আপনি যদি বেদের সপ্তম অধ্যায়টা পাঠ করেন, দেখবেন সেখানে লেখা আছে সমস্তই অস্থায়ী। সূতরাং রং মিশে সাদা হয়নি, রংগুলি অস্থায়ী বলে সাদা দেখায়—চোখের ভুল। এবার দেখতে পাচ্ছেন দেয়ালের রংটা লাল ? এই নীল হয়ে গেল, এই আবার সবুজ হল, দেখতে দেখতে হলদে হয়ে গেল—

তামাটে মুখ প্রায় কালে! করিয়া জ্যোতির্ময়কে ফিরিতে হইয়াছে। কিন্তু উপায় কী ? তবু তাকে চেপ্টা করিতে হয়, চাকরি তো বজায় রাখিতে হইবে ?

বন্ধুদের কাছে জ্যোতির্ময় অনুচ্চারিত অভিযোগের জবাব দিবার মতো সর্বিনয়ে বলে, ব্যাপারটা কি জান ? সকলের হল দলাদলি মাতামাতি নিয়ে কারবার, কর্তার মতামত প্রচলিত মতামতের বিরোধী। তা ছাড়া, কর্তা বড়োই তেজস্বী আর স্বাধীনচেতা পুরুষ—এই জন্য কর্তাকে অনেকে পছন্দ করে না।

অপরাধ কার, সে নিজে কেন অপরাধী সাজিয়া থাকে, জ্যোতির্ময় বুঝিতে পারে না। তবুও সত্যপ্রিয়কে যারা মহাপুরুষ বলিয়া স্বীকার করে না, সত্যপ্রিয়র মতামত নিয়া হাসাহাসি করে নিজেদের মধ্যে, তাদের কাছে কেমন যেন ছোটো মনে হয় নিজেকে।

জ্যোতির্ময়কে সত্যপ্রিয়র সব সময়েই প্রায় দরকার হয়। কেবল আপিসে কাজ করিয়াই তার রেহাই নাই, সকালে ও সন্ধ্যায় প্রায়ই বাগানবাড়িতে ছুটিতে হয়, ছুটির দিনগুলিও অধিকাংশই বাগানবাড়িতে কাটে। হয়তো ঘণ্টাখানেক সত্যপ্রিয় তার সঙ্গে কাজের কথা বলে, বাকি সময়টা অপেক্ষা করিয়া বসিয়া থাকিতে হয়। তবে অসময়ে খাওয়ার জন্য বাড়িতে জ্যোতির্ময়কে ছুটিতে হয় না, খাওয়াটা সত্যপ্রিয়র ওখানেই হয়। মানুষজনকে খাওয়ানো সম্বন্ধে সত্যপ্রিয় বড়োই উদার। হয়তো সত্যপ্রিয়র ধারণা আছে, মানুষকে দিয়া গুণ গাওয়ানোর একটা খুব সহজ উপায় মানুষকে ঠাসিয়া নুন খাওয়ানো।

চাকরি জ্যোতির্ময়কে প্রাস করিয়া ফেলিয়াছে। মুখে সে বলে বটে যে, খাটিতে খাটিতে প্রাণ গেল, এত খাটুনি মানুষের সহ্য হয় না—বাড়ির চেয়ে আপিসে থাকিতেই সে ভালোবাসে, বাড়ির লোকের ভাবনা ভাবার চেয়ে কাজের ভাবনা ভাবিতেই তার আরাম বোধ হয় বেশি। অনেক বয়সে বিবাহ করিলে লোকে নাকি একটু বউপাগলা হয়, জ্যোতির্ময়েরও হয়তো এ রকম পাগলামি একটু আসিয়াছে, কিন্তু সেটা প্রকাশ পায় রাত্রে শয্যাগ্রহণ করিবার সময়, যখন আর কোনো কাজ করিবার থাকে না, আর কিছু ভাবিবার থাকে না। আগে বিশ্রাম ছিল শুধু ঘুম, এখন জুটিয়াছে পুতুল নিয়া খেলা করার আমোদ—অপরিপুষ্ট ও অপরিণত অপরাজিতার বিবর্ণ মুখ ও উৎসুক দৃষ্টি শ্রান্তি দূব করিতে সাহায্য করে। সারাদিন মনের রাশ টানিয়া রাখিবার পর আলগা দেওয়ামাত্র প্রতিক্রিয়া আরম্ভ হয় প্রচণ্ডভাবে, মনের একটা সাময়িক বিকারের মতো। কী যে সে করে অপরাজিতাকে নিয়া আর কী যে করে না, কিছুই ঠিক থাকে না। কথা শুনিতে শুনিতে অপরাজিতার মাথা ঘুবিয়া যায়, আদরে সোহাগে দম আটকাইয়া আসে—শান্ত, সহিষ্ণু ও অনামনস্ক মানুষটার আকস্মিক প্রণয়মূলক উন্মত্ততার ভয়ে তার বুকের মধ্যে টিপটিপ করিতে থাকে। কোনোদিন তার মুর্ছা হওয়ার উপক্রম হয়, ফ্যাকাশে মুখে চটচটে ঘাম দেখা দেয়, চোখ স্তিমিত হইয়া আসে। জ্যোতির্ময় খেয়ালও করে না অপরাজিতার মুখে একটা কথা নাই, আধমরা মানুষের মতো সে শিথিল হইয়া গিয়াছে। এক প্রাস জল দিতে বলিলে সে যে নড়িতেছে না সেটা দৃষ্টামিও নয়, অবাধ্যতাও নয়, আলস্যও নয়। আপিসে পিয়ন কথা না শুনিলে জ্যোতির্ময় যেমন বিরক্ত হয়, অপরাজিতার উপর তার তেমনই বিরক্তি জাগে। নেহাত ভদ্রলোক বলিয়াই আপিসের পিয়নের মতো বউকে গালাগালি করে না, মৃদু অনুরোধ ও উপদেশ দিতে দিতে ঘুমাইয়া পড়ে।

অপরাজিতার গা-এলানো নির্বাক শিথিল ভাবটা জ্যোতির্ময় যে অসুস্থ দেহমনের দুর্বলতাব লক্ষণ বলিয়া চিনিতে পারে না, হয়তো তার আরও একটা কারণ আছে। মাঝে মাঝে অপরাজিতাও খোঁপিয়া যায়, কী অফুরন্তই মনে হয় সেদিন তার জীবনীশক্তি। গলগল করিয়া ক্রমাগত কথা বলিয়া যায়, অপরিমিত হাসে, প্রাণহীন জড়বস্তুর মতো কেবল সোহাগ গ্রহণ করার বদলে সোহাগের বন্যায় স্বামীকে একেবারে ভাসাইয়া দিবার চেষ্টা করে, এমন লজ্জাহীন বেহায়ার মতো আচরণ করে যে, জ্যোতির্ময় প্রায় স্তম্ভিত হইয়া যায়। আবেগের আতিশয্যে কোনোদিন নিজের চুল টানিয়া ছিঁড়িয়া ফেলিবার উপক্রম করে; অস্বাভাবিক ফরসা মুখখানা তাহার দেখায় রক্তবর্ণ, চোখ হইয়া থাকে বিস্ফারিত।

পরিসমাপ্তিটাই জ্যোতির্ময়কে সবচেয়ে বেশি বিব্রত করে। অকারণে কাঁদিতে আরম্ভ করিয়া অপরাজিতা বলিতে থাকে, লোকে বউকে কত ভালোবাসে, তুমি আমায় একটুও ভালোবাস না। কিছুতেই কী সে থামে! জ্যোতির্ময় যতই বুঝাইবার চেষ্টা করে যে, অন্য যত স্বামী আছে পৃথিবীতে তাদের সকলের চেয়ে সেই বেশি ভালোবাসে তার বউকে, অপরাজিতা তত বেশি কাঁদে আর তত বেশি অনুরোধ করে।

পরদিন নটা-দশটার আগে কোনোমতে অপরাজিতাকে তোলা যায় না, সুবর্ণ গিয়া জাগাইয়া দিলেও তার হাত ছুঁড়িয়া দিয়া পাশ ফিরিয়া তৎক্ষণাৎ আবার ঘুমাইয়া পড়ে। ঘুম যখন ভাঙে, বুঝিতে যখন পারে, সে কে এবং কোথায় আছে, তাড়াতাড়ি উঠিতে গিয়া মাথা ঘুরিয়া পড়িয়া যাওয়ার উপক্রম হয়। কোনো রকমে সে নীচে যায়, লজ্জায় ভয়ে কাঠ হইয়া থাকে, অন্য সময়, অন্য অবস্থায়, অন্য লোক তার মুখ আর কালিপড়া চোখ দেখিয়াই তৎক্ষণাৎ হয়তো তাকে বিছানায় ফেরত পাঠাইয়া তাড়াতাড়ি ডাক্তার ডাকিয়া আনিত, কিন্তু এ সময়, এ অবস্থায়, এ বাড়িতে কে অনুমান করিবে অসুখের ঝড়েই একরাশে মেয়েটার অবস্থা হইয়াছে দুমড়ানো মোচড়ানো চারাব মতো ? প্রতিদিনকার মতো কালও সে নিয়মিত খাইয়া দাইয়া ঘবে গিয়াছিল, কাল বরং অন্যদিনের চেয়ে তাকে মনে হয়েছিল একটু বেশি সজীব আর হাসিখুশি। তা ছাড়া, অনেক রাত্রে তার হাসি আর কথাব শব্দও তো বাড়ির লোকের কানে আসিয়াছে কিছু কিছু।

তাই সুধীরা মুখ বাঁকাইয়া শুধু বলে, ঝুং। আর সুবর্ণ কেবলই মুচকি মুচকি হাসে, আড়ালে ডাকিয়া নিয়া গত রজনীর ইতিহাস সব না হোক কিছু শনিবার জন্য কেবলই খোঁচায়, তোষামোদ করে আব কেবলই ভয় দেখায়, না যদি বলে বউদি, আমার বিয়ে হলে একটি কথা তোমায় বলব না।

জ্যোতির্ময় কিছু দ্যাখেও না, বলেও না। ঘুম ভাঙিবাব পর আর অপরাজিতার দিকে তাকানোব অবসর তার হয় না। কত দায়িত্ব তাব, কত দৃশ্চিন্তা ! মন পড়িয়া থাকে আপিসের দিকে। অপরাজিতা উঠিবার আগেই হয়তো সে বাহিব হইয়া যায়।

হেড আপিসটি বেশ বড়ো, কয়েকটি বিভাগ আছে, শ-চারেক লোক কাজ করে। জ্যোতির্ময়ের আপিস যে ঘরে তার মাঝামাঝি মানুষ-সমান উঁচু কাঠের পাটিশন তুলিয়া দু-ভাগে ভাগ করিয়া ফেলা হইয়াছে, একভাগে জ্যোতির্ময় বসে, অন্যভাগে অন্যথের বড়ো শালা কেঁটবাবু। কেঁটবাবুর কাজটা যে ঠিক কী, এত কাছাকাছি থাকিয়া এতদিনেও জ্যোতির্ময় ঠিক বুঝিয়া উঠিতে পারে নাই। এককালে স্বদেশি করিত, অনেকগুলি স্বদেশি প্রতিষ্ঠানের সঙ্গে যোগ ছিল, সভা-সমিতি ও নেতাদের মজলিশে সব সময়েই প্রায় তাকে দেখা যাইত। কেবল জেলে যাওয়ার আশঙ্কা আছে এমন কোনো বিপজ্জনক সম্ভাবনাব সময় আর তার পাত্তা মিলিত না। প্রৌঢ় বয়সে বোধ হয় কতকটা দেশের জন্য জীবন উৎসর্গ করার পুরস্কাব স্বরূপ আর কতকটা অন্যথের খাতিরে এখানে একটা চাকরি পাইয়া এখন একটু আরাম করিতেছে। শ্রোতা পাইলেই নিজের গৌববময় অতীত জীবনের গল্প আরম্ভ করে, সগর্বে বলে, ছেড়ে দিয়ে এলাম সাধে ? আব সইল না মশায় ? ওবা সব কটা হামবড়া, কেবল দলাদলি আর নিজে কী করে বড়ো হবে সেই চেষ্টা। চক্কোত্তিমশায়েব কথাই ঠিক, ওবাই দেশের সর্বনাশ করছে। শ্রোতা না পাইলে টেবিলের সামনে মুখ গভীর করিয়া বসিয়া থাকে, মাঝে মাঝে ফোনটা তুলিয়া নিয়া কথা বলে, আর যখন তখন নিম্নপদস্থ কর্মচারীদের মধ্যে একে ওকে ডাকিয়া অর্থহীন প্রশ্ন করে এবং উপদেশ ও ধমক দেয়। এইসব পরিশ্রমের কাজ করিতে করিতে ক্রান্ত হইয়া পড়িলে সত্যপ্রিয়র দামি মোটর আপিসের সামনে আসিয়া দাঁড়ানোমাত্র তাকে ডাকিয়া দিবাব জন্য পিয়ন পাঁচুকে সতর্ক করিয়া দিয়া টেবিলে পা তুলিয়া একটু ঘুমায়ে।

ঘুমানোর আগে হয়তো জোর গলায় সিন্ধাসা করে, কী করছেন জ্যোতির্ময়বাবু ?

প্রুফ দেখছি।

চক্কোত্তিমশায়েব নতুন প্রবন্ধটার প্রুফ ? সংস্কৃত কোটেশনগুলি ভালো করে মিলিয়ে দেখবেন কিন্তু, অনেক খুঁজে পেতে বার করেছি।

জ্যোতির্ময় জবাব দেয় না। প্রবন্ধগুলিতে সংস্কৃত সাহিত্যে সত্যপ্রিয়র অগাধ পাণ্ডিত্যের যে পরিচয় থাকে, তার উৎস যে কেঁটবাবু নয়, কেঁটবাবু শুধু সত্যপ্রিয়র কোন বিষয়ে কী ধরনের শাস্ত্রীয়

বাক্য প্রয়োজন জানিয়া নিয়া কয়েকজন আসল পণ্ডিতের কাছ হইতে সেগুলি সংগ্রহ করিয়া আনে, জ্যোতির্ময়ের তা জানা আছে। তবু মোটামুটি সংস্কৃত জানা থাকায় সংগ্রহের কাজটা কেঁটবাবু করে এবং করিতে পারে বলিয়া লোকটার উপর জ্যোতির্ময় বড়োই ঈর্ষা বোধ করে।

পিছনের ঘরখানা খাতাপত্রের গুদাম। আপিসঘরে ঢুকিলেই জ্যোতির্ময় পুরানো কাগজের সৌদা গন্ধ পায় : কয়েক বছর নাকে লাগিতে লাগিতে সবদিন গন্ধটা সে আজকাল সচেতনভাবে অনুভব করিতে পারে না, কিন্তু অভ্যস্ত আবেষ্টনীর আরামটা সঙ্গে সঙ্গে বোধ করে। টেবিলের উপর বাঁধানো খাতা, ফাইল, কাগজপত্র, অভিধান পর্যায়ের কয়েকটি ইংবাজি বাংলা বই, কতকগুলি মাসিক ও সাপ্তাহিক পত্রিকা, আজের তারিখের সাত-আটখানা ইংরাজি বাংলা ছোটোবড়ো সংবাদপত্র, কাগজচাপার তলে কয়েকটি প্রুফ, কাঁচের দোয়াতদান, ব্লটিংপ্যাড, কলিংবেল, পিনকুশন এই সমস্ত খুঁটিনাটির অস্তিত্ব পর্যন্ত যেন চোখের পলকে অনুভব করিয়া সে খুশি হইয়া ওঠে।

নিজের রাজ্য পরিদর্শনরত রাজার মতোই তৃপ্তিভরা এক অপব্রূপ গাণ্ডীর্থ তার গোলগাল মুখখানিতে ফুটিয়া ওঠে। নূতন ও পুরাতন চেয়ারগুলি, এক কোণে বইভরা বুকশেলফ ও অন্য কোণে বাদামি কাগজে বাঁধানো পাহাড় সমান পুরাতন সংবাদপত্রের ফাইল—এ সমস্ত যে তাকে ঘিরিয়া আছে কাজ করিতে করিতেও সে যেন মাঝে মাঝে তা অনুভব করিতে পারে। কাজের সময় এবং অন্য সময়েও অনুভব করিতে পাবে না কেবল পার্টিশনটার ও-পাশে কেঁটবাবুর অস্তিত্ব। বোধ হয় কেঁটবাবুর উপর তার রাগ আছে বলিয়া।

নন্দকে জ্যোতির্ময় একটি চাকরি দিয়াছে, সত্যপ্রিয় মিলে ধর্মঘটের কিছুদিন পবেই। যশোদার আর ইচ্ছা ছিল না নন্দ এখানে চাকরি করে, ধর্মঘটের সঙ্গে সে যেভাবে জড়িয়া পড়িয়াছিল তারপর তার ভাইকে এখানে চাকরি করিতে দেওয়াটা একটু খারাপ দেখায়। কিন্তু এদিকে ভাইটাও তার দিন দিন বড়োই বখাটে হইয়া যাইতেছে। গান বাজনা করিয়া আর তাস পিটাইয়া অলস বেকার জীবনযাপন করিতে করিতে অমানুষ হইয়া পড়িতেছে দিন দিন। যশোদার নিজের হাতে মানুষ কবা ছেলে, সেই ছেলের চোখে কি না মাঝে মাঝে ধরা পড়িতেছে ভাবাবেশে ঢুলু ঢুলু চাউনি ! বারণ তাই যশোদা করে নাই। সত্যপ্রিয় মিলের কর্তৃপক্ষের সঙ্গে ঝগড়া তো তার হয় নাই, এমন আর কী খাবাপ দেখাইবে তার ভাই সত্যপ্রিয়র আপিসে সামান্য মাহিনায় কাজ করিলে ! বাস্তব জগতের সংস্পর্শে একটু আসুক নন্দ, নরম মনটা তার গলিয়া যাইতে আরম্ভ করিয়াছে, একটু শক্ত হোক।

একটা ছোটোখাটো দোকান করে দি, তাই চালা তুই নন্দ, কেমন ?

না দিদি। চাকরিই করি।

তা করবে না ? চাকরি ছাড়া আব কীইবা করবার ক্ষমতা তোমার আছে !

নন্দর কাজটা জ্যোতির্ময়কে সাহায্য করা। সহকারী সে নয়, সাহায্যকারী। নানা ঠিকানায় যে সব চিঠিপত্র পুস্তিকা প্রভৃতি যায় তার উপর ঠিকানা লেখা, কোথায় কী পাঠানো হইল সেটা খাতায় টুকিয়া রাখা, যেখানে জ্যোতির্ময়ের নিজে না গেলেও চলে অথচ পিয়ন পাঠানো যায় না সেখানে ছুটাছুটি করা, জ্যোতির্ময়ের প্রয়োজন মতো হাতের কাছে এটা ওটা আগাইয়া দেওয়া, এই ধরনের সব ছোটো ছোটো সাধারণ কাজ। এই কাজ পাইয়া নন্দ কিন্তু ভারী খুশি। সে চাকরি করে কেবল এই জন্যই তার গর্বের সীমা নাই, তার উপর জীবনের হঠাৎ একটা অভূতপূর্ব পরিবর্তন ঘটয়াছে, কী একটা অজানা রহস্যময় জগতে সে আসিয়া পড়িয়াছে যেখানে চলাফেরা ওঠাবসা কথা বলা চুপ করিয়া থাকা সব কিছুই নিয়ম নতুন !

এক কোণে ছোটো একটি টেবিল তার রাজ্য। জ্যোতির্ময়ের টেবিলের তুলনায় তার টেবিলটিকে অবশ্য দেখায় সমৃদ্ধিশালী সাম্রাজ্যের কাছে জংলি দেশের জমিদারির মতো, তবু মোটা মোটা খাতা, দোয়াতদান, ব্লটিংপ্যাড, পিনকুশন এ সব সম্পদপূর্ণ এমন একটি সম্পত্তিই বা নন্দের কবে ছিল।

অতি যত্নে নন্দ সব সাজাইয়া গুছাইয়া বাণে, মসৃণ ও সমতল করিয়া লাল নীল পেন্সিলের দুটি মুখ কাটে, লালকালির কলম ভুলিয়াও কখনও কালো কালিতে ডুবায় না, খাতার কাগজে লিখিবার সময় ধরিয়া ধরিয়া সাবধানে লেখে, খামে ভরিবার আগে প্রচারপত্রটির সঙ্গে জ্যোতির্ময়ের লিখিত পত্রটি ক্লিপ দিয়া আঁটিবে না পিন দিয়া আঁটিবে এ কথাটি পর্যন্ত জ্যোতির্ময়কে জিজ্ঞাসা করিয়া নেয়। আর পরম উৎসাহে আপিসের নিয়মকানুন আয়ত্ত করার চেষ্টা করে।

জ্যোতির্ময় গভীর মুখে বলে, অনাথবাবু ঘরে এলে উঠে দাঁড়িয়ে।

নন্দর মুখ স্নান হইয়া যায়, ভয়ে ভয়ে বলে, উনি বাগ কবেননি তো ? আর কে কে এলে উঠে দাঁড়াব ?

বলে দেবখন।

বাড়ি ফিবিতে সন্ধ্যা হইয়া যায়। তার শুকনো মুখ দেখিয়া যশোদা মনে মনে রাগ করিয়া ভাবে, সামান্য একটা চাকরির পরিশ্রম পর্যন্ত সহিবার ক্ষমতা নেই শরীরে, কেন জন্মেছিলি তুই পৃথিবীতে ? ভাইকে সে দুধ খাওয়ায়, কলা খাওয়ায়, সন্দেশ খাওয়ায়—চাকরির শ্রমে ক্লান্ত শরীরটা যদি ভালো ভালো খাদ্য পাইয়া একটু পুষ্ট হইতে রাজি হয়। সন্ধ্যার সময় যশোদা বাঁধাবাড়া নিয়া ব্যস্ত থাকে, তখন অবসর হয় না, বাগ্রে নন্দ চাকরির গল্প করে—সমস্ত দিনের প্রত্যেকটি খুঁটিনাটি ব্যাপারের বিস্তারিত কাহিনি। নন্দর আনন্দ ও আগ্রহ যশোদাকে পীড়ন করে। শুনিতে শুনিতে মনে তার খটকা লাগে যে, চাকরি কবিত্তে গিয়া বাস্তব জগতের সংস্পর্শে আসিয়া নন্দর মন শক্ত হইবে এ আশা বোধ হয় মিত্যা। যে জগতে নন্দ মানুষ হইয়াছে সেখানকাব বাস্তবতা কী কম কঠোর, কম সর্বগ্রাসী ? তাই যদি নন্দকে স্পর্শ কবিত্তে না পাবিয়া থাকে, সত্যপ্রিয়র আপিসের বাস্তবতা কি পারিবে ? এক একটা ছেলে বোধ হয় এইরকম বর্মপরা মন নিয়া জন্মায়, পৃথিবী ধলাকাদা সে মনের নাগাল পায় না। পাপ পর্যন্ত তাবা করে পুণ্য করাব মতো নির্দোষ আগ্রহর সঙ্গে। যে সব ছেলের সঙ্গে নন্দ এতকাল আড্ডা দিত, এখনও সকাল সন্ধ্যা দিতেছে, তাদের কাছে বখামি পাকামি শিখিতে কি কিছু তার বাকি আছে ? কিন্তু কী কাজে লাগিয়াছে তাব ও সব শিক্ষা ? ছেলেমানুষি ঘোচে নাই, মন পাকে নাই, কয়েকটা কেবল বিকার জন্মিয়াছে মনের, কর্দয় এবং কুৎসিত। বসিয়া বসিয়া স্বপ্ন দেখার তাতে তার কিছুমাত্র ব্যাঘাত হইয়াছে বলিয়া মনে হয় না। খারাপ দিকেও কিছু অভিজ্ঞতা জন্মিয়া নন্দর মনটা যদি একটু শক্ত হইত, শিশু ভিখারি আর কিশোরী মেয়েব মতো ভয়, লজ্জা, অভিমান, বিনয়, নির্ভবশীলতা, সংকোচ, স্বপ্ন দেখা এ সব যদি একটু কমিত, বাঁচিয়া থাকাই যে একটা ভীষণ লড়াই এ বিষয়ে সামান্য একটু জ্ঞান জন্মিয়া ভাবপ্রবণতাটা খানিকটা নিস্তেজ হইয়া আসিত, তাতেও বোধ হয় খুশি হইত।

একদিন সত্যপ্রিয় মহাসমারোহে বাপের বার্ষিক শ্রাদ্ধের আয়োজন করিয়াছে, রাজ্যের লোককে আহ্বারের নিমন্ত্রণ করা হইয়াছে, একদলকে মধ্যাহ্নে আর একদলকে রাতে। আপিসের সকলে রাতে সত্যপ্রিয়র বাড়ি খাইতে খাইবে। হঠাৎ দুপুরবেলা সত্যপ্রিয় আপিসে আসিয়া হাজির। কেউ স্বপ্নেও ভাবে নাই সেদিন সে আপিসে আসিবে। সকলেই কমবোশ গা এলাইয়া দিয়াছিল—কেরানিরা পর্যন্ত। কেরানিদের সঙ্গে সত্যপ্রিয়র এক রকম কোনো সম্পর্কই নাই, তাদের উপর অনেক উপরওয়ালা আছে, অন্যদিন যারা তাদের এক মুহূর্তের জন্য বাড়ি ভুলিতে দেয় না। সত্যপ্রিয় না আসিলেও তাদের কাজে টিল পড়িবার কোনো কারণ ছিল না। কিন্তু কেবল একজনের কড়াকড়িতে যেখানে নিয়মতান্ত্রিকতা জেলখানার অত্যাচার হইয়া দাঁড়ায়, একটি মাত্র স্কু আঁট থাকিলে যেখানে সংগঠন খাড়া থাকে, সেই একজনের অভাবে স্কুতে টিল পড়িলেই নিয়ম শিথিল হয়, সংগঠনে আলগা পড়ে। অন্যদিন সত্যপ্রিয় না আসিলেও কিছু আসিয়া যায় না, তার আসিবার সম্ভাবনাতেই যথারীতি কাজ চলিতে থাকে। কিন্তু আজ সত্যপ্রিয়র আবির্ভাব এক রকম অসম্ভব জানা থাকায় কাজে কারও মন

নাই, মাস্টার আসিবে না জানিয়া স্কুলের ছেলেদের যেমন হয় সকলের মনে সেই রকম একটা মুক্তির আনন্দ আসিয়াছে, উপরওয়ালারাও হঠাৎ বিস্ময়কর উদারতার সঙ্গে কেরানিদের অনেকটা রেহাই দিয়াছে, ধমক দিবার পরিশ্রমটুকুও তারা আজ করিতে নারাজ। অন্যথ ও আরও তিনজন উচ্চপদস্থ কর্মচারী সিঁড়ির ঠিক পাশের ঘরে দরোয়ানকে দিয়া দরোয়ানের শিলনোড়াতেই সিঁদ্ধি বাটাইতেছে, আপিসের দলাদলিতে এরা অন্যথের দল। অন্যথের উপরওয়ালাদের আরেকটি দলের গোপন পরামর্শের আসর বসিয়াছে, আলোচ্য বিষয়—আপিসের কুটনীতি এবং অন্যথের প্রতিপত্তি ক্ষয় করিবার উপায় উদ্ভাবন। দুটি ছেলেমানুষ কেরানি বারান্দায় দাঁড়াইয়া সিগারেট টানিতে টানিতে গল্প করিতেছে। কর্মব্যস্ততার গুঞ্জনধ্বনির বদলে আজ আপিস জুড়িয়া উঠিয়াছে গল্পগুজবের চাপা কলরব। কয়েকজন বৃদ্ধ কর্মচারী শ্রান্ত চোখ বুজিয়া বিমাইতেছে আর পাঁচুকে যথারীতি সতর্ক করিয়া না দিয়া টেবিলে পা তুলিয়া দিয়া কেঁপেবাবু হইয়া পড়িয়াছে নিদ্রাগত।

সত্যপ্রিয়র দামি মোটরটি নিঃশব্দে আসিয়া দাঁড়াইল, হাতের দাঁতের ছড়িটি হাতে করিয়া সত্যপ্রিয় নিঃশব্দে সিঁড়ি দিয়া উপরে উঠিতে লাগিল। আপিসের আবহাওয়ায় যেন একটা বৈদ্যুতিক প্রবাহ বহিয়া গেল। কী ভাণ্ডে মোটর আসিয়া দাঁড়ানোমাত্র পাঁচুর চোখে পড়িয়াছিল, চাপা গলায় অন্যথকে খবরটা দিয়াই সে উপরে ছুটিয়া গেল। তারপর চওড়া একটা কাগজের তলে চাপা পড়িয়া গেল শিলনোড়া, যুবক কেরানি দুটির হাতের সিগারেট পায়ের তলে পিষিয়া গিয়া হাতে দেখা দিল কলম, বৃদ্ধ কর্মচারী কজন চমকিয়া সজাগ হইয়া উঠিল, কৌচারণ খুঁটে চোখ মুছিয়া কেঁপেবাবু পরীক্ষা করিতে লাগিল মোটা একটা হিসাবের খাতা ; আপিসটা হঠাৎ হইয়া গেল অস্বাভাবিক রকম স্তব্ধ। সত্যপ্রিয় মুদু একটু হাসিল। এ রকম নিঃশব্দ পূজায় সে বড়ো তৃপ্তি পায়। এক একটি ঘরের সম্মুখ দিয়া সত্যপ্রিয় যায় আর ঘরের ভিতরের কর্মচারীরা তড়াক তড়াক করিয়া উঠিয়া দাঁড়ায়, সত্যপ্রিয় চাহিয়াও দেখে না। তবে এ ঘরে চুকিবামাত্র পার্টিশনের ওপারে কেঁপেবাবু যে লাফাইয়া উঠিয়া দাঁড়াইতে গিয়া চেয়ারটাই উলটাইয়া দিল, আর এপারে জ্যোতির্ময় ঘাড় গুলিয়া লিখিতেই লাগিল, এটা চাহিয়া দেখিল। একটু ক্ষণের জন্য মনে হইল, দেয়াল আর পার্টিশনের শেষপ্রান্তের কয়েক হাত ব্যবধানের মধ্যে দাঁড়াইয়া সত্যপ্রিয় ঠিক করিতে পারিতেছে না কার অংশে পদার্পণ করিবে। এ ধরনের সমস্যায় সত্যই সত্যপ্রিয়র বিরক্তিও জাগে, কৌতুকও বোধ হয়। ব্যাপারটা হাস্যকর বটে, কিন্তু তুচ্ছ নয়। যার অংশে পা দিবে সেটা হইবে তার সম্মান ও পুরস্কার, অন্যজনের পক্ষে যত্নস্বরের সমান।

এদিকে আসুন কেঁপেবাবু, দুজনে জ্যোতির্ময়বাবুর অতিথি হওয়া যাক। কী লিখছেন জ্যোতির্ময়বাবু ?

মুখ তুলিয়া দেখিয়া জ্যোতির্ময়ও তড়াক করিয়া উঠিয়া দাঁড়াইল।

বসুন, বসুন। অত ফর্মালিটি করবেন না, এ যুগে এ সব ফর্মালিটি অচল, কী বলেন ?

বলিয়া নিজে সত্যপ্রিয় দাঁড়াইয়া থাকে, বসে না। হাসিমুখে উচ্চারিত সহজ সরল মন্তব্য আর প্রশ্নটি যে তার কতবড়ো ফাঁদ, সত্যপ্রিয়র কাছে যে অনেকদিন কাজ করে নাই, তার পক্ষে কল্পনা করাও কঠিন। সে দাঁড়াইয়া আছে, শুধু বসিবার অনুমতি দেওয়া হইয়াছে বলিয়াই জ্যোতির্ময় বসে কিনা হঠাৎ তাই পরীক্ষা করিয়া দেখিবার সাধ হইয়াছে সত্যপ্রিয়র। কিন্তু ভক্তি ও সম্মান প্রদর্শনের পরীক্ষায় জ্যোতির্ময় কখনও ফেল করে না। সে ঠায় দাঁড়াইয়া রহিল। সত্যপ্রিয়র কথার ফাঁদের জ্বাবও তার জানা আছে—আজ্ঞে না, এটা ঠিক ফর্মালিটি নয়, আপিসের সুপিরিয়ার আপিসারের সামনে দাঁড়ানোই নিয়ম।

এই কথাগুলি জ্যোতির্ময় উচ্চারণ করিল বটে, কিন্তু বলিল কী শুধু এইটুকু ? কেবল সুপিরিয়র আপিসার বলিয়া দাঁড়ায়, আর কোনো কারণ নাই ? কত কারণ আছে আরও। সত্যপ্রিয় অসাধারণ

মানুষ, এ জগতে তার মতো মানুষ আর নাই, তার অতুলনীয় বিদ্যাবুদ্ধি, ব্যক্তিত্ব, কর্মশক্তি, নিষ্ঠা সমস্ত মিলিয়া জ্যোতির্ময়কে শ্রদ্ধা ও ভক্তিতে গদগদ করিয়া দিয়াছে, এইগুলিই আসল কারণ। তবে এ সব কথা মুখে বলিতে নাই, নির্জলা স্তোকবাক্যের মতো শোনায়ে, এ রকম সস্তা মোসাহেবি সত্যপ্রিয়র ভালো লাগে না। না বলিয়াও এই কথাগুলি বলিবার একটা কায়দা আছে, দাঁড়ানোর ভঙ্গিতে, মুখের ভাবে, চোখের দৃষ্টিতে, বলার ধরনে কথাগুলি নেপথ্যে থাকিয়াও সুন্দর অভিব্যক্তি লাভ করে। কায়দাটা আয়ত্ত করিতে একটু সময় লাগে, কিন্তু তারপর আর বিশেষ অসুবিধা হয় না। মনের কথা বলাও হইয়াছে, সত্যপ্রিয়র শোনাও হইয়াছে, টের পাইয়া তখন বড়োই আনন্দ হয়। সরব পূজাও অবশ্য আছে সত্যপ্রিয়র, কিন্তু নীরব পূজা যখন জানাইয়া দেয় পূজা যথাস্থানে পৌছিয়াছে, তখন প্রায় পুলকের শিহরনের সঙ্গেই মনে হয়, দেবতার সঙ্গে যেন রীতিমতো একটা সম্পর্কই স্থাপিত হইয়া গেল।

কেষ্টবাবুর পূজাটা প্রধানত সরব, জ্যোতির্ময়ের নীরব পূজার মতো মার্জিতও নয়, সরসও নয়। কেষ্টবাবুর ঈর্ষাতুর মুখের দিকে এক নজর চাহিয়া জ্যোতির্ময়ের পূজায় পরিতুষ্ট দেবতা উপবেশন করে। তারপর অনাথ আসিয়া জোটে। নিজের ঘরে না গিয়া সত্যপ্রিয় জ্যোতির্ময়ের ঘরে গিয়াছে টের পাইয়া আপিস পরিচালনায় যে কজন সত্যপ্রিয়র ডানহাত আর বাঁহাত তারাও আসিয়া জোটে। প্রথমে দাঁড়াইয়া থাকে, বসিতে বলিলে বসে। সত্যপ্রিয় কথা বলে এমনভাবে যেন এ আপিসটির নীচে তার বিশেষ কোনো সম্পর্ক নাই, সে কেবল একজন মাননীয় অতিথি, একটু বেড়াইতে আসিয়াছে, গল্পগুজব করিতে আসিয়াছে। বাহিরের লোকের মতোই এক সময় সে ভদ্রতার কুশল জিজ্ঞাসা করার মতো বলে, কাজকর্ম চলছে কেমন আপনাদের, ঠিকভাবে চলছে তো ? বলিয়া মুখটা এদিকের কাঁধের সান্নিধ্য হইতে ধীরে ধীরে ওদিকের কাঁধের কাছে লইয়া গিয়া নিজেই আবার বলে, একটু যেন ঢিল পড়েছে মনে হল। তা হোক, তা হোক, তাই স্বাভাবিক, মাঝে মাঝে হঠাৎ দু-একটা দিন এ রকম ঢিল পড়ে। আমাদের গ্রীষ্মপ্রধান দেশে স্বাস্থ্য বজায় রেখে পাশ্চাত্য প্রথায় কাজ কবা কঠিন, মানুষকে একেবারে যন্ত্র বানিয়ে দিচ্ছে দিনকে দিন—স্বাস্থ্য, শাস্তি সব রসাতলে গেল।

এই ভয়টাই সকলের মনে জাগিতেছিল। আজ যখন তার পিতৃশ্রদ্ধা, কেহ কল্পনাও করিবে না সে আপিসে আসিবে, অতএব আজই একবার দেখিও আসা যাক কর্ম কেমন চলিতেছে। সকলেই মুখ কাঁচুমাচু করিয়া ক্রিষ্ট হাসি হাসে। অনাথ বলে, আজ্ঞে হ্যাঁ, একটু কাজে ঢিল পড়েছে আজ, কারও মন বসছে না কাজে। ও বেলা আপনাব ওখানে যাবার কথা ভেবে—

এখন ছুটি দিয়ে দিলে কেমন হয় অনাথ ?

জবাব দেওয়ার আগে অনাথ এক মুহূর্তের মধ্যে সত্যপ্রিয়র মুখের ভাবটি অধ্যয়ন করিয়া ফেলে, তারপর দৃঢ়স্বরে বলে, আজ্ঞে না, খেতে যাবে রাতে, এখন থেকে ছুটি কেন ?

সত্যপ্রিয় সকলের দিকে চাহিয়া বলে, দেখলেন আপনারা ? আপিসের ওপর এতটুকু জোরও আমার নেই, একদিন হাফ হলিডে দিতে চাইলে দিতে পারি না।

সত্যই যেন আপিসের উপর সত্যপ্রিয়র কিছুমাত্র জোর নাই, এইবকমভাবে সকলে নিঃশব্দে হাসিল। এভাবে হাসাই নিয়ম, কারণ এটা রসিকতা। ইচ্ছে করলে একদিন কেন, যতদিন খুশি আপিস ছুটি দিতে পারেন—এ ধরনের কোনো কথা বলা নিষেধ। কারণ, তাতে দিনকে রাত বলিয়া যে রসিকতা করা হইয়াছে তার জোর কমিয়া যায়। সত্যপ্রিয় সাধারণভাবেই কথা বলিয়া যায়, রাগ করিয়াছে কিনা বোঝা যায় না, কিন্তু আপিসের কাজে শৈথিল্য দেখিয়া যে খুশি হয় নাই, সেটা টের পাইতে কারও বাকি থাকে না। খুশি না হওয়ার মধ্যেই এ ব্যাপারের শেষ নয়, বেতনভোগী কর্মচারীদের সম্বন্ধে অমন নিষ্ক্রিয় খুশি-অখুশির ধার সত্যপ্রিয় ধারে না। কিছু একটা ঘটিবেই। হয়তো সপ্তাহ কাটিবে, মাস কাটিবে, আজিকার আকস্মিক আপিস পরিদর্শনের কথা সত্যপ্রিয়র মনে আছে

কিনা টেরও পাওয়া যাইবে না। হঠাৎ একদিন কয়েকটা পরিবর্তন কয়েকটা নূতন নিয়ম বিনা সমারোহে চালু হইয়া যাইবে। কিন্তু কী পরিবর্তন ? কী নিয়ম ?

কিছুক্ষণ পরে সত্যপ্রিয় উঠিল। বুকশেলফের আড়ালে আধ-ঢাকা নন্দর দিকে কখন চোখ পড়িয়াছিল কেউ জানে না, উঠিয়া দাঁড়াইয়াই কিছু জিজ্ঞাসা করিল, ছেলোটিকে কে জ্যোতির্ময়বাবু ?

জ্যোতির্ময়ও এই সুযোগের প্রতীক্ষা করিতেছিল। একজন হেলপার নিতে বলেছিলেন, ওই ছেলোটিকে নিয়েছি। নন্দ এদিকে এসো। একে প্রণাম করো।

ঝুকিয়া পায়ে হাত দিয়া প্রণাম করবার সময় মনে হইল নন্দর শিরদাঁড়াটা বুঝি জামা ঠেলিয়া বাহির হইয়া আসিবে, আশীর্বাদ করার ছলে সত্যপ্রিয় আলগোছে তারই উপরে একটু হাত বুলাইয়া দিল। হঠাৎ-জাগা ছেলেমানুষি খেয়ালের হাত হইতে মানুষ হইয়া কে রেহাই পায় ? সংযমের জন্য সময় পর্যন্ত পাওয়া যায় না।

বোধ হয় নিজের এই আকস্মিক ও অকারণ দুর্বলতার কাছে হার মানার জন্যই নন্দর স্বাস্থ্যের শোচনীয় অভাবটা সত্যপ্রিয় ক্ষমা করিয়া ফেলিল। বোধ হয় আপিসের তুচ্ছতম কেরানিটিকেও সে তুচ্ছ করে না, ডানহাত বাঁহাতগুলিকে এটা বুঝাইয়া দিবার জন্যই বিদায় নেওয়া কয়েক মিনিট পিছাইয়াও দিল। নন্দকে জিজ্ঞাসা করিল দু-একটা কথা, উপদেশ ও উৎসাহ দিল যথেষ্ট, সামান্য অবস্থা হইতে মানুষ যে শুধু নিজের চেপ্টাতেই বড়ো হইতে পারে এই সুপ্রাচীন মিথ্যাটি কয়েকবার কয়েকভাবে নন্দর মাথায় ঢুকাইবার চেষ্টা করিল—সমস্তই স্নেহ ও শুভেচ্ছার সঙ্গে।

তারপর হঠাৎ সে যেন চিরকালের মতো বিদায় গ্রহণ করিতেছে, সকলের সঙ্গে এই তার শেষ দেখা এমনই উদাস ব্যথিত কণ্ঠে বলিল, আচ্ছা যাওয়া যাক এবার, কাজ করুন আপনাবা। যে সমস্যাতে আপনারা আমাকে ফেলে দিলেন মশায় ! মাঝে মাঝে দশজনকে ডেকে খাওয়াতে না পারলে তো আমি বাঁচব না মশায়, পয়সা যে রোজগার করছি দুটো, আর কীসে তার সার্থকতা বলুন ? কিন্তু আমার বাড়িতে নেমস্তম্ব থাকলেই যদি কাজে টিল পড়ে, তবে তো ভাবনার কথা ! পয়সাই যে রোজগার হবে না তা হলে, দশজনকে খাওয়ার কী !

সে চলিয়া গেলে সকলে মুখ চাওয়া চাওয়ি করে। এ আপিসে সবচেয়ে বেশি মাহিনা পায় বীরেনবাবু নামে এক প্রৌঢ় ভদ্রলোক। সত্যপ্রিয়র সম্বন্ধে বেশি মাথা ঘামানোর বদলে কাজের দিকেই তার ঝোক বেশি। এক রকম তারই চেপ্টায় সত্যপ্রিয়র নূতন একটি ব্যবসায় এবং আপিসের নূতন একটি বিভাগ গড়িয়া উঠিয়াছে। এই গড়িয়া তোলার কাজে সত্যপ্রিয়র সঙ্গে কয়েকবার তার মনোমালিন্যও হইয়া গিয়াছে ! সত্যপ্রিয় যে তাকে পছন্দ করে না, তাকে ছাড়া চলিবে না বলিয়াই যে টিকিয়া আছে, অনেকেই তা জানে। বীরেনবাবু সকলকে আশ্বাস দিয়া বলিল, ভয় নেই, কেউ আপনারা জবাই করেন না। উনি শুধু ওয়ার্নিং দিয়ে গেলেন। উনি কাউকে জবাই করেন না।

কথাটা সেই রাগেই প্রমাণ হইয়া গেল অস্তুতভাবে।

সত্যপ্রিয়র প্রকাণ্ড বাড়ির প্রকাণ্ড হল, বড়ো বড়ো তিনটি ঘর আর উপর ও নীচের লম্বাচওড়া বারান্দায় নিমন্ত্রিতেরা সারি সারি বসিয়া গিয়াছে, গলায় বুদ্ধাঙ্কের মালা বুলাইয়া স্মৃটিকের জপমালা হাতে করিয়া খড়ম পায়ে সত্যপ্রিয় একে একটু হাসি, ওকে দুটি কথা দিয়া কৃতার্থ করিয়া বিনয় ও ভদ্রতা রক্ষা করিয়া বেড়াইতেছে। পরিবেশন আরম্ভ হওয়ামাত্র হঠাৎ যেন একটা গুবুতর কথা মনে পড়িয়া গেল।

নন্দ সারাঙ্কণ ছায়ার মতো জ্যোতির্ময়ের সঙ্গে সঙ্গে ঘুরিতেছিল, হলঘরের একপ্রান্তে জ্যোতির্ময়ের কাছেই সে খাইতে বসিয়াছে। কাছে গিয়া সত্যপ্রিয় বলিল, ছি ছি, একে এখানে বসালে কে ? ওঁর দিদি শুনলে রাগ করবেন যে ! তোমাদের কারও ঘটে একফোঁটা বুদ্ধি নেই ভূষণ—সকলকে কুশাসনে বসিয়েছ, পাতায় খাওয়াচ্ছ বলে এর বেলাও তাই করবে ? কার্পেটের আসন নিয়ে এসো একটা, আর বুপোর থালা গেলাস বাটি বার করে দিতে বলা।

পরিবেশন বন্ধ হইয়া রহিল, হলের একদিকে কয়েক হাত জায়গা খালি ছিল সেইখানে লাল ঘাসের মধ্যে সবুজ বাঘ আঁকা কার্পেটের আসন পাতা হইল, সত্যপ্রিয়র সবিনয় অনুরোধে ভীতসম্প্রস্তু নন্দ পায়ে পায়ে উঠিয়া গিয়া আসনে বসিল। সামনে ঝকঝকে বুপোর থালা দেওয়া হইয়াছে, সাধারণ থালার তিনগুণ তার আকার।

তুমি শুধু এঁকে পরিবেশন করবে ভ্রমণ—আর কারও দিকে তোমার তাকাবার দরকার নেই।

ঘরের শ-দেড়েক মানুষের কারও মুখে কথা নাই। জ্যোতির্ময়ের মুখ বিবর্ণ হইয়া গিয়াছে। বিহুল নন্দ এদিক-ওদিক তাকায়, মনে হয় বুঝি কাঁদিয়াই ফেলিবে। কাল সাহেবি পোশাকে যে সত্যপ্রিয়কে আপিসে দেখিয়াছিল, আজ বাড়িতে আধা-সাধকের বেশে সত্যপ্রিয়কে চেনা তার পক্ষে যেমন কঠিন, আজ দুপুরে আপিসে নন্দকে মেহকোমলকণ্ঠে আশীর্বাদ উপদেশ ও উৎসাহ দিতে যে দেখিয়াছিল, এখন বাড়িতে সেই নন্দকে এই অপব্রূপ উপায়ে পীড়নের আনন্দে মশগুল সত্যপ্রিয়কে চেনাও তার পক্ষে কম কঠিন নয়। সকলে বেতন পায় কাজের বদলে, সকলেই দাস। তাই ঘরভরা মানুষ স্তব্ধ হইয়া এখনকার সত্যপ্রিয়কে চিনিবার চেষ্টা করে।

দাঁড়িয়ে রইলে কেন, পরিবেশন আরম্ভ করো ? আপনারা খান।

সরিয়া আসিয়া জ্যোতির্ময়কে উদ্দেশ্য করিয়া সত্যপ্রিয় বলে, সত্যি বলছি জ্যোতির্ময়বাবু, ওনার পরিচয় জানতাম না। এই খানিক আগে শুনলাম। তাই ত্রুটি হয়ে গেছে, যথাযোগ্য সম্মান দেখাতে পারিনি।

জ্যোতির্ময় নীরবে লুচি ভাঙিয়া এক টুকবা লুচি আর কিছু বেগুন ভাজা মুখে তোলে। না জানিয়া সতাই অপরাধ হইয়া গিয়াছে। যার প্ররোচনায় সত্যপ্রিয়র দুটি মিলে ধর্মঘট হইয়াছিল মাত্র কিছুদিন আগে, তার ভাইকে চাকরিটা দেওয়া উচিত হয় নাই।

সত্যপ্রিয়র সংযম আছে, কোনো বিষয়ে বাতাবাড়ি কবে না—একমাত্র অর্থাপার্জননের বিষয়টি ছাড়া। নন্দর সামনে থালাবাটিতে ভিন্ন ভিন্ন খাদ্য জমিতে থাকে, নন্দ হাত গুঁটাওয়া চুপচাপ বসিয়া থাকে। কিন্তু সত্যপ্রিয় আব তার দিকে তাকায় না, আর কিছুই তাকে বলে না। আগের মতো একে একটু হাসি এবং ওকে দুটি কথা দিয়া বেতনভোগী অতিথিদের আপ্যায়ন করিতে থাকে।

বাড়ি ফিরিবার সময় জ্যোতির্ময় বলে, কাল থেকে তুমি স্মার আপিসে যেয়ো না ভাই। যদি পারি অন্য কোথাও তোমার একটা চাকরি করে দেব।

নন্দ চুপ করিয়া থাকে। জ্যোতির্ময় একটু সংকোচের সঙ্গে বলে, আমার কোনো দোষ নেই বুঝতে পারছ তো ? এক মাসের মাইনেটা তোমায় পাইয়ে দেব।

মাইনে চাইনে।

বিছানায় শূইয়া নন্দ আর সেদিন প্রতিদিনকার মতো ঘুমানোর আগে খানিকক্ষণ এ-পাশ ও-পাশ করে না, চুপচাপ শূইয়া থাকে। নিজের হাতে মানুষ করা ভাই সম্বন্ধে যশোদার অনুভূতি একটু বেশি রকম তীক্ষ্ণ। অন্ধকার ঘরে নন্দর অভ্যস্ত নড়ন-চড়নের সাড়া না পাইয়া সে ঘরের অন্যপ্রান্তের বিছানা হইতে জিজ্ঞাসা করে, ঘুমোলি নন্দ।

না, ঘুমোইনি।

নন্দ রাগ করিয়াছে ? কী হইল নন্দর ? কী আবার হল তোর ?

সকলের সঙ্গে ঝগড়া করবে তুমি, আর চাকরি যাবে আমার। সর্বনাশ করে ছাড়বে তুমি আমার।

নন্দর উলটাপালটা কথা জোড়া দিয়া ঘটনাটা আগাগোড়া গঠন করিতে যশোদার একটু সময় লাগে। তখন সে বিছানায় উঠিয়া বসিয়া বলে, আর তুই কী করলি ? ঘাড় হেঁট করে খেয়ে এলি পেট পুরে ? মরণ হয় না তোর নচ্ছার হারামজাদা ছেলে !

খেয়েছি নাকি আমি কিছু ?

খাসনি ? কিছু খাসনি ? বসেই বা রইলি কেন অমন অপমানের পর ? কার্পেটের আসন আর বুপোর থালাবাটি যখন আনতে বলল, গটগট করে উঠে চলে আসতে পারলি না তুই ? বলে আসতে পারলি না, তোমার মতো লোকের বাড়িতে আমি—

উঠিয়া আলো জ্বালিয়া : যাক গে মবুক গে। যা করেছিস, বেশ করেছিস। কী খেতে দি তোকে এখন আমি ! লুচি পোলাউ ফেলে এলি, ঘরে যা আছে তা কি তোর মুখে বুচবে ? দাঁড়া, আনিয়ে দিচ্ছি।

রাত তখন এগারোটা বাজিয়া গিয়াছে। সুধীরকে সঙ্গে নিয়া গিয়া সেই রাত্রে যশোদা তার শত্রু ও সখী কুমুদিনীকে ডাকিয়া তুলিয়া তার স্বামীর সাইকেলে সুধীরকে খাবার আনিতে পাঠাইয়া দিল। কুমুদিনীর স্বামীর টিফিন কারিয়ারটিও সঙ্গে দিল।

যত শিগগির পারো ফিরে আসবে কিন্তু—জ্বারে জ্বারে চালিয়ে যাও।

একঘণ্টা পরে সুধীর ফিরিয়া আসিল। যশোদার ফরমাশ মতো সব জিনিস সে পায় নাই, তবে অনেক কিছুই আনিয়াছে। লুচি, তরকারি, ডাল, মাংস, ডিমভাজা, মামলেট, সাতরকম মিষ্টি, দই এবং রাবড়ি। রাগ ও ঝোঁকের মাথায় এতসব খাদ্য যশোদা আনিতে দিয়াছিল বটে, এতরাতে নন্দকে সব খাইতে দেওয়ার সাহস তার হইল না।

অর্ধেকের বেশি তুলিয়া রাখিল, বাকিটা ভাগ করিয়া দিল সুধীর আর নন্দকে।

পেট ভরেনি দিদি।

খুব ভরেছে, এবার ওঠো।

সন্দেহ দাও আর একটা।

উঁহু, যা খেয়েছ তাতেই তোমার অসুখ হয় কিনা দ্যাখো, আর সন্দেহ খায় না। ধনঞ্জয়ের কথা যশোদার মনে পড়িতেছিল। সমস্ত খাবারটাই তাকে নির্ভাবনায় দেওয়া চলিত, অসুখের কথা ভাবিতে হইত না। মানুষটা খাওয়ায় ছিল ভীম, হজমশক্তিতে অগস্ত্য। ভাবিতে ভাবিতে যশোদার মনে পড়ে যে, খাইয়া ধনঞ্জয়ের পেট ভরিত কিনা এ কথা তো একদিনও সে তাকে জিজ্ঞাসা করে নাই ! এ বাড়ির সকলেই যতক্ষণ ক্ষুধা না মেটে চাহিয়া যায়, এ বিষয়ে যে সংকোচ করিবার কিছু থাকিতে পারে কারও তা মনেও আসে না। কিন্তু ধনঞ্জয়ের মতো যে বেশি খায়, একজনে তিন-চারজনের ভাত, তার হয়তো একটু লজ্জা করিত বারবার চাহিয়া খাইতে। মোটামুটি আন্দাজ করিয়াই অবশ্য যশোদা তাকে সব দিত, তবু পরের পেটের খবর কি আন্দাজে লোকে সঠিক জানিতে পারে ?

এতরাতে হঠাৎ এত সব ভালো ভালো খাদ্য আনাইবার কারণটা জানিবার জন্য সুধীর ব্যস্ত হইয়া পড়িয়াছিল, কয়েকবার জিজ্ঞাসা করিয়া ভালো রকম জবাব পায় নাই। নন্দ শূইয়া পড়িলে যশোদা যখন ঘরে দরজা দিবার উপক্রম করিতেছে, তাকে বাহিরে ডাকিয়া আনিয়া চুপিচুপি সুধীর আর একবার জিজ্ঞাসা করিল, ব্যাপার কী বলো তো চাঁদের মা ? এতরাতে খাবার আনালে, নিজে কিছু খেলে না, আমাদের খাইয়ে সব তুলে রাখলে ? যশোদা একটু হাসিয়া বলে, মাথাটা হঠাৎ বিগড়ে গেল কিনা—

সুধীর ভয় পাইয়া বলিল, মাথার অসুখ আছে নাকি তোমার।

নেই ? রাতদুপুরে যারা খালি খালি বাজে কথা শূধোয় একবার ছেড়ে দশবার, তাদের মাথাটা ছেঁচে ফেলতে সাধ যায় সুধীর। ভালোয় ভালোয় শূয়ে পড়ো গে যাও।

শুনিয়া সুধীর ক্ষুধা হইয়া ফিরিয়া গেল। কী অকৃতজ্ঞ যশোদা ! এতরাতে প্রাণপণে সাইকেল চালাইয়া হাঁপাইতে হাঁপাইতে খাবারগুলি নিয়া আসিল, এত জিজ্ঞাসা করা সত্ত্বেও খাবার আনিবার কারণটা তাকে কিছুতেই খুলিয়া বলিল না। ভালো ভালো জিনিসগুলি পেট পুরিয়া তাকে অবশ্য খাইতে দিয়াছে যশোদা, তবু—

পরদিন সকালে উঠিয়াই নন্দ ছুটিয়া গেল জ্যোতির্ময়ের বাড়ি।

আমার এক মাসের মাইনেটা পাইয়ে দেবেন তো ?

যশোদা নিজের হাতে মানুষ করিয়াছে বটে, কিন্তু কেবল একজন মানুষ তো আর একজনকে মানুষ করে না, আরও অনেক কিছু করে। দাবিটা অবশ্য নন্দের অন্যায়া নয়, নিজের প্রাপ্য সে দাবি করিতে শিখিয়াছে জানিলে যশোদা খুশিই হইবে, কিন্তু এমন সসংকোচে ভিক্ষা চাওয়ার মতো দাবি করা কেন ? কাল রাগেই বেতনের যে টাকা কয়েকটা সে নিবে না বলিয়াছিল, সকাল হইতে সে টাকার উপর এত লোভ কেন, ফসকাইয়া যাওয়ার এত ভয় কেন ?

চার

বর্ষার পরে একদিন ধনঞ্জয় আসিয়া হাজির।

সেই রকম জামাকাপড়, সেই শতরঞ্জি মোড়া বিছানা আর রংচটা টিনের বাক্সো, কেবল আগের বারের চেয়ে ধনঞ্জয় নিজে একটু কাবু হইয়া পড়িয়াছে মনে হয়। এই শরীরে সামান্য জোয়ারভাটা ধরাই কঠিন, সুতরাং দেখিয়াই যখন টের পাওয়া যায়, ভাটাটা সম্ভবত বেশ একটু জোরালোই হইয়াছে।

যশোদা খুশি হইয়া বলিল, তুমি কোথা থেকে গো নবাবসায়ের ? এসো, এসো। বাড়ির আমার মানি বাড়ল।

ধনঞ্জয় একটা পিঁড়িতে বসিয়া বলিল, আবার ফিরে এলাম চাঁদের মা।

তা বেশ কবেছ, ফিরে আসবে বইকী। সবাই আসছে, তুমি আসবে না কোন দুঃখে ?

বিকালে একটু অবসর পাইয়া কালো ভাঙ্গিয়া যশোদাকে তার দুঃখের কাহিনি শুনাইতেছিল। জগৎ বড়ো খারাপ ব্যবহার আরম্ভ করিয়াছে তার সঙ্গে। আর সহ্য হয় না। কী রকম খারাপ ব্যবহার ? খাইতে দেয় না ? মারে ? না, সে সব নয়, ভালো করিয়া কথা বলে না, বকে, খেঁটা দেয়, আরও কত কী করে ! নালিশ শুনিতে যশোদাব ভালো লাগে না, বিশেষত এইসব অভিমান আর ভাবপ্রবণতার নালিশ। তবু সে মন দিয়া শুনিলার চেষ্টা করিতেছিল আর কালোর কাঁদো কাঁদো মুখ দেখিয়া ভাবিতেছিল, এমনই নরম মন না হলে আর চাঁপা তোমার কলতলায় ধাক্কা দিয়ে সরিয়ে দেয়, তুমি চূপ করে থাকো ! ধনঞ্জয় আসিবামাত্র কালোর কথা শুনিতে আর তার কিছুমাত্র আগ্রহ দেখা গেল না। দুঃখের কথা বলিতে না পাইয়া মনের দুঃখে কালো ঘরে ফিরিয়া গেল।

যশোদা ধনঞ্জয়ের খারাপ চেহারা আর সংকোচ লক্ষ করিতেছিল, কিন্তু অনর্থক মিষ্টকথা বলা যশোদার ধাতে নাই।—কাজ করবার মন করে এসেছ তো এবার, না আবার লেজ গুটিয়ে পালাবে ?

না, কাজ করব। উপায় কী।

যশোদাও তো এই কথাই বলিয়া আসিয়াছে চিরকাল, কাজ যখন করিতেই হইবে কাজ না করিয়া উপায় কী ! দেশের জন্য মন অবশ্য কাঁদে, শহর আর শহরতলি ভালো অবশ্য লাগে না সকলের, কিন্তু এ সব মন-কাঁদা আর ভালো লাগা-না-লাগাকে প্রশয় দিলে মানুষের চলিবে কেন ?

বেশ, থাকো এখানে, কাজ একটা জুটি দেবখন।

এখানে থাকার কথায় ধনঞ্জয়ের সংকোচ বাড়িয়া যায়, সে উশখুশ করিতে থাকে। যশোদা চিন্তিতভাবে বলিতে থাকে যে, কোন ঘরে ধনঞ্জয়কে থাকিতে দেওয়া যায় ? টিনের ঘরে তার জায়গাটা আবার বেদখল হইয়া গিয়াছে, সুধীর যে ঘরে থাকে সেখানে একজনের জায়গা হইতে পারে বটে, কিন্তু বড়োই ঘেঁষাঘেঁষি হইবে। তার চেয়ে—পাকা ঘরে জায়গা আছে, সেখানে থাকো না তুমি ? ভাড়া কিন্তু একটু বেশ।

ধনঞ্জয় বিপন্নভাবে ডান হাতের তালুটা হাঁটুতে ঘষিতে ঘষিতে বলে, আমি বলছিলাম কী, যদিইন কাজকন্ম না জোটে আমি বরং অন্য কোথাও—

এখানে থাকবে না ? বেশি ভাড়া না দিতে চাও—

বেশি ভাড়ার জন্যে নয়। মানে, কী জান চাঁদের মা, সঙ্গে এবার—

আর কিছু বলিতে হয় না, যশোদা সঙ্গে সঙ্গে ব্যাপারটা অনুমান করিয়া বলে, অ ! পয়সা-কড়ি সঙ্গে নেই, ট্যাক এবার টিক্‌টিক্‌ করছে।—যশোদা হাসে, কোথায় থাকবে তবে ? মিনি পয়সায় থাকতে দেবে জানাশোনা আছে কেউ ?

ধনঞ্জয় ছেলেমানুষের মতো বিব্রত হইয়া পড়ে, গলাটা সাফ করিয়া বলে, কাজটা যদিইন না হয় এক রকম করে—

যশোদা গম্ভীর মুখে বলে, রাস্তায় ঘুরে ঘুরে কাটিয়ে দেবে আর কলের জল খেয়ে পেঁট ভরাবে। তাই করো গে যাও, আমার কাছে এসেছ কেন ? আমি কাজ জুটিয়ে দেব, সে পর্যন্ত আমার অন্ন খেতে মানে বাধবে—এমন যদি মানী দুর্যোগ্যধন তুমি রোজগার করতে বেরিয়েছ কেন ঘর থেকে ? বউয়ের আঁচল ধরে বসে থাকলেই পারতে ঘরে !

ধনঞ্জয় হঠাৎ গরম হইয়া বলিল, বউ কোথা যে বউয়ের খোঁটা দিচ্ছ ?

যশোদা আশ্চর্য হইয়া বলিল, বউ নেই তোমাব ? আরবাব যে বললে ছেলেমেয়ে আছে চারটি ?

ছেলেমেয়ে থাকিলেই যে বউ থাকিবে তার কী মানে আছে ? বউ মরিতে জানে না ? কেবল একটি নাকি, দুটি বউ মরিয়াছে ধনঞ্জয়ের। চারটি ছেলেমেয়েই তার প্রথম বউয়েব, পাঁচ নম্বব সন্তানকে জন্ম দিতে গিয়া সে বউ মরিয়া যায় পাঁচবছর আগে। তারপব ধনঞ্জয় যাকে বিবাহ করিয়াছিল, প্রথম সন্তানকে জন্ম দিতে গিয়া সেও মরিয়া গিয়াছে আজ প্রায় দু-বছর। সেই হইতে ধনঞ্জয়ের বৈরাগ্যা আসিয়াছে, আর সে বিবাহ করিবে না।

আমার বউ বাঁচবে না চাঁদের মা, ছেলেমেয়ে হতে গেলেই মরে যাবে। মোদেব গাঁয়েব রাধাচরণ কবরেজ নিজে বলেছে।

এক চড়ে মাথাটি ঘুরিয়ে দিতে পারনি তোমাদেব গাঁয়ের রাধাচরণ কবরেজের ? কথা শোন একবার !

দেহ বড়ো হইলে বুদ্ধি নাকি কম হয়। এই হিসাবে ধনঞ্জয়ের একফোঁটা বুদ্ধি থাকাও উচিত নয়। সে যেন তারই প্রমাণ দিবার জন্য বলে, না না, কথাটা সত্যি। তবে যদি তোমার মতো বড়োসড়ো কাউকে—

পাকা ঘরে ধনঞ্জয়ের থাকিবার ব্যবস্থা করিয়া রাব্রে রান্নাঘরে তাকে ডাকিয়া যশোদা তার দেশের গল্প শুনিতোছিল। উনানে মস্ত কড়াই চাপাইয়া সে তখন তেল গরম করিতেছে, ডাল সস্তার দিবে। কী বলিতেছে খেয়াল করিয়াই ধনঞ্জয় সভয়ে থামিয়া গিয়াছিল, কে জানে এবার যশোদা রাগের মাথায় কড়াইয়ের গরম তেলটাই তার গায়ে ঢালিয়া দিবে কিনা ! কিন্তু যশোদা রাগিল না, প্রচণ্ড শব্দে হাসিয়া উঠিয়া বলিল, তাই করো তবে এবার, আমাকেই বিয়ে করে ফেলো। বলিয়া হাসি আর যশোদার খামে না। জগতে যত মানুষ প্রাপ্য হাসি প্রত্যাখ্যান করিয়া হাসে না, তাদের সকলের ভাগের হাসি যশোদা যেন একাই বেদখল করিয়াছে। হাসির শব্দে সুধীর আসিয়া রান্নাঘরের দরজায় দাঁড়াইল, হাসির ধমক কিছুতেই সামলাইতে না পারিয়া কোনোমতে কড়াইটা নামাইয়া রাখিয়া যশোদা পালাইয়া গেল উঠানে।

উঠানে বড়ো তাড়াতাড়ি যশোদার হাসি থামিয়া গেল। এতটুকু উঠানে দাঁড়াইয়া প্রাণ ভরিয়া হাসা যশোদার পক্ষে অসম্ভব। এখানে দাঁড়াইলেই যেন চারিদিকের ঘরগুলি সরিয়া সরিয়া আসিয়া

তার হাসিকান্না চাপা দিবার চেষ্টা করে। ঘরে তো এ বকম হয় না ? এখানে তবু মাথার উপরে আকাশ আছে, ঘরে শিক বসানো জানালা ছাড়া কোথাও এতটুকু ফাঁক নাই। হয়তো ঘরের পক্ষে খাঁচা হওয়াটাই স্বাভাবিক বলিয়া পীড়ন করে না, উঠান ফাঁকা হওয়া উচিত বলিয়া এখানকার সংকীর্ণতা বাগে পাইলেই যশোদার দম আটকাইয়া দিতে চায়।

বাপের বাপ—কী হাসাতেই পারে লোকটা। দম আটকে মবলাম হাসতে হাসতে ! বলিয়া আব একটুও না হাসিয়া রান্নাঘরে ঢুকিয়া যশোদা আবার উনানে কড়াইটা চাপাইয়া দেয়। ভাবিতে থাকে যে, কী কৃষ্ণণে বেশি লোককে থাকতে দেবার জন্য উঠানে ঘর তুলেছিলাম ! ঘর থেকে বেরিয়ে একটু হাঁপ ছাড়বার জায়গা নেই। এই কথা ভাবিয়া মনে মনে আপশোশ কবিত্তে করিতে চাঁদের কথা মনে পড়িয়া যশোদা বড়ো কষ্ট হয়। প্রবল বন্যাব মতো যেভাবে হাসি আসিয়াছিল, সেইভাবে পুত্রশোক ভিতব হইতে ঠেলিয়া উঠিতে থাকে। কিন্তু এমন খাপছাড়া অদ্ভুত সংযম যশোদার যে, হাসি ঠেকাইতে না পারিলেও শোকটা অনায়াসে চাপিয়া রাখিয়া বান্না করিয়া যায়।

ধনঞ্জয়ের সঙ্গে এত হাসাহাসি সুধীরের ভালো লাগে নাই, একফাঁকে সে যশোদাকে জিজ্ঞাসা করে, ওকে যে দালান ঘরে থাকতে দিলে, ভাড়া দিতে পারবে ? মতি কী বলছিল জান, ওর একটি কানাকড়ি সম্বল নেই।

বেলের ইয়ার্ডে যশোদা সুধীরের একটি চাকরি করিয়া দিয়াছে। কাজটি ভালো, আগের চেয়ে সুধীরের উপার্জন বাড়িয়াছে। সুধীরের গর্ব ও গৌরবের সীমা নাই।

যশোদা বলে, তোমার সে কথা ভাববার দবকার ? কাজকর্ম হলেই সম্বল হবে।

সুধীর সবজাস্তার মতো হাসিয়া বলে, হচ্ছে ! কাজ করার মতলব ও সব লোকের থাকে ? রোজগার কবলেও একটি পয়সা আদায় করতে পাববে ভেবেছ ? যদিইন পারে থেকে তোমার ঘাড়টি ভেঙে পালাবে।

যশোদা রাগিয়া বলে, পালায় পালাবে, তোমার কী ক্ষেতি হবে শূনি ? তোমরা বড়ো বাকি বেখেছ আমার ঘাড় ভাঙতে। কতগুনো টাকা পাব তোমার কাছে একবারটি মনে পড়ে ?

শূনিয়া অপমান মুখ কালো কবিয়া সুধীর সবিয়া যায়। শত্রু অকথা গাল দিলেও সুধীরের এ রকম অপমান বোধ হইত না, আপনজনের মতো ভালো পবামর্শ দিতে আসিয়া এ রকম আঘাত খাইলে মানুষের সহ্য হয় ? মনে মনে গর্জাইতে গর্জাইতে শূনির ভাবে কী, এ মাসের বেতনটা একবার হাতে পাইলে হয়, যশোদার একটি পয়সা বাকি রাখিবে না। কিন্তু একমাসের বেতনে তো কুলাইবে না ! যশোদার কাছে সে যে অনেক টাকা ধাবে ! যশোদা পাওনাটা অবিলম্বে সংগ্রহ কবিয়া তার গায়ের উপর ছুঁড়িয়া ফেলিয়া দিবার সুখটা অনুভব কবিবার আগ্রহে কত মতলবই যে সে মনে মনে ঠাওরাইতে থাকে। মানুষের পাওনা ফাঁকি দিবার মতলব ঠাওরানোই যার চিরদিনের অভ্যাস একেবারে উলটো ধরনের ভাবনা ভাবিবার সময় তার চিন্তাক্রান্ত মুখে এমন একটা আশ্চর্য দুঃখের ছাপ পড়ে যে, দেখিলে অবাক হইয়া যাইতে হয়, মনে হয় এইমাত্র লোকটার কোনো আপনজন মরিয়া গেল নাকি ?

মানুষকে কাজ জুটাইয়া দিতে যশোদা বড়ো ওস্তাদ। অনেক বছর ধরিয়া ধীরে ধীরে আপনা হইতে অনেকগুলি ছোটবড়ো কলকারখানা সঙ্গে তার একটা যোগাযোগ গড়িয়া উঠিয়াছে, অনেক কারখানার ম্যানেজার হইতে সর্দার কুলি পর্যন্ত তাকে চেনে—চোখে না দেখিলেও নাম শূনিয়াছে। অনেক শ্রমিকের সঙ্গে যশোদার মুখোমুখি পরিচয় আছে, অনেকে তাকে কেবল দু-একবার চোখে দেখিয়াছে, অনেকে সহকর্মীদের মুখে তার নাম শূনিয়াছে। কার কাজ নাই, কার কাজ চাই, কে কাজের লোক, কে অকেজো, কোথায় কোন কারখানায় কী ধরনের লোক নেওয়া হইতেছে বা হইবে, এ সব খবর ঘরে বসিয়াই এত বেশি পাওয়া যায় যে খাতাপত্রের সাহায্য ছাড়া মনে রাখা অসম্ভব। কিন্তু

ও সব হিসাব রাখার বলাই যশোদার নাই, সেটা তার পেশাও নয় ! কোনো আদর্শ, উদ্দেশ্য বা স্বার্থসিদ্ধির জন্য সে চেষ্টা করিয়া সংগ্রহ করে নাই, শ্রমিক-জগতে আপনা হইতে তার একটা স্থান জুটিয়া গিয়াছে, প্রথমে খুবই সংকীর্ণ ছিল এখন পরিসর বাড়িয়াছে।

কিন্তু নিজের স্থানটির সীমা যশোদা কখনও অতিক্রম করে না, চেষ্টা করিয়া পরিসর বাড়াইবার চেষ্টাও করে না। যাদের সঙ্গে তার সংযোগ আছে, সোজাসুজি পরিচিত না হোক অন্তত পরিচিত কারও মধ্যস্থতায় যাদের সঙ্গে তার ব্যক্তিগত যোগাযোগ একটা স্থাপিত হইয়াছে অথবা হয়, কেবল তাদের সম্বন্ধে যেসব খবর কানে আসে সেইগুলিই সে বাছিয়া বাছিয়া মনে রাখে। চেষ্টা করিয়া সে মনে রাখে তা নয়, মনে থাকিয়া যায়। হয়তো কানে আসিল ভারতলক্ষ্মী মিলের লুমে কাজ করিবার জন্য কয়েকজন লোক চাই ; সঙ্গে সঙ্গে ভারতলক্ষ্মী মিলের সহকারী ম্যানেজারের সঙ্গে চাক্ষুষ পরিচয় না থাকিলেও লোকটি তাকে বড়ো বিশ্বাস করে, আজ পর্যন্ত যত লোককে সে পাঠাইয়াছে প্রত্যেককে ওখানে নেওয়া হইয়াছে ; সেই সঙ্গে যশোদার আরও মনে পড়িয়া গেল লুমে কাজ করিয়াছে এমন সাতজন বেকারকে সে জানে তাদের দুজন একেবারে অপদার্থ, দুজন সুবিধাজনক নয়, তিনজন ভালো। এক টুকরা কাগজ ছিড়িয়া পেঙ্গিল দিয়া যশোদা তখন আঁকাবাঁকা অক্ষরে সাত জনের নাম লেখে, তিনজনের নামের পর লেখে good, দুজনের নামের পরে লেখে not good, আর দুজনের নামের পর লেখে bad ; লিখিয়া not good ও bad চারজনকে একটু সুযোগ দিবার অনুরোধ করিতে গিয়া যশোদার ইংরাজি জ্ঞানে কুলায় না, চোখকান বুজিয়া বাংলাতেই অনুরোধটা জানায়, তারপর নিজের নাম স্বাক্ষর করে। অনুরোধটা কাকে করিতেছে, কী জন্য করিতেছে, সাতটি নাম ও নামের পাশের মন্তব্যের অর্থ কী এ সব কিছুই কাগজের টুকরাটি পড়িয়া বুঝিবার উপায় থাকে না, কিন্তু ভারতলক্ষ্মী মিলেরই একজন শ্রমিকের সঙ্গে সাতজন কর্মপ্রার্থীকে মিলে পাঠাইয়া দিলে সেখানকার গুজরাটি সহকারী ম্যানেজার জলের মতো সমস্ত পরিষ্কার বুঝিয়া ফেলে। কাগজের টুকরাটি যত্ন করিয়া রাখিয়া সাতজনকেই হয়তো কাজে লাগাইয়া দেয়, হয়তো পাঁচজনকে কাজে লাগাইয়া বাকি দুজনকে ফিরাইয়া দেয়।

যশোদার মতে যারা bad কাজ না পাইলে অথবা কাজ পাইয়া কিছুদিন পরে ববখাস্ত হইলে তারা যশোদার কাছে নালিশ জানাইতে আসে। যশোদা বলে, আমি কী করব ? কাজ জানো না, তার ওপর কাজে ফাঁকি দেবে, কে রাখবে তোমাদের ? তার চেয়ে এক কাজ কর না তোমরা, অন্যকাজে লেগে যাও। অন্য কাজে হয়তো তোমাদের মন বসবে।

তারা রাজি হয় না, কিছুতেই রাজি হয় না, রাগ করিয়া যশোদাকে প্রথমে কড়া কড়া কথা বলিয়া গাল দিবার উপক্রম করিয়াই যশোদার মুখ দেখিয়া থামিয়া যায়, তারপর একমাস কাটে, দু-মাস কাটে। মুখ কাচুমাচু করিয়া একদিন তারা আবার আসিয়া দাঁড়ায় যশোদার কাছে। কিছুদিন পরে হয়তো তাদের একজনকে দেখা যায় একটি আপিসের বারান্দায় বৃকের কাছে লাল ওরফে অফিসের নামের সংকেত লেখা লম্বা কোট গায়ে চাপাইয়া কলিংবেলের টুং টুং আওয়াজের প্রতীক্ষায় টুলে বসিয়া টুলিতেছে। আর এক জনকে দেখা যায় পাড়ারই ডায়মন্ড রেস্টোরেটে (ডবল ডিমের মামলেট মাত্র ১৫ পয়সা) প্যান্ডার চা-প্রিয় ছেলেবুড়োকে চা সরবরাহ করিতেছে। মুখের উপর হইতে একটা পরদা যেন সরিয়া গিয়াছে দুজনেরই, জীবনযাপনে দুজনেই বেশ মশগুল।

যশোদা কী করিয়া টের পায় ভগবান জানেন, বোধ হয় অনেকদিন এদের সঙ্গে এদেরই এক জন হইয়া বাস করিতেছে বলিয়া, কয়েকজন অলস ও অকর্মণ্যকে কেবল জীবিকা অর্জনের ভিন্ন পথ ধরাইয়া সে কাজের মানুষ করিয়া তুলিয়াছে। তার সখী কুমুদিনীর বাড়ির ঠিক পাশে নকড়ির ছিল কুঁড়ে, একমাসের বেশি নকড়ি কোথাও চাকরিতে টিকিয়া থাকিতে পারিত না, তার ছেলেমেয়ে বউয়ের সে কী দুর্দশা ! একবার যশোদার একখানা শাড়ি মাঝামাঝি ভাগ করিয়া নকড়ির বউ আর

মেয়ে তিনদিন ঘরের মধ্যে আটক থাকিবার পর বাহিরে আসিতে পারিয়াছিল। তারপর যশোদা নকড়ির তাড়িখানায় চাকরি করিয়া দিয়াছে, এবং জীবনযুদ্ধে এই চাকরির কর্মটি নকড়ির গায়ে যেন আঁটিয়া বসিয়া গিয়াছে, কোনোদিন খসিয়া পড়িবে না। আর সম্প্রতি নকড়ির বউ একখানা নতুন ডুরে শাড়ি পরিয়া সমস্ত পাড়া ঘুরিয়া সকলকে দেখাইয়া বেড়াইয়াছে, যশোদাকে পর্যন্ত।

ধনঞ্জয়ের জন্য কাজ জোগাড় করিতে গিয়া যশোদা কিন্তু বিপদে পড়িয়া গেল। একেবারে আনাড়ি মানুষটা, কোনো কাজ জানে না, কাজ শিখিবার বয়সও চলিয়া গিয়াছে। গায়ে জোর আছে, মাথায় মোট বহা আর ঠেলাগাড়ি ঠেলার মতো যে সব কাজ শুধু গায়ে জোর থাকিলেই মোটামুটি করা যায়, সে সব কাজও লোকটা করিবে না—অপমান হইবে। সহ্যও বোধ হয় হইবে না, প্রকাণ্ড একটা দেহ থাকিলেই তো কষ্ট সহ্য করার শক্তি জন্মায় না। চাষবাসের কাজ জানে, কিন্তু এখানে চাষবাসের কাজ যশোদা কোথায় পাইবে!

নিজের হাতে চাষ করতে তো? না অন্যকে দিয়ে কাজ করিয়ে নিজে ফপরদালালি করতে? নিজে কিছু করতাম বইকী।

কিছু কিছু করতে!

সেটা যশোদা আগেই টের পাইয়াছিল, মানুষটা একটু আরামপ্রিয় অর্থাৎ সহজ ভাষায় কুড়ে। আরামপ্রিয় মানুষ না হইলে রাগ-অভিমান এমন প্রবল হয়, কথায় কথায় বোধ হয় অপমান। নিখুঁত সৃষ্টি ভগবানের কৃষ্টিতে নাই ভাবিয়া যশোদার বড়ো আপশোশ হয়। কী অপরূপ একটা শরীর! ধরাবাঁধা কাজে অলস কিন্তু বাজে কাজে পরিশ্রম করিতে খুব পটু, পনেরো মাইল হাঁটিয়া বেড়াইয়া আসে, না বলিতেই বালতি বালতি জল তুলিয়া ছাতে বর্ষার শ্যাওলা সাফ করিয়া দেয়—রাত্রে চিত হইয়া শূইয়া শরৎকালের আকাশ দেখিবে! দেহের গড়নটা তাই তার বিকৃত হয় নাই, কেবল ভালো করিয়া খাইতে না পাওয়ার জন্যই বোধ হয় একটু—ধনঞ্জয়ের সর্বশ্রেণে চোখ বুলাইয়া যশোদা আন্দাজ করিবার চেষ্টা কবে ভালো করিয়া খাইতে না পাওয়ার জন্য কতটুকু ক্ষতি তার দেহের হইয়াছে, খাওয়া পাইলে আরও কতখানি পরিপুষ্ট দেখাইত তাকে।

কিন্তু কাজ? উপার্জনের ব্যবস্থা? বসাইয়া বসাইয়া লোকটাকে পেট ভরিয়া খাওয়াইলেই তো চলিবে না, যতই ভালো লাগুক ওব খাওয়া দেখিতে! অনেক ভাবিয়া যশোদা একদিন বলিল, এক কাজ করো তুমি। সুধীরের সঙ্গে রেলের ইয়ার্ডে যাও, চান্দ্রঃ ঘুরেফিরে কাজকন্মো দ্যাখো গিয়ে, তারপর ওখানেই সুবিধামতো একটা কাজ তোমাকে জুটিয়ে দেব।

কাজ হবে কিনা না জেনে—

যশোদা জোর দিয়া বলিল, হবে। নইলে মিছিমিছি তোমায় পাঠাব, মাথা খারাপ নাকি আমার? কাজ তুমি করতে পারবে কিনা সে হল ভিন্ন কথা।

ধনঞ্জয়ের সঙ্গে যশোদা এইসব আলোচনা করে আর সুধীর এদিক হইতে ওদিক যাওয়ার সময় আর ওদিক হইতে এদিক আসার সময় তীব্রদৃষ্টিতে দুজনকে দেখিয়া যায়। গা জালা করে সুধীরের। না খাইয়া কাজে গেলে ক্ষুধায় সে কষ্ট পাইবে বলিয়া এই যশোদাই কি একদিন তাকে খাওয়ার সুযোগ দিতে ছল করিয়া বাড়ি ছাড়িয়া চলিয়া গিয়াছিল? তার জন্য নিশ্চয় নয়, বৃড়া মতির জন্য। বৃড়া মানুষকে যশোদা কষ্ট দিতে চায় নাই। তা 'ড়া, দুবেলা খাইতে দেওয়ার জন্য যশোদা টাকা নেয়, জোরজবরদস্তি করিয়া খাওয়া বন্ধ করিবার তার কী অধিকার আছে, তাতে গোলমাল হইতে পারে। এই সব ভাবিয়াই হয়তো যশোদা সেদিন ও রকম বুদ্ধি আঁটিয়া তাদের খাওয়ার সুযোগ দিয়াছিল, নিজেরও মান বাঁচাইয়াছিল। চালাক তো কম নয় যশোদা। অসুখের সময় সেবা করা? জরিমানার টাকা দেওয়া? এ সমস্তের চমৎকার ব্যাখ্যা সুধীর এখন আবিষ্কার করিতে থাকে। কী আর এমন সেবাটা যশোদা তার করিয়াছিল, ও রকম সে তো অসুখবিসুখের সময় সকলেই করে। যাদের কাছে

থাকা আর খাওয়ার জন্য টাকা নেয় দুবেলা রাঁধিয়া তাদের খাওয়ানোর মতো অসুখের সময় সেবা করাটাও তো যশোদার সাধারণ কর্তব্য।

জরিমানার টাকাটা যশোদা দিয়াছিল, নিছক তাকে হাতে রাখিবার জন্য। সে কাজের লোক, তার মতো কাজের লোক আর কটা আছে ? সে হাতে থাকিলে ধীরে ধীরে জবিমানার টাকাও আদায় হইয়া যাইবে, অন্যদিকেও অনেক সুবিধা হইবে, এইসব হিসাব করিয়াই যশোদা তার সেই উপকারটা করিয়াছিল সন্দেহ নাই। রেলের ইয়ার্ডে তাকে কাজটা জুটাইয়া দিয়া মাঝখান হইতে যশোদা কিছু টাকা মারিয়াছে কিনা তাই বা কে জানে !

সুধীর চিরকাল জানিয়া আসিয়াছে মানুষের চালচলনই এই রকম, এই ধরনের ব্যবহারই মানুষ মানুষের সঙ্গে করিয়া থাকে, অন্য সময় অন্য কারণেও সঙ্গে হইলে রাগ করার কিছু আছে বলিয়া সে ভাবিতে পারিত না। এখন যশোদার সম্বন্ধে একটির পর একটি পরিবর্তনশীল মানসিক ঘূর্ণিপাকে পড়িয়া তার মনে ধাঁধা লাগিয়া যাইতে থাকে। অভিনব প্রত্যাশা ও প্রার্থনার মন্দিরে গৌয়ারগোবিন্দরা চিরদিন হরিজনের মতো ভীৰু, সংকোচ আর অস্বস্তিতে মৃতপ্রায়—যতদিন না ধর্মান্তর গ্রহণ করিয়া মনের সুখে মন্দিরটাই ভাঙিয়া চুরমার করিবার সুযোগ পায়।

কাজে যাওয়ার সময় ধনঞ্জয়কে সঙ্গে নিয়া গিয়া চারিদিক দেখাইয়া শুনাইয়া দিবার প্রস্তাবে সে চোখে অন্ধকার দেখে।—আমার কাজটি ওকে দেবার মতলব করছ বুঝি ?

তোমার কাজটি ছাড়া জগতে আর কাজ নেই ?

শরৎকাল আসিবার পর অন্যান্য বছরের মতো এবারও চারিদিকে সকলের মধ্যে যশোদা একটা বিস্ময়কর মানসিক উদ্বেগ লক্ষ্য করে। চাঁপা ও কালোর বিবাদ চরমে উঠিয়াছে, ঠেলাঠেলি ও গালাগালিব বদলে চাঁপা এখন নিজে কালোর সঙ্গে ভালো ব্যবহার কবে আব একদিকে জগৎকে দিয়া তাকে পীড়ন করায় অন্যদিকে সকলের কাছে তার নামে অকথা কুৎসা বটায়। জগৎকে হারানোর ভয়ে ব্যাকুল হইবার কোনো কাবণ ঘটে নাই, জগৎ নিজেও বরং বিবাহের দিনটি আগাইয়া আনিবার জন্য ব্যাকুল হইয়া পড়িয়াছে, তবু চাঁপার দুর্ভাবনার যেন সীমা নাই। তা ছাড়া, মাঝে মাঝে সম্পূর্ণ অকারণে তার মুখে এমন একটা হতাশার ছাপ দেখা যায় যে, কালোর সম্বন্ধে তার বাড়াবাড়িটা একটু কমানোর জন্য তাকে ধমক দিবে ভাবিয়াও যশোদা ধমক দিতে পারে না।

পরেরশকে একদিন পুলিশ ধরিয়া নিয়া যায়।

এতকালের মধ্যে এই দ্বিতীয়বার চুরির জন্য যশোদাব ভাড়াটে পুলিশের হাতে পড়িল। যশোদার মনটা বড়োই খারাপ হইয়া যায়। পবেশকে চলিয়া যাইতে বলাই উচিত ছিল। আগে কোনোদিন চুবি করে নাই বা ভবিষ্যতে সুযোগ পাইলে কবিবে না, কিন্তু চুরি করা যে কোনোদিন এদের কারও পেশা ছিল না, রাত্রির অন্ধকারে গা-ঢাকা দিয়া গোপন অভিযানে বাহির হইবার ত্রাস ও উত্তেজনার স্বাদ যে এরা কেউ পায় নাই, যশোদা তা জানে। পরেশের মতো সে সব মানুষের জাতই আলাদা, তাদের চিনিতো যশোদার বিশেষ কষ্ট হয় না। তবু জানিয়া-বুঝিয়াও পরেশের সম্বন্ধে কেন যে মনের দুর্বলতা আসিয়াছিল !

পরেশের বউকে সে জিজ্ঞাসা করিল, এবার তুমি কী করবে ?

পরেশের বউ বলিল, কালীঘাটে আমার বাপের বাড়ি, আমায় যদি কালীঘাটে দিয়ে এসো যশোদাদিদি ?

কালীঘাটে তার বাবার বাড়ির ঠিকানা পরেশের বউ জানে না, কিন্তু মন্দিরের কাছে গেলে সেখান হইতে চিনিয়া যাইতে পারিবে। নন্দর সঙ্গে তাকে পাঠাইবার ব্যবস্থা করিবে বলায় পরেশের বউ আপত্তি করিল, মিনতি করিয়া বলিল, না দিদি, পুরুষের সঙ্গে যাব না।

নন্দ তো ছেলেমানুষ, খোকার মা ?

হোক ছেলেমানুষ, পুরুষমানুষ তো, নন্দর সঙ্গে তাকে যাইতে দেখিলেই তার বাবা সন্দেহ করিবে, পাড়া-প্রতিবেশী সন্দেহ করিবে।

তুমি আমায় দিয়ে এসো দিদি, পায়ে পড়ি তোমার।

ধনঞ্জয়কে সঙ্গে করিয়া যশোদা পরেশের বউকে পরদিন সকালবেলা তাব বাপেব বাড়ি পৌঁছিয়া দিল। তারপর গেল মন্দিরে। এককালে এ অঞ্চলও নাকি শহরতলি ছিল। কবে ? যখন এখানে সবে শহরের পত্তন হইয়াছিল, তখন ?

ধনঞ্জয় মস্ত বিদ্বান, স্কুলে ইতিহাস পড়িয়া যত বড়ো শরীর প্রায় তত বড়ো ঐতিহাসিকে পরিণত হইয়া গিয়াছে। সে বলিল, কলকাতা শহর যখন পত্তন হয়, সেই ইংরেজ আমলে, এটা তখন গাঁ ছিল।

সেই ইংবেজ আমল মানে ? এটা কোন আমল ?

ইংরেজ আমলের গোড়ার দিকে গো। ওই যে ভবানীপুর না, যেখানটা এখন আসল শহর, ওইখানটাও আগে শহরতলি ছিল, শ্যাল ডাকত দিনদুপুরে।

দুৎ !

দুৎ ? কেন, দুৎ কেন ? তিনটে গাঁ নিয়ে হল কলকাতা শহর, তাহলে একদিন ভবানীপুর কেন শহরতলিও তো শ্যাল ডাকতে পারত অনায়াসে, ওখানটা যখন গাঁ ছিল ?

কথাটা বিবেচনা করিয়া যশোদা বলিল, সে হিসাবে সব জাগাই তো এককালে গাঁ ছিল।

ধনঞ্জয় কবুণার হাসি হাসিয়া বলিল, তা কেন হবে ? কলকাতা হল বাংলাব রাজধানী, ভাবতবর্ষের রাজধানী হল দিল্লি। কলকাতাব যখন চিহ্নও ছিল না তখনও দিল্লি শহর ছিল। এটা শহর নাকি ? এটা হল—এটা হল নরক। বাঙালিরা খুব বজ্জাত কিনা তাই ইংরেজরা তাদের জন্যে এই নরক বানিয়েছে, কলকাতা শহর আছে বলেই তো বাঙালির এই দুর্দশা। ছেলেগুলো একবার কলকাতা আসে আব বিগড়ে যায়, আমাদের গায়ে কত ছেলে অমন গেছে। একটা বছর তুমি কলকাতা থাক, বাস্ আর গায়ে গিয়ে বাস করতে পাববে না। কলকাতাব মতো পাঁজি জায়গা আছে ! পেট ভরে মানুষ খেতে পর্যন্ত পায় না বাছা তোমাদের কলকাতায়, মা !

যশোদা ফাঁস করিয়া উঠিল, কেন, পেট ভবে খেতে পারই না তোমাকে ?

ধনঞ্জয় লজ্জিত হইয়া বলিল, আমার কথা বলছি নাকি ? যেমন ধব ওই খাবারের দোকানটা, চার আনার খাবার কেনো, একবারটি মুখে দিতে কুলোবে না।

ভারী খাইয়ে তুমি তাই বলছ। এক সের রসগোল্লা খেলে ঢেকুর তুলবে।

যশোদা আর একটু খোঁচাইতেই ধনঞ্জয় বাগ করিয়া তার খাওয়ার শক্তির পরিচয় দিতে স্বীকার হইয়া গেল। পাঁচ টাকার একটা নোট সঙ্গে করিয়া যশোদা বাহির হইয়াছিল, নতুবা সে এ পরীক্ষা দেওয়াব জন্য ধনঞ্জয়কে খাপাইয়া তুলিত কিনা সন্দেহ। নিজেবও যশোদার ক্ষুধা পাইয়াছিল বইকী, ভালো খাবার খাইতে তার নিজেবও তলে তলে বেশ একটু লোভ ছিল বইকী। যশোদা ভাত খায় তার সবচেয়ে জোয়ান ভাড়াটেব তিনগুণ সেই জনাই সে মাঝে মাঝে রীতিমতো সংকোচ বোধ করে, প্রাণ ভরিয়া ভালো খাবার খাওয়ার সাধটা তার সাধারণত চাপাই থাকে। আজ ধনঞ্জয়ের সঙ্গে নিশ্চিন্ত মনে পেট ভরিয়া খাবার খাইল—ধনঞ্জয়ের খাওয়ার পরিমাণটা তার চেয়েও বেশি, এই জন ধনঞ্জয়ের কাছে বসিয়া খাইতে তার লজ্জা করে না।

দুজনকে একত্র দেখিলেই লোকের একটু অবাক হইয়া চাহিয়া থাকার কথা, দোকানি সবিস্ময়ে দুজনের খাওয়া দেখিতে লাগিল। তারপর হাসিয়া ফেলিল।

চোখে পড়ায় ধনঞ্জয় রাগিয়া বলিল, হাসি কী জন্যে শুনি ?

যশোদা বলিল, আমাদের খাওয়া দেখে হাসছে আর কী।

দোকানির হাসি নিভিয়া গিয়াছিল, হাতজোড় করিয়া সে তাড়াতাড়ি বলিল, আঞ্জে না গিন্নিমা, খাওয়া দেখে কী হাসতে পারি ! আপনারা খাবেন আঞ্জে, তবে তো আমাদের দুটো পয়সা ! আপনাদের দেখে বড়ো আনন্দ হল কিনা মনে, তাই হাসলাম একটু মনের সুখে। আমার একটি দিদি আছে গিন্নিমা, আমার পিসতুতো দিদি, তেনাও আপনারই মতো আঞ্জা।

যশোদা বলিল, বটে নাকি ?

দোকানি বলিল, আঞ্জা। তবে তেনার বয়েসটা কিছু বেশি হবে, চুলে পাক ধরে গেছে। আমরা যাই, তা তামাশা করে বলেন কী যে গুরুজন আমি, আমায় পেলাম কর রসিক। যেই পেলাম করতে মাটিতে মাথা ঠেকাই, মাথার পরে পা-টি তুলে দেয়। বাস্ সব নড়নচড়ন বন্ধ। পা-টি না সরালে আর মাথাটি সরাবার জো নেই।

বেশ বুঝা যায় শেষটুকু বাড়ানো ও বানানো গল্প। যত শক্তিমতী পিসতুতো বোনই মাথায় পা রাখুক, মাথা নাড়ানো চলবে না এত জোরে পায়ের চাপ দিয়া তামাশা করার শক্তি তার থাকিতে পারে না, কারণ মাথায় ও রকম চাপ পড়িলে ডাক্তার ডাকিবাব দরকার হয়। রসিক কেবল রসালো খাবারের দোকান করে নাই, মানুষটাও সে রসিক বটে। যশোদার শুনিতে বেশ মজা লাগিতেছিল।

রসিক বলিল, কিন্তু হায় অদেস্ত ! বোনাইটি আমার এই এইটুকুন মনিষ্যি—একটা বাচ্চা ছোকরার সমান। মা কালী আপনাদের কেমন সুন্দর মিল করেছেন দেখে তার কথাটা মনে পড়ল কিনা, তাই হাসছিলাম গিন্নিমা।

অনেক বেলা হইয়াছে, গঙ্গার ঘাটে বসিবার আর সময় ছিল না, তবু দুজনে একটু বসিল। খাওয়াটা বড়ো বেশি হইয়াছে। অনেক নারী-পুরুষ ঘাটে স্নান করিতেছে, লজ্জাটা নারী ও পুরুষ উভয়েরই কম, মানুষের যতটা থাকা দরকার প্রায় ততটুকু—দেখিলে কে বলিবে তারা শহব বা শহরতলির অধিবাসী, স্নানের সময় অন্তত স্বাভাবিকতার পবিত্রতাটুকু পাওয়ার জ্ঞানই যেন তারা বাড়তি সভ্যতা ত্যাগ করিয়াছে।

আমি সত্যি হাতির মতো দেখতে, না ?

কই না, তুমি তো মোটা নও।

হাতি কী আর মোটা, হাতির চেহারাই হাতির মতো। কোথেকে যে হলাম এমন ! আমার বাপ-মা তো এমন ছিল না, আমার ভাইটা তো এমন নয়, বোন আছে একটা সে রীতিমতো সুন্দরী—হ্যাঁ, মাইরি বলছি তোমায়। বিশ্বাস হল না ?

ধনঞ্জয় কী একবার যশোদাকে বলিতে গেল, তুমিও রীতিমতো সুন্দরী ? কথাটা কেমন শোনাইত কে জানে, জীবনে প্রথম একজন মানুষের কাছে কথাটা শুনিতে যশোদার কেমন লাগিল তাই বা কে জানে ! কিন্তু ধনঞ্জয় কথাটা জোলো করিয়া ফেলিল এইভাবে যে, তুমিও তো খুব বেশি খারাপ নও।

খুব বেশি না হই—খারাপ তো ?

কে বললে খারাপ ?

যশোদা হাঁ করিয়া চাহিয়া থাকে, তিনটি যুবতি তৈরি করা চলিত এতগুলি হাড়মাংসের পুতুলের মতো। একটু বৃদ্ধি বিশ্বাস তার হয় কথাটাকে, বড়ো সাধ কিনা বিশ্বাস করার। দেখিতে সে খারাপ নয় এ কথা বিশ্বাস করিবার সাধ ছিল নাকি যশোদার ? হয়তো ছিল এতদিন খেয়াল করিয়াও খেয়াল করে নাই, খেয়াল করিতে সাহস পায় নাই। ধনঞ্জয় তাকে স্পষ্ট সুন্দরী বলিলে সে বোধ হয় এই খেয়ালখুশির রসালো ফাঁদে পড়িত না, শুনিতে ভালো লাগা আলাদা কথা, সে মিঠা কথায় কাবু হওয়ার মানুষ যশোদা নয়, কিন্তু ধনঞ্জয় যেভাবে যা বলিয়াছে, সে কথাটা তো সত্য হওয়া আশ্চর্য নয়। তবু উঠিবার আগে ছড়া কাটিয়া রসিকতা করিতে যশোদা ছাড়িল না—

ছদ্মবেশী ভীমকে পেয়ে কীচক খুশি ভারী,
সেরিক্কী লো ! এ জগতে তুমিই সেরা নারী।

ধনঞ্জয় রসিকতা না বুঝিয়া ফুরু হইয়া বলিল, আহা, কীচক তো ভীমকে আর দেখতে পায়নি চোখে, ভেবেছিল দ্রৌপদী বুঝি। আমি তো তোমায় চোখে দেখে বলছি, দেখতে তুমি খারাপ নও। যশোদা হাসিয়া বলিল, আ মর ! এ দেখি কচি খোকার মতো অভিমান করে। তুমি কি বাবু কীচক, না আমি ছেরিক্কী, যে গায়ে লাগল ?—নাও ইবারে বাড়ি চলে, যা রোদটা উঠেছে।

এদিকে পাড়ার দুজন স্ত্রীলোকের উপর রান্নার ভার দিয়া ধনঞ্জয়ের সঙ্গে যশোদাকে বাহির হইয়া যাইতে দেখিয়া সুধীর চোখে অন্ধকার দেখিতে থাকে। কেন গেল যশোদা, কী দরকার ছিল যশোদার যাওয়ার ? যদি বা গেল, নন্দ থাকিতে ধনঞ্জয়ের সঙ্গেই বা গেল কেন ? সুধীরকে তো সে বলিতে পারিত, আমার সঙ্গে চলে। সুধীর। একদিন না হয় সুধীর কাজে যাইত না।

নন্দ কীর্তন শিখিতে যাইতেছিল, তার কাছে সুধীর পরেশের বউয়ের বিবরণ এবং যশোদার কালীঘাট যাওয়ার প্রয়োজন খুঁটিয়া খুঁটিয়া জানিয়া একটু যেন শান্ত হইল মনটা। যশোদা বাধ্য হইয়া গিয়াছে। হয়তো সুধীরের কাজে যাওয়া হইবে না ভাবিয়াই বেকার ধনঞ্জয়কে সঙ্গে নিয়া গিয়াছে। তবু, সব কথা একবার তো সে বলিতে পারিত যে, এখানে যাচ্ছি সুধীর, তোমার কাজ কামাই হবে তাই ধনঞ্জয়কে সঙ্গে নিয়ে গেলাম !.. এভাবে তাকে জানাইয়া যাওয়ার অর্থই যে তার অনুমতি নিয়া যশোদার কালীঘাটে যাওয়া এবং তার অনুমতি নিয়া যশোদার কোনো কাজ করার সঙ্গত বা অসঙ্গত কোনো কারণই থাকিতে পারে না, এ সব সুধীরের মাথায় আসে না। অত সব ভাবিবার জানিবার বা বুঝিবার ক্ষমতা তো তার নাই। সে রাগ করিতে জানে, তাই সোজাসুজি যশোদার উপর রাগ করে।

তারপর সে ইয়ার্ডে যায় কাজ করিতে।

ওয়গনে কুলিরা মাল বোঝাই দেয়, সুধীর সর্দা বি করে। মাল তুলিতে একটু সাহায্য করে, কুলিদের তাড়া দেয়, দাঁড়াইয়া দাঁড়াইয়া বিড়ি টানে, হঠাৎ ওয়গনের ভিতরে ঢুকিয়া একটা মাল এদিকে একটা মাল ওদিকে কয়েক ইঞ্চি সরাইয়া দেয়, থাকি-থাকিয়া বস্তাগুলি গোগে আর রাজেনকে জিজ্ঞাসা করে, কটা বস্তা যাবে বললেন আজ্ঞে এটাতে ?

রাজেন যশোদার সখী কুমুদিনীর স্বামী, রাজেনকে বলিয়াই যশোদা এখানে সুধীরের কাজ জুটাইয়া দিয়াছে। কুমুদিনী জানিলে অবশ্য যশোদার লোককে কাজ দেওয়ার সাহস রাজেনের হইত না, কিন্তু কুমুদিনী জানে না। যশোদাকে রাজেন পছন্দ করে, ভয় আর খাতিরও করে—কিন্তু সেটা কুমুদিনীর অজ্ঞাতই আছে। আড়ালে যাই বলুক দেখা হইলে কুমুদিনী সখীর মতো আলাপ করে যশোদার সঙ্গে, তখন তার কথা শুনিয়া আর মুখের ভাব দেখিয়া কে অনুমান করিবে যশোদাকে সে দু-চোখে দেখিতে পারে না, যশোদার নাম শুনিলেই তার মোটা শরীরের টিলা চামড়ায় জ্বালা ধরিয়া যায় ! যশোদার কাছে কোনো উপকার পাওয়ার সম্ভাবনা এটিলে নির্বিবাদে সেটা আদায় করিয়া নিতেও কুমুদিনীকে কোনোদিন কুণ্ঠিত দেখা যায় নাই। উপকার পাওয়ার পরেই যশোদার নিন্দায় কুমুদিনী মুখের হইয়া উঠিলে রাজেন প্রায় নির্বিচারভাবেই স্ত্রীর কথাগুলি শুনিয়া যায়, মাঝে মাঝে সায় দিয়া বিস্ময় ও বিরাগের দু-একটা সংক্ষিপ্ত মন্তব্য হয়তো করে। কাঁচাপাকা চুলে ঢাকা মাথাটি নাড়িতে নাড়িতে বলে, ছি ছি, ওকে আর বাড়িতে ঢুকতে দিয়ে না।

তারপর কাজে যাওয়ার সময় হয়তো যশোদার বাড়িতে একবার উঁকি দিয়া যায়, জীর্ণ শীর্ণ মুখের চামড়া কৌতুকে হাসিতে কুঁচকাইয়া কুমুদিনীর নিন্দাগুলি সব যশোদাকে শোনায়, বলে, শুনলে যশোদা, কী সব বলে তোমার নামে ?

যশোদা কিছুমাত্র বিচলিত না হইয়া বলে, বলুক গে যাক, মবুক গে যাক, আজ তো নতুন নয়। ছেলেবেলা থেকে এমনি করে বলছে আমার নামে। তবে কী জান সরকারমশায়, আমার জন্যে এর সত্যি মায়া আছে। এমনি বলে মুখে, কিন্তু—

বাড়িতে যতই নিরীহ হইয়া থাক, যশোদার কাছে যতই কৌতূকের হাসি হাসুক, মেজাজ কিছু রাজেনের একেবারেই ঠান্ডা নয়। সুধীর কয়েকবার বোকার মতো প্রশ্ন করিলেই তার মেজাজ গবম হইয়া যায়।

মনে থাকে না তোর নচ্ছার ? কবার বলব ?

নাকের মাঝখানে আঁটা চশমার ভিতর দিয়া বাজেন হাতের খাতাটির বাদামি রঙের পাতায় চোখ বুলাইয়া বলে, তেইশটা।

জায়গা থাকবে।

থাকবে তো তোর কী ? তোর বাবার ওয়াগন ? নির্দোষ মস্তবোর জবাবটা একটু কড়া হইয়া গিয়াছে ভাবিয়াই হয়তো রাজেন একটু মৃদু গলায় বলে, ছেচল্লিশটা বস্তা দুটো ওয়াগনে যাবে, তেইশ ভাগ হবে না রে পাঁঠা কোথাকার !

অ !—সুধীর তাড়াতাড়ি আর একবার ওয়াগনের ভিতরে গিয়া বস্তাগুলি গুনিয়া ফেলে। আরও কয়েকটি ওয়াগনে একই সময়ে মাল বোঝাই হইতেছিল। চটে মোড়া, কাঠের বাক্সে প্যাক করা, চৌকো গোল ছোটো বড়ো কত মাল এখানে আসিয়া জমা হইয়াছে, কাছে ও দূরে কত বিভিন্ন তাদেব গন্তব্যস্থান। প্রতিদিন রাশি রাশি মাল বাহিরে চলিয়া যায়, কিন্তু শহরের মালের ভান্ডার যেন অফুরন্ত। কথাটা ভাবিতে গেলে মাঝে মাঝে বিব্রত হইয়া সুধীরকে মাথা চুলকাইতে হয়, ব্যাপাবটা সে ঠিক বুঝিয়া উঠিতে পারে না। মাল যে কেবল এখান হইতে বাহিরে চলিয়া যায় তা অবশ্য নয়, ধুকিতে ধুকিতে ইঞ্জিন যে লম্বা ওয়াগনের সারি বাহির হইতে টানিয়া আনে সেগুলিও মালে বোঝাই থাকে, কিন্তু যে মাল বাহিরে যায় তার সঙ্গে এই সব মালের তফাতটা অনায়াসেই সুধীর বুঝিতে পারে। একই বস্তা হয়তো ফিরিয়া আসে, ওয়াগনে তুলিবার সময় যে প্যাকিং কেসটির উপর সে পানেন পিক ফেলিয়াছিল, কয়েকমাস পরে সেই প্যাকিং কেসটিই হয়তো অন্য এক ওয়াগন হইতে নামানো হয়, কিন্তু তবু সুধীর জানিতে পারে ভিতরের মাল বদলাইয়া গিয়াছে। কারণ—সুধীর এইভাবে মনের মধ্যে যুক্তি খাড়া করে—যে জিনিস এখান হইতে দুশো-তিনশো মাইল দূরে চালান গিয়াছিল সেই জিনিস কিছুকাল পরে আবার ফিরিয়া আসিবে কেন ? মানুষ তো পাগল নয় যে মিছিমিছি গাড়ি ভাড়া গুনিবে।

সুধীরের শ্লথ অপরিণত মস্তিষ্কে এই শহরের মাল আনাগোনার ব্যাপারটাব বিরাটত্ব সমুদ্র দর্শনার্থীর প্রথম সমুদ্র দর্শনের মতো একটা আয়ত্তাতীত বিস্ময় ও আনন্দে চিরদিন স্তম্ভিত ও মুগ্ধ করিয়া রাখিয়াছে। এ সম্পর্কে তার অভিজ্ঞতা আছে, ব্যাপক ও বিচিত্র। ভাবিতে গেলে তার মনে হয়, চিরটা জীবন সে বুঝি কেবল এই শহরের আমদানি-রপ্তানির সঙ্গে সংশ্লিষ্ট কাজই করিয়া আসিয়াছে। জেটিতে সে কুলির কাজ করিয়াছে, চোখ মিটমিট করিতে করিতে চাহিয়া দেখিয়াছে, ফ্রেনের সাহায্যে বিদেশি জাহাজে মাল ওঠানো-নামানোর সশব্দ প্রক্রিয়া, ছোটোবড়ো স্টিমার আর পানসি নৌকোয় নিজে সে তাড়াহুড়া হইচই করিয়া মাল বোঝাই দিয়াছে, মাল নামাইয়া নিয়াছে, শহরতলির খালগুলির দুপাশে গুদাম ও আড়তে কাজ করিবার সময় নৌকায় ধীরেসুস্থে মাল আনা-নেওয়া দেখিয়াছে ; রেলের ইয়ার্ডে কাজ করার সময় দেখিয়াছে, মালগাড়ির আশ্রয়ে মালের দুমুখি স্রোত আর কাজের অবসরে শহরতলির প্রধান পথের ধারে দাঁড়াইয়া দেখিয়াছে, মাল বোঝাই লরি ও গোরু মহিষের গাড়ির আনাগোনা, ঝাঁকা ও মোট মাথায় মানুষের যাতায়াত। বিদেশে কী যায় বিদেশ হইতে কী আসে, মফস্বলে কী যায়, মফস্বল হইতে কী আসে সে সম্বন্ধে একটা অস্পষ্ট আবছা ধারণা সুধীরের আছে।

ধারণাটি লইয়া সময়ে অসময়ে সে মনে মনে খেলা করে, সৃষ্টি করে অর্থহীন আবাস্তব কতগুলি সমস্যা এবং ভাবিতে ভাবিতে বিফল ও বিবস্ত্র হইয়া ওঠে। কত সমস্যাই যে মনে জাগে সুধীরের ! নদীটা যদি হঠাৎ মজিয়া যায়, জাহাজ স্টিমার নৌকার আনাগোনা যদি হইয়া যায় বন্ধ, কী হয় তাহা হইলে ? রেল কোম্পানি যদি হাজ্জামা সহিতে নারাজ হইয়া একদিন বলিয়া বসে, 'ধুস্তোর' এবং বলিয়া রেলগাড়ির চলাচল বন্ধ করিয়া দেয়, কী হয় তাহা হইলে ? বাজার-গাড়িতে, লরিতে, মানুষের মাথায় শহরে মাছ তরকারি আসা বন্ধ হয়, শহরের লোকের মাছ তরকারি সংগ্রহ করিবার কী উপায় হইতে পারে ? এই রকম আবও কত দুর্ভাবনাই আসে সুধীরের মাথায়। পচা জিনিস সম্বন্ধে মাছি যতটুকু জানে ব্যাবসা বাণিজ্যের সঙ্গে এতকাল এতভাবে সংশ্লিষ্ট থাকিয়া বেচারি ব্যাপারটা ততটুকুও বোঝে না কিনা।

কাজে ফাঁকি দিলে যতটা না হয় সুধীরকে চিন্তিত দেখিলে রাজেন রাগিয়া আগুন হইয়া যায়। তুই বড়ো বজ্জাত সুধীর, এক নম্বর বজ্জাত।

এত গরমে ক্রমাগত গালাগালি কাঁহাতক মানুষের সহ্য হয় ? সুধীরের রক্ত আর মাথা এক সঙ্গে গরম হইয়া ওঠে। মনে মনে রাজেনকে অকথ্য গালাগালি দিতে দিতে ওয়াগনের দরজা বন্ধ করিতে যায়। দরজা সিলমোহর করিতে হইবে, খড়ি দিয়া ওয়াগনের গায়ে সংকেত ও নির্দেশ লিখিতে হইবে, তারপর সরাইয়া দিতে হইবে পাশের লাইনে। প্রথম কাজ দুটি অন্যলোকের, শেষ কাজটা করিতে হইবে সুধীরকে। দরজা বন্ধ করিয়া সুধীর তীব্রদৃষ্টিতে রাজেনকে দেখিতে থাকে—শুকনো মোচাব মতো শীর্ণ মুখ তুলিয়া রাজেন তার দিকে চাহিলেই সে মুখ ফিরাইয়া নিবে, সেটুকু বুদ্ধি ও অভিজ্ঞতা সুধীরের আছে, কিন্তু যশোদার উপব নিবুপায় ক্রোধের জ্বালায় পেট ভরিয়া সুধীর খাইতে পাবে নাই, যার চেয়ে তার রাগের বড়ো প্রমাণ বোধ হয় আর কিছুই হইতে পারে না, কিন্তু কাজে আসিয়া সুধীর তার অতীত ও বর্তমান জীবনের কাজের সঙ্গে সংশ্লিষ্ট এই সব কথাই ভাবে। কাজ যারা কবে তাদের জীবনে এই জনাই কি রোমাঙ্গ থাকে না ?

কাজে সুধীর ফাঁকি দেয় না কিন্তু তাকে কোনো ফাঁকে চিন্তিত মুখে বিড়ি টানিতে দেখিলে রাজেন বড়ো রাগিয়া যায়। নিজের জন্য একটি লোক ছিল রাজেনের, এই কাজটা সে তাকে জুটাইয়া দিবে ভাবিয়াছিল, যশোদার অনুবোধে সুধীরকে কাজটা জুটাইয়া দিতে হওয়ায় সুধীরের উপরেই বোধ হয় তার মেজাজটা একটু বিগড়াইয়া আছে।

এক নম্বর ফাঁকিবাজ তুমি সুধীর—এক নম্বর বজ্জাত।

সুধীরের রক্ত আর মাথা একসঙ্গে গরম হইয়া ওঠে। পেটটাও বুঝি তার ক্ষুধার জ্বালা অনুভব করিতে আরম্ভ করিয়াছিল, মাঝ-দুপুর পার হইয়া গিয়াছে। চোখ তুলিয়া চাহিয়া দ্যাখে, ধনঞ্জয় কখন আসিয়া দাঁড়াইয়াছে, বিড়ির ধোঁয়া ছাড়িতে ছাড়িতে রাজেনের গালাগালিতেই বোধ হয় আমোদ পাইয়া মুখে হাসিও ফুটাইয়াছে। শুকনো মোচাব মতো শীর্ণকায় রাজেনের উপর যে বাগটা হইয়াছিল, সে বাগটা সুধীরের তাই গিয়া পড়ে দৈত্যের মতো বিশাল-দেহ মানুষটার ওপর। মনে মনে রাজেনের বদলে ধনঞ্জয়কে অকথ্য গালাগালি দিতে দিতে সে ওয়াগনের আরও কাছে সবিয়া যায়। ধনঞ্জয়কে সুধীর ভয় করে। ভূতপ্রেত দৈত্যদানার যে ভয় আচমকা ছোটো ছেলেদের ঘুম ভাঙাইয়া দেয়, অন্ধকারে মাকে জড়াইয়া ধরিয়া যে এয়ে ছোটো ছেলে থরথর করিয়া কাঁপিতে কাঁপিতে ফুঁপাইয়া ফুঁপাইয়া কাঁদে। সেই সঙ্গে হিংসা তো আছেই। গত কয়েকদিনের মধ্যে যে হিংসার তীব্রতা মারাত্মক গোপন রোগের মতো ভিতরে ভিতরে একটা দুর্বোধ্য যাতনায় সুধীরকে প্রায় পাগল করিয়া তুলিয়াছে।

ধনঞ্জয় কাছে আগাইয়া আসে। কালীঘাট গেলাম ভাই যশোদার সঙ্গে—যা মিস্টিটাই একপেট খাওয়ালে যশোদা। যত বলি আর খাব না, তত খুঁচিয়ে খুঁচিয়ে খাওয়ায়, বলে, এই খাওয়ার ক্ষমতা

নিয়ে তোমার এত গবেষা ! আর কটা রসগোল্লা যদি না খাও তুমি, চাদিকে তোমার নিন্দে রটিয়ে বেড়াব।—বাড়ি এসে ফের বলে কী, নাও চান করে, ভাত খেয়ে নাও চটপট, তারপর সুধীরের সঙ্গে কাজকর্ম দেখবে যাও।

সুধীর এখন হইতে ওখানে যায়, মাল গানে, ওয়াগনের দরজা বন্ধ করে, কুলিদের সঙ্গে ঠেলিয়া এ লাইন হইতে ওয়াগন পাশের লাইনে সরাইয়া দেয়। এই সব গোলমালের মধ্যে যে ওয়াগনটির কিছুক্ষণের জন্য নড়িবার কথা ছিল না সেটাকে সুধীর কীভাবে কখন ঠেলিয়া দেয় আর কীভাবে ওয়াগনের চাকা ধনঞ্জয়ের একটি পায়ের উপর দিয়া চলিয়া যায় ঠিক মতো কেউ বুঝিয়া উঠিতে পারে না।

হাসপাতালে যশোদার কাছে ধনঞ্জয় বলে, সরতে পেলাম কই ? পাশের লাইনে একটা ইঞ্জিন যাচ্ছিল তাই দেখছি, পাশ থেকে গাড়িটার ধাক্কা খেয়ে পড়ে গেলাম। লাইনের বাইরে পড়েছিলাম গো যশোদা, দুটো পা-ই যদি গুটিয়ে নিতাম তাড়াতাড়ি, হায় হায় ! কেমন যেন হকচকিয়ে গেলাম।

ধনঞ্জয় কাতরায় আর কাঁদে। এতবড়ো একটা দৈত্যের মতো মানুষের চোখ দিয়া জল পড়িতে দেখিয়া যশোদারও মনে হয়, একমাত্র চাঁদের শোকে দু-একটা দিন সে যা করিয়াছিল, আজ বুঝি তাই করিয়া বসিবে—সোজাসুজি কাঁদিয়া ফেলিবে। তবু সে জেরা করে।

একটা পা গুটিয়ে নিলে, আরেকটা নিলে না কেন ?

তা কি ধনঞ্জয় জানে ? অনেক ভাবিয়া সে আন্দাজে বলে, পড়বার সময় একটা পায়ে চোট লেগেছিল বলে বোধ হয়।

সেটা সম্ভব। যশোদা কয়েকবার যে প্রশ্ন করিয়াছে, আবার তাকে সেই কথাই জিজ্ঞাসা করে, কিন্তু গাড়িটা ঠেলে দিলে কে ?

কে জানে। দু-একজন সুধীরের নাম করছিল, কিন্তু তারাও ঠিক দ্যাখেনি, জোর করে বলতে নারাজ।

কিন্তু সুধীর ওয়াগনটা ঠেলিয়া দিবে কেন ধনঞ্জয়ের গায়ের উপর ? দিলেও ইচ্ছা করিয়া নিশ্চয় দেয় নাই। ভ্রু কঁচকাইয়া যশোদা ভাবিতে থাকে, তার মনের মধ্যে এই প্রশ্নটা বারবার জাগিতে থাকে যে, ধনঞ্জয়ের গায়ের উপর সুধীর ইচ্ছা করিয়া ওয়াগনটা ঠেলিয়া দিবে কেন ?

নন্দ বড়ো চমৎকার কীর্তন গাহিতে পারে। ছেলেবেলা হইতেই তার গানের দিকে ঝোঁক, গান শোনার সুযোগ পাইলে সে আর সব ভুলিয়া যাইত। এখনও ভুলিয়া যায়, গান শোনার সময় আর নিজে গাওয়ার সময়। মাইলখানেক দূরে কদমতলার বিখ্যাত কীর্তনিয়া দীননাথ তাকে কীর্তন শিখাইয়াছে। শিক্ষা এখনও শেষ হইয়াছে বলা যায় না, তবে যেটুকু নন্দ শিখিয়াছে সাধারণ লোকের পক্ষে তাই যথেষ্ট, আর কিছু শিখাইবার মতো বিদ্যা গুরুরও তার আছে কিনা সন্দেহ। তবু নন্দ এখনও নিয়মিতভাবে শিখিতে যায়, দীননাথ যা শেখায় ব্যাকুল আগ্রহে তাই শেখে, মাঝে মাঝে দু-চারটাকা গুরুরক্ষিণা দেয়। কীর্তন দীননাথের জীবিকার উপায়ও বটে, জীবনের একমাত্র নেশাও বটে, এখন পর্যন্ত নন্দর এটা শুধু নেশা হইয়াই আছে। নন্দর ইচ্ছা শুধু কীর্তন করিয়াই জীবনটা কাটাইয়া দিবে—কীর্তনের মতো আর কী আছে জগতে ? সোনার মতো নাম বলিয়া সুবর্ণ যার নাম, তার কথা অবশ্য আলাদা। তবে নন্দর কল্পনার চিরন্তনী রাখার সঙ্গে ভাবভাঙ্গি চালচলন কোনোদিক দিয়াই সুবর্ণের মিল নাই বলিয়া নন্দর বড়ো আপশোশ। কথা সুর ভাব ও আবেগ এই সব নিয়া যে কীর্তন, নন্দর মনে সত্যসত্যই তার একটা মূর্তি আছে, কখনও স্পষ্ট দেখিতে পায় কখনও আবছা হইয়া যায় ; সুবর্ণের সঙ্গে কতকটা মিল আছে মূর্তিটির, কিন্তু সে মিল কোনো কাজের মিল নয়, তার কোনো দাম নাই। নন্দর রূপধরা কীর্তন বিজনে বসিয়া মালা গাঁথে, ফুলগাছের পাতাটি খসিয়া পড়ার শব্দে চকিত হইয়া ওঠে, উৎসুক চোখে চাহিয়া থাকে, চুল আর আঁচল উড়াইয়া যমুনা নামক

নদীর তীরে (শহরের কয়েক মাইল উজানে গঙ্গার ধারে নন্দর একটি চেনা স্থানের সঙ্গে যার আশ্চর্য মিল আছে) ছুটিয়া যায়, ধুলায় সোনার অঙ্গ লুটাইয়া কাঁদে, অভিমানে মুখভার করিয়া থাকে, আরও কত কী করে। সুবর্ণকে নন্দ কোনোদিন এ সব করিতে দেখে নাই।

মাঝে মাঝে এখানে ওখানে দীননাথ দলবলসহ কীর্তন গাহিতে যায়, নন্দও সঙ্গে যায়। কোনোদিন গুরু আসর জমায়, কোনোদিন শিষ্য। সাধারণ জীবনে নন্দ ভীৰু ও লাজুক, চোখ তুলিয়া লোকের সঙ্গে কথা বলিতে পারে না, কিন্তু কীর্তনের আসরে শ্রোতাদের মধ্যে আবেগ, রোমাঞ্চ ও শিহরন বিতরণ করার সময় তার সবটুকু আড়ষ্ট ভাব কাটিয়া যায়, লজ্জা ভয়ের চিহ্নও থাকে না। সর্বাঙ্গের ভাবভঙ্গির মধ্যে শব্দে যা সম্পূর্ণ প্রকাশ করা গেল না, তারই অভিব্যক্তি দিবার চেষ্টাটা যেন আপনা হইতেই চলিতে থাকে। কীর্তনের কথায় হঠাৎ রাধিকার লজ্জা পাওয়ার সময় নন্দকে দেখিতে দেখিতে সত্যই মনে হয় ভিজা কাপড়ে পরপুরুষের সামনে পড়িয়া গৃহস্থ বধু যেন নিজের মধ্যে নিজেই লুকাইতে চাহিতেছে, কাপড়টি এখানে ওখানে একটু টানিয়া না দিলেই নয়, কিন্তু আঁচলের তলা হইতে হাতটি বাহির করিতে যাওয়ায় হাতটিই তার লজ্জায় অবশ হইয়া গেল, মচকান ডালের মতো মরিয়াই গেল নাকি কে জানে !

কোনো কোনোদিন রাধার বিরহে কৃষ্ণের কী অবস্থা হইয়াছিল আত্মহারা হইয়া সকলকে তাই বুঝাইতে থাকে, শুনিতে শুনিতে দীননাথ কাঁদিয়া ফেলে। নন্দকে বুকো চাপিয়া ধরিয়া বলে, আমি কী পারি : এ... নিশোর কোমল কণ্ঠ আমি কোথায় পাব ? বিবহ যাতনায় শ্যামের যখন আমার চেতনা লোপ পেয়ে এসেছে, রাধার নাম নিতে নিতেই শেষ নিশ্বাস ফেলবেন ভেবে অশ্রুটস্বরে বলাছেন রাধা রাধা, আর নিজের মুখে রাধার নাম শুনে দেখে যেন জীবন ফিরে আসছে—তখনকার সেই আকুল মিনতিভরা ডাক আমার এই কর্কশ কণ্ঠে আমি কেমন করে ফোটাবো গো।

সত্যসত্যই এমনিভাবে বলে দীননাথ, নাটকের পাটের মতো আগে হইতে যেন মুখস্থ করা ছিল। আসরে যে আবহাওয়াটা তখন সৃষ্টি হইয়া আছে, শ্রোতাবা যে রকম মুগ্ধ ও বিভোর হইয়া গিয়াছে, তাতে দীননাথের কথা ও কান্নায় সকলের চোখ সজল হইয়া আসে, অনেকে ভেউ ভেউ করিয়া কাঁদিয়া উঠিতে চায়, কেউ কেউ কাঁদেও।

বড়ো আসরে অনেকক্ষণ জমজমাট কীর্তন করিয়া আসিবার পর দু-তিনদিন নন্দ হাসে না, কথা বলে না, খাইতে চায় না, নড়াচড়া করিতে চায় না, প্রাণহীন জড়পিণ্ডের মতো শূন্য বসিয়া সময় কাটায়। যশোদা ভয়ে ভয়ে ভাবে যে, কী জানি কী হইবে এ রকম প্রচণ্ড ভাবাবেগ আর তার প্রতিক্রিয়া এই রোগদূর্বল ছেলেমানুষের কতদিন সহ্য হইবে ? নন্দর কীর্তনের মোহ কাটাইতে কত চেষ্টাই যে যশোদা কবিয়াছে। কিন্তু কিছুতেই কিছু হয় না। জোর করিয়া আটকাইয়া রাখিলে দিনদিন নন্দর ভাবপ্রবণতা আর অবরুদ্ধ উদ্ভেজনার চাঞ্চল্য এমনভাবে বাড়িয়া যাইতে থাকে যে, তাতেও যশোদা ভয় পাইয়া যায়।

এ কী অপদার্থ একটা জন্মিয়াছিল তার ভাই হইয়া ? এর চেয়ে কোকেনখোব আফিমখোরেরাও ভালো, তারা কেবল নিজেদেরই সর্বনাশ করে, এ ছোঁড়া আরও কত ছেলেমেয়েকে গোপ্তায় পাঠাইতেছে তার হিসাব নাই।

একদিন সত্যপ্রিয় নন্দর কীর্তন শনিবার আগ্রহ জানাইয়া অনুরোধ করিয়া পাঠাইল। অনুরোধটা আসিল জ্যোতির্ময়ের মারফতে। সেদিন পিতৃশ্রদ্ধের নিমন্ত্রণে নন্দকে নিয়া একটু নির্দোষ পরিহাস করায় নন্দ যে রাগ করিয়া চাকরি ছাড়িয়া দিয়াছে, এ কথা জানিয়া সত্যপ্রিয়র নাকি দুঃখের সীমা নাই। নন্দর জাগরণ অবশ্য আরেকজন লোক নেওয়া হইয়াছে, কিন্তু সত্যপ্রিয় যত শীঘ্র সম্ভব নন্দকে আরেকটি চাকরি দিবে; আগামী রবিবার সত্যপ্রিয় বাড়িতে একটু খাওয়া-দাওয়ার আয়োজন করিয়াছে, ওই দিন নন্দ যদি একটু কীর্তন করে তার বাড়িতে, আর যশোদা যদি দুটি শাকাম গ্রহণ

করে, সত্যপ্রিয় বড়োই বাধিত হইবে। বলিলেন, মিল আর শ্রমিকদের অবস্থা সম্বন্ধে তোমার সঙ্গে একটু কথাবার্তা বলতে চান।

সত্যপ্রিয়র মিলে আবার একটা ধর্মঘটের গুজব চলিতেছিল, দু-চারজন পাভা আসিয়া যশোদার সঙ্গে দেখাও করিয়াছে। হঠাৎ নন্দ আর তাকে সত্যপ্রিয়র এতখানি খাতির করার কারণটা অনুমান করিতে যশোদার অবশ্য দেরি হইল না, তবু সে রাজি হইয়া গেল। এখন ধর্মঘট করার পক্ষপাতী সে নয়, মিলে কাজ খুব কম, এখন ধর্মঘট কবিয়া বিশেষ কিছু লাভ হইবে না। তাছাড়া ধর্মঘট হইবে কিনা তাও এখনও ঠিক নাই। এদিকে সত্যপ্রিয়কে শ্রমিকদের অনেকদিনের ন্যায়সঙ্গত দাবির কিছু কিছু অন্তত মিটাইয়া দিবার জন্য অনুরোধ করার যদি সুযোগ পাওয়া যায়, সেটা গ্রহণ করিতে দোষ কী? লাভ হয়তো কিছুই হইবে না, তবু চেষ্টা করিতে দোষ নাই।

নন্দর কীর্তন করা সম্বন্ধেই কেবল যশোদার মনটা খুঁতখুঁত করিতে লাগিল। অনেক লোকের মধ্যে কীর্তন করিতে গেলেই নন্দর বড়ো বেশি উত্তেজনা হয়। কিন্তু বাধা দিয়াই বা কী হইবে? এখানে না হোক দুদিন পরে অন্য একটা বড়ো আসরে নন্দ কীর্তন কবিতে যাইবে—আধমরা হইয়া বাড়ি ফেরার আগে সে হয়তো জানিতেও পারিবে না নন্দ কীর্তন করিতে গিয়াছিল।

উপলক্ষ সামান্য, সত্যপ্রিয়র পিতার মাসিক শ্রাদ্ধ। শোনা যায়, জীবনের শেষ দশ বৎসর সত্যপ্রিয়র পিতা ছেলের মুখদর্শন করেন নাই, মুখদর্শন করিবার পর বাঁচিয়াছিলেন মোটে কয়েক মাস। কেউ কেউ নেহাত তামাশা করিয়াই বলে বটে যে, সত্যপ্রিয় নিজের মুখটা না দেখাইলে বুড়া আরও কয়েকটা বছর হয়তো টিকিয়া যাইত। কিন্তু এ সব কথা সত্যপ্রিয়র কানে যায় কিনা সন্দেহ, গেলেও পিতৃহত্যার পাপ মাথায় চাপিয়াছে এ ধরনের খুঁতখুঁতানিব জনাই সে বার্ষিক বা মাসিক একটা শ্রাদ্ধও বাদ দেয় না, এ কথা মনে করার কোনো সংগত কারণ নাই।

জ্যোতির্ময় এবং তার বাড়ির মেয়েদেরও নিমন্ত্রণ হইয়াছে। উপলক্ষ যত সামান্যই হোক, নিমন্ত্রিতের সংখ্যা শ-তিনেকের নীচে নামিবে না। সত্যপ্রিয়র বাড়িতে কোনো উপলক্ষে নিমন্ত্রিতের সংখ্যা এর কম বড়ো একটা হয় না, কম করা চলে না। লোকে বলিবে কী?

রবিবার সকালে জ্যোতির্ময় অপরাজিতাকে বলিল, কীর্তন যদি শুনতে চাও তিনটির আগে যেতে হবে, তা যদি না শোনো তাহলে সন্ধ্যার সময় গেলেই চলবে। আর শোনো, উনি যে নেকলেসটা দিয়েছিলেন বিয়ের সময়, সেটা পরে যোগো।

আমি যাব?—অপরাজিতা বিবর্ণ মুখে জিজ্ঞাসা করিল।

যাবে না? ওঁর বাড়ি নেমস্তন্ন, এত কাছে থেকে না গেলে চলবে কেন?

তবে অবশ্য কোনো কথা নাই, না গেলে যখন চলিবেই না তখন যাইতে হইবে বইকী।

না, এমনি জিজ্ঞেস করছিলাম যাব কিনা। গভীর শ্রান্তিতে অপরাজিতার হাই ওঠে, আবার শূইয়া পড়িতে ইচ্ছা হইতেছে।

নেকলেসটা কিছু পরা চলবে না।

জ্যোতির্ময় একটু হুসিয়া বলিল, কেন? সাজবার সাধ নেই? না না, পোরো নেকলেসটা, কর্তা দেখলে খুশি হবেন। চোখে অবশ্য ওঁর পড়বে কিনা সন্দেহ, তবু যদি সামনে পড়েন কখনও, প্রণাম করবার সময় পড়তে পারে চোখে। সামনে পড়লে প্রণাম কোরো কিন্তু পায়ে হাত দিয়ে।

নেকলেসটা কেমন কালো হয়ে গেছে, ও আর পরা যাবে না।

জ্যোতির্ময় আশ্চর্য হইয়া বলিল, কালো হয়ে গেছে মানে? দেখি।

অপরাজিতা অপরাধীর মতো মখমলের কেসটা বাহির করিয়া আনে। কেসটি তেমনি উজ্জ্বল আছে, কিন্তু নেকলেসটির কেমন যেন জ্যোতি নাই। সোনাটা পিতলের মতো দেখাইতেছে, পাথর আর মুক্তাগুলি যেন কাচ আর পুঁতি।

কাউকে দেখাইনি অ্যাডিন, লুকিয়ে রেখেছিলাম। তোমায় বলতেও কেমন—

জ্যোতির্ময় বিশ্বলের মতো চাহিয়াই থাকে। অপরাজিতা আবার বলে, আমাদেরই ভুল হয়েছিল, জিনিসটা নকল।

জ্যোতির্ময় যেন চোখে দেখিয়াও বিশ্বাস করিতে পারে না, তাই কী হয়, উনি আসল জিনিস বলে নকল দেনেন ?

আসল জিনিস বলে তো দেননি।

জ্যোতির্ময় নেকলেসটা নাড়াচাড়া করিতে থাকে, তাব মুখেব খানিকটা জ্যোতিও যেন নিভিয়া গিয়াছে।

অপরাজিতা মিনতি করিয়া বলে, আচ্ছা, নাইবা গেলাম আমি ? শরীবটা একটু—

শুনিবামাত্র কী বাগটাই যে জ্যোতির্ময়ের হয় ! চোখ পাকাইয়া সে বলে, বড়ো ছোটো মন তো তোমার ? যদি দিয়েই থাকেন একটা নকল জিনিস, তাই বলে ওঁর বাড়ি যাবে না তুমি ? মাস গেলে উনি মাইনে দেন বলে দুবেলা পেট ভবছে সেটা খেয়াল আছে ?

অন্য কেউ হয়তো বলিত যে, একা সত্যপ্রিয় নয়, কাজ করিলে সকলেই মাস গেলে মাহিনা দিয়া থাকে, এটা এমন কিছু সৃষ্টিছাড়া উদাবতার পরিচয় নয়। অপরাজিতা চুপ করিয়া দাঁড়াইয়া রহিল। মখমলের কেসটা বন্ধ করিয়া তার হাতে দিয়া জ্যোতির্ময় বলিল, বাকসে তুলে বেখে দাও, কেউ যেন না দ্যাখে। কাউকে বোলো না।

নেকলেসটা নকল বলিয়াই যেন জ্যোতির্ময় বাগ করিয়া বেলা একটা বাজিতে না বাজিতে গাড়ি আনিয়া সকলকে সঙ্গে করিয়া বাহির হইয়া পড়িল। কেবল নিমন্ত্রণ রাখিতে যাওয়া নয়, এখন হইতে বাত্রি দশটা এগাবোটা পর্যন্ত অপরাজিতাকে সত্যপ্রিয়ব বাড়িতে থাকিতে হইবে। যশোদাব সবু গলির মুখে গাড়ি দাঁড় করাইয়া তাকে ডাকা হইল, কিন্তু যশোদার এখন গেলে চলিবে না। ও বেলার রামাবানার ব্যবস্থা করিয়া যাইতে হইবে।

সন্ধ্যার সময় যশোদা যখন সত্যপ্রিয়ব বাড়িতে গেল, নীচের প্রকাণ্ড হল ঘরটিতে নন্দর কীর্তন চলিতেছে। হল ঘরটি পুুষ শ্রোতায় ভরিয়া গিয়াছে, পাশের দুটি ঘরের বড়ো বড়ো চারটি দরজার কাছে মেয়েদের ভিড়। নন্দব কীর্তন শুনিবাব লোভ যশোদার কম নয়, তবু সে না শুনিয়া এড়াইয়া চলিবার চেষ্টাই করে, পাতায় কোথাও নন্দর কীর্তন হইলেও সহ্যে যাইতে চায় না। সে ভাবিয়াছিল এতক্ষণে কীর্তন শেষ হইয়া গিয়াছে। একটি দরজার কাছে মেয়েদের মধ্যে বসিয়া কীর্তন শুনিতে শুনিতে সে ভাবিতে থাকে, আজ তো বিভোর হইয়া নন্দ ঘণ্টা ১ পব ঘণ্টা কীর্তন করিয়া চলিয়াছে, কাল তার কী অবস্থাটাই না জানি হইবে ! কিন্তু বেশিক্ষণ যশোদা এ সব দুশ্চিন্তা মনেব মধ্যে পুষ্টিয়া রাখিতে পারে না।

নন্দর কীর্তন শুনিতে শুনিতে যশোদাবও মানসিক জগৎটা ধীরে ধীরে একেবারে বদলাইয়া যায়। কেমন একটা অস্বস্তি বোধ হয়, বুকেব মধ্যে আকুলি-বিকুলি করিতে থাকে আব যত সব আবোল-তাবোল ঝাপছাড়া কথা মনে আসে। নন্দ এদিকে নিজেই বাধা হইয়া তার কৃষ্ণের মতো কালো তমালকে কত যে মনেব কথা বলে আর যশোদা এদিকে ভাবিতে থাকে যে ধনঞ্জয়টা সত্যই কী নিষ্ঠুর, এ জগতে কেবল সেই পারে যশোদা. . . বুকে তুলিয়া লইতে কিন্তু একবারও কী সে বলিল, এসো যশোদা, আমার বুকে এসো ? যাইতে বলিলেই যে চলিয়া যায় সে কেমন ধাবা প্রেমিক গো ! বলিয়া নন্দ এদিকে যত অনুযোগ করে, যশোদাব তত মনে হয়, তাই তো বটে, ঠিক তো, সে কাছে ঘেঁষিতে দেয় না বলিয়া কাছে ঘেঁষিবে না, কেমনধাবা মানুষ ধনঞ্জয় ?

তারপর একসময় সুবর্ণের দিকে চোখ পড়ায় যশোদা যেন চেতনা ফিরিয়া পায়, মনটা ছাঁৎ করিয়া ওঠে। মুখখানা লম্বাটে হইয়া গিয়াছে সুবর্ণের, ছোটো একটু হাঁ করিয়া আছে, দু-চোখ বড়ো

বড়ো করিয়া খোলা, কী একটা রোগের যন্ত্রণায় মেয়েটা যেন মুখ ভেংচি দিয়াছে। একটু আগে তার নিজের মুখভঙ্গিটা কী রকম হইয়াছিল কে জানে ! আর ধনঞ্জয়ও তো কাটা পা নিয়া পড়িয়া আছে হাসপাতালে।

জোর করিয়া যশোদা বাড়ির কথা ভাবিতে আরম্ভ করে, এ সব পাগলামিকে আর প্রশয় দিবে না। সকাল সকাল সে রান্না সারিয়া রাখিয়া আসিয়াছে, ও বাড়ির নদেরচাঁদের বউকে পরিবেশন করিতে বলিয়া আসিয়াছে, কিন্তু খাওয়ার সময় বোধ হয় গোলমাল বাধিবে, যা শয়তান তার বাড়ির লোকগুলি, হইচই এত ভালোবাসে ! এ সব কথা ভাবে বটে যশোদা, কিন্তু ভাবিতে যেন ভালো লাগে না, আবেগে ব্যাকুল হওয়ার জন্য মনটা আকুলি-বিকুলি করিতে থাকে—ঘরবাড়ি, ভাড়াটে, ডালভাত পরিবেশন এ সমস্তের চিন্তায় রস কই, নেশার মতো রস ?

এদিকে কাশীবাবুর সঙ্গে কথা বলিতে বলিতে মাঝে মাঝে সত্যপ্রিয় জ্যোতির্ময়কে জিজ্ঞাসা করিতেছিল যশোদা আসিয়াছে কিনা। যশোদার সম্বন্ধে আজ তার আগ্রহের সীমা নাই। কীর্তন শেষ হইবার পর যশোদাকে সঙ্গে করিয়া জ্যোতির্ময় দোতলার একপ্রান্তে একটি মাঝারি আকারের ঘরে নিয়া গেল। এটি সত্যপ্রিয়র অবসর যাপনের ঘর, একপাশে প্রায় চৌকির মতো সাদাসিদে ছোটো একটি খাটে বিছানা, একটি রিভলভিং বুকশেলফে কতগুলি বই আর মেঝেতে আসন করিয়া বসিয়া লিখিবার জন্য একটি ডেস্ক ছাড়া আর কোনো আসবাবের বালাই নাই। একটি চেয়ারও চোখে পড়ে না। বাড়ির অন্যান্য অংশে গৃহস্বামীর ঐশ্বর্যের নির্লজ্জ বিজ্ঞাপন দুই চোখ ভরিয়া দেখিতে দেখিতে এ ঘরে আসিয়া ঢুকিলে মনে হয়, এখানে বুঝি কোনো সংসারবিরাগী নিম্পৃহ সন্ন্যাসী বাস করে। সত্যপ্রিয়র বেশ আর ঝকঝকে মেঝেতে তার বসিবার ভঙ্গি দেখিয়া কথটা আরও বেশি করিয়া মনে হয়।

সত্যপ্রিয়র বেশ দেখিয়া জ্যোতির্ময় পর্যন্ত আজ একটু অবাক হইয়া গেল। যশোদাকে ডাকিয়া আনিতে যাওয়ার সময় সত্যপ্রিয়র পরনে সাদা কাপড় ছিল, গায়ে জামা ছিল—দূরে কোথায় অসময়ে বাদলা দেখা দেওয়ার শহরতলিতে শীতের আমেজ টের পাওয়া যাইতেছিল। এখন কিন্তু খালি গায়ে হাঁটুর উপর কাপড় তুলিয়া সত্যপ্রিয় মেঝেতে আসন-পিড়ি হইয়া বসিয়াছে, পরনের কাপড়খানা গরদের। কাঁধে মোটা পইতা, গলার্য রুদ্রাক্ষের মালা, বাহুতে অনেকগুলি কবজ ও তাবিজ, কবজির কাছে স্ফটিকের জপমালা জড়ানো। মনটা হঠাৎ যেন কেমন করিয়া উঠিল জ্যোতির্ময়ের, সত্যপ্রিয় কি দর্শক অনুসারে বেশ বদলায় ? সত্যপ্রিয়কে নানা বেশে সে দেখিয়াছে, কোনোদিন হ্যাটকোট পরা খাঁটি সাহেবি পোশাক, কোনোদিন মাথায় টুপি, গায়ে লম্বা কোট খানিকটা—পশ্চিম ভারতীয়ের পোশাক, কোনোদিন মটকার পাঞ্জাবি, কঁচানো ধুতি, কাঁধে তাঁজ করা চাদর—বাঙালি পোশাক, কোনোদিন মাঝে মাঝে সত্যপ্রিয়র বেশে মুসলমান ভদ্রলোকের বেশের একটু ধাঁচ যে কী করিয়া আমদানি হয় জ্যোতির্ময় বলিতে পারে না। আজ হঠাৎ জ্যোতির্ময়ের মনে পড়িয়া গেল, যতবার সত্যপ্রিয়কে সে ভিন্ন ভিন্ন পোশাকে দেখিয়াছে তার প্রত্যেকবার বিশেষ প্রয়োজনে হয় ভিন্ন দেশীয় কোনো বিশিষ্ট ব্যক্তির তার সঙ্গে দেখা করিতে আসিবার অথবা তার নিজের গিয়া দেখা করিবার কথা ছিল।

ঘরের রিক্ততা ও সত্যপ্রিয়র বেশ যশোদাকেও একটু কাবু করিয়া ফেলিয়াছিল। মানুষটাকে প্রণাম করিবার কোনো সংকল্পই তার ছিল না, কিন্তু ঘরে ঢুকিয়া প্রৌঢ় ও সাধুবেশধারী ব্রাহ্মণকে সে একেবারে পায়ে হাত দিয়া প্রণাম করিয়া ফেলিল, কারণ বলিয়া দিবার দরকার হইল না—যশোদা, ইনিই তিনি, একে প্রণাম করো। দেখিয়া জ্যোতির্ময় ভাবিতে থাকে, এই জন্যই কি সত্যপ্রিয় তাড়াতাড়ি বেশ বদলাইয়াছে, যশোদার মনে শ্রদ্ধা জাগাইবার জন্য ? একটু পিছাইয়া আসিয়া মেঝেতে হাতের ভর দিয়া একটু কাত হইয়া যশোদা সসন্ত্রমে বসে আর জ্যোতির্ময় মনের মধ্যে নকল নকলেসের

দীপ জ্বালিয়া নতুন দৃষ্টিতে সত্যপ্রিয়কে দেখিতে থাকে। এ কী সম্ভব ? মাড়োয়ারি ব্যবসায়ী দেখা করিতে আসিবে বলিয়া সত্যপ্রিয় ইচ্ছা করিয়া বেশের খানিকটা বাঙালি তু লোপ করিয়া দেয়, পুরোপুরি মাড়োয়ারি সাজে না সেটা মাড়োয়ারিরও দৃষ্টিকটু হইবে বলিয়া ? কেবল এইটুকু বেশ পরিবর্তন করে যার অলক্ষ্য প্রভাব আগন্তুকের সঙ্গে অন্তরঙ্গ হইতে তাকে সাহায্য করিবে, অজ্ঞাতসারে তার দৃষ্টিকে তৃপ্তি দিবে ?

আপনিও বসুন জ্যোতির্ময়বাবু।

জ্যোতির্ময় বসিলে সত্যপ্রিয় বলিল, তোমার ভাই বড়ো সুন্দর কীর্তন করে বাছা, শুনে মুগ্ধ হয়ে গেছি। কিন্তু—তুমি প্রায় আমার মেয়ের বয়সিই হবে তোমায বলতে দোষ নেই—ছেলেটির স্বাস্থ্য ভালো নয়।

মেয়ের বয়সি না হইলে নন্দর স্বাস্থ্য ভালো নয় এ কথাটা তাকে বলিলে কী দোষ হইত যশোদা বুঝিতে পারে না বটে, কিন্তু খুশি সে হয়।

আজ্ঞে হ্যাঁ, ওর জন্য মাঝে মাঝে বড়ো ভাবনা হয়।

বয়স বাড়লে হয়তো স্বাস্থ্যের উন্নতি হবে। পড়াশোনা কতদূর করেছে ?

প্রথম পাশের পরীক্ষায় ফেল করেছে।

বেশ, বেশ। পাশ করে তো সব রাজা হচ্ছে আজকাল। দেশের বেকার সমস্যা যে কী উৎকট হয়ে দাঁড়িয়েছে তা টের পাই বাছা আমরা, চাকরির জন্য রোজ দলে দলে ছেলেরা আসছে, তাদের দেখে কী দুঃখই যে হয়। আমার দেশের সোনার চাঁদেরা, দেশের ভবিষ্যৎ আশাভরসা, দুটি অঙ্গের জন্য তারা হাহাকার করে বেড়াচ্ছে। সকলের আগে এখন আমাদের কী করা দরকার জানো বাছা, দেশের বেকার সমস্যা দূর করা। খেতেই যদি না পায় মানুষ তবে সে করবে কী, আগে পেটের ভাতের জোগাড় করে তবে না অন্য কথা ?—কথা বলিতে বলিতে সত্যপ্রিয় যশোদার মুখের ভাব-পরিবর্তন লক্ষ করিতে থাকে, পেটের ভাতের কথাটা যশোদার খুব প্রিয় বুঝিতে পারিয়া আবার বলিতে আরম্ভ করে, কিন্তু দেশকে যারা চালায়, তারা কী তা বুঝতে পারে, না বুঝতে চায় ? সব ভেসে চলেছে শ্রোতে, নাম চাই, হাততালি চাই। না, না, সবাই ফাঁকিবাজ আমি তা বলছি না বাছা, দেশের জন্য সর্বস্ব তাগ করেছেন, এ রকম মহৎ লোক কী নেই দেশে, অনেক আছে—কিন্তু বালো তো বাছা, তুমিই বালো, চোখকান বুজে শুধু তাগ করলেই কি কাজ হয় ? না খেয়ে যে মরতে বসেছে যথাসর্বস্ব বিক্রি করে, বিলেত থেকে দামি ওষুধ এনে খাওয়ালে সে কী বাঁচে। ইংরেজকে তাড়াও, ধর্মঘট কর, স্বাধীনতা চাই—এই সব বলে বাবুরা চেষ্টাচ্ছেন, এদিকে দেশের চাষি-মজুররা খেতে পাচ্ছে না, ছেলেরা সব বেকার যন্ত্রণা সহিতে না পেরে আত্মহত্যা করছে—

প্রথমটা যশোদা একটু ভডকাইয়া গিয়াছিল, এখন সামলাইয়া উঠিয়া গস্তীর মুখে শুনিয়া যায়। মিলের কথা শান্তভাবে আলোচনা করিয়া মিলের শ্রমিকদের সম্বন্ধে কোনো অনুরোধ করিয়া যে লাভ হইবে না, বুঝিতে যশোদার আর বাকি থাকে না। ভদ্রলোক ভাবপ্রবণতা আনিয়াছে। আবেগে উচ্ছ্বসিত হইয়া উঠিয়াছে, এ বর্ম ভেদ করিয়া শ্রমিকদের কাহিনি দিয়া তার মর্ম ভেদ করার ক্ষমতা কারও নাই। কথা বলিতে বলিতে আবেগের আতিশয্যে কারও মুখ দিয়' যখন খুঁতু ছুঁটিতে আরম্ভ করে, পরের কথায় সে তখন কান দেয় না।

একটু আত্মসংবরণ করিয়া সত্যপ্রিয় বলে, যাক, যাক। দেশের অবস্থা তোমারও অজানা নয়, আমারও অজানা নয়। তোমার ভাইকে একটি চাকরি দিতে হবে, না ? ছেলেমানুষ ঝোঁকের মাথায় কাজটা ছেড়ে দিল, নইলে ওই কাজেই ওর উন্নতি হত। বেশ কাজ করছিল ছেলেটি, না জ্যোতির্ময়বাবু ? তা, কয়েকটা মাস যাক এখন, ক-মাস পরে তোমার ভাইকে একটি ভালো চাকরি বোধ হয় দিতে পারব। আমার মিল দুটোতে ক-মাস পরে আগাগোড়া সংস্কার করব ভাবছি, নতুন

লোকজন নিয়ে কাজের ভালো ব্যবস্থা করে ফেলবে। মিলের লোকেরাও নানারকম দাবিদাওয়া করছে, সে বিষয়েও একটু বিবেচনা করে দেখতে হবে।

উঠিয়া দাঁড়াইয়া ছয়টা দরজার একটার দিকে পা বাড়াইয়া বলে, এবার সকলকে খেতে বসানো দরকার, দেখি গিয়ে কী ব্যবস্থা হল। দুটি শাকান্ন মুখে দিয়ে যেয়ো কিন্তু বাছ।

সত্যপ্রিয় চলিয়া গেলে জ্যোতির্ময় নেকলেসের কথা, সত্যপ্রিয়র বেশ পরিবর্তনের গোপন রহস্যের কথা, সব ভুলিয়া গিয়া প্রায় গদগদ কণ্ঠে বলিল, দেখলে চাঁদেব মা, শুনলে ? এমন মানুষ আর দেখেছ ?

যশোদা স্বীকার করিয়া বলিল, খানিক খানিক দেখেছি—এমন তুখোড় দেখিনি।

তারপর যশোদা অন্দরে গেল। তাকে দেখিয়াই সুবর্ণ উচ্ছ্বসিত হইয়া বলিল, কী সুন্দর কীর্তন করে তোমার ভাই, যশোদাদিদি ! এমন আর জীবনে শুনিনি !

কত সুদীর্ঘ জীবন সুবর্ণের, কত কীর্তনই সে শুনিয়াছে ! সে আর জীবনে কখনও এমনটি শোনে নাই, নন্দর এতবড়ো সার্টিফিকেট যেন আর হয় না।

গলাটা মিষ্টি বলে শুনতে ভালো লাগে, নইলে শিখেচে কচু।

সুবর্ণ উত্তেজিত হইয়া বলে, না, না, তুমি জানো না যশোদাদিদি, ভালো কবে না শিখলে কেউ এমন করে গাইতে পারে ? সবাই কী বলছে জানো ? কীর্তন যে এমন হয় আদ্দিন কেউ ভাবতেও পারেনি।

যশোদা একটু হাসে আর মনে মনে বলে, সবাই তো তোমাবই মতো পণ্ডিত। কীর্তন যে গাইয়াছে যশোদাই তার দিদি শুনিয়া মেয়েরা কেউ কেউ আসিয়া তার সঙ্গে কথা বলে, কীর্তনের প্রশংসা জানায়। যশোদা প্রতিবাদ করে না, মৃদু একটু হাসিয়া কতকটা কথা বদলানোব উদ্দেশ্যে আর কতকটা মেয়েমানুষের প্রকৃতিগত কৌতূহলের জন্য জিজ্ঞাসা করে, এ মেয়েটি কে, ও বউটি কে। অল্প সময়ের মধ্যেই অধিকাংশ মেয়ের পরিচয় যশোদার জানা হইয়া যায়। নিমন্ত্রিতার সংখ্যা আজ খুব কম, কিন্তু সত্যপ্রিয়র অন্দরেই যত নারী বাস করে, একটি সাধারণ কাজেবঁ বাড়ি ভরাট কবিতা তুলিবার পক্ষে তারাই যথেষ্ট। কেউ বসিয়া থাকে, কেউ ঘুবিয়া বেড়ায়, কোথাও দল বাঁধিয়া কয়েকজন গল্পগুজব করে। বেশির ভাগ মেয়েকে সুবর্ণই যশোদাকে চিনাইয়া দেয়, কোনটি সত্যপ্রিয়র মেয়ে, কোনটি তার বউ, কোনটি তার বোন, কোনটি ভাগনি অথবা ভাইঝি অথবা দূরসম্পর্কের আত্মীয়।

সত্যপ্রিয়র অন্দরের কমবয়সি মেয়েদের সম্বন্ধে সাধারণভাবে সুবর্ণ মন্তব্য করে, কী বিচ্ছিরি করে সেজেছে, এমন গেঁয়ো ওরা ! গায়ে রাশ রাশ গয়না চাপিয়ে দিলেই যেন সাজ হয় !

যশোদা ভাবে, থাকলে তুমিও গায়ে চাপাতে ছাড়তে না। সুবর্ণের মন্তব্য শুনিয়া নয়, আপনাই হইতেই এ বাড়ির মেয়েদের সম্বন্ধে যশোদার একটা অস্পষ্ট ধারণা গড়িয়া উঠিতে থাকে। বাড়ির লোকের কাছে বাড়ির কর্তা কতকটা রাজার মতো, সেই একজন মানুষের ব্যক্তিত্বের ও কর্তৃত্বের চাপে কারও স্বাভাবিক বিকাশ হয় নাই, সকলেই অল্পবিস্তর বিকাশ পাইয়াছে। তা ছাড়া আছে বড়োলোকের অন্দরমহলের অধিবাসিনী হওয়ার অপরিহার্য পরিণাম। এ বাড়ির মেয়ে হওয়ার অর্থই যে অন্য বাড়ির মেয়ের মতো না হওয়া, এটা সকলেই জানে। আশ্রিতা আছে বহু, কারও দাবির জোর বেশি, মানমর্যাদাও বেশি, কারও দাবির জোর কম, মানমর্যাদাও কম এবং এই হিসাব মতো এ ওর মন জোগাইয়া চলে, এ ওকে অবজ্ঞা করে, হিংসাটা হইয়া থাকে বিশ্বব্যাপী। আশ্রিতারাই কি বাড়ির মেয়েদের মন বিগড়াইয়া দেয় বেশি, আবহাওয়াটা করিয়া তোলে বেশি বিকৃত ? সত্যপ্রিয়র সেজো মেয়ে আর মেয়েটির সমবয়সি পিসতুতো বোনটির আজন্ম একসঙ্গে লালিতপালিত হওয়ার ফলটা কয়েক মিনিট চোখে দেখিয়াই যশোদার তাক লাগিয়া যায়। সেজো মেয়ের কাপড়খানার

দাম অনেক বেশি, গয়নাও তার গায়ে অন্যজনের চেয়ে দশগুণ। আজ একটি নতুন দুল পরিয়াছে সেজো মেয়ে।

সেজো মেয়ে (মুখভার) : সবাই চলে গেলেই তোমার দুল ফিরিয়ে দেব।

পিসতুতো বোন (ভীতা) : কেন ভাই ?

সেজো মেয়ে : দিদির কানবালা ধাব কবে পরতে পারবে বলেই তো যেচে যেচে নিজের বিচ্ছিরি দুল দুটো আমায় পরালে।

পিসতুতো বোন : তুই নিজেই তো চেয়ে নিলি ভাই ?

সেজো মেয়ে : কখন চাইলাম ?

পিসতুতো বোন : না ঠিক, এমন বোকা আমি।

সেজো মেয়ে : বোকা তুমি নও। দুল দুটো পরলে নিজেকে খুব সুন্দর দেখায় জানো কিনা তাই আমি যেই দুল দুটো নিয়ে এলাম, ওমনি ফন্দি এঁটে দিদির কানবালা নিয়ে পরলে, যাতে আরও সুন্দর দেখায়। ফরসা রঙের অহংকারে ফেটে পড়ছ, বোকা হতে যাবে কোন দুঃখে ?

পিসতুতো বোন : আমার রংটা তো ফ্যাকাশে সাদা ভাই, তোর মতো দুখে আলতা তো নয় ভাই ? কানবালা খুলে ফেলব ?

বাড়ির একটি বিশেষ শ্রেণির আশ্রিতাদের সঙ্গে খাইতে বসানো হইল, দাসী চাকরানি নয়, সত্যপ্রিয়ব সঙ্গে সতাই তাদের সম্পর্ক আছে, তাবা আত্মীয়া। তবে, সত্যপ্রিয়ব মেয়ে আর বউরা যে যশোদাকে একেবারে খাতির কবিল না তা নয়, একটু দূরে দাঁড়াইয়া যশোদা আব যশোদার খাওয়া চাহিয়া দেখিয়া তাদের কী ফিসফাস কথা আব চাপা হাসি। সুবর্ণ বোধ হয় অন্য ঘরে খাইতে বসিয়াছিল।

পিসতুতো বোনের সঙ্গে কলহের পর সেজো মেয়েব মনটা ভালো ছিল, কে একজন যশোদার দিকে দৃষ্টি আকর্ষণ করাতে সে খিলখিল কবিয়া হাসিয়া ফেলিল। যশোদা তখন বড়ো বড়ো লেডিকিনি মুখে তুলিতেছিল। খাওয়া বন্ধ করিয়া সে বলিল, এই ছুঁড়ি এদিকে শোন।

মেয়েদের হাসিগল্পে গুঞ্জন থামিয়া গেল, সেজো মেয়ে কয়েক পা আগাইয়া আসিয়া মুখ লাল করিয়া বলিল, তোমার তো আশ্পদনা কম নয় !

তোমারই বা কম কী দিদি ? আমায় নেমস্তন্ন করে এনে- বয়সে আমি তোমার মা-মাসির সমান, আমার খাওয়া দেখে কী বলে তুমি হাসলে ? এ রকম যে হাসতে নেই, ছোটোলোকের বাড়ির মেয়েরও সেটুকু শিক্ষে আছে।

আমায় তুমি ছোটোলোকের মেয়ে বললে ! দাঁড়াও, বাবাকে বলে তোমায় মজা দেখাচ্ছি। সেজো মেয়ে ঝড়ের মতো বাহির হইয়া গেল।

যশোদা খাইয়া উঠিয়া বাড়ির পিছনের বারান্দায় সত্যপ্রিয়র স্ত্রীর কাছে একটু বসিল। রাত প্রায় এগারোটা বাজে, জ্যোতির্ময়ের বাড়ির সকলে কোথায় যে উধাও হইয়া গিয়াছে ! একসঙ্গে ফেরা যাইত।

সত্যপ্রিয়র স্ত্রী বড়ো শাস্ত ও নিরীহ মানুষ, কিছুক্ষণ আগে তার সঙ্গে দু-একটা কথা বলিয়াই যশোদা এটা টের পাইয়াছিল। সব সময়েই যেন যেন ভাবাচ্যাকা লাগিয়া আছে।

মেয়ে নাকি কী বলেছে আপনাকে ?

কী আবার বলবে ? ছেলেমানুষ, ওর কথার ভারী দাম !—যশোদা একটু হাসিল।

আপনি রাগ করবেন না, ছেলেমেয়েগুলো আমার বড়ো বেয়াড়া। বলুন রাগ করবেন না ? বলিয়া সত্যপ্রিয়র স্ত্রী যশোদার হাত ধরিল। ইস, এই জন্য সে এখানে একা বসিয়া আছে, বাড়ির গিন্নি সে। ধনীর গৃহিণীতে পরিণত হইতে না পারায় স্বামী-পুত্র, আত্মীয়স্বজন, দাসদাসী কারও সঙ্গে

আঁটিয়া উঠিতে না পারায় একেবারে হাল ছাড়িয়া দিয়া নিজের একটা মানসিক বিকারের অবাস্তব জগতে ভাসিয়া গিয়াছে, সকলের অপরাধে নিজেকে যেখানে সে অপরাধী মনে করে, তাদের হাত ধরিয়া ক্ষমা চায়।

কিছুক্ষণ পরে সত্যপ্রিয় আসিল।

খাওয়া হয়েছে ? বড়ো রাত হয়ে গেল। গাড়ি বলে দিয়েছি।

গাড়ি কী হবে ? এইটুকু পথ হেঁটেই চলে যাব।

কিন্তু তা হয় না, যশোদা যে সত্যপ্রিয়ের অতিথি। পথ যতটুকুই হোক, রাত্রিকাল, স্ত্রীলোক, হাঁটিয়া যাওয়া চলে ?

যশোদা জিজ্ঞাসা করিল, জ্যোতির্ময়বাবুর বাড়ির সবাই কি চলে গেছে ?

আধঘন্টা আগে। আমিই বললাম জ্যোতির্ময়বাবুকে, একটু পরে তোমাকে পাঠিয়ে দেব তোমার ভায়ের সঙ্গে। গাড়িটা একটু আটকা ছিল। তা তোমার ভাইকে তো কোথাও খুঁজে পাচ্ছি না যশোদা। সে তবে আগেই চলে গেছে। কেউন করলে ওর শরীর বড়ো দুর্বল লাগে।

সত্যপ্রিয় নিজেই সঙ্গে করিয়া যশোদাকে গাড়িতে তুলিয়া দিল। বোধ হয় সেদিন নন্দকে যে অপমান করা হইয়াছিল, আজ সুদে-আসলে নন্দর দিদিকে সম্মান দিয়া তার ক্ষতিপূরণ হইতেছে। যশোদা ভাবিল, কী মতলব আঁটছ তুমি কে জানে ! সত্যপ্রিয়কে একটু বেশি রকম গম্ভীর ও অন্যমনস্ক মনে হইতেছিল। যশোদাকে আর একদিন আসিবার জন্য অনুরোধ করিল।

শুনলাম বেয়াদবির জন্য মেয়েকে নাকি ধমক দিয়েছ। আমার কাছে নালিশ করতে এসেছিল, আমিও ধমক দিয়েছি। তবু আমার বাড়িতে আমার মেয়েকে অমন করে বলবার সাহস কারও হতে পারে, ভাবতেও পারিনি যশোদা।

ছেলেমানুষের দোষ দেখিয়ে দেব, তাতে আর সাহসের কী আছে !

সত্যপ্রিয় হঠাৎ যেন বড়ো সরল হইয়া গিয়াছে, যশোদার সঙ্গে যেন তার অনেকদিনের পরিচয়। হ্রানমুখে একটু হাসিয়া বলিল, তুমি জানো না যশোদা, আমার চাকরবাকরের দোষ দেখিয়ে দেবার সাহস পর্যন্ত অনেকের হয় না। যাদের কোনোদিন একটি পয়সা পাবার ভরসা নেই যারা চায়ও না একটি পয়সা, তারা পর্যন্ত ভয়ে মরে আমি পাছে চটে যাই।

এ কথার জবাবে যশোদা কিছু বলিল না। প্রত্যাশা না থাকে, সত্যপ্রিয় চটিলে যে ভয়ের কারণ আছে এটুকু সেও বোঝে। টাকা অনেক কিছু করিতে পারে। তার বাড়ির কাছেই এমন দু-একজন মানুষ বাস করে যাদের হাতে মোটে শ খানেক টাকা গুঁজিয়া দিলে একদিন এই সত্যপ্রিয়ের মাথাটা ফাটাইয়া কয়েকমাস জেল খাটিয়া আসিতে রাজি হইয়া যাইবে। টাকার পরিমাণটা বেশি করিলে একেবারে খুন করিয়া ফাঁসিকাঠে ঝুলিবার ঝুঁকিটা নিতেও হয়তো রাজি হইয়া যাইতে পারে। এরা সব নিচুস্তরের জীব, কিন্তু উঁচুস্তরেও এমন কত জীব আছে, যারা এদেরই রকমফের, হাতে কিছু টাকা গুঁজিয়া দিলে যারা খুন না করিয়াও মানুষের এমন সর্বনাশ করিতে পারে, যা খুন করারও বাড়া। এমন শক্তি যে টাকার, সত্যপ্রিয় সেই টাকা গাদা করিয়াছে। প্রত্যাশা যারা করে না, তারাও তাকে ভয় করিবে বইকী। তা ছাড়া, প্রত্যাশা করা না করার প্রশ্নই কেবল নয়, গেন্‌রুয়া কাপড় দেখিলেই ধর্মভীরু গৃহস্থের যেমন পায়ে লুটাইতে ইচ্ছা হয়, বড়োলোককে ভয় আর খাতির করা সেইরকম একটা সংস্কারে দাঁড়াইয়া গিয়াছে মানুষের।

পরদিন দুপুরবেলা কীর্তনের অবসাদে নন্দ বিমাইতেছে, কোথা হইতে সুবর্ণ আসিয়া হাজির।

একটু কীর্তন গাইবে ? একটুখানি ?

উদ্ভেজনা সে যেন চাপিয়া রাখিতে পারিতেছে না, চোখেমুখে ফুটিয়া বাহির হইতেছে। যশোদা যে ঘরের অন্যদিকে চৌকিতে বসিয়া জামা সেলাই করিতেছিল, তার চোখে পড়িয়াছে কিনা সন্দেহ। একটা ঘরে চুকিয়া সেই ঘরেই যশোদার মতো একটা মানুষকে চোখে না পড়ার মতো অবস্থা, আবেগ একটু বেশি রকম উথলাইয়া না উঠিলে হওয়া সম্ভব নয়।

নন্দ মুখ কাঁচুমাচু করিয়া বলিল, এমনি তো হয় না, মানে, আয়োজন চাই কিনা অনেক, আর অনেকক্ষণ ধরে না গাইলে—

এ বাড়িতে সুবর্ণের আসাটাই খাপছাড়া ব্যাপার, তাও এমন অসময়ে। কাল নন্দর কীর্তন শুনিয়া তার কী রকম লাগিয়াছিল নন্দকে জানাইবার জন্য সে ছটফট করিতেছিল, সবুর নয় নাই। নতুবা জানাইবার সুযোগের অভাব তার হইত না, নন্দই হয়তো আজকালের মধ্যে তাদের বাড়ি যাইত।—কীর্তন যে এমন হয়, আমি সত্যি জানতাম না। কাল শুনতে শুনতে আমার যে কী রকম হচ্ছিল—

যশোদা মনে মনে বলে, রকম দ্যাখো ছুঁড়ির, ও রকম তো তোর সব সময়েই হচ্ছে।

মুখে অবশ্য ভদ্রতা করিতে হয়, এ ধরনের ভাবোচ্ছ্বাসের জন্য গালে চড় কসাইয়া দিবার নিয়ম নাই। বড়ো জোর গম্ভীর মুখে, কড়া সুরে এদিকে আসিয়া বসিতে বলিয়া জিজ্ঞাসা করা চলে যে, ব্যাপারখানা কী। কিন্তু তাতে কি এ সব মেয়ের মাথা ঠাণ্ডা হয় ?

তুমি শূনেছ যশোদাদিদি ? কাল শূনেছ কীর্তন ? ও, হ্যাঁ, তুমি তো কাল গিয়েছিলে নেমস্তম্ভ খেতে। কীর্তন শূনে কাল বাড়ি ফিরে বউদি কাঁদছিল। ঘরে নয়, সবাই ঘুমোবার পর সিঁড়িতে বসে। আমি জিজ্ঞেস করতে বললে, কীর্তন শূনে এমন মন কেমন করছে ছোট্টাকুরঝি !—বউদি আমায় ছোট্টাকুরঝি বলে।

সবাই ঘুমোবার পর তুমি বুঝি জেগেছিলে ?

হ্যাঁ, কিছুতেই ঘুম আসছিল না কাল।

চান করনি আজ ?

না। গায়ে জল লাগলেই এমন ঝাঁকঝাঁক করে উঠছিল যশোদাদিদি। ওই যা, আসল কথাই ভুলে গেছি। বউদি তোমায় একবার যেতে বলেছে, বড্ড দরকার।

চলো তবে, এখনি শূনে আসি দরকারটা কী।

ছেলেমানুষ। রাগে ভালো করিয়া ঘুমায় নাই। জ্বরও বোধ হয় আসিয়াছে। চোখ দেখিলে মনে হয়, কোনো পাগলাগারদ হইতে যেন পলাইয়া আসিয়াছে। তাড়াতাড়ি সেলাই রাখিয়া যশোদা উঠিয়া পড়ে। বাড়ি নিয়া গিয়া সর্বাগ্রে নিজের হাতে লেবু দিয়া বড়ো এক গ্লাস শরবত বানাইয়া মেয়েটাকে খাওয়াইবে, তারপর অন্যকথা।

কিন্তু সুবর্ণ নড়িতে চায় না।—তুমি যাও না যশোদাদিদি, আমি যাচ্ছি একটু পরে।

না, আমার সঙ্গে এসো। এখানে কী করবে তুমি ?

একটু কীর্তন শুনব। নন্দর দিকে চাহিয়া মিনতি কবিশা বলে, জোরে না গাও, গুনগুন করে একটু গাও না ? সেই যেখানটা গাইতে গাইতে কাল তুমি কাঁদছিলে, সেখানটা।

যশোদা আর কথা না বলিয়া সোজাসুজি সুবর্ণের ডান হাতের কবজি চাপিয়া ধরিয়া তাকে একরকম গায়ের জোরে টানিয়াই সঙ্গে নিয়া ঘরের বাহির হইয়া যায়। আর ভদ্রতা করা সম্ভব নয়, উচিতও নয়। কে বলিতে পারে কখন মেয়েটা মেঝেতে চিত হইয়া হাত-পা ছুঁড়িতে ছুঁড়িতে মুখে ফেনা তুলিতে আরম্ভ করিয়া দিবে ? কেবল লেবুর শরবত নয়, যাওয়ার সময় দু-পয়সার বরফও কিনিয়া লইয়া যাইতে হইবে কিষেনের দোকান হইতে। সুবর্ণের মাথাটাও ধোয়াইয়া দিবে বাড়ি গিয়াই।

হাত ছাড়ো যশোদাদিদি—উঃ রে বাবা রে, হাতটা ভেঙে ফেলবে নাকি তুমি আমার ?

বাড়ির বাহির হইয়া যশোদা তার হাত ছাড়িয়া দিল। চোখ মুছিতে মুছিতে সুবর্ণ তার সঙ্গে চলিল আর বিড়বিড় করিয়া কী যে বলিতে লাগিল অশ্রুটস্বরে সেই জানে।

কেঁদো না সুবর্ণ। রাস্তায় যদি কাঁদো ঠাস করে গালে চড় বসিয়ে দেব বলে রাখছি।

শুনিয়া সুবর্ণের কান্না ও বিড়বিড়ানি দুইই হঠাৎ বন্ধ হইয়া গেল। বরফ কেনার সময় ক্ষীণকণ্ঠে সে একবার জিজ্ঞাসা করিল বটে, বরফ কিনছ কেন যশোদাদিদি ?—যশোদা জবাবও দিল না।

জ্যোতির্ময়ের বাড়ি গিয়া গলা নরম করিয়া যশোদা বলিল, তোমাব যে অসুখ হয়েছে বোন, জ্বর হয়েছে। মাথাটা ধুয়ে দিই এসো, তারপর তুমি শূয়ে পড়োগে যাও। বরফ দিয়ে আমি সুন্দর শরবত বানিয়ে দিচ্ছি, খেলেই তোমার জ্বর কমে যাবে।

মিষ্টিকথা শোনাশ্রমাত্র সুবর্ণ ফোঁপাইয়া কাঁদিয়া উঠিল, আমার অসুখ হয়েছে আর তুমি আমায় এমন করে মারলে যশোদাদিদি !.....

সুবর্ণের ব্যবস্থা করিয়া জ্যোতির্ময়ের ঘরে বসিয়া ভদ্রলোকের বিজ্ঞাপন দেওয়া খাপছাড়া দরদর কথা যশোদার মনে হইতে থাকে। বেশ সাজানো ঘরখানা, আসবাবপত্র একটু বেশি রকম ঠাসা। এক ঘরে খাট, ড্রেসিং টেবিল, লেখাপড়ার জন্য মাঝারি আকারের একটি টেবিল ও চেয়ার, ট্রাংক, স্টকেস, অর্গ্যান, আলনা ইত্যাদি অনেকগুলি জিনিস ভর্তি করায় নড়াচড়ার স্থানাভাব ঘটিয়াছে। অধিকাংশ আসবাবই জ্যোতির্ময় ভালোবাসিয়া কিনিয়া দিয়াছে, অর্গ্যানটি তো মাত্র ক-মাস আগে কেনা।

ভালো কী গাইতে জানি ? তবু কিনে দিলেন।—অপবাজিতা সলজ্জ আনন্দে যশোদাকে জানায়। সুবর্ণকে কিনিয়া দেওয়ার বদলে স্ত্রীব নামে সংগীতযন্ত্রটি কেনায় বাড়িতে যে কথা হইয়াছিল, যশোদার কানে তাহা আগেই পৌঁছিয়াছে। জ্যোতির্ময়কে যশোদা মোটামুটি চেনে, তাই এমন একটা সহজ সাংসারিক চালে তার ভুল হওয়ায় সে আশ্চর্য হয় নাই। দুদিন পবে যে বোন বিবাহ হইয়া শ্বশুরবাড়ি চলিয়া যাইবে, তার নাম করিয়া ওটা কিনিলেই কোনো গোল হইত না ! কিন্তু সেটা জ্যোতির্ময়ের খেয়াল হয় নাই। বিবাহের সময় যৌতুক হিসাবে অর্গ্যানটি দিতে হইতে পারে, এ আশঙ্কা অবশ্য একটু ছিল। কিন্তু সেও তো জ্যোতির্ময়েরই হাত। যার নামেই কেনা হোক মেয়ে দেখিতে আসিলে এই অর্গ্যান বাজাইয়া সুবর্ণকে গান একটু শুনাইতেই হইবে, অর্গ্যানটি কাব সম্পত্তি, বরপক্ষ তখন সে প্রশ্নও জিজ্ঞাসা করিবে, তখন বলিলেই হইবে এটি জ্যোতির্ময়ের স্ত্রীর জিনিস। তাছাড়া, বরপক্ষ যদি অর্গ্যান একটা দাবি করে, নাছোড়বান্দা হইয়া দাবি করে, স্ত্রীর নামে কেনা হইয়াছে বলিয়াই এটি দান না করিয়া জ্যোতির্ময় কি পারিবে ? আব একটু সস্তা দামের অন্য একটা অবশ্য—

ভদ্রলোকের অন্দরমহলে আসিলেই যশোদার ঢুল ধরে আব এই ধবনের চিন্তা মনে গিজগিজ করিতে থাকে। তবে অপবাজিতা আজ যে সব কথা বলিতেছিল কানে যাওয়ার পর সে পূর্ণমাত্রায় সচেতন হইয়া উঠিল।

ওমা, এ সব কী কথা বলছ বউ ?

বলিবার যে খুব বেশি প্রয়োজন ছিল অপবাজিতার তা নয়, তার চেহারা দেখিয়া, মুখচোখ দেখিয়া বেশ বুঝিতে পারা যায় ভিতরে কিছু গোলমাল হইয়াছে। কিন্তু অবস্থাটা যে এমন শোচনীয় হইয়া দাঁড়াইয়াছে, সেও কি তা অনুমান করিতে পারিয়াছিল ?

ভয়ে অপবাজিতার মুখ ছাইবর্ণ হইয়া গেল। খুব খারাপ নাকি দিদি ?

যশোদা তাড়াতাড়ি অভয় দিয়া বলিল, খারাপের তো কিছুই ছিল না বউ, শরীরটা এমনই খুব দুর্বল করে ফেলেছ কিনা, তাই যা একটু ভয়। ওনাকে বলনি ?

কখন বলি ?

তাও তো বটে, উপহারে আসবাবে যে ঘব ভরিয়া দেয়, প্রত্যেক রাত্রি যার পাশে শুইয়া কাটে, এত বড়ো বিপদের কথাটা তাকে বলিবার তোমার সুযোগ কোথায় ! প্রথমটা যশোদার বড়ো রাগ হয়, মনে হয়, এমন ন্যাকামো কথা যাদের দভাব চুলোয় যাক তারা, কাজ নাই, তাদের কথায় থাকিয়া। কিন্তু অপরাধিতার শীর্ণ বিবর্ণ মুখে ভাসা ভাসা ভয়ার্ত চোখের চাউনি দেখিয়া মনটা আবার গলিয়া যায়।

তা বললে তো চলবে না বোন! ওনাকে বলে চিকিৎসার ব্যবস্থা করতে হবে তো ?

অনেক বুঝাইয়া, অনেক পবামর্শ ও উপদেশ দিয়া যশোদা বাড়ি ফিরিয়াছে। ভাবিতে ভাবিতে আসিয়াছে যে, বেশি বয়সে বিয়ে করা বউকে কি লোকে এতই বেশি ভালোবাসে ? এমনভাবে সীমা ছাড়াইয়া যায় সেই ভালোবাসা যে, বৃকের মধ্যে মুখ গুঁজিয়া তিলতিল করিয়া মরিতে থাকিলেও খেয়াল পর্যন্ত হয় না খাপছাড়া কিছু ঘটতেছে ? সূশ্রী ও কচি মুখখানা আর সুগঠিত ও কোমল দেহখানা দেখিয়া বউটাব জন্য যদি দরদ জাগিয়া থাকে জ্যোতির্ময়ের বৃকে, সে দরদ কেন তাকে এখন বলিয়া দেয় না, সে শ্রীও নাই, সে লাষণ্যও আর নাই ? বউটাও বা এমন হাবা কেন, স্বামীকে অসুখের কথা বলিতে লজ্জা পায় ? ভদ্র স্বামী-স্ত্রীর ভালোবাসার খেলা এই রকম ভদ্রতা বজায় রাখিয়া চলে নাকি ? ভাগ্যে সংসারে সকলে ভদ্র নয় !

হাসপাতাল হইতে ধনঞ্জয় ফিবিয়া আসিয়াছে।

ডান পাটি হাঁটুর নীচ হইতে বাদ গিয়াছে। এখনও ব্যান্ডেজ বাঁধা, তবে ঘা শুকাইয়া আসিয়াছে। আরও কিছুদিন পরে কাঠের পা লাগানো চলিবে।

কী পাপে আমার এমন দশা হল যশোদা ?

পাপ ? পাপের কথা না ভাবাই ভালো। সবই ভগবানের ইচ্ছা। ভগবান যা করেন মানুষের বুঝবার উপায় আছে কী, কেন কবেন ? সহ্য কবা ছাড়া মানুষের আর উপায় নাই।

প্রাণে যে বেঁচে গিয়েছ—

এব চেয়ে মরই ভালো ছিল।

ধনঞ্জয় মবে নাই, আধমব হইয়া গিয়াছে। এ শরীরে এখন জোয়ারভাটা টের পাওয়া যাইতে না, এখন যেন ভাটাব সময় কালীঘাটের কাছে আদিগঙ্গার যে অবস্থা যশোদা অনেকবার দেখিয়া আসিয়াছে, সেই বকম হইয়া গিয়াছে ধনঞ্জয়ের চেহারা।

দেশে খবর দেবে না ?

ধনঞ্জয় ভাবে, অকর্মণ্য হইয়া সে আসিয়া ঘাড়ে চাপিয়াছে, যশোদা তাই তাড়াতাড়ি দেশে খবর দিয়া তাকে তাড়ানোর ব্যবস্থা কবিতো ব্যস্ত হইয়া পড়িয়াছে। মুখ বাঁকাইয়া সে বলে, তাড়াবার জন্য তর সহিছে না চাঁদের মা ? ধনা তোমরা শহুবে মানুষ ! তুমি বঙ্গলে সুধীরের সঙ্গে রেলের ইয়ার্ডে কাজ শেখো গে যাও, তোমার জন্য আমার এই সন্ধানশ হল, আর তুমিই আমাকে—

ধনঞ্জয়ের চোখে জল আসিয়া পড়ে। এত বড়ো অপবাদের জবাবে যশোদা শান্তভাবে শুধু জানায় যে তাড়ানো দূরে থাক, ধনঞ্জয় এখন যাইতে চাইলে যশোদা তাকে যাইতে দিবে নাকি ? ইচ্ছায় হোক আর অনিচ্ছায় হোক এইখানেই এখন ধনঞ্জয়কে থাকিতে হইবে কিছুকাল, পায়ের ঘা শুকাইয়া যতদিন কাঠের পায়ের ব্যবস্থা না হয়। তারপর সে যদি দেশে যাইতে চায় দেশে চলিয়া যাইবে। আর যদি এখানে কোনো কাজকর্ম করিতে চায়, তাও হয়তো যশোদা ঠিক করিয়া দিতে পারিবে।

কাজ ? আর কি আমি কাজ করতে পারব যশোদা ?

কেন পারবে না ? কাঠের পা নিয়ে লোকে রোজগার করে যাচ্ছে না ? দেশে খবর দেবার কথা বলছিলাম, কাউকে যদি তুমি দেখতে চাও ?

কে আর আছে দেশে ধনঞ্জয়ের, কাকেই বা সে দেখিতে চাইবে। এখন আর খবর দিয়া কাজ নাই, ভালো হইয়া রোজগারপাতি করার মতো সুদিন যদি কখনও ধনঞ্জয়ের আসে—

আমার দেনাটাও তখন আস্তে আস্তে শোধ করে দিতে পারবে।

যশোদার আর সব ভালো, মিষ্টি করিয়া কথা বলিতেও সে জানে, কেবল মাঝে মাঝে এই রকম এক একটা কথা বলিয়া এমন সে প্রাণে আঘাত দেয় মানুষের ! এখন প্রাণে আঘাত পাইলেও যশোদার আশ্রয়ে যশোদার অঙ্গে প্রাণধারণ করিয়া থাকিতে থাকিতে কয়েকদিন পরে যশোদার এই কথা মনে করিয়াই লজ্জাটা যে তার কম হইবে, প্রাণে একটু স্বস্তি বোধ করিবে, এ সব অবশ্য ধনঞ্জয়ের খেয়াল হয় না। সামান্য একটু সাময়িক মনঃকষ্ট দিয়া অনেকদিনের অনেক বেশি মনঃকষ্ট নিবারণের এ সব উপায়ের সঙ্গে তার পরিচয় নাই—কজন মানুষেরই বা থাকে !

সুধীর প্রথমটা ধনঞ্জয়ের কাছে ভেড়ে নাই। ধনঞ্জয় হাসপাতাল হইতে বাড়িতে আসিয়াছে, দু-তিনদিন এটা যেন তার অজানাই রহিয়া গেল। তারপর একদিন সকাল বেলা কাজে যাওয়ার আগে মুখে অস্বাভাবিক গাভীর আনিয়া আস্তে আস্তে সে ধনঞ্জয়ের ঘরে গেল।

কেমন আছ ধনাদা ? যাও, বিড়ি খাও একটা।

ধনঞ্জয় বিছানায় উঠিয়া বসিয়াছিল। সুধীরের দেওয়া বিড়িটা ধরাইয়া সে বলিল, বোসো দিকি ভাই এখনে, তোমাকে একটা কথা সুধৌই পষ্ট করে। যা হবার তা তো হল, সব আমার অদৃষ্টের দোষ, গোলমাল টোলমাল আমি আর করব না, মা কালীর দিব্যি। গাড়িটা কে ঠেলে দিয়েছিল বলা দিকিন ?

শুনিতে শুনিতে সুধীরের মুখ বিবর্ণ হইয়া গিয়াছিল, বুকের মধ্যে টিপটিপ করিতেছিল—কে ঠেলে দেবে, কেউ ঠেলে দেয়নি।—বড়োবাবু নিজে এসে সবাইকে জিজ্ঞেস করে রিপোর্ট দিলে—

সে তো জানি, তুমি নিজে দ্যাখোনি কিছু ?

সুধীর রাগিয়া বলিল, কী বললে ? আমি দেখেছি ? দেখেও চূপ মেরে আছি ? আমি মিথ্যুক ? বড়োবাবু নিজে এসে—

হয়তো একটা কলহ বাধিয়া যাইত দুজনের মধ্যে, যশোদা আসিয়া পড়ায় সেটা আর ঘটতে পারিল না।

যশোদা রাগ করিয়া সুধীরকে বলিল, কাজে যাও তো তুমি। কেমন ধারা মানুষ তুমি, রোগা মানুষটার সঙ্গে ঝগড়া করছ ? যাও, এখুনি চলে যাও, একটি কথা নয় আর।

ধনঞ্জয়ের সঙ্গে সুধীরের কলহ হইয়া গেলেও বোধ হয় এর চেয়ে ভালো ছিল। সোজাসুজি কলহ-বিবাদের ঝাঁজ কতক্ষণ মানুষের মনে থাকে ? যশোদা আসিয়া এমন করিয়া বলায় সুধীরের মনে যে জ্বালা ধরিয়া গেল তার ঝাঁজ সহজে মিটিবার নয়। তার জন্য দরদ ছিল যশোদার মনে, ধনঞ্জয় আসিয়া সে দরদ গাপ করিয়াছিল। এখনও, ধনঞ্জয়ের ঠ্যাং কাটা যাওয়ার পরেও, এই ধনঞ্জয়কেই যশোদা দরদ করিবে ? সে তুচ্ছ হইয়া থাকিবে ?

কেন এমন হইল ? কেন যশোদা তাকে আর পছন্দ করে না ?

যশোদা ধনঞ্জয়ের সেবা করে, তাকে বাটিভরা দুধ খাওয়ায়, না বলিতে দরকার মতো তাকে বিড়ি পর্যন্ত কিনিয়া দেয়। অসুখে-বিসুখে আরও দু-একজনকে এ বাড়িতে সুধীর শয়্যাগত হইয়া থাকিতে দেখিয়াছে, সে নিজেও একবার অসুখে ভুগিয়াছিল, তখন যশোদা যেমন সেবা করিয়াছিল ধনঞ্জয়ের সেবা করার সঙ্গে তার আকাশ-পাতাল তফাত। অন্য সমস্ত কাজ যেন যশোদার কাছে তুচ্ছ হইয়া গিয়াছে, অন্য সকলের সুবিধা অসুবিধার জন্য তার যেন আগের মতো ভাবনা নাই, ধনঞ্জয়ের সুখসুবিধার ব্যবস্থা করাটাই যেন তার এখন একমাত্র কর্তব্য, সব সময় সে যেন কেবল ধনঞ্জয়ের কথাই ভাবে, ধনঞ্জয়ের ডাক শুনবার জন্য উৎকর্ণ হইয়া থাকে। অন্তত দেখিয়া শুনিয়া সুধীরের তাই মনে হয়। দেখাশোনাটা সারাদিন চলে না, সুধীরকে কাজে যাইতে হয়। কিন্তু কল্পনা তো

আছে সুধীরের, কাজে যাওয়ার আগে আর কাজে যাওয়ার পরে সে যতটুকু দেখে আর শোনে, ওয়াগনে মাল বোঝাই দিতে দিতে তারই ভিত্তিতে সে অহর্নিশ যশোদার আত্মবিশ্বস্ত সেবায়ত্নের এমন কল্পনা গড়িয়া তোলে যে সত্যসত্যই সেই অনুপাতে ধনঞ্জয়ের সেবা করিয়া থাকিলে দু-চার দিনের মধ্যে যশোদাও শয্যাগ্রহণ করিত আর তার নিজেই দরকার হইত সেবার। এইসব দুর্ভাবনায় অন্যান্যমন্ড হইয়া রাজেনের গালাগালিতে সুধীরের প্রাণান্ত হয়। সুদীর্ঘ সরীসূপের মতো লম্বা মালগাড়ির একপ্রান্তে ইঞ্জিন আসিয়া ঠেকিলে ওয়াগনের সঙ্গে ওয়াগনের ধাক্কায় যে শব্দ ওঠে তাতে সে চমকাইয়া ওঠে। না, এর চেয়ে তার একটা পা কাটা গেলে যেন ভালো ছিল ! অথবা পা কাটার বদলে ধনঞ্জয় যদি একেবারে মরিয়া যাইত। ধনঞ্জয় অবশ্য এখনও মরিতে পারে—কিন্তু লোকটার মরাবাঁচার ভার কি ভগবান সুধীরের হাতে ছাড়িয়া দিবেন একদিন এক মহূর্তের জন্য, সেদিন তাকে আলগা ওয়াগনটার পাশে দাঁড় করাইয়া রাখিয়া হঠাৎ সুধীরের মাথায় ওয়াগনটা ঠেলিয়া দিবার বুদ্ধি যেমন জোগাইয়া দিয়াছিলেন ?

এই চিন্তাটা মাথায় আসিলে সুধীরের মুখের ভাব এমন হয় যে বকিতে গিয়া রাজেন পর্যন্ত তাকে কিছু বলিতে সাহস পাষ না, কথাগুলি গিলিয়া ফেলে।

বাড়ি ছাড়িয়া কাজে আসিতে সুধীরের ভালো লাগে না, নানা ছুতায় সে বাড়িতে বসিয়া থাকিবার চেষ্টা করে। কাজে যাইবে না কেন, কী হইয়াছে সুধীরের ? অসুখ হইয়াছে—পেট ব্যথা করিতোছে। বেশ, তবে আর এ বেলা সুধীরের কিছু খাইয়া কাজ নাই।

তোমার ব্যাপারখানা কিছু ধরতে পারছি না সুধীর। কাজে নাকি ফাঁকি দিচ্ছ আর মেজাজ দেখাচ্ছ, রাজেন বললে। এ তো ভালো কথা নয় ? এ কাজটা যদি যায় তোমার, আর কাজ আমি জুটিয়ে দিতে পারব না বলে রাখছি।

না দিলে কাজ জুটিয়ে, কাজ করব না।

খাইয়া দাইয়া দেরি করিয়া সুধীর সেদিন কাজে গেল বটে, মাঝরাতে ফিরিয়া আসিল মাতাল হইয়া। আসিয়া এমন মাতলামিই সে আরম্ভ করিয়া দিল, শুধু মদ খাইয়া মাতাল হইয়া যেটা কোনো মানুষের পক্ষেই করা সম্ভব নয়। কুড়ি-বাইশজন কুলিমজুরকে বাড়িতে রাখিয়াও যশোদা তার বাড়িকে এতদিন ঠিক বস্তির পর্যায়ে নামিতে দেয় নাই, সুধীর একাই সেই কাজটা করিয়া দিল।

সকলে ভাবিয়াছিল পরদিন যশোদা বোধ হয় তাকে দ্বন্দ্ব করিয়া তাড়াইয়া দিবে। কিন্তু যশোদা কিছুই বলিল না। বলাব খুব বেশি সুযোগও সে পাইল না, কারণ পরদিন কারও কাছে কিছু না বলিয়া সুধীর উধাও হইয়া গেল। ফিরিয়া আসিল তিনদিন পরে।

তখনও যশোদা তাকে কিছুই বলিল না।

কদিন বাহিরে ঘুরিয়া আসিয়া সুধীরের বোধ হয় হাওয়া পরিবর্তনের কাজ হইয়াছিল, সেই সঙ্গে মতেরও বোধ হয় পরিবর্তন ঘটিয়াছিল। চোরের মতো পলাইয়া গিয়াছিল যশোদার ভয়ে, ফিরিয়া আসিল যেন লাটসাহেব হইয়া, ভয় নাই, অনুতাপ নাই, মুখ ভার করিয়া থাকা নাই, এ জগতে কাউকে সে গ্রাহ্যও করে না। কৈফিয়ত হিসাবে নয়, নেহাত যেন দয়া করিয়াই যশোদাকে হঠাৎ উধাও হওয়ার কারণটা জানাইয়া দিল।

মনটা ভালো ছিল না চাঁদের মা, তাই একবার একটু ঘুরে এলাম।

যশোদা বলিল, বেশ করেছ। রাজেনকে বলে দিয়েছি, এবার কিছু বলবে না, আর কিন্তু এ রকম পাগলামি কোরো না কখনও।

তোমার জন্যেই তো। তুমি আমার সঙ্গে ও রকম কর কেন ?

যশোদা কথা বলে না। সুধীরের সম্বন্ধে কী করা দরকার এখনও সে ঠিক করিয়া উঠিতে পারে নাই।

সুধীর বলিতে থাকে, জানো চাঁদের মা, সেই যে সেদিন তুমি মুখে বললে আমি ভাত পাব না, কিন্তু পাছে ভাতটি না খেয়ে যাই তাই জন্যে নিজে তাড়াতাড়ি বাড়ি ছেড়ে চলে গেলে, সেদিন টের পেয়েছি সংসারে টাকা বল, রূপযেবন বল, দরদ ছাড়া সুখ নেই মানুষের।

যশোদা রীতিমতো বিব্রত হইয়া বলে, অ ! সেদিন টের পেয়েছ।

আবেগের মাথায় সুধীর বলিয়া বসে, তুমি বললে তোমার জন্যে আমি প্রাণ দিতে পারি চাঁদের মা।

প্রাণ তোমাকে দিতে হবে না, নদেরচাঁদের বউটা জুরে ভুগছে, ওকে একটু ওষুদ এনে দাও দিকি ? খানিক পরে খবর আনিতে গিয়া যশোদা দেখিল ঔষধ আনা হইয়াছে কিন্তু খাওয়ানো হয় নাই। বিছানায় চাঁপার মা কঁোকাইতেছে, ঘরের কোণে চাঁপা আর সুধীর মশগুল হইয়া আলাপ করিতেছে।

চাঁপা বলিল, ওষুদটা কবার খাওয়ার বুঝে নিচ্ছিলাম দিদি।

ওষুদটা খাইয়ে গল্প কর চাঁপা। বলিয়া যশোদা চলিয়া আসিল।

তারপর হইতে সুধীরকে চাঁপার যেন সর্বদাই দরকার হইতে লাগিল। দু-বেলা ডাকিয়া পাঠায়, নিজে আসিয়া সুধীরের সঙ্গে গুজগাজ ফিসফাস করে, কী যেন একটা ষড়যন্ত্র আরম্ভ করিয়াছে দুজনে। ও বাড়িতে গেলেই যশোদা দুজনকে একসঙ্গে দেখিতে পায়। দু-একবার কালোকেও তাদের সঙ্গে দেখা গেল, তিনজনে হাসি-গল্প করিতেছে। কথা বেশি বলিতেছে সুধীর, হাসি চাঁপাই হাসিতেছে বেশি, কালো হাঁ করিয়া শুনিতোছে। যশোদা ওদের এড়াইয়া চলিতে লাগিল, চাঁপা যদি জগৎকে ছাড়িয়া সুধীরের দিকে ঝুকিয়া থাকে, যশোদার কিছু বলিবার নাই। নিজের ভালোমন্দ চাঁপা ভালো করিয়াই বোঝে। চাঁপার জন্য সুধীরের দরদ জাগিয়া তার জন্য দরদটা যদি একটু কমে তাহা হইলেই যশোদা এখন বাঁচে।

কিন্তু কিছুতেই কিছু হইল না, যশোদাকে উপেক্ষা করাব লক্ষণ সুধীরের দেখা গেল না। কয়েকদিনের মধ্যে চাঁপার সম্বন্ধে তার একান্ত উদাসীনতা দেখা গেল, চাঁপা ডাকিলে সব সময় সে যাইতে চায় না। কেবল চাঁপা যখন কালোকে পাঠাইয়া, তাকে বিশেষ দরকারে ডাকিয়া পাঠায়, তখন কালোর সঙ্গে সে মুখ গভীর করিয়া শুনিয়া আসিতে যায় দরকারটা কী এবং গিয়াই ফিরিয়া আসে অল্পক্ষণের মধ্যে। ধীরে ধীরে আবার যেন তার আশ্রয়স্থল ফিরিয়া আসিতে লাগিল। ধনঞ্জয় আর যশোদাকে একসঙ্গে দেখিলেই কোথা হইতে সে আসিয়া উপস্থিত হয় কিছুতেই নড়িতে চায় না। যশোদাকে একা পাইলেই কাছে বসিয়া আবেল-তাবেল গল্প জুড়িয়া দেয়, ধনঞ্জয়ের যত পারে নিন্দা করে, তার জানা একটি স্ত্রীলোকের উপর ধনঞ্জয়ের কী গভীর অনুভাব ছিল সেই গল্প ফেনাইয়া ফাঁপাইয়া এমন করিয়া বলে যে কথটা সত্য না মিথ্যা জিজ্ঞাসা করারও প্রয়োজন হয় না।

তারপর একদিন সুধীর বলে কী, একটা কথা বলি শোনো চাঁদের মা। শূনে রাগ কোরো না কিন্তু। আমার কোনো কুমতলব নেই আগেই বলে রাখছি তোমাকে।

তুমি মস্ত সাধুপুরুষ। শূনি কথটা ?

আর তো সুধীর থাকিতে পারে না যশোদাকে ছাড়া, সে যে পাগল হইয়া গেল যশোদার জন্য তা কি যশোদা দেখিতে পায় না ? এমন ভাবে আর কতদিন চলিবে ? তার চেয়ে এখনকার বাড়িঘর বিক্রয় করিয়া যশোদা চলুক না তার সঙ্গে দূরদেশে, যেখানে তারা দুজনে ঘর বাঁধিয়া পরম সুখে থাকিতে পারিবে ?—তুমি ভাবছ আমার চেয়ে বয়স তোমার দু-এক বছর বেশি, চেহারাটা তোমার জবরদস্ত, তোমার জন্যে আমার মন কাঁদতে পারে না, বাড়ি বিক্রির টাকার পরে আমার লোভ ? আগেই তো বলেছি তোমাকে, আমার কোনো কুমতলব নেই। বেশ বাড়িঘর থাক তোমার, এমনিই চলো তুমি আমার সঙ্গে, আমিই রোজগার করে তোমায় খাওয়াবো।

কথাটার আকস্মিকতায় যশোদা খানিকক্ষণ হতভঙ্গ হইয়া থাকে, তারপর বলে, বটে ? ফাজলামির আর পাণ্ডুর পেলো না তুমি, তাম্শা জুড়েছ আমার সঙ্গে ? আস্পন্দা তো কম নয় তোমার !

সুধীর ব্যগ্রকণ্ঠে বলে, তাম্শা নয় চাঁদের মা, সত্যি তাম্শা নয়। মতিদা বলছিল, কেউ কোনোদিন তোমায় দরদ দেখায়নি বলে মনটা তোমার বিগড়ে গেছে, কেউ দরদ করলেই ভাব তাম্শা জুড়েছে। কী করলে তোমার বিশ্বাস হবে বলো, আমি তাই করব। তুমি জান না যশোদা—

জানতে চাই না আমি। যাও তুমি, বেরোও আমার বাড়ি থেকে—এখুনি বেরোও। ফের যদি আমার সামনে পড়, কিলিয়ে তোমায় নিকেশ করব।

কেবল এই কথা কয়েকটি নয়, আরও অনেক কিছু যশোদা অবশ্য তাকে বলিল, যে রকম জোরালো ঝাঁজালো, অকথা কথার ফোড়ন না থাকিলে সুধীরের মতো মানুষের পক্ষে বোঝাই কঠিন হয় যে তাকে সত্যসত্যই তিরস্কার করা হইতেছে।

তখন দুপুরবেলা। সুধীর সেদিন কাজে যায় নাই। ফতুয়াটা গায়ে দিয়া সুধীর বাহির হইয়া গেল আর সারাটা দিন রাগে যশোদা গরগর করিল। রেল ইয়ার্ডের একটা কুলি, সে কাজটা জুটাইয়া দিয়াছে বলিয়া দু-বেলা দুটি অন্ন জুটিতেছে, সে কিনা তাকে এমনভাবে অপমান করিতে সাহস পায় ! এই কী লাভ হইয়াছে তার কুলিমজুরকে আপন করিতে গিয়া ? রাগের প্রথম অবস্থাটা কাটিয়া যাইবাব পন বড়ো দুঃখ হয় যশোদার. একবার চোখে জলও আসিয়া পড়ে। সুধীর কুলিমজুর বলিয়াই যশোদার এতখানি অপমান বোধ বা রাগ বা দুঃখ নয়, সুধীরের প্রেমনিবেদনের ভঙ্গিটাই তাকে বড়ো যন্ত্রণা দিতেছিল। দুজনে মিলিয়া তারা পালাইয়া যাইবে এ যেন সুধীর প্রার্থনা করে নাই, যশোদাই অনেকদিন হইতে তাব পায়ে ধরিয়া সাধিতেছিল, এতদিনে ভাবিয়া চিন্তিয়া সুধীর রাজি হইয়া গিয়াছে। সুধীরের মনের ভাব টের পাইতে যশোদার বাকি ছিল না, কদিন হইতে এই সমস্যাটাই সে মনের মধ্যে নাড়াচাড়া কবিতেছিল, ভাবিতেছিল কী উপায়ে তার এই পাগলামি ঘূচানো যায়। একদিন পোষা কুকুরের মতো পায়ে লুটাইয়া পড়িয়া সে তার ভালোবাসার কথাটা বলিয়া ফেলিতে পারে, এ ভয়ও যশোদার ছিল। কিন্তু এমনভাবে সোজাসুজি এমন একটা প্রস্তাব তার কাছে করিবার সাহস যে সুধীরের পক্ষে হওয়া সম্ভব, যশোদা তা কল্পনাও করে নাই :

রাত্রি রান্নার শেষে যশোদা দেখিতে পাইল, সুধীর চোরের মতো পা টিপিয়া টিপিয়া বাড়ি ঢুকিতেছে। ক্ষমা-টমা সে চাহিবে না, যশোদা তা জানে। ও সব কায়দাদুরস্ত চালচলন এখনও এদের আয়ত্ত হয় নাই, একটু পরে সুধীর আবার চুপিচুপি বাহির হইয়া গেল। দোকানে খাবার কিনিয়া খাইতে গেল বোধ হয়। মাথার মধ্যে কেমন গোলমাল হইয়া যাইতেছিল, পরিষ্কার করিয়া ব্যাপারটা যশোদা বিবেচনা করিয়া দেখিতে পারিতেছিল না। এ সব মানুষকে বিচার করা বড়ো কঠিন। এদের মতো একাধারে এমন বোকাহা বা পাকা, বজ্জাত, ঝানু, শিশু, কোমল, কঠোর, সাহসী, ভীৰু, ভালো আর মন্দ জীব আর হয় না। সুধীরের আসল উদ্দেশ্যটা ধরিতে না পারিয়াই যশোদা বড়ো অস্বস্তি বোধ করিতেছিল। সুধীর কি সত্যই বিশ্বাস কবিয়াছিল যশোদা তার সঙ্গে পালাইয়া যাইতে রাজি হইবে ? এ রকম একটা বিশ্বাস তার মনে জন্মিল কীসে ? যশোদা ধমক দিলে যার মুখ শুকাইয়া যায়, যশোদার স্নেহ-মমতার জন্য তার ব্যাকুলতা জন্মিতে পারে, যশোদার সঙ্গে পিরিত করার শখ হওয়াও তার পক্ষে সম্ভব, কিন্তু এমন একটা ধারণা তার মনে আসে কী করিয়া যে যশোদা তাকে প্রশ্রয় দিবে ?

কখন আবার সুধীর আসিয়া ঢুকিয়াছিল যশোদা দেখিতে পায় নাই, পরদিন সকালে ঘরের বাহিরে আসিয়া কলতলায় যশোদাকে দেখিয়াই চোরের মতো সুধীর আঙুটে আঙুটে পালাইয়া যায়। দোষ করিয়া গুবুজনের কাছে ছোটো ছেলে যেমন করে। দেখিয়া কে বলিবে এই সেই গোঁয়ার-গোবিন্দ

সুধীর, মতির হইয়া যে মিলে মারামাৰি করিয়াছিল, যশোদাকে কাল যে ডাক দিয়া বলিয়াছিল, চলো গো যশোদা, আমরা হাত ধরাধরি করে পিরিত করতে যাই !

সারাদিন সুধীরের পাত্তা মিলিল না, সারাদিন যশোদা তারই কথা উলটাইয়া পালটাইয়া মনের মধ্যে নাড়াচাড়া করিতে লাগিল। একরাত্রেই যশোদার মন শান্ত হইয়া গিয়াছে ; নিজের ভাবপ্রবণতার মেঘ কাটিয়া যাওয়ায় আর সুধীরের মতো গৃহসুখে বঞ্চিত অশিক্ষিত বর্বর দুর্ভাগ্যগুলির জন্য তার স্বাভাবিক মমতা ফিবিয়া আসায়, এবার ধীরে ধীরে সে সুধীরের পাগলামির মানে বুঝিতে পারে। কবে যেন সুধীর প্রথম টের পাইয়াছিল, সংসারে টাকা বলো, বৃপ-যৌবন বলো, দরদ ছাড়া সুখ নাই ? যশোদা যেদিন তাকে ভাত খাওয়ার সুযোগ দিতে ছল করিয়া বাড়ির বাহির হইয়া গিয়াছিল। সুতরাং দরদের দাম কষিতে তাকে শিখাইয়াছে যশোদাই। আর মতি যেন কী বলিয়াছে সুধীরকে ? পুরুষের ভালোবাসা না পাওয়ায় মনটা বিগড়াইয়া গিয়াছে যশোদার ! যশোদার কাছে দরদ চিনিয়া বৃপলাবণ্যের অভাবে পুরুষের ভালোবাসা না পাইয়া যশোদা মনে মনে কাঁদিতেছে জানিয়া, সুধীরের পক্ষে এ কথা মনে কবা আশ্চর্য কী যে তার মতো জোয়ান বয়সি মানুষের ভালোবাসা পাইয়া যশোদা একেবারে কৃতার্থ হইয়া যাইবে।

স্বস্তি বোধ কবে যশোদা, মুখে একটু হাসিও তার দেখা দেয়। আহা, সুধীর তবে সতাই দরদ দেখাইতেছিল ! হাতির মতো যে যশোদাকে কেউ চায় না, তাকে সঙ্গে করিয়া পলাইতে চাহিয়া সেই একটা মস্ত ত্যাগ স্বীকার করিতেছিল। তার আসল লোভ যে শ্রীমতী যশোদার উপর, সেই রোজগার করিয়া যশোদাকে খাওয়াইবে, এই কথাটায় যশোদার বিশ্বাস জন্মানোর জন্য তাই অমন ব্যাকুল হইয়া পড়িয়াছিল সুধীর।

রাত্রে রান্না করিতে করিতে যশোদা ভাবে, না, তার কুলিমজুরেরাই ভালো। এদের যদি আপন না করিবে, আপন হইবে কারা ? সত্যপ্রিয়র মতো যারা বড়োলোক, অথবা জ্যোতির্ময়ের মতো যারা ভদ্রলোক ? বড়োলোক, ভদ্রলোক আর ছোটোলোক, বিগড়াইয়া অবশ্য গিয়াছে সকলেই, তবু অভাবে যারা বিগড়াইয়া গিয়াছে তারা এখনও মানুষ আছে খানিক খানিক। আব এ অবস্থায় জীবন কাটাইয়া খানিক খানিক মানুষ থাকাও কী সহজ গৌরবের কথা ! সুধীরের মতো একজন করিয়া প্রত্যেক দিন তার সঙ্গে বেয়াদবি কবুক, তবুও যশোদা চিরকাল এদেরই ভালোবাসিবে।

সারাটা দিন বাহিরে কাটাইয়া রাত্রি প্রায় দশটার সময় সুধীর চূপচূপ নিজের ঘরে গিয়া চুকিয়াছিল। যশোদা হাঁকিয়া বলিল, ও মতি, সুধীরকে ডাকো, ভাত খেয়ে যাক।

সুধীরকে রান্নাঘরে খাইতে বসাইয়া যশোদা বলিল, এবারটি ধরলাম না তোমার কথা, আর কিছু ও সব বোলো না আমায় কোনদিন।

সুধীর মুখ নিচু করিয়া খাইতে থাকে, যশোদা পিঁড়িটা আর একটু সরাইয়া আনিয়া মুখোমুখি বসিয়া বলে, কাজে যাওনি আজ ?

না।

কাল থেকে যেয়ো।

রান্নাঘরটি যশোদার পার্শ্বকার পরিচ্ছন্ন, কেবল তিনটি উনানের ধোঁয়ায় দেয়াল কালিবর্ণ হইয়া গিয়াছে। ধোঁয়ার সঙ্গে লড়াই করিয়া যশোদা পারে না। দোষটা অবশ্য আসলে ধোঁয়ার নয়, মানুষের পেটের। দু-বেলা ভাত সিদ্ধ করিতে না হইলে তিনটি উনানে দু-বেলা আঁচ দেওয়ারও দরকার হইত না, দেয়ালে এত কালিও জমিত না।

ঘর-সংসার করার সাধ হয়ে থাকলে বিয়ে-থা করো একটা ? বলো তো আমিই না হয় বিয়েটা দিয়ে দিই তোমার একটা মেয়ে ঠিক করে ?

সুধীর মাথা নাড়িয়া চূপচাপ খাইয়া যায়।

যশোদা বলে, বেশ তো সাধ না হয়ে থাকে আমার কথা রাখবার জন্যেই বিয়ে করো। তুমি তো বলছিলে আমার জন্যে প্রাণ দিতে রাজি আছ। প্রাণ দেওয়াব চেয়ে বিয়ে করাটা কি কঠিন নাকি ?

সুধীর চুপচাপ খাইয়া যায়।

চাঁপাকে যদি তোমার পছন্দ হয়—

সুধীর মাথা নাড়ে। যশোদা বলে, অ ! আমি ভাবলাম কী, হয়তো বা চাঁপাকে পছন্দ হয়েছে তোমার।

এবার সুধীর মুখ তুলিয়া বলিল, কাটা ঘায়ে নুনের ছিটা কেন দিচ্ছ চাঁদের মা ?

সেদিন এই পর্যন্ত। দিন তিনেক চুপচাপ থাকিয়া যশোদা আবার অন্যভাবে কথাটা পাড়িল। চাঁপা বড়ো কষ্টে দিন কাটাচ্ছে, এমন মায়া হয় মেয়েটাকে দেখলে ! তুমি যদি বিয়ে কর ওকে, বড্ড খুশি হব আমি।

চাঁপাকে ? চাঁপার কি মায়ামমতা কিছু আছে চাঁদের মা ? ওর চেয়ে কালো ঢের ভালো।

তারপর যশোদা ঘটকালি করিয়া কালোর সঙ্গে সুধীরের বিবাহ ঠিক করিয়া ফেলিল। বলিল, খবচার টাকাটা কিছু ফেরত দিতে হবে বাবু। দু টাকা চার টাকা করে দियो, কিন্তু যদিহে হোক শোধ করে দিতেই হবে। তুমি আমার এমন কিছু সাতপুবুয়েব কুটুম নও যে, তোমার ঘর-সংসার পাভতে গিয়ে আশি ক্ষতর হব।

একদিনে দুটি বিবাহ হইয়া গেল, সুধীরের সঙ্গে কালোর আর জগতের সঙ্গে চাঁপার। কদিন পরে সত্যপ্রিয়র ছোটোমেয়ের বিবাহ, এখন হইতে গেটে শানাই বাজিতে আরম্ভ করিয়াছে। যশোদাব বাড়িতে দুটি বিবাহে শানাই বাজিল শুধু এক সন্ধ্যা, উৎসব হইল একটু অভদ্র রকমের, তবে এমন জমজমাট উৎসব হইল বলিবাব নয়। রাত বাবোটার পর মতির তো জ্ঞানই বহিল না। যশোদাকে একাধারে কন্যাকর্তা ও বরকর্তার নাবী-সংস্করণ হইয়া সমস্ত দাযিত্ব ঘাড়ে নিতে হইল বটে, আমোদ-আহ্লাদ সেও করিল না কম। সকলের সঙ্গে এক হইয়া সে মিশিয়া গেল। নেশাটা জমিয়া আসিলে মতি একবার তাব গলাটা জড়াইয়া ধরিয়াছিল, হাত ছাড়াইয়া যশোদাকে তাড়াতাড়ি অন্যদিকে চলিয়া যাইতে দেখিয়া সবাই ভাবিয়াছিল সে বুঝি রাগ করিয়াছে। ওমা, খানিক পরে এক বাটি দুধ আর একটা চামচ আনিয়া সকলের সামনে জেব করি : মতিকে শিশুর মতো কোলে শোয়াইয়া যশোদা তাকে তিন চামচ দুধ খাওয়াইয়া ছাড়িল !

পাঁচ

যশোদা বড়ো ব্যস্ত, একেবারে সময় পায় না। দুটি বিবাহের হাঙ্গামা চুকিতে না চুকিতে সত্যপ্রিয় মিলে জোরালো ধর্মঘটের আয়োজন আরম্ভ হইয়া গিয়াছে। সবদা যশোদার কাছে লোকজন আসে যায়, তার সঙ্গে পরামর্শ করে, শ্রমিকদলের সন্ধ্যায় গিয়া তাকে বক্তৃত ; করিতে বলে। যশোদার পরামর্শের ধরনটা একটু বিচিত্র। খুঁটিয়া খুঁটিয়া সে কেবল প্রশ্নের পর প্রশ্ন করিয়া যায় অথবা যারা পরামর্শ করিতে আসে তাদের কথা কাটাকাটি মন দিয়া শোনে। তারপর একেবারে মত প্রকাশ করে ; এখন করলেও চলে অবিশ্যি, কিন্তু কিছুকাল পরে কবলেই ভালো হত।

বক্তৃতা করা সম্বন্ধে হাতজোড় করিয়া বলে, ওটি মাপ করতে হবে। আমি মুখ্য-সুখ্য মানুষ, অত ভনিতে করে সাজিয়ে গুঁজিয়ে বলা আমার কন্মো নয়। দু-দশজনে এলে, কথাবার্তা কইলাম, সে আলাদা। ভাবলে গায়ে কাঁটা দেয়, বক্তৃত্তে করব কী গো !

অপরাজিতার সম্বন্ধে জ্যোতির্ময়কে সতর্ক করিয়া দিবে ভাবিয়াছিল, নানা হাঙ্গামায় যাওয়া হয় নাই। মাঝখানে অপরাজিতা আর একদিন তাকে ডাকিয়া পাঠাইয়াছিল, সেদিন তার অবস্থা দেখিয়া সত্যসত্যই যশোদার বড়ো ভাবনা হইয়াছে। একদিন যশোদা জ্যোতির্ময়ের সঙ্গে দেখা করিতে গেল।

বড়ো ব্যস্ত জ্যোতির্ময়। সত্যপ্রিয়র কন্যার বিবাহ উপলক্ষে প্রীতি-উপহারের পদ্য লিখিতেছে। একটি দুটি নয়, অনেকগুলি। মা-বাবা, মাসি-পিসি, খুড়া-জেঠা, দাদা-দিদি, বউদিদি, ভগ্নীপতি ইত্যাদি নানা সম্পর্কের উপযোগী আশীর্বাদে গুরুগভীর অথবা হাসি-তামাশায় হালকা পদ্য লিখিতে হইবে। প্রত্যেক পদ্যের শেষে ভগবানের কাছে প্রার্থনা থাকিবে যে, নবদম্পতি যেন সুখী হয়। একটু ক্লিষ্ট দেখাইতেছে জ্যোতির্ময়কে, অসুখী মনে হইতেছে। প্রীতি-উপহারের পদ্য লিখিবার পরিশ্রমে নয়, সেই নেকলেসটার জন্য। নেকলেসটা যেন পাইয়া বসিয়াছে জ্যোতির্ময়কে, ক্রমাগত পীড়ন করিতেছে। ভাবিয়া সে কিছু ঠিক করিতে পারে না। সত্যপ্রিয় তাকে এমনভাবে ঠকাইবে কেন ? এমন কোনো কথা ছিল না যে, কর্মচারীর বউকে তার হাজার টাকা দামের গহনা দিতেই হইবে, না দিলে লোকে নিন্দা করিবে, তাই বাধ্য হইয়া কোনোরকমে সেদিন মানরক্ষা করিতে হইয়াছে ! সত্যপ্রিয় অবশ্য বলিয়া দেয় নাই যে, হাজার টাকা দামের নেকলেস দেওয়া হইল, কিন্তু সেদিন নেকলেসটির ঝলমলে রূপ দেখিয়া সেই ধারণাই তো সকলের মনে জাগিয়াছিল, লোকের মনে এ রকম মিথ্যা ধারণা সৃষ্টির উদ্দেশ্যই যদি সত্যপ্রিয়র না থাকিবে, এমন জিনিস সে কেন দিবে প্রথম কয়েকদিন যা চোখে ধাঁধা লাগাইয়া দেয়, তারপর কয়েক মাসের মধ্যে চাকচিক্য হারাইয়া এমন সস্তা দেখাইতে থাকে ? সত্যপ্রিয় ভালো একখানা কাপড় দিতে পারিত, ছোটোখাটো সোনার কিছু দিতে পারিত, কিছু না দিয়াও পারিত। একেবারে কিছু না দিলে জ্যোতির্ময় একটু ক্ষুণ্ণ হইত সত্য, কিন্তু সে ক্ষোভ এমন উগ্র হইত না, এমন স্থায়ীও হইত না।

সত্যপ্রিয়র দোষক্ষালনের জন্য কতভাবেই যে ব্যাপারটা জ্যোতির্ময় বিশ্লেষণ করিবার চেষ্টা করিয়াছে। ভাবিয়াছে, হয়তো সত্যপ্রিয় জানিত না, নিজে তো দোকানে গিয়া সে জিনিসটি কেনে নাই। এত সব খুঁটিনাটি বিষয়ে নজর-দিবার তার সময় কোথায় ? একেবারে অপরাজিতার হাতে দিবার সময় এক মিনিটের জন্য ছাড়া হয়তো জিনিসটা সত্যপ্রিয় ধরেও নাই, চোখেও দেখে নাই। যে জিনিসটা কিনিয়া আনিয়াছে, শেষ মুহূর্তে যে সত্যপ্রিয়র হাতে জিনিসটা তুলিয়া দিয়াছে, সেই হয়তো ঠকাইয়াছে সত্যপ্রিয়কে। নির্ভয়েই ঠকাইয়াছে, কারণ দুদিন পরে ফাঁকি ধরা পড়িলেও কেউ তো আর সত্যপ্রিয়কে জিজ্ঞাসা করিতে যাইবে না, আপনি আমার বউকে কত দামের উপহার দিয়েছিলেন ?

প্রীতি-উপহারের পদ্য লিখিতে বসিয়া এইসব কথাই জ্যোতির্ময় ভাবিতেছিল, যশোদাকে দেখিয়া খুশি হইয়া বলিল, এসো চাঁদের মা। সব সময় এসো না কেন বলো তো ?

সব সময় আসব কেন ?

তা ঠিক। সত্যি বলছি চাঁদের মা, তোমার সঙ্গে কথা বলতে এমন ভালো লাগে, এমন সহজভাবে তুমি কথা বলতে পার। কোনো বিষয়ে তোমার ন্যাকামি নেই। মানুষের মন রেখে কথা বলতে বলতে প্রাণ বেরিয়ে গেল চাঁদের মা।

না বলিলেই পারেন ?

সেটা যে সম্ভব নয়, যশোদাও খানিক খানিক বোঝে। অন্যভাবে কথা বলিতে জানিলে তো বলিবে, মানুষের মন রাখিয়া কথা না বলিলে বোবা হইয়া থাকিতে হয়।

অপরাজিতার কথাটা যশোদা প্রথমে জ্যোতির্ময়ের মন রাখিয়া মোলায়েম করিয়াই বলিবার চেষ্টা করে। কিন্তু জ্যোতির্ময় যেন শুনিয়াও শোনে না, কথাটার গুরুত্ব উপলব্ধি করিতে পারিয়াছে মনে হয় না। তখন যশোদা ভদ্রতা তুলিয়া যায়, এমন সব কথাই শোনায যে মনে মনে জ্যোতির্ময় রাগিয়া

যায়, ভাবে যে কড়া সুরে বলিয়া দিবে কিনা, তার স্ত্রীর ভাবনা যশোদাকে ভাবিতে হইবে না কিন্তু ভদ্রলোক বলিয়া কিছুই সে বলিতে পারে না, চূপচাপ শুনিয়া যায়, মাঝে মাঝে ভয়, বিস্ময় ও দুর্ভাবনা জানাইতে বরণ এই ধরনের মন্তব্যই করে : সত্যি বলছ ? এ সব তো জানতাম না আমি ! ইস্, বড়ো অন্যায় হয়ে গিয়েছে তো !

বাপের বাড়ি পাঠিয়ে দিন না ?

বাপের বাড়ি ? তাই তো, বাপের বাড়ি পাঠিয়ে দিলেই তো হয় ! কথাটা তো একেবারেই খেয়াল হয়নি আমার ! বলিতে বলিতে জ্যোতির্ময় অন্যমনস্ক হইয়া যাওয়ার উপক্রম করে, অন্যমনস্ক হইয়া যাওয়ার উপক্রম করিতে করিতে বলে, তাই দেব। চক্কোত্তিমশায়ের মেয়ের বিয়েটা চুকে গেলেই পাঠিয়ে দেব।

যশোদা উঠিয়া আসিবে, হঠাৎ জ্যোতির্ময় জিজ্ঞাসা করিল, আচ্ছা চাঁদের মা, তোমাকেই একটা কথা জিজ্ঞাসা করি। চক্কোত্তিমশায়কে তো তুমি চেন, তোমার কী মনে হয় সামান্য কটা টাকার জন্য উনি ছোটোলোকোমি করতে পারেন ?

যশোদা সঙ্গে সঙ্গে বলিল, তা পারেন।

পারেন ? —জ্যোতির্ময় যেন স্তম্ভিত হইয়া গেল।

সত্যপ্রিয়র মেয়ের বিবাহের তিনদিন আগে সত্যপ্রিয় মিলে ধর্মঘট আরম্ভ হইয়া গেল। কেবল ধর্মঘট নয়। একটু মারামারিও হইয়া গেল। এবারও মারামারির সূত্রপাত হইল মতির জন্য। বড়ো রহস্যময় মারামারি। পরদিন ধর্মঘট হইবে, কাজ করিতে হইবে না ভাবিয়া আগের দিন রাত্রে মতি—মিলের প্রায় এক মাইল দূরে তার একটি চেনা স্ত্রীলোকের ঘরে নিশ্চিন্ত মনে মদ খাইতে গিয়াছিল। একাই গিয়াছিল, কালোকে বিবাহ কবিবার পর সুধীর আর মতির সঙ্গে হন্থা করিতে বাহির হয় না। কার যেন একটু রাগ ছিল মতির উপরে, এতদিন গোঁয়ার সুধীরটা সঙ্গে থাকায় মতিকে কিছু বলিতে পারে নাই, সেদিন রাত্রে একা পাইয়া মারিয়া সে মতিকে একেবারে জখম করিয়া দিল। পরদিন সত্যপ্রিয় মিলে গুজব রটিয়া গেল যে মতি খুন হইয়াছে। মিলের সামনে কয়েক শো শ্রমিক জমায়েত হইয়াছিল। শ-তিনেক শ্রমিক ধর্মঘটে যোগ দেয় নাই, মিলের গেট বন্ধ করিয়া কাশীবাবু তাদের দিয়া কিছু কিছু কাজ চালাইবার চেষ্টা করিতেছিল। ভিতরের মজুরদের অন্য পথে বাহির হইবার চমৎকার ব্যবস্থা কাশীবাবু করিয়াছিল, কিন্তু তারা দল বাঁধিয়া সদরের গেট দিয়াই বাহির হইয়া আসিল ; কতলোকে কতরকম উসকানিই যে দিতেছিল !

বাহিরের দলের একজন হাঁকিয়া বলিল, তোরা মতিকে মারলি কেন রে ? বলিয়াই সেও যে ভিড়ের মধ্যে কোথায় মিশিয়া গেল !

ভিতরের দলের একজন হাঁকিয়া বলিল, তোরাও অমনিভাবে মরবি ! বলিয়া সেও যে ভিড়ের মধ্যে কোথায় মিশিয়া গেল !

কিছুক্ষণের মধ্যেই দেখা গেল মারামারি আরম্ভ হইয়া গিয়াছে এবং পুলিশ আখালিপিথালি সকলকে পিটাইতেছে। কয়েকজন জখম হইয়া হাসপাতালে গেল, কয়েকজন গ্রেপ্তার হইয়া হাজতে গেল, মিল অঞ্চল প্রায় জনশূন্য হইয়া পড়িল।

সেই দিন সন্ধ্যার সময় যশোদা যখন হাসপাতালে কয়েকজন আহত শ্রমিকের কাতরানি শুনিতেছে, সত্যপ্রিয় মিলের মজুরদের মধ্যে খবর রটিয়া গেল যে ধর্মঘট উসকানির জন্য যশোদার উপর এমন অকথ্য অত্যাচার করা হইয়াছে যে তাহাকে হাসপাতালে যাইতে হইয়াছে। মতি খুন হয় নাই এ ঋবরটাও পাওয়া গেল।

পরদিন একজন মজুরও সত্যপ্রিয় মিলে কাজ করিতে গেল না। মতির মতো যশোদার সম্পর্কে গুজবটাও যে সত্য নয় এটা অবশ্য ক্রমে ক্রমে সকলেই জানিতে পারিল, কিন্তু তখন আর সে জন্য

কিছু আসিয়া যায় না, কাল মারামারিটা হইয়া যাওয়ার ফলে সত্যপ্রিয় মিলের মজুরদের মধ্যে মনের মিল হইয়া গিয়াছে।

মারামারির ফলে মনের মিল ? মজুরদের মধ্যে ও রকম হয়, ওরা ছোটলোক কিনা। দু-একজন লোক দলের মধ্যে চিড় খাওয়াইয়া দেয়, একজনের মনে হয়তো একটু অভিমান আছে, ধর্মঘটের দাবি উঠাইতে তার পরামর্শটা গ্রাহ্য করা হয় নাই। সে কয়েকজনকে শুনাইয়া বলিল, কর্মো নেই ধর্মো ঘটে। কয়েকজনের মনে হইল, তাই তো বটে, কী দরকার হাঙ্গামায় ? কয়েকজনের মনে হইল, একজন যেন বড়ো বেশি উঠিয়া পড়িয়া লাগিয়াছে ধর্মঘটের জন্য, ওর মতলবটা কী ? হিংসা, ভয়, সন্দেহ, দুর্বলতা, অবিশ্বাস, ভুল ধারণা আর আত্মমর্যাদার অভাব তো চিরদিন পুরামাত্রাতেই আছে, তার উপরে একটু কুপরামর্শ জুটিলে আর দেখিতে হয় না। যে ধর্মঘট করে না সে ভাবে, যারা ধর্মঘট করিয়াছে তাদের সঙ্গে আমার সম্পর্ক কী ? একটু হাতাহাতি, মারামারি করিতে পাইলে এই চরম প্রশ্নের মীমাংসাটা তাদের হইয়া যায়, হঠাৎ যেন তাদের তুচ্ছ জীবনে এ ব্যাপারটার গুরুত্ব উপলব্ধি করিতে পারে। কুপরামর্শদাতারা সময়মতো সাবধান না হইলে এই জন্য মারামারির পর মজুরদের মনের মিল হইয়া যায়।

মারামারিতে সুধীর একটু জখম হইয়াছিল। পরদিন সকালে ঘর হইতে তাকে পুলিশে ধরিয়া লইয়া গেল। জগৎকেও তারা খুঁজিতেছিল, কিন্তু তাকে পাওয়া গেল না।

চাঁপা নির্বিকার চিন্তে বলিল, আমি কী জানি তার খবর ? রাতে ঘরে ছিল না।

যশোদা রান্না করিতেছে, ঝড়ের মতো কালো ছুটিয়া আসিয়া হাউমাউ করিয়া কাঁদিয়া উঠিল, ও দিদি, পুলিশে ধরে নিল যে ?

যশোদা বলিল, নিক না। জোয়ানমদ্দ মানুষটাকে পুলিশ কি গিলে খাবে ? হাঙ্গামা মিটলেই ছেড়ে দেবে দুদিন পরে।

কালো তা বৃষ্টিতে চায় না, দাঁড়াইয়া দাঁড়াইয়া থরথর করিয়া কাঁপে আর ফুঁপাইয়া ফুঁপাইয়া কাঁদে। মেয়েমানুষ সমস্ত গুন্ডগোলের গোড়া, এই মতবাদ খাড়া করিয়া যশোদা যে এ বাড়িতে স্ত্রীলোক থাকিতে দেয় না, এ বাড়িতে ঢুকিয়া কালো যেন যশোদার সেই মতবাদটাই প্রমাণ করিয়া দিতে থাকে। যশোদা শেষে রাগ করিয়া বলিল, কেবল কি পিরিত করতে জেনেছিস, বাছা সংসারে ? একটু এদিক ওদিক হলে যদি চোখে আঁধার দেখবি, পিরিতের মানুষটাকে আঁচলে বেঁধে রাখিস না কেন ?

এই বলিয়া রাগে আগুন হইয়া যশোদা হনহন করিয়া হাজির হইল একেবারে গলির মোড়ে, যেখানে কাশীবাবু একটু আড়ালে গা-ঢাকা দিয়াছিল।

সুধীরকে ধরানো হচ্ছে কী জন্যে ? ওরা মারামারি করেছে নিজেদের মধ্যে, আপনার তাতে কী ? এমনিতে পুলিশ তো মেরে লোপাট করে দিলে, আপনি আবার বেছে বেছে এক-একজনার পিছনে লাগছেন কেন ?

সঙ্গে পুলিশ ছিল, কাশীবাবু নির্ভয়ে একগাল হাসিয়া বলিল, সুধীর তোমার পিরিতের লোক নাকি যশোদা ? তা তো জানতাম না ! জড়িয়ে ধরার সময় বেড় পায় ?

বটে রে মুখপোড়া, রসিকতা হচ্ছে ?—হাত ধরিয়া হাঁচকা টানে কাশীবাবুকে কাছে টানিয়া আনিয়া ঘাড় ধরিয়া মাথাটা নিচু করিয়া যশোদা ভদ্রলোকের মুখখানা জোরে জোরে রাস্তায় ঘষিয়া দিল। কাশীবাবু যখন সোজা হইয়া দাঁড়াইল, মুখের অর্ধেক চামড়া তার উঠিয়া গিয়াছে, দরদর করিয়া রক্ত চৌয়াইয়া পড়িতেছে।

সুতরাং সুধীরের সঙ্গে যশোদাও হাজতে গেল। ঘণ্টা তিনেক পরে সত্যপ্রিয় স্বয়ং তাকে ছাড়াইয়া লইয়া আসিল। যশোদার সামনেই মুখে ব্যাণ্ডেজ বাঁধা কাশীবাবুর কাছে হাতজোড় করিয়া বলিল, আপনাকে মিনতি করছি কাশীবাবু, আমায় না জানিয়ে দয়া করে কিছু আপনি করতে যাবেন

না। দুদিন একটু ব্যস্ত আছি, দাঙ্গা বাধিয়ে, পুলিশ ডেকে এক কাণ্ড করে আপনি বসে আছেন। আমার মিলের লোককে পুলিশে ধরে নিয়ে গেল, আপনি ভাবছেন এতে আমার সম্মান খুব বাড়ল ? কে ডাকতে বলেছিল আপনাকে পুলিশ ? আমার দেশের মানুষ ওরা, দুটি অল্পের জন্য খাটতে এসেছে, খিটিমিটি বাধে নিজেদের মধ্যে তা মিটিয়ে নেব, ওদের না পোষায় ওরা কাজ করবে না, আমার না পোষায় আমি কারখানা তুলে দেব—পুলিশ ডাকল কোন লজ্জায় ?

যশোদা অবাক হইয়া চাহিয়া রহিল। কাশীবাবুর রাস্তায় ঘষা মুখটা বোধ হয় বেড়ো জ্বালা করিতেছিল, মাথার ঠিক ছিল না, সত্যপ্রিয়র তীব্র অনুযোগে খতোমতো খাইয়া সে বলিয়া বসিল, আজ্ঞে আপনি নিজেই তো—

সত্যপ্রিয় গর্জন করিয়া উঠিল, যান, যান, বাড়ি যান আপনি। আপনার মতো অপদার্থ লোক রেখেই আমার সর্বনাশ হবে একদিন।

কাশীবাবু বিছানায় শূইয়া স্ত্রীর সেবা গ্রহণের জন্য বাড়ি গেল। সত্যপ্রিয় বলিল, যশোদা, তিন মাস আমি মিলের কোনো ব্যবস্থা বদলাতেও পারব না, নতুন ব্যবস্থা চালাতেও পারব না। আমি যদি বলি তিনমাস পরে আমি নিজে খোজখবব নিয়ে ওদের সমস্ত নালিশ আর দাবির ব্যবস্থা করব, হাঙ্গামাটা তুমি মিটিয়ে দিতে পারবে ?

যশোদা ভাবিয়া বলিল, আপনি যদি বলেন—

আমি বলছি।

যশোদা চেষ্টা করিয়া দেখিতে রাজি হইয়া চলিয়া আসিল বটে, মনটা তাব খুঁতখুঁত করিতে লাগিল। এই সময় ধর্মঘট চালাইয়া যা কিছু আদায় করিতে পারা যায়, আদায় করিয়া লইলেই ভালো হইত। এ সব মতলববাজ লোককে বিশ্বাস আছে ? তিন মাসে কত কী করিয়া বসিবে ঠিক আছে কিছু। কিন্তু টাকা সম্বন্ধে যত মতলববাজ লোকই হোক—ব্যবসাদার মানুষেরা ও রকম একটু হয়—দেশ সম্বন্ধে একটু মমতা বোধ হয় আছে সত্যপ্রিয়র। পুলিশ সম্বন্ধে যে কথাগুলি সত্যপ্রিয় বলিল, তার মধ্যে একটু আন্তরিকতা আছে বলিয়া মনে হইল না ?

বাড়ি ফিরিয়া কালোর খোঁজ করিতে গিয়া যশোদা দেখিল, না খাইয়া ঘবে কপাট দিয়া সে পড়িয়া আছে। যশোদা ডাকিতে সে দরজা খুলিয়া দিল। ঘরের মধ্যে আলো একটু কম, আলো কম বলিয়াই বোধ হয় কী যে একটা আশ্চর্য কমনীয় রূপ চোখে পড়িল। কালোর দুঃখক্লিষ্ট মুখে ! ন্যাকামি দেখিয়া রাগ করার বদলে যশোদা যেন একটু আশ্চর্য হইয়া গেল—সময় সময় এমন দেখায় কেন মানুষের মুখ ? মুখখানা কচি বলিয়া ? না সত্যি ভিতরের কিছু মুখে ফুটিয়া বাহির হইতেছে ? এ রকম আকুল হওয়ার মধ্যে সুখ আছে নাকি কিছু, একটা বিশেষ ধরনের আনন্দ, যশোদা যার স্বাদ জানে না ?

যশোদার দেহে সুধীরের বাহুর বেড় না পাওয়ার রসিকলন্টা যশোদা ভুলিতে পারিতেছিল না, প্রেমিকের বাহুবন্ধনের জন্য যশোদার কিছুমাত্র মাথাব্যথা নাই, তবু ঘুরিয়া ফিরিয়া মনে হইতেছিল, কথাটা তো মিথ্যা নয় কাশীবাবুর, দেহটা তার একটু বেড়ো বেড়ো বইকী। যেমন ধর এই কালো, এই ছিপছিপে পাতলা মেয়েটাকে সুধীর যেমনভাবে বুকে তুলিয়া লইতে পারে—ঠিক তেমনিভাবে যশোদাকেও বুকে তুলিয়া লইতে একজন খোঁজ হয় পারে—ধনঞ্জয়। কাশীবাবুকে ডাকিয়া আনিয়া ধনঞ্জয়ের চেহারাটি একবার দেখাইয়া দিবে নাকি, একবার বলিয়া দিবে নাকি যে, আপনার মতো বামনাবতার সবাই নয়। মশায়, হ্যাঁ দেখুন চেয়ে ? হাতে হাতে অবশ্য প্রমাণ করিয়া দেওয়া চলিবে না যে যশোদাকে বেড় দিবার পক্ষে ধনঞ্জয়ের বাহু দুটি যথেষ্টই লম্বা—

কিন্তু ধনঞ্জয়ের পা কাটা গিয়াছে। আর কি এখন মানুষকে ডাকিয়া গর্বের সঙ্গে তাকে দেখানো চলে ?

অপরাধটা যেন কালোর, এমনভাবে হঠাৎ বেচারার কালোর উপরে রাগ করিয়া সে বলিল, না খেয়ে পড়ে আছিস যে ছুঁড়ি ? একটা দিনের জন্য তোকে ছেড়ে যেতে পাবে না সে মানুষটা ? কালো সাগ্রহে বলিল, একটা দিন দিদি ? কাল আসবে ? আজকেই হয়তো আসবে। যা, নেয়ে খাবি যা।

সত্যপ্রিয়র বাগানবাড়িতে সত্যপ্রিয়র একটি মেয়ের বিবাহ, কিন্তু মনে হয় সমস্ত শহরতলিতে যেন রাশি রাশি মেয়ের বিবাহ হইতেছে। যশোদার নিমন্ত্রণ হইয়াছিল। সত্যপ্রিয়র মোটরে আসিয়া যশোদার গলির সামনে মোটর দাঁড় করাইয়া জ্যোতির্ময় আর অনাথ দুজনে তাকে নিমন্ত্রণ করিয়া গিয়াছিল। গাড়ি নিয়া নিমন্ত্রণ করিতে যাওয়ার কথায় জ্যোতির্ময় বলিয়াছিল, আজ্ঞে, গাড়ির দরকার নেই, বাড়ি ফেরার পথে আমি বলে যাব। শুনিয়া হঠাৎ এমন একটা অদ্ভুত রকমের উদাসভাব সত্যপ্রিয়র মুখে ফুটিয়া উঠিয়াছিল বলিবার নয়। জ্যোতির্ময় তাড়াতাড়ি ত্রুটি সংশোধন করিয়া বলিয়াছিল, আজ্ঞে, গাড়ি নিয়েই যাই তবে, তাড়াতাড়ি হবে।

সত্যপ্রিয় বলিয়াছিল, না না, তাড়াহুড়ো করবেন না। বাড়িতে ঢুকেই বললেন, তোমার নেমস্তম্ভ, আর বলেই চলে এলেন, এতে অপমান করা হয় মানুষের। বসে কিছুক্ষণ আলাপ পরিচয় করে বিশেষভাবে অনুরোধ করে আসবেন, বিয়েতে যেন আসে।

বিবাহের দিন সন্ধ্যার সময় সত্যপ্রিয়র গাড়িতেই জ্যোতির্ময় বাড়ির সকলকে এবং যশোদা ও নন্দকে বিবাহবাড়িতে নিয়া গেল। ধর্মঘট মিটাইয়া দিয়া যশোদা যেন সত্যপ্রিয়কে কিনিয়া ফেলিয়াছে, কীভাবে তাকে সম্মান দেখাইবে সত্যপ্রিয় ভাবিয়া পাইতেছে না।

যশোদা কিন্তু সংশয়ভরে নন্দকে বলিয়াছে, উঁহুঁ, কী যেন মতলব আছে লোকটাব। নইলে এমন বাড়াবাড়ি করত না।

নিমন্ত্রণে যাওয়ার কথায় অপরাধিতা এবারও বলিয়াছিল, আমি যাব ? তারপর রওনা হওয়ার সময়ও সে আপত্তি করিয়াছে, বলিয়াছে, দ্যাখো, শরীরটা বড়ো খারাপ লাগছে, ভিড়ের মধ্যে নাইবা গেলাম আমি ?

একবারটি চলো লক্ষ্মী। গিয়ে না হয় একপাশে চুপটি করে বসে থেকো।

সকলকে অন্দরের মুখে ছাড়িয়া দিয়া জ্যোতির্ময় এদিক ওদিক ঘুরিয়া বেড়ায়। বাড়ির সামনে প্রকাণ্ড হোগলার মণ্ডপ তোলা হইয়াছে, থামগুলি রঙিন কাগজ আর দেবদারু পাতায় ঢাকা, বাহিরের গাছগুলিকে লাল নীল আলোয় সাজানো হইয়াছে। অনেকগুলি জোরালো আলোয় চারিদিক ঝলমল করিতেছে। পান, সিগারেট আর শরবত বিতরণ করা হইতেছে হরদম, মাঝে মাঝে গোলাপজলের পিচকারিও মারা হইতেছে। চারিদিকে লোক গিজগিজ করিতেছে, নানা অবস্থার নানা বয়সের লোক—বাঙালিই বেশি, অবাঙালিও আছে। সকলেই বেশভূষা করিয়াছে প্রাণপণে, কিন্তু গরিবদের দেখিলেই চেনা যায়। কেবল পোশাক ভেদ করা দারিদ্র্য নয়, অনভ্যস্ত উৎসবের আবেষ্টনীতে সকলের দৈনন্দিন অভ্যস্ত জীবনের পরিচয় বিচিত্র ইঞ্জিতে প্রকাশ হইয়া যাইতেছে। সংকোচ, ভয়, দীনতা, দুঃখ, রোগ, শোক, বিষণ্ণতা, তার নিজেদের ? চার-পাঁচজন চেনা মানুষ জিজ্ঞাসা করিয়াছে, মুখ তার শুকনো কেন, তার কী অসুখ করিয়াছে ? এত বড়ো ভয়ানক কথা যে, একটা নেকলেস তাকে এমন অবস্থায় আনিয়া দিতে পারে যে, তাকে দেখিলে লোকের মনে হয় সে অসুস্থ !

ক্রমাগত গাড়ি আসিয়া নিমন্ত্রিতদের নামাইয়া দিয়া যাইতেছিল। জমিদার, ব্যাঙ্কার, ব্যবসায়ী, উকিল, ব্যারিস্টার, ডাক্তার। তিনজন মারোয়াড়ি ব্যবসায়ীর পরে দুজন মস্তীর আবির্ভাব ঘটিল— একজন অন্য প্রদেশের। তারপর কয়েকজন বোম্বাইওয়ালা, পাঞ্জাবি ও যুরোপীয় ব্যবসায়ীর পিছনে আসিল দুজন উচ্চপদস্থ রাজকর্মচারী। দুজনেই ইংরেজ। বোধ হয় এদের অভ্যর্থনা করার জন্যই

একজন বাঙালি উচ্চপদস্থ রাজকর্মচারী এতক্ষণ সত্যপ্রিয়র কাছে দাঁড়াইয়া মোটা একটা সিগার টানিতেছিল। এদের একজনের সঙ্গে জ্যোতির্ময় চাকরির প্রথম দিকে একবার দেখা করিতে গিয়াছিল। নিজে যায় নাই, সত্যপ্রিয় সঙ্গে করিয়া লইয়া গিয়াছিল। একটু চা পান আর ঘণ্টাখানেক নানা বিষয়ে আলোচনা হইয়াছিল। ঠিক যে আলোচনা হইয়াছিল তা নয়, নানা বিষয়ে জ্যোতির্ময়ের মতামত জানিবার জন্য যেন কতকটা জেরাই করা হইয়াছিল জ্যোতির্ময়কে, তবে সে কাজটা ভদ্রলোক করিয়াছিল বড়োই অমায়িকভাবে। সবচেয়ে আশ্চর্যের বিষয় আগাগোড়া সত্যপ্রিয় বিশেষ কথা শুনিয়াছিল—যেটা সত্যপ্রিয়র একেবারেই প্রকৃতিবিরুদ্ধ। যাই হোক, কোনো বিষয়ে নিজের কোনো মতামত জ্যোতির্ময়ের ছিল কিনা সন্দেহ, ততদিনে সত্যপ্রিয়র মতামতগুলিও সে মোটামুটি আয়ত্ত করিয়া ফেলিয়াছিল, সুতরাং সত্যপ্রিয়র সামনে বসিয়া ভারতবর্ষের অতীত, বর্তমান ও ভবিষ্যৎ সম্বন্ধে অভিমত প্রকাশ করিতে তার বিশেষ অসুবিধা হয় নাই। সত্যপ্রিয়ও মোটামুটি খুশি হইয়াছিল, কেবল ফিরিবার সময় দু-একটি বিষয় উল্লেখ করিয়া বলিয়াছিল, আমার কথাগুলি এখনও সম্পূর্ণ বুঝে উঠতে পারেননি। যাই হোক, আপনার নিষ্ঠা আছে, ধীরে ধীরে বুঝবেন। আমার কত বছরের চিন্তার ফল, ও কী আর দু-চারদিনে বোঝা যায়।

তারপর জ্যোতির্ময় আর ইংরেজ ভদ্রলোকটির সংস্পর্শে আসে নাই। কিন্তু সত্যপ্রিয়র যত লেখা ও বক্তৃতা ছাপা হয়, সত্যপ্রিয় নিজে যে সেগুলিতে নানারকম মন্তব্য যোগ করিয়া এর কাছে পাঠাইয়া দেয়, কিছুদিন পরে জ্যোতির্ময় তা জানিতে পারিয়াছে।

সেই সঙ্গে একটা বিষয়ে জ্যোতির্ময়ের একটা অস্পষ্ট ধারণাও জন্মিয়াছে। গভর্নমেন্টের বড়ো বড়ো কনট্রাক্ট বাগানোর ব্যাপারে সত্যপ্রিয় যে অসাধারণ ও প্রায় অবিশ্বাস্য কৃতিত্ব দেখাইয়াছে, অনেকের কাছেই তা দুর্বোধ্য রহস্যে ঢাকা। কিন্তু জ্যোতির্ময়ের মনে হয়, এই ইংরেজ ভদ্রলোকটির অনুগ্রহেই বোধ হয় সত্যপ্রিয় এই বিশেষ সৌভাগ্য।

স্পষ্ট ধারণা করিবার উপায় নাই। সত্যপ্রিয়কে ব্যক্তিগতভাবে এতখানি অনুগ্রহ করিবার মতো উচ্চপদে তো ভদ্রলোক প্রতিষ্ঠিত নয়। ব্যক্তিগত অনুগ্রহের ব্যাপারও এটা নয়। জোর গলায় যে ঘোষণা করিতেছে যে, আমি দেশকে ভালোবাসি, ভারতবর্ষের সকল সমস্যার সমাধান আমি আবিষ্কার করিয়াছি, দেশের অপরিণামদর্শী অন্ধ নেতাদের প্রদর্শিত ভ্রান্তপন্থ ত্যাগ করিয়া আমার প্রদর্শিত পথে চলিলে তেত্রিশ বৎসরে ভারত স্বাধীন হইবে, ভারতের ঘরে ঘরে শান্তি ও শান্তি বিরাজ করিবে—মাঝে মাঝে সে ইংরেজ-বিদ্বেষ আর সোজাসুজি গভর্নমেন্টের সঙ্গে বিরোধ ত্যাগ করিতে বলে বলিয়াই কি তাকে প্রশ্রয় দেওয়ার মতো উদারতা গভর্নমেন্টের হয় ?

অথবা হয় ?

কিছুই বুঝিয়া উঠিতে পারে না জ্যোতির্ময়। মনে হয়, কোথায় যেন একটা ধাঁধা আছে। দেশপূজ্য নেতা, স্বদেশি প্রতিষ্ঠান, স্বাধীনতার আন্দোলন সমস্ত কিছুই বিবুদ্ধ সমালোচনা সত্যপ্রিয় যেমন করে, গভর্নমেন্টের নিন্দাও তো করে ? অবশ্য স্বাধীনতার মন্ত্র প্রচারকদের সমালোচনার সময় ভাষাটা যেমন তীব্র হয়, এদের প্ররোচনায় দেশের যে সর্ববনাশ হইতেছে তার বর্ণনা যেমন রোমাঞ্চকর হয়, গভর্নমেন্টের নিন্দাটা তেমন জমে না। শিক্ষার অব্যবস্থা, নদীনালায় সংস্কারের অভাব, পাশ্চাত্য সভ্যতা প্রচারে সহায়তা, মাদ্রাসা পূর্ণ অর্থনৈতিক নীতি অনুসরণ, এই ধরনের কয়েকটি বিষয়ে গভর্নমেন্টের ভুল দেখাইয়া সসন্ত্রমে গভর্নমেন্টকে সতর্ক করিয়া দিয়াই সত্যপ্রিয় ক্ষান্ত হয়। তবু, এ সব তো বিবুদ্ধ সমালোচনা ? সত্যপ্রিয় যে সত্যসত্যই দেশকে ভালোবাসে, যত খাপছাড়া বা উদ্ভট সে ভালোবাসা হোক, তার লেখা ও বক্তৃতায় তার যথেষ্ট পরিচয় থাকে।

দেশের দূরবস্থার যে বর্ণনা লেখায় ও বক্তৃতায় সত্যপ্রিয় দেয়, দেশকে ভালো না বাসিলে কেউ তা পারে ? নেতারা যা চায় সত্যপ্রিয়ও তাই চায়—কেবল তার উপায়টা একটু পৃথক, একটু

অভিনব। কদিন আগেও সত্যপ্রিয়র একটি পুস্তক জ্যোতির্ময় প্রকাশ করিয়াছে, তাতে সত্যপ্রিয় স্পষ্টই বলিয়াছে, সর্বাপ্তে ভারতের প্রকৃত স্বাধীনতা চাই, প্রকৃত স্বাধীনতা অর্জনের জন্য প্রত্যেক ভারতবাসীর চেষ্টা করা কর্তব্য : বলিয়া প্রকৃত স্বাধীনতা কাকে বলে ধর্ম ও শাস্ত্রগ্রন্থের সাহায্যে সেটা ব্যাখ্যা করিয়াছে। সংস্কৃত শ্লোকগুলি সম্ভবত কেঁটবাবুই সংগ্রহ করিয়া দিয়াছে। তা হোক, সেটা বড়ো কথা নয়, সংস্কৃত শ্লোকের অপার সমুদ্রে ভাড়াটে ডুবুরি নামাইয়া রত্ন উদ্ধার করিলে দোষ হয় না, সেগুলি কাজে লাগাইতে পারাই আসল কথা। ব্যাখ্যার পর সত্যপ্রিয় নির্দেশ করিয়াছে, প্রকৃত স্বাধীনতা অর্জন করিবার উপায়। এই উপায় নির্দেশ করাই প্রবন্ধটির প্রধান উদ্দেশ্য, প্রবন্ধটির নামই ছিল, 'তেত্রিশ বৎসরে ভারতের স্বাধীনতা লাভের উপায়'। ধর্ম যখন লোপ পায়, সমাজব্যবস্থা বিকৃত হয়, দেশবাসীর দারিদ্র্য, অশান্তি, স্বাস্থ্যভাব, অকালমৃত্যু বীভৎস রূপ ধারণ করে, দেশহিতৈষীর তখন সর্বপ্রথম কর্তব্য কী? এ সমস্তের মূল কারণ অনুসন্ধান। কারণ না জানিলে প্রতিকার হইবে কী রূপে? শাস্ত্রগ্রন্থ, ধর্মগ্রন্থ, দেশবিদেশের হাজার বৎসরের ইতিহাস অনুসন্ধান করিয়া সত্যপ্রিয় দেখাইয়াছে, একটিমাত্র কারণে দেশের সর্বাঙ্গীণ দুরবস্থা ঘটে—রাজশক্তির সহিত উদ্দেশ্যহীন বিরোধ। বিশ্বব্রহ্মাণ্ডের পরিচালনায় ঈশ্বর কয়েকটি মূলনীতি স্থির করিয়া দিয়াছেন, কেবল সূর্যের সহিত পৃথিবীর সম্পর্ক বিচার করিয়াই সে নীতির মর্ম উপলব্ধি করা সম্ভব, ওই সকল মূলনীতির একটি হইল—রাজশক্তির সহিত অকারণ কলহ করিলে দেশবাসীর ধর্ম, সমাজ, সুখ-সম্পদ স্বাস্থ্য-শান্তি নষ্ট হইবেই হইবে, কিছুই তাহা ঠেকাইতে পারিবে না। এই নিয়মের দ্বারাই বিশ্বনিয়ন্তা শক্তির সামঞ্জস্য বিধান করিয়াছেন। এইখানে সত্যপ্রিয় শক্তি সম্বন্ধে বিজ্ঞানের মতবাদ ও ভারতীয় ঋষিগণের মতবাদ আলোচনা করিয়া বিজ্ঞানের মতবাদের ভ্রান্তি প্রমাণ করিয়াছে, যদিও সত্যকথা বলিতে কী, আলোচনাটা জ্যোতির্ময় একবিন্দুও বুঝিতে পারে নাই। ভারতবর্ষে যে অধঃপতন হইয়াছে, ভারতবাসীর যে শোচনীয় দুরবস্থা দেখা দিয়াছে এবং দিন দিন অধঃপতন ও দুরবস্থা ক্রমশ বাড়িয়াই চলিয়াছে, তাহার একমাত্র কারণ ভারতবাসীর রাজশক্তির সহিত বিবাদ। কিন্তু তাই যদি হয়, ভারতবর্ষ কি তবে স্বাধীনতা পাইবে না? স্বাধীনতা পাইতে গেলেই তো রাজশক্তির সহিত ভারতবাসীর বিবাদ বাধিবে—কারণ রাজশক্তি বৈদেশিক? না, তা নয়। সত্যপ্রিয় স্পষ্টই বলিয়া দিয়াছে, স্বাধীনতা ভারতবাসী অনায়াসে পাইতে পারে, তেত্রিশ বৎসরে পাইতে পারে, যদি ঠিক পথ অনুসরণ করা হয়।

শতাব্দীর পর শতাব্দী রাজশক্তির সহিত ভারতে বিরোধ চলিয়া আসিতেছে, কখনও একরূপে কখনও অন্যরূপে, কখনও প্রবলভাবে, কখনও ক্ষীণভাবে—ইতিহাস ইহার সাক্ষ্য দেয়। শতাব্দীর পব শতাব্দী ধরিয়া ভারতের অধঃপতন ঘটিতে ঘটিতে ভারত বর্তমান অবস্থায় আসিয়া পৌঁছিয়াছে। সূত্রাং, মুর্খেরও এখন বোঝা উচিত যে ভারতবাসীর সর্বপ্রথম কর্তব্য রাজশক্তির সহিত সর্বপ্রকার বিরোধ পরিত্যাগ করা। কার্যে, চিন্তায় ও বাক্যে এমন কিছুই প্রশ্রয় পাইবে না যাহা রাজশক্তির পছন্দসই নহে। এমন কী, কেহ যদি ভ্রান্তিবশত রাজশক্তির বিরোধিতা করিয়া দেশের সর্বনাশ করিতে উদ্যত হয়, রাজশক্তি তাকে উপেক্ষা করিলেও দেশবাসীর নিজেদেরই কর্তব্য হইবে তাকে সংযত করা। একদিনে ইহা হইবে না সত্যপ্রিয় তাহা জানে, সত্যপ্রিয়র পস্থা অনুসরণ করিলে ইহাতে বিশ বৎসর সময় লাগিবে। যে মুহূর্তে ভারতবাসী রাজশক্তির সহিত বিরোধ পরিত্যাগের চেষ্টা আরম্ভ করিবে, সেই মুহূর্ত হইতে ধর্ম ও সমাজের অধোগতি রদ হইয়া দেশবাসীর অম্লকষ্ট, সুখশান্তির অভাব, স্বাস্থ্যের অভাব এ সমস্তের প্রতিকারও আরম্ভ হইবে—বিশ বৎসর পরে দেখা যাইবে, একমাত্র পরাধীনতা ছাড়া ভারতবর্ষের কোনো অভাব নাই। ভারতীয় ধর্ম, ভারতীয় সমাজ-বিধান চরম উন্নতি লাভ করায় তখন পরিবর্তন ঘটিতে আরম্ভ করিবে, কারণ প্রকৃতির নিয়মে ধর্ম ও সমাজ বিধানের অনুরূপ রাজশক্তিই দেশে প্রচলিত থাকিতে পারে; এইখানে ঋষিগণের বাক্য হইতে

সত্যপ্রিয় দেখাইয়াছে, একমাত্র ঈশ্বর ভিন্ন আধারহীন শক্তি হয় না, আধার পরিবর্তিত হইলেই শক্তিরও বাহ্যিক রূপান্তর ঘটিবে, অবশ্য মূলশক্তি চিরদিনই অবিনাশী ও অপরিবর্তনীয়, ইত্যাদি। তেরো বৎসর ভারতবাসী যদি ধর্ম আর সমাজ বিধানের উৎকর্ষ বজায় রাখিতে পারে ভারতের বৈদেশিক রাজশক্তি ভারতীয় রাজশক্তিতে পরিণত হইবে। সুতরাং, তেত্রিশ বৎসরে ভারতবর্ষ কেবল রাজনৈতিক স্বাধীনতা নয়, সর্বপ্রকার স্বাধীনতা লাভ করিবে। নান্য পন্থা বিদাতে অয়নায়। ইংরেজ-বিদ্বেষ প্রচার করিয়া, স্বাধীনতার আন্দোলন তুলিয়া নেতৃবর্গ দেশের ধ্বংসের পথটাই পরিষ্কার করিয়া দিতেছে—স্বাধীনতাকে হাজার বৎসর ভবিষ্যতে ঠেলিয়া দিতেছে।

সত্য কথা বলিতে গেলে, সত্যপ্রিয়র প্রবন্ধটি জ্যোতির্ময়ের কাছে কতকটা প্রলাপেব মতো মনে হইয়াছে, তবু কী যেন আছে প্রবন্ধটিতে যা মনের নীতিধর্মগত অন্ধবিশ্বাসে জন্ম-মৃত্যু-সীমাহীনতা নক্ষত্রলোক-আশ্রয়ী দুর্বোধা ও রহস্যময় অনুভূতির জগতে, কেমন যেন একটা অদ্ভুত প্রভাব বিস্তার করে। আশার কথা বলা হইয়াছে, তবু অকারণ হতাশায় মন ভরিয়া যায়, কার্যের নির্দেশ দেওয়া হইয়াছে তবু মনে হয় হাত-পা গুটাইয়া বসিয়া থাকাই ভালো। ভারতবর্ষের স্বাধীনতার কথা বলিতে বসিয়া প্রাচীন ভারতের স্বর্গের সঙ্গে বর্তমান ভারতের নরকের তুলনা করিয়া, ধর্ম আর ঈশ্বর আর দর্শনের কথা বলিয়া, সত্যপ্রিয় যেন একেবারে মনের ভিত্তি ধরিয়া নাড়া দেয়—আসল বক্তব্য সত্যপ্রিয় কী যুক্তি দিয়া প্রমাণ কবিয়াছে সে বিষয়ে মাথা না ঘামাইয়াই তার কথা মানিয়া লইতে ইচ্ছা হয়। মাঝে মাঝে, বহির্জগতের চিন্তাধারার সঙ্গে হঠাৎ যখন জ্যোতির্ময়ের কোনো কারণে একটু সংস্পর্শ ঘটিয়া যায়, তখন দু-একবার তার মনে হইয়াছে, সত্যপ্রিয়র বলিবার যেন কিছুই নাই, সে শুধু ধর্ম, ঈশ্বর, শাস্ত্র, দেশ ও সমাজের দোহাই দিয়া দেশবাসীকে স্বাধীনতার প্রচলিত আন্দোলন বন্ধ কবিতে বলিতেছে। এই একটি কথাই বলিবার আছে সত্যপ্রিয়র এবং এই একটি কথাই সে ফেনাইয়া ফাঁপাইয়া ঘুরাইয়া ফিরাইয়া পুনরাবৃত্তি করিয়া চলিয়াছে।

এদিক ওদিক ঘুরিতে ঘুরিতে জ্যোতির্ময় বিবাহের আসরের কাছে আসিয়া পড়িয়াছিল। একজন বড়োবাজারের বড়ো বাবসায়ী সামনে পড়িল। ভুঁড়ি নাই, বাঙলা বলিতে পারে। সত্যপ্রিয়র সঙ্গে অনেকদিনের ঘনিষ্ঠতা, কারণ, সত্যপ্রিয় তিনবাব তিনটি মুখের গ্রাসে লাখ তিনেক টাকা কাড়িয়া লইয়াছে।

জ্যোতির্ময়বাবু যে ! কেমন আছেন ! ভাল ত ! একদৃষ্টে খানিক তফাতে সত্যপ্রিয়র দিকে চাহিয়া থাকে। সাদা ও কালো রাজকর্মচারী কজনকে সত্যপ্রিয় বিবাহের আসর দেখাইতেছিল এবং সম্ভবত হিন্দুবিবাহ পদ্ধতির অবনতি ও তাহার কুফল ব্যাখ্যা করিতেছিল।—দেখিয়েছেন জ্যোতির্ময়বাবু ! মেয়ের সাদি দিতে দিতে কেমন নিজের কাম বাগিয়ে নিয়েতেছেন। কী চাঁজ আছেন আপনার সত্যবাবু ! কি বলিয়েতেছেন জনিসন সায়েবকে জানেন ? হামি জানি ! বলিয়েতেছেন—সায়েব, ইয়ংমান স্বদেশি করবে আর তোমরা তাদের জেলে ভেজবে, তোমরা তাদের জেলে ভেজবে আর ইয়ংমান স্বদেশি করবে—হামারা বাত শুনিয়ে, জেলে কখনো দিয়ো না, একঠো নরম গরম মেয়ের সাথে জবরদস্ত সাদি দিয়ে দাও, স্বদেশি না করে ইয়ংমান তখন সে তিশ রুপেয়ার কেরানি বনে যাবে।

জ্যোতির্ময় হাসিয়া বলিল, তাই নাকি ! সত্যপ্রিয়বাবু ও কথা বলছেন আপনি কী করে জানলেন মোহনলালজি ?

হামি না জানিয়েলে কে জানবে ? হামি আর উনি দুজন তো টেন্ডার দিয়েলাম—সায়েব হামাকে পুছলো, মোহনলালজি, দেশকো যত আদমি ইংরেজ রাজকো ভাগাতে চায় তাদের কী করা যায় বলুন তো ? হামি বললাম, জেলমে পুরে দিন। বাস, হামি আর টেন্ডার না পেলাম।

জ্যোতির্ময় সাগ্রহে জিজ্ঞাসা করিল, ওঁকে জিজ্ঞাসা করায় উনি কী বললেন ?

হামারা সামনে কি পুছিয়েছে : ওই অনুমান করে লিন না ! আপনি সত্যাবাবুকে না জানেন ? সত্যাবাবুর জবাব না শূন্য ?—হাসিয়ে হাসিয়ে উনি কোতোবার বলেছেন, সাধুকে দাবু পিলাবে তো মন্দিরমে ঘটা করে পূজা দিয়ে চরণামৃত বোলকে পিলায়ে দেও। দশ রোজ পিলায়ে দিলে সাধু মাতাল হয়ে যাবে, চোরকে সাধু বানাবে তো আসলি সাধু বনে থাকলে চুরির কতো সুবিস্তা সমঝিয়ে দিয়ে দশ রোজ ধরে সাধু বানাও—চোর আর চুরি না করবে। সত্যাবাবু সায়েবকো এসা কুছু বলিয়ে থাকবেন !

হয়তো তাই হইবে। যে সামান্য একটা নেকলেসের ব্যাপারে ছ্যাঁচড়ামি না করিয়া পারে না—

তারপর এক সময় কোনোরকমে লুচি পোলাও কিছু পেটে পুরিয়া মণ্ডপের খামে ঠেস দিয়া দাঁড়াইয়া জ্যোতির্ময় নানা রঙের শাড়ি-পরা একদল ছোটো ছোটো চঞ্চল মেয়ের মহোৎসবে প্রীতি-উপহারের সংগৃহীত কাগজ ভাগাভাগি করা দেখিতেছে, সত্যপ্রিয়র বড়োছেলে মহীতোষ আসিয়া তাকে ডাকিয়া লইয়া গেল।

কী হয়েছে মহী ?

বউদি হঠাৎ অসুস্থ হয়ে পড়েছেন।

অপরাজিতা ? অপরাজিতার আবার কী অসুখ হইল। অন্দরে মেয়েদের ভিড়, একটা ঘরে বাসর বসিয়াছে, বারান্দা ও দু-তিনটি ঘরে খাওয়া চলিতেছে, শাড়ির বর্ণ-বৈচিত্র্যে চোখ বলসিয়া যায়। কিছু না জানিয়াও জ্যোতির্ময় বুঝিতে পারিল, এদের একজনও অপরাজিতা নয়। বাড়ির প্রায় পিছনে কোণের দিকে ছোটো একটি ঘরের সামনে স্বয়ং সত্যপ্রিয় দাঁড়াইয়াছিল। আর একটু তফাতে তিন-চারজন মেয়ের কাছে দাঁড়াইয়া সুবর্ণ নিঃশব্দে কাঁদিতেছিল। জ্যোতির্ময়কে দেখিবামাত্র এতক্ষণের চাপা রাগ ও বিরক্তির বশে সত্যপ্রিয় বলিয়া ফেলিল, আপনার মাথায় গোবর ভরা জ্যোতির্ময়বাবু ! বউমাকে এ অবস্থায় কী বলে নিয়ে এলেন ?

মাথায় যে জ্যোতির্ময়ের সত্যসত্যই গোবর ভরা তার প্রায় আরও একটা প্রমাণ দিয়া সে বলিল, আপনি যে আনতে বললেন ?

সত্যপ্রিয় তীক্ষ্ণদৃষ্টিতে জ্যোতির্ময়ের মুখের দিকে চাহিয়া দেখিল, কিছু বলিল না। মহীতোষকে একখানা গাড়ি একেবারে বাড়ির পিছনে আনিয়া লাগাইতে বলিয়া দিল। গাড়ি যেন বড়ো হয়, এক জনকে যেন শোয়ানো চলে গাড়িতে।

মহীতোষ বলিল, অ্যান্থলেপের জন্য ফোন করে দিলে হয় না ?

সত্যপ্রিয় যেন শূন্যে পাইল না এমনিভাবে সরিয়া গিয়া বারান্দায় রেলিংয়ে ঝুঁকিয়া একটু চাহিয়া রহিল, তারপর ঘুরিয়া দাঁড়াইয়াই রাগ করিয়া বলিল, দাঁড়িয়ে রইলি যে মহী ?

এই যে যাই।—চোখের পলকে মহীতোষ অদৃশ্য হইয়া গেল।

জ্যোতির্ময় সুবর্ণের কাছে সরিয়া গিয়া জিজ্ঞাসা করিল, কী হয়েছে রে সুবর্ণ ?

সুবর্ণ কাঁদিতে কাঁদিতে বলিল, বউদি হঠাৎ মুছে গিয়ে গোঙাতে লাগল, আর—

এবার সত্যপ্রিয় ডাকিয়া বলিল, ভয় পাবেন না জ্যোতির্ময়বাবু। দুজন ডাক্তার পরীক্ষা করছেন, দেখি তাঁরা কী বলেন। যশোদাও ৩তরে আছে।

মিনিট পনেরো পরে দরজা খুলিয়া ডাক্তার দুজন বাহির হইয়া আসিল, যশোদাও সঙ্গে আসিল। দুজন ডাক্তারকে জ্যোতির্ময় চেনে, দুজনেই নাম করা চিকিৎসক, একজন শহরের, একজন শহরতলির। এমন কত ডাক্তার আজ সত্যপ্রিয়র কন্যার বিবাহে নিমন্ত্রণ রাখিতে আসিয়াছে।

ডাক্তার দুজন মুখ খুলিবার আগেই সত্যপ্রিয় বলিল, একটু সুস্থ হয়েছেন তো এখন ? যাক বাঁচা গেল। বিয়েবাড়িতে একটা বিপদ-আপদ ঘটলে বাড়ির কর্তার বুকের মধ্যে কেমন করে, আপনারা কী বুঝবেন ! সামান্য একটু কিছু ঘটল তো সব কাজ পশু হতে বসল। যাই হোক ভগবানের দয়ায় সুস্থ

যখন হয়েছেন, গাড়ি করে এবার ওঁকে বাড়ি পাঠিয়ে দি, কী বলেন ? বাড়ি কাছেই, পাঁচ মিনিটের পথ। ইনি মেয়েটির স্বামী।

ডাক্তার দুজনের মধ্যে যার বয়স কম সে একটু ইতস্তত করিতে লাগিল। জ্যোতির্ময়ের দিকে এক নজর চাহিয়া সে হঠাৎ বলিল, আমি বলছিলাম কী—

পরম ধৈর্যের ভঙ্গিতে তার মুখের দিকে একদৃষ্টে চাহিয়া থাকিয়া শাস্তকণ্ঠে বলিল, বলুন ? বলুন, আপনি কী বলছেন ?

ডাক্তার টোক গিলিয়া বলিল, বাড়ি কাছে হলে আর ভালো একখানা গাড়ি পেলে নেওয়া চলে বইকী।

সত্যপ্রিয় বলিল, তা ছাড়া আপনি যখন সঙ্গে যাচ্ছেন, তখন আর ভয়ের কী থাকতে পারে ? সুতরাং, আর কারও কিছু বলিবার রহিল না, কেবল যশোদা একবার বলিল, আজ রাতে ঠাইনাড়া করা কি ভালো হবে ডাক্তারবাবু ?

ডাক্তার কী জবাব দিল ভালোমতো বোঝা গেল না। সিঁড়ি দিয়া নামাইয়া গাড়ি পর্যন্ত নেওয়ার জন্য স্ট্রচারের মতো একটা কিছু ব্যবস্থার কথা ডাক্তার উল্লেখ করিলে যশোদা বলিল, থাক, থাক, এঁদের আর কষ্ট দিয়ে কাজ নেই। আমিই নিয়ে যাচ্ছি ওকে কোলে করে, তাতে ঝাঁকুনিও কম লাগবে।

শিশুর মতো অপরাজিতার শরীরটা দু-হাতে অবলীলাক্রমে বুকের কাছে তুলিয়া নিয়া যশোদা নীচে নামিয়া গেল। তাকে বুকে ধরিয়া রাখিয়াই নিজে সে গাড়িতে উঠিয়া বসিল। ডাক্তার ভিতরে আসিল, জ্যোতির্ময় আর সুবর্ণ সামনে বসিল।

যশোদা ডাক্তারকে বলিল, এইভাবেই রাখলাম, আবার নামাতে হবে তো। বারবার তোলা-নামার চেয়ে একভাবে থাকাই ভালো। কী বলেন ?

ডাক্তার সংক্ষেপে বলিল, হ্যাঁ।

দক্ষিণের গেট দিয়া গাড়ি রাস্তায় পড়িতেই যশোদা কারও সঙ্গে পরামর্শও করিল না, কারও অনুমতি চাহিল না, চালককে সোজা হাসপাতালে যাইতে হুকুম দিয়া দিল। জ্যোতির্ময় চমকাইয়া উঠিল, সুবর্ণ অশ্রুট একটা শব্দ করিয়া আবার কাঁদিয়া ফেলিল, ডাক্তার চুপ করিয়া রহিল।

যশোদার গা বোধ হয় বড়ো বেশি রকম জ্বালা করিতেছিল, ডাক্তারের লজ্জিত নীরবতাও তাকে থামাইয়া রাখিতে পারিল না, একটু পরে আবার বলিল, হাসপাতালে না গিয়ে কী করি বলুন ? আপনাদের মতো ডাক্তারের ভরসায় বাড়ি নিয়ে যেতে সাহস হল না।

ডাক্তার এবারও কিছু বলিল না।

এমার্জেন্সি ওয়ার্ডের একটা ঘরে অপরাজিতার মরণ রদ করিবার চেষ্টা চলিতে থাকে, বাহিরে একটা কাঠের বেঞ্চে বসিয়া থাকে জ্যোতির্ময়, যশোদা আর সুবর্ণ। প্রিয়জনকে হাসপাতালে দিবার একটা অমৌক্তিক অসুবিধা আছে, নিজেদের কিছুই করিবার ক্ষমতা নাই, জানা থাকিলেও নিজেদের কিছু করা হইল না ভাবিয়া বড়ো কষ্ট হয়। একজন মরিচ্ছে আর এমন নিশ্চেষ্ট বসিয়া থাকা ! এ যেন এক ধরনের অপরাধ।

রাত তিনটার সময় ডাক্তার জানাইল, এখন তারা নিশ্চিত মনে বাড়ি যাইতে পারে। না, ঠিক নিশ্চিত মনে নয়, আর ভয় নাই এমন কথা ডাক্তার বলিতে পারে না, তবে এখনকার মতো বিপদটা কাটিয়া গিয়াছে। অপরাজিতা যদি নেহাত মরেই তবে তার মরিতে অন্তত দু-একটা দিন সময় লাগিবে। এমন রূঢ়ভাবে যে ডাক্তার খবরটা জানাইল তা নয়, তার কথার মোটামুটি অর্থাৎ এই।

যশোদার সঙ্গে সুবর্ণকে বাড়ি পাঠাইয়া দিয়া জ্যোতির্ময় একাই হাসপাতালে বসিয়া রহিল। অপরাজিতাকে সে কি খুব ভালোবাসে ? অপরাজিতা মরিয়া গেলে খুব কষ্ট হইবে তার ? উত্তেজনার

প্রতিক্রিয়া আর রাত্রি জাগরণের অবসাদের জন্য বোধ হয় মনটা ভোঁতা হইয়া গিয়াছে, ঠিক বুঝিয়া উঠিতে পারিতেছিল না।

হাসপাতাল হইতে সে যখন বাহির হইল, রাত্রি প্রায় শেষ হইয়া আসিয়াছে। রাস্তার আলো নেভে নাই, কিন্তু চারিদিকে দিনের আলোর আবির্ভাবের আবছা সংকেত টের পাওয়া যায়। ট্রাম ও বাস চলিতে আরম্ভ করিয়াছিল, কিন্তু জ্যোতির্ময় হাঁটিতে আরম্ভ করিল। সমস্ত রাত জাগিয়া থাকার পর শহর ও শহরতলির জাগরণ আরম্ভ হইবার সময়টা এই পথ দিয়া হাঁটিতে ভালো লাগিতেছিল। কয়েক ঘণ্টা পরে মানুষ ও গাড়িঘোড়ার কী ভিড়টাই এই পথে আরম্ভ হইবে। শহরতলি হইতে শহরের দিকেই মানুষ চলিতে আরম্ভ করিবে বেশি, বিকালের দিকে সে শ্রোতটা ফিরিয়া আসিবে শহর হইতে শহরতলির দিকে।

পথটা এলোমেলোভাবে বহুদূর বিস্তৃত সারি সারি রেললাইন ডিঙাইয়া গিয়াছে। ব্রিজের উপর রেলিংয়ে ভর দিয়া জ্যোতির্ময় একটু দাঁড়াইল। ওয়াগন বাছাই করিবার জন্য ইম্পাতের রেখার দুর্বোধ্য আর জটিল রেখাচিত্র দিয়াই শহর ও শহরতলিকে যেন ভাগ করা হইয়াছে। উঁচু থামের উপর হইতে এদিকে ওদিকে জোরালো আলো ফেলিয়া কোনো কোনো লাইনের কিছু কিছু অংশ আলোকিত করা হইয়াছে, বাকিটা আবছা আলো-অন্ধকারে ঢাকা। ব্রিজের দু-পাশে বহুদূর পর্যন্ত অসংখ্য ওয়াগন বিশৃঙ্খলভাবে দাঁড়াইয়া আছে। কয়েকটা ওয়াগন ইঞ্জিনের ঠেলা খাইয়া আপনা আপনি একদিকে আগাইয়া চলিয়াছে, লিভার ঠেলিয়া ঠেলিয়া সেগুলিকে সরাইয়া দেওয়া হইতেছে এক লাইন হইতে আর এক লাইনে। দুদিকে কাছে ও দূরে থামের মাথায় বসানো সিগনালের অনেকগুলি লালনীল আলো, মানুষের হাতের সঞ্চরণশীল আলোর নড়িয়া নড়িয়া দূরের মানুষকে দুর্বোধ্য ইঙ্গিত কবা, কতবার জ্যোতির্ময় এই ব্রিজের উপর দিয়া দিনে ও রাত্রে যাতায়াত করিয়াছে, কিন্তু কোনোদিন খেয়ালও করে নাই ব্রিজের দুপাশে নগরের এমন একটা রূপ বিছানো রহিয়াছে। অপরাজিতাকে সে যে বিবাহ করিয়াছে, এতকাল এক বিছানায় রাত কাটাইয়াছে, অপরাজিতার মধ্যে নিজেব এক প্রতিনিধিকে আনিয়া দিয়াছে, তাও কী এতকাল সে খেয়াল করিয়াছিল ?

অপরাজিতা যদি মরিয়া যায় !

কী হইবে অপরাজিতা মরিয়া গেলে ? ব্রিজের দুদিকে রেললাইনগুলি এমনভাবেই পাতা থাকিবে, ইঞ্জিনেব হুসহুস আর ওয়াগনে ওয়াগনে ঠোকটুকির এমনই শব্দ উঠিবে, থামেব মাথাব জোরালো আলো, সিগনালের লালনীল আলো, লঠন নাড়িয়া মানুষের সংকেত কিছুই বদলাইবে না।

বাড়ি ফেরার পথে যশোদার সঙ্গে দেখা করিয়া গেল। যশোদা উনানে আঁচ দিয়াছে, আঁচ প্রায় ধরিয়া আসিল।

কাল চাকরিতে রিজাইন দেব চাঁদের মা !

বেশ তো, রিজাইন দেওয়া তো পালাবে না ? বাড়ি গিয়ে শুয়ে পড়বেন যান।

অপরাজিতা বাঁচিবে না আশঙ্কা করিয়াই সত্যপ্রিয় একটু বাস্তব হইয়া তাকে বাড়ি পাঠাইয়া দিয়াছিল। কেবল অমঙ্গলের ভয় নয়, তার চেয়ে বেশি ভয় ছিল গোলমালের। এত টাকা খরচ করিয়া মেয়ের বিবাহের আয়োজন করিয়াছে, তার মধ্যে এমন একটা উৎপাত কি মানুষের ভালো লাগে ? সে রাত্রে অপরাজিতার প্রাণটা বাহির হইবে না জানা থাকিলে হয়তো তাকে সরাইয়া দিবার জন্য অতটা ব্যস্ত হইয়া পড়িত না।

পরদিন বেলা প্রায় এগারোটার সময় নিজেই জ্যোতির্ময়ের বাড়ি খবর জানিতে আসিল। এ বড়ো সহজ সম্মান ও দরদের পরিচয় নয়। জ্যোতির্ময়ের বৈঠকখানায় অল্প দামি কাঠের চেয়ারে বসিবার আগে প্রথম কথা বলিল এই : ইস, আপনার চোখমুখ যে বসে গেছে জ্যোতির্ময়বাবু !

জ্যোতির্ময় বলিল, আঞ্জের না, ও কিছু নয়।

অপরাজিতার খবর ? তার অবস্থা বিশেষ ভালো নয়, শেষ পর্যন্ত কী হইবে বলা যায় না, সে হাসপাতালেই আছে এবং সম্ভবত কিছু দিন থাকিতে হইবে।

আপনি কিছু দিন ছুটি নিন জ্যোতির্ময়বাবু।

ছুটি সম্পর্কে জ্যোতির্ময়ের বিশেষ আগ্রহ দেখা গেল না। এ সব বিষয়ে সত্যপ্রিয়র ব্যবস্থা বড়ো জটিল, ছুটি চাহিলেই দেয়, সময় সময় দরকার মনে করিলে, যেমন আজ জ্যোতির্ময়ের বেলা মনে করিয়াছে, না চাহিলেও নিজে হইতে যাচিয়া ছুটি দিতে চায়। কিন্তু ছুটি যে শেষ পর্যন্ত তার হয় বিপদ। কাজ আর কাজের দায়িত্ব সত্যপ্রিয় ভাগ করিয়া দিয়াছে, যার যা কবাব কথা তাকে তা করিতেই হইবে, কাজ না করার পক্ষে কোনো যুক্তি নাই, কোনো কৈফিয়ত নাই। সে নিজে হইতে ছুটি নিতে বলিয়াছিল, ছুটিতে থাকার সময় মানুষ কাজ করিতে পারে না, এ যুক্তিটা খুব জোরালো সন্দেহ নাই, কিন্তু জোরালো যুক্তিটা শুনাইবার সুযোগ তো সত্যপ্রিয় কোনোমতেই সৃষ্টি করিবে না ! কাজ কেন হয় নাই সে কৈফিয়ত আজ পর্যন্ত সত্যপ্রিয় কারও কাছে স্পষ্ট ভাষায় দাবি করিয়াছে কিনা সন্দেহ, কিন্তু রাগ যে সে করিয়াছে, এ ভাবে যে চলিবে না, কাজের ক্ষতির সঙ্গে যে চাকরির ক্ষতির অবিচ্ছেদ্য সম্পর্ক, এই সব কী কৌশলে যেন ববাবর ভাষাব চেয়েও স্পষ্ট করিয়া সকলকে বুঝাইয়া দিয়া আসিয়াছে !

জ্যোতির্ময় তাই আমতা আমতা কবিয়া বলিল, আজ্ঞে, আপনাব নতুন প্রোগ্রামটা চালু করা হচ্ছে, এ সময়—

সত্যপ্রিয় আবেগভরা কণ্ঠে বলিল, না, না, ওসব প্রোগ্রাম-ট্রোগ্রামের কথা নিয়ে আপনি আব এখন মাথা ঘামাবেন না জ্যোতির্ময়বাবু।

এ সব কথার অর্থও জ্যোতির্ময় জানে। সত্যপ্রিয় সকলকেই এমনভাবে দরদ জানায়, সকলের প্রতিই এমনি উদারতা পবিত্র দেয়। কিন্তু সত্যসত্যই যদি কোনো মুর্খ এই দরদ আর উদারতার সুযোগ গ্রহণ করিয়া বসে, দুদিন পরে সে আর কুল দেখিতে পায় না। এ বিষয়ে সত্যপ্রিয়র একটা থিয়োরি আছে। কর্মচারীদের সে এইসব কথা বলে, বন্ধু ও আত্মীয় হিসাবে, কর্মচারী ও উপরওয়ালার সম্পর্কটা তো তাতে বাতিল হইয়া যায় না, মাসান্তে কর্মচারী মতিনা তো গ্রহণ করে, সুতরাং কাজ সম্পর্কে আত্মীয় বন্ধু হিসাবে সে যা বলে, কাজ সম্পর্কে সে কথার লি প্রয়োগ কবা কি কর্মচারীদের উচিত ? তার মতো অবস্থাব আব একজন মানুষও কি আছে সামান্য মাহিনার কর্মচারীর সঙ্গে যে এমন সহজভাবে মেলানেশা করে, বিপদে-আপদে সহানুভূতি জানায়, পবামর্শ দেয় ? এই মেলানেশার অনুগ্রহটুকু বাড়তি পাওনা মনে করিয়া তাদের কৃতার্থ থাকা উচিত। প্রথম প্রথম যাবা বোকামি করিয়া এই সহজ কথাটা বুঝিতে পারে না, তাদের সে ক্ষমাও করে, ভবিষ্যতে সাবধান হইবার সুযোগও দেয়। কিন্তু যে পুরা টাকা মাহিনা দেয় সে প্রতিদানে পুরা কাজ চাহিবে, দরদ আর ভালোবাসা দেখানোর জন্য মাহিনা দিয়া মানুষ লোক রাখে না—এই সরল সত্যটা যার মাথায় কোনো রকমেই ঢোকানো যায় না, অগতাই সত্যপ্রিয় তাকে বিরাট ব্রহ্মাণ্ডে চারিয়া খাইবার জন্য মুক্তি দেয়।

অবশ্য, এই রকম দরদ ও সহানুভূতির সঙ্গে ব্যবহার করে বলিয়াই সকলে হাসিমুখে দশ ঘণ্টার জায়গায় পনেরো ঘণ্টা কাজ করে, তিনজনের কাজ একজনে করে। কিন্তু সত্যপ্রিয় তো করিতে বলে নাই ? যার যতক্ষণ ইচ্ছা কাজ কবুক না, সত্যপ্রিয়র কী আসিয়া যায়, তার কাজ হইলেই হইল।

জ্যোতির্ময় তাই আবার আমতা আমতা কবিয়া বলিল, আজ্ঞে, ছুটির দরকার হলেই আপনাকে বলব। এখন তো হাসপাতালেই রইল, দুবেলা গিয়ে শুধু দেখে আসা।

শ খানেক টাকা বরঞ্চ আপনি রাখুন, চিকিৎসার জন্য যদি দরকার হয়।

এ আর এক বিপদ। যার যা প্রাপ্য তার বেশি একটি পয়সা কোনোদিন কেউ সত্যপ্রিয়র কাছে পায় নাই, কোনোদিন পাইবেও না। সে যে দান করে হিসাব করিলে দেখা যায়, দানের রীতি, নীতি, প্রথা, নিয়ম, সামাজিক ও অন্যবিধ বাধ্যবাধকতা প্রভৃতি হিসাবে সেটাও গ্রহীতার প্রাপ্য ছাড়া আর কিছুই নয়। কর্মচারীদের হাতে টাকা গুঁজিয়া জোর করিয়া সাহায্য করিতেও দু-একবার সত্যপ্রিয়কে দেখা গিয়াছে। কিন্তু প্রত্যেক ক্ষেত্রে টাকা সত্যপ্রিয়র ফিরিয়া আসে, কোথাও আসে কাজে, কোথাও আসে বাধ্যবাধকতার প্রয়োজনীয় সম্পর্কটা বজায় থাকতে, কোথাও আসে প্রতিহিংসায়।

সত্যপ্রিয় চলিয়া গেলে জ্যোতির্ময় স্নান করিতে গেল। খাইয়া আপিস যাইবে। যাওয়ার পথে হাসপাতালে খবর নিয়া যাইবে।

সুবর্ণ বলিল, আজকেও আপিস যাবে দাদা ?

একবার না গেলে চলবে কেন ? সকাল সকাল ফিরে আসব।

কী দরকার ? রাত্রিটাও আপিসে থেকে—সুবর্ণের মুখ বিবর্ণ, চোখ ফুলিয়া গিয়াছে। বলিতে বলিতে আবেগে বিবর্ণ মুখে রক্তের সঞ্চার হয়, মাথা ঝাঁকি দিয়া সে আবার বলে, বউদি যেন মরে— মরে, মরে, মরে। মরে যেন তোমার হাত থেকে রেহাই পায়।

সুধীরা চিৎকার করিয়া বলে, সুবর্ণ !

আর জ্যোতির্ময় করে কী, ঠাস করিয়া এক চড় বসাইয়া দেয় বিবাহযোগ্য বোনের গালে, গায়ের যত জোর আছে, তত জোরের সঙ্গে। পাঁচটি আঙুল নয়, সুবর্ণের টুকটুকে গালে, তিনটি আঙুলের ছাপ সঙ্গে সঙ্গে এমন স্পষ্টভাবে ফুটিয়া ওঠে যে, ভয় হয় কোনোদিন বুঝি এ দাগ আর মুছিয়া যাইবে না।

আপিস যাওয়ার সময় জ্যোতির্ময় একটু ঘুরিয়া যায়, যশোদার বাড়ির গলিটার সামনে দিয়া যাইতে আজ কেমন সংকোচ বোধ হইতেছিল।

দুপুরবেলা সুবর্ণ সুধীরাকে বলিল, আর তো এ বাড়িতে আমার থাকা হয় না দিদি।

সুধীরা বলিল, চূপ কর। বকিমানে মেলা।

সুবর্ণ তখন গেল যশোদার কাছে।

আর তো আমার ও বাড়িতে থাকা হয় না যশোদাদিদি।

গালের দাগ দেখিয়া যশোদার বড়ো মায়া হইয়াছিল, কথা শুনিয়া মনটা বিগড়াইয়া গেল। —মারবে না? সারারাত জেগে ভয়ে ভাবনায় পাগল হয়ে আছে মানুষটা, তাকে তুমি অমন করে বলতে গেলে কেন ?

কোথাও কি সহানুভূতি নাই ? এমন কী কেউ নাই জগতে যে যুক্তি-তর্ক-বিচার-বিবেচনা বাদ দিয়া কোন অবস্থায় কে তাকে কী জন্য মারিয়াছে, সে কথা ভুলিয়া গিয়া, শুধু গালে চড় খাইয়া গালটা তার ফুলিয়া গিয়াছে বলিয়া ব্যাকুল হয় ? জগতে দরদি নাই ভাবিয়া সুবর্ণের যখন কান্না আসিতেছে, দেখা হইল নন্দর সঙ্গে। সুবর্ণের গাল দেখিয়া নন্দ যে ঠিক ব্যাকুল হইল, তা বলা যায় না, বোধ হয় বিন্ময়েই অভিভূত হইয়া গেল। সুবর্ণের কাছে তাই যথেষ্ট। নন্দকেই তো সে খুঁজিতেছিল। আর কে আছে তার নন্দ ছাড়া ?

এসো তো আমার সঙ্গে।

এখানে এই সব গলির মধ্যে দাঁড়াইয়া কী কথা বলা যায়, যে নোংরা চারিদিকে, যে দুর্গন্ধ চারিদিকে, দুজন মানুষ পাশাপাশি চলিতে গেলে হয় গায়ে গায়ে ধাক্কা লাগে, নয় দুপাশের দেয়ালে গা ঠেকিয়া যায়। তা ছাড়া যশোদার ভয় আছে, দেখিলেই দুজনকে সে তফাত করিয়া দিবে। বেণী দুলাইয়া সুবর্ণ হনহন করিয়া চলিতে থাকে, পায়ের স্যাঙেলে শব্দ হয় চটচট। পাড়ার রাস্তায়

এমনভাবে সুবর্ণের সঙ্গে চলিতে গিয়া নন্দর মুহূর্তে মুহূর্তে রোমাঞ্চ হয় আর মুহূর্তে মুহূর্তে হাত-পা যেন আড়ষ্ট হইয়া আসে। চেনা পথের দুপাশে চেনা ঘরবাড়ি দোকানপাট সব যেন হাজার হাজার চেনা মানুষে ভরিয়া গিয়াছে, সকলে চাহিয়া দেখিতেছে সুবর্ণের চলন আর নন্দের অনুসরণ।

একটু আস্তে হাঁট না ?

সুবর্ণ থমকিয়া দাঁড়ায়। ঠিক তিনু, বিশু আর বেন্দার কামারশালার সামনে। লোহার পাত গরম হইতেছে, তিনু প্রাণপণে হাপরের দড়ি টানিতেছে, বিশু হাতুড়ি উদ্যত করিয়া আছে, বেন্দা লোহার পাতটি ঘুরাইয়া ফিরাইয়া আগুনে গুঁজিয়া গুঁজিয়া ধরিতেছে। সেইখানে দাঁড়াইয়া সুবর্ণ জিজ্ঞাসা কবে, নন্দ কি তবে সুবর্ণের সঙ্গে যাইতে চায় না ? তবে না হয় থাক নন্দ, সুবর্ণ একাই যাইবে ! যদিকে দু-চোখ যায় চলিয়া যাইবে ! নন্দ ভাবিয়াছিল, সুবর্ণ বুঝি ব্যাকুল হইয়া হাসপাতালে ছুটিয়া যাইতেছে তার বউদিকে দেখিবার জন্য ; কিন্তু হাসপাতালের পথ তো যদিকে দু-চোখ যায় চলিয়া যাওয়ার পথ নয়। সুবর্ণের মুখে কড়া রোদ পড়িয়াছে, অভিমানের গাঢ় ছায়া স্পষ্ট করিয়া নন্দকে দেখানোর জন্যই সুবর্ণ যেন মুখ করিয়া দাঁড়াইয়াছে সূর্যের দিকে। রাখার অভিমানের জ্বালায় নন্দ নিজে কত জুলিয়াছে, তবু সুবর্ণের অভিমান সে চিনিতে পারে না। এতক্ষণ পরে হঠাৎ ব্যাকুল হইয়া সে বলে, তোমার অসুখ করেছে, সুবর্ণ ?

চেনা মানুষের কথা আর তো নন্দ মনে থাকে না, সেইখান হইতে গলা ফাটাইয়া অনেক দূরের একটা রিকশাকে ডাকিয়া আনে। রিকশায় উঠিয়া বসিয়াই সুবর্ণ অবশ্য নন্দর গায়ে গা এলাইয়া মূর্ছা যায়। কিন্তু নন্দ রিকশাওয়ালাকে বাড়ির দিকে ফিবিয়া যাইতে বলামাত্র সচেতন হইয়া বলে, না না, বাড়ি নয়, ট্রাম রাস্তার দিকে যেতে বেলো।

বাড়ি আর সুবর্ণ ফিরিবে না। নন্দ যদি ফিরিতে চায়, ফিরিয়া যাক। আর যদি সুবর্ণের সঙ্গে যায় নন্দ, অনেক দূরের কোনো এক অজানা শহরে চলিয়া যায় সুবর্ণের সঙ্গে, আর নদীর ধারে ছোটো একটি ঘর ভাড়া করিয়া দুজনে বাস করে, আর নন্দ যদি সারাদিন কীর্তন করে, আর নন্দর কীর্তন শুনিতে শুনিতে সুবর্ণ যদি রাঁধাবাড়া ঘরকন্নার কাজ করে—

নন্দর পকেটে আনা পাঁচেক পয়সা ছিল, তবে সুবর্ণের হাতে ছিল সোনার চুড়ি, কানে সোনার দুল। শহরের দিকে না গিয়া শহরকে পিছনে ফেদিয়া শহরতলি টি হইয়া নিবুদ্দেশ যাত্রা করিলে কী ঘটিল বলা কঠিন। এদিকের শহরতলি হইতে শহরে যাওয়ার পথে যদি হাসপাতালটা না পড়িত এবং হাসপাতালে যদি অপরাজিতা না থাকিত, আর অপরাজিতার কাছে একবার শেষ বিদায় নেওয়ার সাধটা যদি সুবর্ণের না জাগিত, তাহা হইলেও কী ঘটিল বলা কঠিন। হয়তো কয়েকদিন পরে দুজনে ফিরিয়া আসিত, হয়তো তাদের ফিরাইয়া আনা হইত এবং বিশী একটা হাঙ্গামা আরম্ভ হইয়া যাইত। কিন্তু অপরাজিতার খবর লইতে গিয়া জানা গেল, ঘণ্টাখানেক আগে সেও নিবুদ্দেশ যাত্রা করিয়াছে, ফিরিয়া সে আর আসিবে না, ফিরাইয়া তাকে আনা যাইবে না। কেবল শরীরটাকে চিতায় তুলিয়া পুড়াইবার হাঙ্গামাটুকু করিতে হইবে।

সুতরাং নন্দ ও সুবর্ণের নিবুদ্দেশ যাত্রা আপনা হইতে বাতিল হইয়া গেল। জ্যোতির্ময় আপিস যায় নাই, আপিস যাওয়ার পথে খবর নেওয়ার জন্য হাসপাতালে ঢুকিয়া হাসপাতালেই আটক হইয়া গিয়াছে। হাসপাতালের নূতন ও পুরাতন দালানের মাঝখানে চারিদিকে চওড়া কাঁকর বিছানো পথের জন্য প্রায় সবুজ স্বীপের মতো দেখিতে ছোটো একটি গোলাকার ঘাসে ঢাকা জমি আছে। সবুজ রংকরা গোটা তিনেক লোহার বেঞ্চিও সেখানে পাতা আছে, রোগীর খবর যারা জানিতে আসে, ইচ্ছা করিলে দরকার মতো ওখানে ফাঁকায় বসিয়া বেশি বেশি বাতাস টানিয়া বুকের ষড়ফড়নি শান্ত করিতে পারে। এখন রোদের বড়ো তেজ, জ্যোতির্ময় একাই একটা বেঞ্চে চুপচাপ বসিয়াছিল। গায়ের উপর ঝাঁপাইয়া পড়িয়া সুবর্ণ তাকে জড়াইয়া ধরিল। সুবর্ণ মরিতে বলিয়াছিল বলিয়াই কি অপরাজিতা মরিয়া গিয়াছে ?

জ্যোতির্ময় ধীরে ধীরে তাকে ছাড়াইয়া পাশে বসাইয়া দেয়। বলে, এ রকম করে না, ছিঃ ! উতলা হতে নেই, মরতে বললে কী মানুষ মরে রে পাগলি ? আর তুই তো শুধু মুখে বলেছিলি মনে মনে তো চাইছিলি তোর বউদি বাঁচুক। কত মা পর্যন্ত কতবার রাগ করে ছেলেমেয়েকে মরতে বলে, মরতে বললেই যদি কেউ মরত—

মনে হয়, জ্যোতির্ময় যেন বক্তৃতা আরম্ভ করিয়াছে। হঠাৎ খামিয়া গিয়া অন্ততঃ কণ্ঠে সে বলিল, ইস্ গালটা যে তোর ফুলে গিয়েছে সুবর্ণ ! খুব লেগেছিল না ? সেই শাড়িটা তোকে কিনে দেব সুবর্ণ।

কয়েকদিন আগে স্কুলে যাওয়ার জন্য নতুন ফ্যাশানের একটা শাড়ি চাইয়া সুবর্ণ জ্যোতির্ময়ের ধমক খাইয়াছিল, এদিকে খরচ চলে না, নিত্য নতন ফ্যাশানের শাড়ি ! সেদিন সুবর্ণ ভাবিয়াছিল যে, হুঁ, বউদিকে তো খুব বিনে দিতে পার, আমায় দেবার বেলাই তোমার খরচ চলে না। গালে চড় মারার ক্ষতিপূরণস্বরূপ জ্যোতির্ময় সেই শাড়িখানা কিনিয়া দিবে শুনিয়া হঠাৎ তার মনে পড়িয়া গেল, অপরাজিতার রাশি রাশি শাড়ি সমস্তই এবার সে পাইবে। মনে পড়ায় সুবর্ণ ফুঁপাইয়া ফুঁপাইয়া কাঁদিতে লাগিল। অপরাজিতার শোকে নন্দর কাঁদিবার কথা নয়, মুখখানা ম্লান ও গম্ভীর করিয়া রাখিলেই যথেষ্ট হইত, সুবর্ণকে আকুল হইয়া কাঁদিতে দেখিয়া সেও চোখ মুছিতে লাগিল।

তখন দেখা গেল, জ্যোতির্ময়ের চোখ দিয়াও জল পড়িতেছে। কান্না বোধ হয় হোঁয়াচে।

ছয়

পাড়ায় চার-পাঁচটি নতন বাড়ি তৈরি হইতেছে। শহরতলির পরিবর্তন আবস্ত হইয়াছে কয়েক বছর আগে, দিন দিন পরিবর্তন যেন দ্রুততর হইয়া উঠিতেছে। শহরের লোক শহর ছাড়িয়া শহরতলিতে বাস করিতে আসিতেছে। এ কী একটা নতন ফ্যাশন ? ভবানীপুব কালিঘাটের মতো যেখানে ধনঞ্জয়ের মতে এককালে দিনদুপুরে শিয়াল ডাকিত, এই শহরতলিকেও শহর ক্রমে ক্রমে গ্রাস করিয়া ফেলিবে ? দশ-বারোবছর আগে এ অঞ্চল কী ছিল, এখন কী দাঁড়াইয়াছে, ভাবিলেও যশোদা অবাক হইয়া যায়। কাছাকাছি যে প্রকাণ্ড একটা শহর আছে, তখন তাই বা কে ভাবিতে পারিত ? ছড়ানো বাড়িঘর, মেটে পথ, ডোবা-পুকুর, বাঁশঝাড় এ সব কিছুই অভাব তখন ছিল না। সত্যপ্রিয়র বাগানবাড়িটা ছিল প্রায় জঙ্গল, বাগানবাড়ির দক্ষিণ দিকে কয়েক ঘর গরিব মুসলমানের একটি বসতি ছিল, বছর তিনেক আগে তারা যে কোথায় উঠিয়া চলিয়া গিয়াছে, আর জানা যায় না। বোধ হয়, শহরতলির উত্তর দিকে যে নতন মুসলমান পল্লিটি গড়িয়া উঠিয়াছে, সেইখানে গিয়া বসবাস আরম্ভ করিয়াছে। এ পাড়ায় আগেকার সেই ভাঙা ঘরের বাসিন্দা শ্রমিক শ্রেণির গরিব মুসলমানদের বদলে এলোমেলোভাবে কয়েকটি পাকাবাড়িতে কয়েক ঘর ভদ্র মুসলমান পরিবার আসিয়াছে, এরা সকলেই চাকুরিজীবী। পরিষ্কার বেশভূষা করিয়া পরিশ্রমের অভাবে বেচপ শরীর লইয়া নটা-দশটার সময় প্রত্যেক দিন এদের ট্রামের উদ্দেশ্যে ব্যস্ত হইয়া ছুটিতে দেখিলে সেই অশিক্ষিত নিম্নশ্রেণির মুসলমান পরিবার কয়েকটির জন্য যশোদার কষ্ট হয়।

তবে শহরতলির ধীরে ধীরে শহরে পরিণত হওয়ার বিরুদ্ধে যশোদার কোনো নালিশ নাই— যদি তার মনের মতো শহরে পরিণত হয়। এ বিষয়ে বড়ো আশ্চর্য ও নিখুঁত কল্পনা আছে যশোদার, তার এই পাড়াকে কেন্দ্র করিয়া এই শহরতলিকে সে বড়ো শহরটির সঙ্গে সংলগ্ন একটি সুবিন্যস্ত, পরিচ্ছন্ন, সুশ্রী নগররূপে কল্পনা করিতে পারে। সে নগরে পল্লির সবুজ রূপের বাহুল্য নাই, নগরবাসীর জীবন পল্লিবাসীর জীবনের মতো সহজ সরলও নয়। পল্লির সঙ্গে যশোদার যথেষ্ট পরিচয় আছে, কিন্তু পল্লির রূপ তার চোখে পড়ে না, ঝোপ-ঝাড়-জঙ্গল, পচা জলের ডোবা-পুকুর,

নাংরা পথঘাট, জীর্ণ ঘরবাড়ি খেত-খামারের মন-ভুলানো, চোখ-জুড়ানো শ্রী তার মানস-নয়নে পর্যন্ত অতি বিস্তীর্ণ ঠেকে এবং ঘষা পড়ার অভাবে পল্লিবাসীটির বুদ্ধিটা একটু ভোঁতা বলিয়াই শহরবাসীর চেয়ে তাদের সরলতা কেন বেশি হইবে যশোদা বুঝতে পারে না, সংকীর্ণ জগতে একঘেয়ে অনাড়ম্বর জীবনযাপন করে বলিয়াই জীবনটাই বা তাদের শহরবাসীর চেয়ে সহজ হইবে কেন তাও যশোদা বুঝিতে পারে না—পল্লিবাসীরাও তো কম গরিব নয় ? যশোদার কল্লনার নগর তাই শহরবাসী গ্রাম নয়, শহরই বটে। নগরের পথে ট্রাম চলে, পথের দুপাশে পাঁচ-সাততলা বাড়ি থাকে, দোকান থাকে, সিনেমা থাকে, পার্ক থাকে, গলি থাকে, হাজার হাজার মানুষ থাকে, অনেক কিছুই থাকে শহরের। কেবল সেই সঙ্গে সঙ্গে থাকে সামঞ্জস্য, বড়ো বাড়ির আড়ালে ছোটো বাড়ির ফাঁপর লাগে না, গলিঘুঁজির গোলকধাঁধা থাকে না, নাকেও লাগে, গায়েও লাগে ন্যাটাইয়া যায় এমন ভাপসা দুর্গন্ধ কোনো গলিতে কোনো বাড়িতে পাওয়া যায় না, আর—

আর, সত্যপ্রিয় অবশ্য মোটরে চড়িয়াই বেড়ায় যশোদার নগরে, কিন্তু যশোদা যে কুলিমজুরদের সঙ্গে ঘর করে, তারা পেট ভরিয়া খাইতে পায়, পরিষ্কার জামাকাপড় পরিতে পায়, দরকার মতো স্ত্রী পায়, জীবনটা উপভোগ করার মতো অবসর পায়—আর ? মনে মনেও তার আদরের হতভাগাগুলোকে পাওয়াইয়া দেওয়ার ব্যাপারে যশোদা তেমন পটু নয় ! কত কিছু কাম্য আছে মানুষের, কত কিছু পাইতে পারে মানুষ, কত কিছু পাইয়াছে মানুষ, কিন্তু এদের দেওয়ার সময় যশোদা সে সমস্তের হৃদয় পায় না, এদের যেন ধন মান স্বাস্থ্য সুখ তেজ শক্তি জ্ঞান বুদ্ধি রূপ যশ এ সমস্তের সত্যই দাবি থাকিতে নাই। কিন্তু এদের পেটের জ্বালা, বোগ শোক দুঃখ গ্লানি অভাব অভিযোগ মনোবিকার এ সমস্ত ম্যাজিকের মতো দূর করিয়া দিবার ক্ষমতা যশোদার কল্লনার আশ্চর্য রকম আছে। এদের দুর্দশা দেখিতে দেখিতে কল্লনাবোধ হয় তার হইয়া গিয়াছে ভোঁতা, তাই অসম্ভব স্বপ্ন সে দেখিতে পারে না, ভিত্তিকরে রাজা হওয়ার আশীর্বাদ করিতে যে কেউ তাকে বারণ করে নাই এটা তুলিয়া গিয়া শুধু বলিতে পারে, আহা, খোঁড়া পা নিয়ে তুমি এত কষ্ট পাচ্ছ, তোমার কষ্ট কমুক, তোমার দুঃখ দূর হোক।

খোঁড়া ধনঞ্জয়ের কাঠের পা আসিয়াছে। পাড়ায় চাঁদা তুলিয়া আর নিজে কয়েকটা টাকা দিয়া যশোদাই তাকে কৃত্রিম পা-টি কিনিয়া দিয়াছে। যশোদার শত্রু আর ছেলেবেলার সখী কুমুদিনী চার আনা চাঁদা দিয়া বলিয়াছে, আর কেন ভাই, এবার মায়া কাটিয়ে বিদেয় দে। লোকে যে নিন্দে করছে ভাই ?

কেন নিন্দে করছে ? কীসের নিন্দে ?

কচি খুকিটি কিনা, বোঝ না কেন নিন্দে করছে, কীসের নিন্দে !

যশোদার ন্যাকামিতে ক্ষুব্ধ হইয়া মুখ নাড়া দিলেও কুমুদিনী বুঝাইয়া বলে। বলে যে, মানুষটা যতদিন দুপায়ে খাড়া ছিল, চেহারা যেমন হোক দশজনের একজন হইয়া বাড়িতে বাস করিত, লোকে হাসি-তামাশা করিলেও তেমন কিছু বলিত না—হয়তো ভাবিতও না। কিন্তু এখন পা কাটা যাওয়ার পরেও যশোদা যদি তাকে ঘরে রাখিয়া পোষে, সকলকে অবহেলা করিয়া কেবল তাকে নিয়াই দিনরাত মাতিয়া থাকে, কাঠের পা কিনিয়া দিবার জন্য সকলের কাছে চাঁদা পর্যন্ত আদায় করিতে শুরু করে—

যশোদা ফৌস করিয়া ওঠে, কেন, সেবারে গগনার পা কাটা গেলে ঘরে রেখে পুঁথিনি তাকে ? কাঠের পা কিনে দিইনি চাঁদা তুলে ?

কুমুদিনী বিস্তের মতো বলে, সে হল আলাদা কথা। তারপর দীর্ঘনিশ্বাস ফেলিয়া আবার বলে, যাকগে ভাই, যা খুশি করগে ভাই তুই, কলঙ্কে আর ডর কী তোর, বোঝার ওপর শাকের আঁটি বই তো নয়। ছেলেবেলা সই পাতিয়েছি, তাইতে বলা, নয় তো আমার কী এলো গেলো।

সামনাসামনি এমনভাবে কথা কুমুদিনী সচরাচর বলে না। চার আনা চাঁদা দিতে হওয়ায় গায়ে এত জ্বালা ধরিয়াছে নাকি তার ? কে জানে, হয়তো ধনঞ্জয় আর তাকে নিয়া সত্যসত্যই খুব একচোট আলোচনা, গবেষণা আর নিন্দা চলিতেছে।

তারপর যশোদার কানে আসে, এ কাজে সুধীরের উৎসাহই নাকি সকলের চেয়ে বেশি, সত্য মিথ্যা কত কথাই যে সে রটাইয়া বেড়াইতেছে ! এখনও সুধীরের ক্ষোভ থাকিবার কোনো কারণ যশোদা ভাবিয়া পায় না। কালোকে নিয়া সে বরং এমন মশগুল হইয়া পড়িয়াছে যে দেখিয়া শুনিয়া মনে হয়, অল্পের জন্য যশোদার হাত হইতে রেহাই পাওয়ার জন্য অদৃষ্টকে তার ধন্যবাদ দেওয়াই বেশি স্বাভাবিক। সুধীরের যে পরিবর্তন ঘটিয়াছে,—গ্রীষ্মের তৃষ্ণাতুর পশুর একেবারে শ্রাবণের ধারাজলে লুটোপুটি করার মতো—দেখিলে হাসিও পায় করুণাও হয়। ছায়ার মতো যে যশোদার সঙ্গে সঙ্গে থাকিত, উদ্ভ্রান্ত দৃষ্টিতে যশোদার চলাফেরা লক্ষ করিত, মুখ দেখিলে মনে হইত এই বুঝি সর্বনাশ ঘটিল, বহুদিনের উপবাসী বাঘের মতো এই বুঝি সে কাপাইয়া পড়ে হুঙ্কার দিয়া যশোদার ঘাড়ে—সেই সুধীর এখন যশোদার ধারে কাছে ভিড়িতে চায় না, কেবলই এড়াইয়া চলিবার চেষ্টা করে, সামনে পড়িলে এদিক ওদিক তাকায় আর কখনও কখনও বোকার মতো একটু হাসে, আরও বেশি বোকার মতো জিজ্ঞাসা কবে, কী খবর চাঁদের মা ? চালচলন বদলাইয়া গিয়াছে সুধীরের, মেজাজ নরম হইয়াছে, শুকনো বাকলের মতো বৃক্ষ কঠিন মুখের চামড়ার ভিতর হইতে একটা কোমল আন্তরণের হৃদয় যেন পাওয়া যাইতেছে না ? একটি কালো সোনার কাঠির ছোঁয়াতে মানুষটার মধ্যে যেন পলকে পলকে পরিবর্তনের ভেলকি আরম্ভ হইয়া গিয়াছে।

নিন্দে করে নাকি বেড়াচ্ছ তুমি আমার ?

সুধীর জবাব দিবার আগেই কালো তাড়াতাড়ি বলে, না দিদি না, মিথ্যে লাগিয়েছে তোমার কাছে মান্বে।

যশোদা চোখ পাকাইয়া বলে, তুই চূপ কর ছুঁড়ি, তোকে বলিনি আমি। কেঁউ কেঁউ করতিস দুদিন আগে কুকুর বাচ্চার মতো, বড়ো মুখ ফুটেছে, না ?

সুধীর ক্ষুব্ধ হইয়া বলে, গাল দিয়ে না চাঁদের মা।

কতবার কত কারণে রাগ করিয়াছে যশোদা, এমন কালো মেঘের ছায়া কে কবে তার মুখে ঘনাইয়া আসিতে দেখিয়াছে ?—গাল দেব না ? গাল দিতে বারণ করলে ? কথা কইলে যদি না সয়, যাও না চলে এখন থেকে ? কে মাথার দিব্যি দিয়েছে থাকতে ? পাওনাগণ্ডা মিটিয়ে দিয়ে গটগট করে বেরিয়ে যাও দুজনে।

বলিয়া যশোদা নিজেই গটগট করিয়া বাহির হইয়া যায়, পরক্ষণে ফিরিয়া আসিয়া অপেক্ষাকৃত শান্তকণ্ঠে বলে, আজ পর্যন্ত একটি পয়সা দিলে না, এমনি করে তো দেনা শোধ হবে না সুধীর। আজকে ভাড়া চুকিয়ে দিয়ে, ও মাসের আর পাঁচটি টাকা দিয়ে দেনার জন্যে। আচ্ছা, পাঁচটা না পার, তিনটে টাকাই দিয়ে।

তারপর যশোদার রাগটা কমিবার সময় দিয়া রাত্রে কালোকে সুধীর তার কাছে কাঁদাকাটা করিতে পাঠাইয়া দেয়। সুধীর নয়, অনেকেই তার নিন্দা করিতেছে এ খবরটা আবিষ্কার করিয়া যশোদার রাগটা কমিয়া আসায় কালোকে সে বলিয়া দেয় যে, আচ্ছা যা, মাইনে পেলে দিতে বলিস।

এতদিন ধনঞ্জয়কে যশোদা ঘরে ভাত দিয়া আসিয়াছে, আজ বাহিরে আসিয়া সকলের সঙ্গে বনিয়া খাইবার ডাক পড়িল।

উঠতে পারি না যে চাঁদের মা ?

খুব পারবে। চেষ্টাই করে দ্যাখো পার কিনা।

বড়ো লাগে চাঁদের মা।

পেরথম পেরথম লাগবে না ? তাই বলে শূয়ে বসে দিন কাটালে চলবে নাকি, অভ্যাস করতে হবে না চলাফেরার ?

উঠলে যে মাথা ঘোরায় চাঁদের মা ?

পেরথম পেরথম মাথা একটু ঘোরায়।

আজ যশোদার প্রথম খেয়াল হয় ধনঞ্জয় সত্যসত্যই বড়ো বেশি আত্মদে হইয়া পড়িয়াছে। আদুরে ছেলের মতো তার ঘ্যানঘ্যানানির অস্ত নাই। নিজের দূরদৃষ্টের কথা ছাড়া মুখে তার কথা শোনা যায় না, পা কাটা যাওয়ায় যন্ত্রণায় সে যত না কাতরাইয়াছিল এখন পায়ের ঘা শুকাইয়া আসিবার পর নিজের পোড়া কপালের নিন্দা করিয়া সে যেন তার চেয়ে বেশি কাতরায়। তার কথা বলার ভঙ্গিতে যেন ভিক্ষুকের সক্রমণ আবেদন নিবেদনের ধ্বনি শোনা যায়। এত যে আরামে যশোদা তাকে রাখিয়াছে, এত সেবা যত্ন করিতেছে প্রাণপাত করিয়া, কাছে বসিয়া ঘণ্টার পর ঘণ্টা তার একঘেয়ে নালিশ শুনিয়াছে আর আশা ও ভরসার কথা শুনাইয়াছে, কিছুতেই ধনঞ্জয়ের তৃপ্তি হয় নাই, সহানুভূতির উগ্র পিপাসা কমে নাই। নিজের দুঃখের কথা বলিতে বলিতে সে অহোরাত্র কাঁদিতে চায়, সেই সঙ্গে কাঁদাইতে চায় পৃথিবীর সমস্ত মানুষকে। যশোদার কাছে তার যে কৃতজ্ঞ হওয়া উচিত এ কথাটিও সে যেন ধীরে ধীরে ভুলিয়া গিয়াছে, যশোদার কাছে এ সব যেন তার পাওনা ছিল। পা কাটিয়া পঙ্গু হওয়ার জন্য তার এই দাবি জন্মিয়াছে।

ধনঞ্জয় মুখ ভার করিয়া পায়ে কাঠের পা-টি আঁটিতে যায়, যশোদা বলে, শূয়ে থেকে থেকে মাথাও কি খারাপ হয়ে গেছে তোমার ? এখন থেকে ওখানে গিয়ে খেতে বসবে, ওটা আঁটছ যে ?

ধনঞ্জয় কাঁদো কাঁদো হইয়া বলে, আর পারি না চাঁদের মা, সত্যি বলছি আর পারি না আমি। আমি কেন মরলাম না চাঁদের মা ?

হয়েছে, এসো এবার। নির্বিকারভাবে এই কথা বলিয়া যশোদা আরও বেশি নির্বিকারভাবে চলিয়া যায়। আর প্রশয় দেওয়া হইবে না মানুষটাকে, এবার হইতে একটু শক্ত হইতে হইবে।

পরদিন সকালে কাশীবাবু আসিয়া হাজির।—কেমন আছ চাঁদের মা ?

রাস্তায় ঘষিয়া মুখের যেখানে যেখানে চামড়া তুলিয়া দিয়াছিল যশোদা, সেই জায়গাগুলি এখনও সাদাটে হইয়া আছে। মুখখানা কিন্তু হাসি হাসি। পরমাশ্চর্য্য যেন দেখা করিতে আসিয়াছে। বসুন। আপনি ভালো তো ?

অনেকক্ষণ বসিয়া কাশীবাবু আজবাজে গল্প করে, শ্রমিকদের কথা বলে, মিল পরিচালনার কথা বলে—সব অর্থহীন ভাসাভাসা কথা। এ বাড়ির বাসিন্দা তারই মিলের শ্রমিকেরা যশোদার বাড়িতে রোয়াকে বসিয়া যশোদার সঙ্গে তাদের ম্যানেজারবাবুকে আলাপ করিতে দেখিয়া একটু অবাধ হইয়া যায়—ভাবে যে, এতদিনে বুঝি সত্যসত্যই তাদের দাবিগুলি সম্বন্ধে একটা ব্যবস্থা হইবে, আলোচনা করিবার জনাই আসিয়াছে। কাশীবাবু কিন্তু সে আলোচনার ধার দিয়াও যায় না, যশোদা নিজে কথাটা তুলিলে আশ্বাস দিয়া শুধু বলে যে, সত্যপ্রিয় নিজে খোঁজখবর নিতেছেন, প্রায়ই মিলে আসিয়া দেখিয়া শুনিয়া যান, যথাসময়ে তিনিই সব ব্যবস্থা করিবেন।

ভাসাভাসাভাবে একটা খবর যশোদার কানে আসিয়াছিল, সত্যপ্রিয় নাকি গভর্নমেন্টের বড়ো একটা কনট্রাক্ট পাইয়াছে অথবা শীঘ্রই পাইবে, মিল বড়ো করা হইবে, উৎপাদন দুগুণ তিনগুণ বাড়াইয়া ফেলা হইবে। জিজ্ঞাসা করিতে কাশীবাবু একটু ধতোমতো খাইয়া গেল।—কই না, আমি তো কিছু জ্ঞানি না ? কত গুজব বাজারে রটে।

একেবারে বিদায় নেওয়ার খানিকটা আগে যশোদার বাড়িতে আসিবার আসল কারণটি কাশীবাবু ব্যক্ত করে। সত্যপ্রিয় তাকে পাঠাইয়া দিয়াছে—অনুতপ্ত ও লজ্জিত সত্যপ্রিয়। সত্যপ্রিয়

মিলে একটি চাকরি খালি আছে, ভালো চাকরি, ষাটটাকা বেতন। নন্দকে এই চাকরিতে ভর্তি করিয়া নেওয়ার জন্য কাশীবাবুর উপর হুকুম আসিয়াছে।

কী চোখেই যে চক্কোস্তিমশাই তোমায় দেখেছেন চাঁদের মা। কপাল তোমার ভালো।

যশোদা উদাসভাবে বলিল, কী জানি কপাল ভালো কী মন্দ !

সত্যপ্রিয়র এ উদারতায় যশোদা একটুও মুগ্ধ হইয়া যায় না। মনটা বরং তার খারাপ হইয়া যায়। ধীরে সূত্রে নন্দকে আগের চাকরিটির মতো সাধারণ একটি চাকরি দিলে কোনো কথা ছিল না, পঁচিশ টাকার বদলে না হয় বেতনটা এবার ত্রিশ টাকাই হইত। কিন্তু অনুগ্রহের এ রকম বাড়াবাড়ির একটিমাত্র অর্থ হয়—শ্রমিকদের দাবি মেটানো সম্বন্ধে সত্যপ্রিয় যে কথা দিয়াছিল, সেটা পালন করিবার ইচ্ছা তার নাই। তাই ভাইকে মোটা মাহিনার চাকরি দিয়া যশোদাকে সে বাঁধিয়া রাখিতে চায়। শ্রমিকদের সম্বন্ধে প্রতিশ্রুতি পালনের সময় পার হইয়া গেলেও যশোদা যাতে গোলমাল না করিয়া চূপ করিয়া থাকে। যশোদার কথায় শ্রমিকেরা ধর্মঘট বন্ধ করিয়াছিল, যশোদা চূপ করিয়া থাকিলে তারাও চূপ করিয়া থাকিবে।

এখন সমস্যা হইল, নন্দকে সে চাকরি করিতে যাইতে দিবে কিনা। দু-তিনমাসের বেশি চাকরি নন্দর থাকিবে না, ধর্মঘটের উপক্রম হইলেই আবার তার চাকরিটি খসিয়া যাইবে এবং নন্দর চাকরির খাতিরে ধর্মঘট যশোদা বন্ধ রাখিবে না, স্থগিতও করিবে না, সত্যপ্রিয় যদি কথা না রাখে এবার ধর্মঘট ঘটাইয়া যশোদা এসপার ওসপার একটা কিছু করিয়া তবে ক্ষান্ত হইবে। কিন্তু সত্যসত্যই কি সত্যপ্রিয় মতলব আঁটিয়াছে যশোদাকে হাত করিয়া শ্রমিকদের একেবারে ফাঁকি দিবে ? নন্দকে চাকরি করিতে না পাঠাইয়া সত্যপ্রিয়কে চটাইয়া দেওয়া কি সংগত হইবে ?

রাগ্রে নন্দকে সে জিজ্ঞাসা করে, চাকরি করবি নন্দ ? নাই বা করলি !

নন্দ জোর দিয়া বলে, না, চাকরি করব। চাকরি ছাড়া আমার চলবে না।

কেন চলবে না ? দু-তিনমাস পরে আবার তো খেদিয়ে দেবে তোকে—কী এমন বাজা হবি তুই দু-তিনমাস চাকরি করে !

নন্দ আবার জোর দিয়া বলে, খেদিয়ে দেবে কেন ? এবার আর খেদিয়ে দেবে না।

শুনিয়া সন্দিগ্ধভাবে যশোদা জিজ্ঞাসা করে, কী করে জানলি তুই ?

চক্কোস্তিমশাই নিজে বলেছে।

শুনিয়া আরও বেশি সন্দিগ্ধ হইয়া যশোদা জিজ্ঞাসা করে, তুই বুঝি চাকরির জন্যে চক্কোস্তিমশায়ের কাছে গেছিলি নন্দ ?

নন্দ সাড়া দেয় না। রাগে দুঃখে অভিমানে যশোদাও অনেকক্ষণ গুম খাইয়া থাকে। অন্ধকার ঘরের দুই প্রান্তের দুটি চৌকিতে ভাইবোনের অস্বাভাবিক নীরবতা অন্ধকারকে যেন কুৎসিত করিয়া দেয়, সবু গলিটার মধ্যেই কেবল যে ভাপসা গন্ধ চিরস্থায়ী হইয়া আছে, ঘরের মধ্যেও হঠাৎ যেন সেই গন্ধের হৃদিস মেলে—অস্তিত্ব তাই মনে হয় যশোদার।

আমায় একবার বলতেও পারলি না নন্দ ? তুই কি কচিখোকা যে, তোকে আমি আটকে রাখতাম ?

চাকরি ছাড়া আমার চলবে না দিদি।

একটা রহস্যময় ব্যবধানের সৃষ্টি হইয়াছে দুজনের মধ্যে। যশোদা স্পষ্ট অনুভব করতে পারে, জিজ্ঞাসা করিয়া কিছু জানা যাইবে না, এতকাল পরে নন্দর জীবনে এমন একটা গোপন কিছুই আমদানি হইয়াছে যা নিজস্ব ব্যক্তিগত সম্পদ, দিদিকে সে ভাগ দিতে পারিবে না। তাকে ডিঙাইয়া সত্যপ্রিয়র কাছে চাকরি ভিক্ষা করিতে যাওয়া শুধু চাকরির লোভে নয়—এতক্ষণে নন্দ তাহা হইলে কাঁদো কাঁদো হইয়া কথা বলিত, এমন তেজের সঙ্গে ঘোষণা করিতে পারিত না যে চাকরি ছাড়া তার চলিবে না, তাই সে চাকরি সংগ্রহ করিয়াছে, যশোদাকে জিজ্ঞাসা করাও দরকার মনে করে নাই।

তবু যশোদা জেরা কবে। তবু সে জানিতে চায়, চাকরির এত দবকার তার কেন হইল। নন্দ যে কৈফিয়ত দেয় তাতে যশোদা একেবারে স্তম্ভিত হইয়া যায়। তার ভাই নন্দ, তার নিজের হাতে মানুষ করা বুগুণ আর ভাবপ্রবণ অপদার্থ নন্দ, সে কিনা আজ তাকে শোনায় যে, বসিয়া বসিয়া দিন কাটাইলে তো চলিবে না, জীবনে একটু উন্নতির চেষ্টা তো করিতে হইবে তাকে ? বড়ো মানুষের মতো এইসব কথা বলিয়া আসল কথাটা গোপন করিয়া রাখে তার কাছে !

বিষাদের স্বাদ যশোদা প্রায় জানেই না, বিষাদ যদি কখনও ঘনাইয়া আসে তার বাহন হয় চাঁদের জন্য শোক। তাও খুব বেশি প্রশ্রয় পায় না যশোদার কাছে, পুত্রশোকে কাতর হওয়ার অবসরই বা তার কই ? আজ চাঁদের কথা মনেও পড়ে না তবু গাঢ় বিষাদে তার যেন কিম ধরিয়া যায়, ঘুমেব বদলে দু-চোখ ভরিয়া আসে, চোখের পাতা খানিকক্ষণ খুলিয়া রাখা আর খানিকক্ষণ বন্ধ করার উত্তেজিত অবসাদ। আর হ্যাঁ, আজ নিজেকে তার অসহায় মনে হয়, মনে হয় জীবনটা তার ব্যর্থ হইয়া গিয়াছে—এত কাল কেন বাঁচিয়াছিল যশোদা, ভবিষ্যতে কেন বাঁচিবে ?

সকালে নিজেকে একটু অসুস্থ মনে হয়। তবে রাত্রির অনুভূতিগুলি রাত্রেই বিদায় হইয়া গিয়াছে। বিষাদও নাই, নিজেকে অসহায় মনে করাও নাই, জীবনের ব্যর্থতা বা সার্থকতা নিষা মাথা ঘামানোও নাই। নন্দকে চাকরি দেওয়ার ব্যাপারটা পরিষ্কার বুঝিয়া আসিবার জন্য সোজাসুজি সে গিয়া সত্যপ্রিয়ব সঙ্গে দেখা করে।

সোজাসুজি জিজ্ঞাসা করে, ষাট টাকা মাইনের চাকরি করবার যুগি় ছিলে তো আমার ভাই নয় চক্কাতিমশায়, ওকে যে নিচ্ছেন, ও কি পাববে ?

সত্যপ্রিয় মৃদু হাসিয়া বলে, তুমি একেবারে চমকে গেছ দেখছি। ভাবছ, কী জানি কী মতলব আছে লোকটার, যেচে এমন একটা চাকরি দেয় কেন ভাইকে। ভাবছ তো ? মতলব একটা আছে বইকী। মিলে নন্দর চাকরি নামমাত্র, আসলে ও চাকরি করবে আমার। বড়ো সুন্দর কীর্তন করে তোমার ভাই, সেদিন শুনে সবাই প্রশংস করেছে। মাঝে মাঝে আমার এখানে কীর্তন করবে, এই জন্য ওকে চাকরি দিয়েছি। নিজের পকেট থেকে মাইনে গুনতে হত, তার বদলে মিল থেকে যাতে মাইনেটা পায় আর আমারও কীর্তন শোনা হয়, সেই রকম একটা ব্যবস্থা করে দিয়েছি।

যশোদা আশ্চর্য হইয়া বলে, কিন্তু মিলও তো আপনার ?

সত্যপ্রিয় তেমনিভাবে মৃদু মৃদু হাসে, মিল আমার বটে, কিন্তু মিলের টাকা আলাদা, আমার টাকা আলাদা ! কপালের কথা বলা কেন, এতগুলি ব্যবসা আমার, কোনো একটা ব্যবসা থেকে পাঁচটি টাকা নিজের জন্য চাইতে পারি না ! —যশোদার মুখ দেখিয়া আবার বলে, ও সব বড়ো গোলমলে ব্যাপারের কথা, ও সব তুমি বুঝবে না। কোনো ব্যবসার শেয়ার হোল্ডার আছে, কোনো ব্যবসার ম্লিপিং পার্টনার আছে, কোনো ব্যবসার আমি শুধু ম্যানেজিং এজেন্ট—তাছাড়া, আসল ব্যাপারটি কী জান, লাভ হলে লাভটি নেব, লোকসান হলে আমার গায়ে লাগবে না, এই হল ব্যবসার মূল কথা। কত পাঁচ কষতে হয়, কত নিয়ম করতে হয় তার ঠিকানা আছে ! নিজে নিয়ম করে নিজে তো ভাঙতে পারি না ? আমিই সব, আমারই সব—তবু, আমি কেউ নই, আমার কিছুই নয়। বছর বছর ব্যাল্কেস টাকা যে আমার কী করে হুহু করে বেড়ে যাচ্ছে, নিজেই ভালো বুঝতে পারি না। এইখানে বোসো তুমি, একটা কাগজে সই করে দিচ্ছি, একঘন্টার মধ্যে লাখ টাকা এসে হাজির হবে তোমার সামনে।...

বলিতে বলিতে সত্যপ্রিয় রীতিমতো উৎসাহিত হইয়া উঠে, বোঝা যায় টাকার কথা বলিতে তার মজা লাগিতেছে। জীবনে একটি কাজ সে করিয়াছে জীবন দিয়া, এও একটা সাধনা বইকী ! কিন্তু এ সাধনার ফাঁকি যশোদা জানে, একটা সীমায় ঠেকিবার পর এ সাধনা একঘেয়ে হইয়া যায়, সেইখানে সাধনার সমাপ্তি, তারপর কেবল জের টানিয়া চলা। সত্যপ্রিয় এখন তাই করিতেছে। ব্যাল্কেস টাকা জমানো আর খোলামকুচি জমানোর মধ্যে আর বিশেষ কোনো পার্থক্য এখন নাই। যত বড়ো

পেটুক হোক, কত আর খাইতে পারে মানুষ ?—এইভাবে কথাটা যশোদা বিচার করে। বড়োলোকের দান সম্বন্ধেও তার তাই বিশেষ শ্রদ্ধা নাই। কোটিপতিরা লাখ টাকার হাসপাতাল স্থাপন না করিলেই বরং সে একটু আশ্চর্য হয়, যেমন আশ্চর্য হয় ময়রার দোকানের পেটুক মালিক যদি অমাবস্যার নিশিপালন না করে।

যশোদাকে অভিভূত হইতে না দেখিয়া সত্যপ্রিয় একটু ক্ষুণ্ণ হয়। নন্দকে চাকরি দিবার কারণটা জানিয়া যশোদা অনেকটা নিশ্চিত মনে বাড়ি ফিরিয়া যায়।

পরদিন কাশীবাবু আবার আসে, আবার বসিয়া বসিয়া গল্প করে, যাওয়ার সময় নন্দকে একেবারে সঙ্গে নিয়া যায়। এবার নন্দ একেবারে চাকরির দলিল নিয়া বাড়ি ফেরে, একমাসের নোটশ না দিয়া কার ক্ষমতা আছে নন্দকে এবার বরখাস্ত করে ? করিলে, একটি মাসের বেতন মাগনা দিতে হইবে, চালাকি নয় নন্দর সঙ্গে !

কী করতে হবে তোকে ?

কিছু না দিদি, কাশীবাবুর ঘরে একটা চেয়ারে বসে থাকব আর কাশীবাবু যা বলবেন করব। আজকে শুধু সঙ্গে করে মিলটা ঘুরিয়ে দেখিয়ে দিলেন। কাল থেকে কাজ আরম্ভ।

পরদিন নন্দকে জিজ্ঞাসা করিয়া জানা গেল, সারাদিনে সে ঘণ্টাখানেক খাতা লিখিয়াছে, দুবার কাশীবাবুর হুকুমে মিলটা ঘুরিয়া আসিয়াছে, আর একবার গিয়া একটি লোককে কাশীবাবুর কাছে ডাকিয়া আনিয়াছে। বাপ-মা তুলিয়া গালাগালি দিয়া কাশীবাবু লোকটিকে দিয়াছে তাড়াইয়া।

যশোদা বলিল, এ আবার কেমন ধারা চাকরি রে বাবা !

রাত্রে বিতাড়িত লোকটি যশোদার সঙ্গে দেখা করিতে আসিল। তার নাম ভুবন, ধর্মঘটে সে একজন পাস্তা ছিল। আসিয়াই সে বলিল, বেশ দিদি, বেশ ! ভাইকে দিয়ে শেষকালে আমারই ঘাড় ভাঙলে ?

কী বলছ তুমি ভুবন ?

যেন জানো না কিছু, ন্যাকা ঠাকরুন ! আমিও এর শোধ তুলব, সর্বনাশ যদি না করি তোমার আমি—গটগট করিয়া ভুবন চলিয়া গেল। যশোদা ভালো করিয়া কিছুই বুঝিতে পারিল না। ভাবিল, নন্দকে দিয়া কাশীবাবু ডাকাইয়া আনায় বলিয়া সে বুঝি রাগ করিয়াছে। ব্যাপারটা কিন্তু তার মনের মধ্যে খচখচ করিতে লাগিল। নন্দকে দিয়া কাশীবাবু ডাকাইয়া আনে কেন ভুবনকে ? ভুবনকে ডাকিবার লোকের কি তার অভাব ঘটিয়াছিল ?

এদিকে সত্যপ্রিয় মিলে চাকরি যাওয়ার যেন মরশুম পড়িয়া গেল। একদিন যায়, দুদিন যায়, নন্দ আসিয়া খবর দেয়, সেদিনও সে ভুবনের মতো একজনকে ডাকিয়া আনিয়াছিল, কাশীবাবু গালাগালি দিয়া তাকে ছাড়াইয়া দিয়াছেন।

ব্যাপার কী মতি ?

মতি ভয়ে ভয়ে বলে, তা তো জানি না চাঁদের মা।

সুধীরকে জিজ্ঞাসা করিতে সেও গম্ভীর মুখে বলিল, জানি না।

যশোদা বলিল, তোমাদের কী হয়েছে বলো তো ? আমাকে যেন সবাই কেমন এড়িয়ে এড়িয়ে চলছে কদিন থেকে ?

তোমার এখন কর্তাবাবু, কাশীবাবু, এনাদের সঙ্গে ভাব, আমরা কী তোমার সঙ্গে মিশতে সাহস পাই !

যশোদা লম্বা করিয়া টানিয়া বলিল, ব—টে ! বড়ো যে লম্বা-চওড়া কথা শিখেছ দেখছি !

সুধীর রাগিয়া বলিল, যাও, কী আর খেতি করবে তুমি, না হয় কাজ থেকে তাড়াবে। গর্তর থাকলে ঢের কাজ পাব।

কাজ থেকে তাড়াব মানে ?

মানে সুধীর বলিল না, গুম হইয়া বসিয়া রহিল। কালোর মুখখানাও অন্ধকার, একদিন যে কালো সুধীরকে তাড়াতাড়ি হাজত হইতে ফিরাইয়া আনার জন্য যশোদার বৃকে মুখ লুকাইয়া কাঁদিয়াছিল। একরকম যশোদাই তো সুধীরকে সত্যসত্যই শেষ পর্যন্ত হাজত হইতে ফিরাইয়া আনিয়াছিল।

যার চেপ্টায় এখনও হাজতে পচাব বদলে পরদিনই সুধীর আসিয়া কালোর মুখে হাসি ফুটাইয়াছিল, আজ তার দিকে কেমনভাবে চাহিয়া আছে দ্যাখো মেয়েটা, যেন যশোদার মতো শত্রু তার আর নাই ! আপশোশ করিয়া কী হইবে, মেয়েমানুষ এমনি অকৃতজ্ঞই বটে।

কিন্তু কেবল কালো তো নয় ? জগৎ আর মতিরই বা কী হইল ?

দুদিন পবে কাজ গেল জগতের, তার পরদিন মতির।

পায়ে পায়ে কাছে আসিয়া কালো বলিল, কাজ থেকে শেষ পর্যন্ত তাড়ালে দিদি ? ধন্য তুমি।

কী বলছিস তোরা কালো ? ডাক তো জগৎকে আর সুধীরকে। কিন্তু তারা কেউ আসিল না।

পরদিন মতি বলিল, তুমিই কাজ খসালে, এবার থেকে তুমিই তবে খেতে দিয়ো তাঁদের মা।

যশোদা বলিল, এসো তো মতি আমার সঙ্গে।

মতিকে সঙ্গে করিয়া সে গেল জগতের ঘরে। জগৎ রাগিয়া আগুন হইয়া আছে। কেবল রাগ নয়, কী অবজ্ঞা সেই সঙ্গে—কথাই বলিবে না যশোদার সঙ্গে ! অনেক বলিয়া অনেক বুঝাইয়া ব্যাপারটা যশোদা বুঝিতে পারিল। খুবই সহজ একটা চাল দিয়া যশোদাকে সত্যপ্রিয় কুপোকাত করিয়াছে। প্রথমে রটিয়াছে এই যে যশোদা ভিড়িয়াছে উপরওয়ালাদের সঙ্গে, যশোদা বিশ্বাসঘাতিনী। প্রমাণ ? আগে একবার ধর্মঘট থামাইয়াছিল কে সকলের ক্ষতি করিয়া ? গতবার ধর্মঘট থামাইয়াছে কে সকলের ক্ষতি করিয়া ? সত্যপ্রিয়র সঙ্গে, কাশীবাবুর সঙ্গে এত অন্তরঙ্গতা কীসের যশোদার, দুবেলা সত্যপ্রিয়র মোটর চাপিয়া কেন সে সত্যপ্রিয়র বাড়ি নিমন্ত্রণ রাখিতে যায় ? নন্দর মতো একটা হৌড়া যে মিলে অমন চাকরি পাইল, এটা কীসের পুরস্কার ? এক একটা ছুতা দিয়া একে একে ধর্মঘটের সাত-আটজন পাতাকে তাড়াইয়া দেওয়া হইল এটা কার পরামর্শ ?

আমার পরামর্শ নাকি জগৎ, অ্যা ? আমি পরামর্শ দিয়েছি তোমাদের তাড়াবার ?

কাশীবাবু নিজে বলেছেন।

শুনিয়া খানিকক্ষণ যশোদা চূপ করিয়া দাঁড়াইয়া রহিল, তারপর বলিল, পেটে পেটে এই মতলব ছিল ব্যাটার, তাই তিনমাস ধম্মোঘট বন্ধ রাখতে বলেছিল ! সবাইকে ডাক দিকি একবার জগৎ, পিলেটা চমকে দিই হাডহাবাতে সত্যপ্রিয় আর কাশীবাবুর।

কিন্তু কেউ আসিল না। আর কে বিশ্বাস করিবে যশোদাকে ? কী লাভ হইয়াছে যশোদাকে বিশ্বাস করিয়া ? বরং লোকসান হইয়াছে পুরামাত্রায়। যশোদা যদি খারাপ মানুষ নাও হয়, ধরা যাক তার কোনোই দোষ নাই, কী দরকার তাকে টানাটানি করিয়া ? সাবধান থাকাই ভালো। শ্রমিক প্রতিষ্ঠান দুটি হইতেও যশোদা সম্পর্কে সাবধান থাকিবার জন্য সকলকে সাবধান করিয়া দেওয়া হইয়াছে। যশোদা কে যে তার কথায় সকলে ধর্মঘট করিবে আর ধর্মঘট থামাইবে ?

যশোদা নন্দকে বলিল, কাল থেকে কাজে যাস না নন্দ।

শুনিয়া নন্দ মুষ্টিয়া গেল। বড়ো আরামের চাকরি, ইতিমধ্যে সে পনেরো টাকা আগাম মাহিনা চাহিবামাত্র পাইয়া গিয়াছে।

দিশেহারার নন্দ পরামর্শ করিতে গেল সুবর্ণের সঙ্গে। সুবর্ণ আঁতকাইয়া উঠিয়া বলিল, না না, কখনও চাকরি ছেড়ো না তুমি। আমাদের কী উপায় হবে ?

চাকরি না ছাড়িলেও যে তাদের কী উপায় হওয়া সম্ভব নন্দ ভাবিয়া পায় না। তবে সুবর্ণই একদিন এক মিনিটের নোটিশে তাকে বগলদাবা করিয়াও উধাও হইয়া যাইতে চাহিয়াছিল, সুবর্ণই

আজ মত বদলাইয়া তাড়াতাড়ি জীবনে তার উন্নতি করাইয়া প্রচলিত প্রথায় তাকে বরণ করিতে চায়, সুতরাং নন্দর কিছু বলিবার থাকিলেও বলিবার উপায় নাই। বলিতে ইচ্ছাও হয় না। অন্যাকথা অবশ্য বলিতে ইচ্ছা হয় অনেক, আসরে শত শত মানুষের মধ্যে একা নন্দ একাকিনী সুবর্ণকে যে সব কথা হাসিয়া কাঁদিয়া বলে তার চেয়েও মৌলিক, তার চেয়েও রোমাঞ্চকর রাশি রাশি কথা। মনে হয়, সুবর্ণেরও যেন ওইরকম অনেক কিছু বক্তব্য আছে। তাই, নন্দও একরকম কিছুই বলে না, সুবর্ণও বলে না—জীবনমরণের সমস্যা নিয়া পরামর্শটা পর্যন্ত তাদের এমন সংক্ষিপ্ত হয় বলিবার নয়। শুনিলে অন্য লোকের মনে হওয়া আশ্চর্য নয় যে, কিশোর-কিশোরীর মাসিকপত্রে যে সব ধাঁধা থাকে দুজনে বৃষ্টি তারই উত্তর বাহির করিতেছে, একজন আর একজনকে শুনাইতেছে এক একটি সংকেত-সূত্র।

সুবর্ণ হয়তো বলে, একশো যদি হত—

নন্দ সায় দেয়। আচমকা তিনটি মোটে শব্দ সুবর্ণ উচ্চারণ করিয়াছে, কিন্তু দুজনের কাছেই তার অর্থ পরিষ্কার। নন্দর যদি একশো টাকা বেতন হইত আর নন্দ যদি জ্যোতির্ময়ের মতো একটি বাড়ি ভাড়া করিয়া বাস করিত আর মেলামেশা করিত ভদ্রলোকের সঙ্গে অর্থাৎ সোজা কথায় নন্দ যদি জ্যোতির্ময়ের স্তরে ঠেলিয়া তুলিতে পারিত নিজেকে, তবে আর তাদের কোনো ভাবনা ছিল না।

একটুক্ষণ চোখে চোখে চাহিয়া থাকিয়া সুবর্ণ হয়তো আবার বলে, দাদার চাকরি গেলেও—

এবারও নন্দ সায় দেয়। জ্যোতির্ময়ের যদি চাকরি যায় এবং আর সে চাকরি না পায় এবং ভয়ানক গরিব হইয়া যশোদার বাড়ির মতোই একটা বাড়িতে কায়ক্বেশে দিন কাটাইতে বাধ্য হয় অর্থাৎ সোজা কথায়, জ্যোতির্ময় যদি নন্দর স্তরে নামিয়া আসে, তাহা হইলেও তাদের কোনো ভাবনা ছিল না।

আবার একটু চোখে চোখে চাহিয়া সুবর্ণ হয়তো আবার আরও নিচু গলায় ফিসফিস করিয়া বলে, বউদির কথা তুলে খুব খোঁচাচ্ছি, কিন্তু—

অপরাজিতার কথা তুলিয়া সুবর্ণ জ্যোতির্ময়কে খুব খোঁচাইতেছে, সে^১ যাতে চাকরি ছাড়িয়া দিয়া গরিব হইয়া যায়। কিন্তু অপরাজিতার স্মৃতির অন্ধ্রেও সুবর্ণ তার মর্মভেদ করিতে পারিতেছে না, সমস্ত খোঁচানো ব্যর্থ হইয়া যাইতেছে।

দুজনে প্রায় একসঙ্গে নিশ্বাস ফেলে। নিশ্বাস ফেলিয়া নন্দ হয়তো বলে, যদি না হয় ?

সুবর্ণ হয়তো জবাব দেয়, তাহলে তাই করব।

অর্থাৎ কিছুতেই যদি কিছু না হয়, তাহা হইলে অগতাই দুজনে তারা হাত ধরাধরি করিয়া নিবৃদ্দেশ হইয়া যাইবে। এমনভাবে কথার অতি ক্ষুদ্র ভগ্নাংশ আর মুখের ভাব আর দৃষ্টি বিনিময় দিয়া অনায়াসে তারা পরস্পরের মনের কথা বুঝিতে পারে, কী সৃষ্টিছাড়া মনের মিলটাই যে তাদের হইয়াছে ! এই রকম আদানপ্রদানের নামই বোধ হয় ভালোবাসার ভাষা, কে বলিবে !

যশোদার বরণ না মানিয়া নন্দ চাকরি করিতে যায় আর যশোদা সকলকে জিজ্ঞাসা করে, নন্দকে যদি আমি খেদিয়ে দিই, তবে তো তোমরা আমায় বিশ্বাস করবে ?

কিন্তু বিশ্বাস অবিশ্বাসের প্রশ্ন এখন তুচ্ছ হইয়া গিয়াছে, যশোদাকে তারা এড়াইয়া চলিতে চায়, যশোদার সঙ্গে মাখামাখি করিয়া বিপন্ন হইবে কে ? বলাই নামে একজন শ্রমিক যেদিন বরখাস্ত হইয়াছিল তার পরদিন সকালে উঠিয়াই ছেঁড়া কাপড় জামা শতরঞ্চি কব্বল গুটাইয়া বিদায় হইয়া গেল যশোদার বাড়ি হইতে শোনা গেল তাকে আবার কাজে নেওয়া হইয়াছে। তারপর সাতদিনের মধ্যে যশোদার বাড়ি খালি হইয়া গেল। যশোদার পাওনা-গন্ডা মিটাইয়া দিয়াই গেল সকলে, কাশীবাবু সকলকে দরকার মতো আগাম টাকা দিয়াছে। যশোদাকে টাকা না দিয়া যাইতে পারিলে অবশ্য সকলে তাহাই করিত, কিন্তু যশোদাকে ফাঁকি দেওয়া খড়ো কঠিন।

প্রথমে যশোদা বুঝাইবার চেষ্টা করিয়াছিল, কী করছ তোমরা বুঝতে পারছ ? সাধ করে ফাঁদে পা দিচ্ছ ? যদিদিন না মিলের দেনা শোধ হবে টু শব্দটি করতে পারবে না তোমরা, যা বলবে যা করবে মুখটি বুজে মেনে নিতে হবে তোমাদের—বুঝতে পারছ ?

বুঝিতে পারিতেছে সকলেই, কিন্তু উপায় কী ?

কেবল সত্যপ্রিয় মিলের নয়, অন্য মিলের যারা যশোদার বাড়িতে ছিল তারাও পলাইয়া গেল। উপর হইতে তাদের উপরেও চাপ পড়িয়াছে। এ বাড়িতে রহিল কেবল মতি আর ধনঞ্জয়, ও বাড়িতে সুধীর আর নদেরচাঁদ। সুধীরকেও চলিয়া যাওয়ার জন্য কালো ক্রমাগত খোঁচাইতেছিল, কিন্তু সে কাজ করে রেলের ইয়ার্ডে, যশোদার দেনা শোধ করিয়া যশোদাকে ত্যাগ করার জন্য কে তাকে আগাম টাকা দিবে ? নদেরচাঁদের কাজ ছিল না, মিলে কাজ পাওয়ার সম্ভাবনাও তার নাই।

তিনটি উনানে যশোদার আঁচ পড়ে না। একটি উনান ধরানোর সময় তার মনে হয়, এত বড়ো উনান ধরাইয়া কী হইবে, মিছামিছি কয়লার অপচয়। ছোটো একটি উনান তৈয়ারি করিতে হইবে। অন্যসময় প্রয়োজন হওয়া মাত্র ছোটো উনান যশোদার প্রস্তুত হইয়া যাইত, এ রকম সামান্য কাজ ফেলিয়া রাখা যশোদার স্বভাব নয়, কিন্তু এবার ছোটো উনানটি যশোদার মনের মধ্যেই জ্বলিতে থাকিল। রান্নাঘরে বড়ো বড়ো উনান তিনটির কাছে কাদামাটি দিয়া গড়িয়া তুলিবার শক্তি বা উৎসাহ যেন তার নাই।

শহরতলি পাণ্ডুলিপির একটি পৃষ্ঠা

শহরতলি

দ্বিতীয় পর্ব

এক

শহরতলির রূপান্তর গ্রহণের প্রক্রিয়া দিন দিন দ্রুততর হইয়া উঠে।

অদ্ভুত ব্যাপার কিছু নয়, তবু আশ্চর্য মনে হয়। মাটির বাসন যেন দেখিতে দেখিতে কৃত্রিম ধাতুতে দাঁড়াইয়া যাইতেছে আর চাকচিক্য বাড়িতেছে প্রতিদিন। কত এবড়ো-খেবড়ো রাস্তা নূতন পিচের আবরণে গা ঢাকিয়া ঝকঝক করিতেছে, কত আঁকাবাঁকা সবু গলি চওড়া আব সিধা হইয়া যাইতেছে, কত অনামি পথেব গায়ে ঠাঁটা হইয়া যাইতেছে জমকালো নাম।

চাবিদিকে বাড়ি উঠিতেছে অসংখ্য। ফাঁকে ফাঁকে ছড়ানো সেকেন্দ্রে ধরনের সাদাসিধে একতলা দোতলা অনেক বাড়ি অদৃশ্য হইয়া সেখানে দেখা দিতেছে আধুনিক ফ্যাশনের বাড়ি—শুধু গঠনের মধ্যেই কত কায়দা। এ অঞ্চলে ছোটোবড়ো সব বাড়িরই প্রায় আকার ছিল চারকোনা বাক্সের মতো, এখন বাড়িগুলি হইয়াছে ইট-কাঠ-চুন-সুরকি-সিমেন্ট-লোহার জ্যামিতি। অস্বাভাবিক বৃপলাবণ্যের অপ্রত্যাশিত আঘাতে বাড়িগুলি যেন দৃষ্টিকে পীড়া দেয়। শিল্পী ভাস্কর কি মিস্ত্রির কাজ আবস্ত করিয়াছে, তাই তাল সামলানো যাইতেছে না ?

দেওয়ানপাটের সংখ্যাও হুহু করিয়া বাড়িয়া যাইতেছে, পুরানো দোকানের চেহারাও বদলাইয়া যাইতেছে। ছোটো ছোটো কত পুরানো দোকান যে উঠিয়া গেল!—ছোটো অপবিচ্ছন্ন ঘরে এলোমেলোভাবে জিনিস সাজাইয়া এতদিন যাদের কাছে মাল বিক্রি করা চলিত তাদের অনেকেই তো নাই, নূতন যারা আসিয়াছে তারা ছবির মতো সাজানো দোকান চায়।

বড়ো রাস্তায় বাস্তার আলোর সংখ্যা আরও জোর বাড়িয়াছে বটে কিন্তু এখন দুদিকের দোকানের আলোতেই রাস্তাটি এমন ঝলমল করে যে, বাস্তাব আলো বাত বাবোটা পর্যন্ত নিভাইয়া ব্যাখিলেও চলে।

বাজারের সংস্কার হইয়াছে। এলোমেলোভাবে যেখানে সেখানে কেউ আর মাছ-তবকারি বেচিতে বসে না, সন্ধ্যার পর বাজারের অর্ধেকটা এখন আর আবছা অন্ধকারে ঢাকিয়া যায় না। দুবেলা ধোয়া-মোছার ব্যবস্থা করিয়াও অবশ্য বাজারের নোংবামি আর দুর্গন্ধ এখনও দূর করা যায় নাই, কোনোদিন যাইবেও না, তবু কুলির দেহ ভদ্রলোকের দেহে পরিণত হওয়ার মতো, বাজারের পবিবর্তন যে হইয়াছে, তাতে সন্দেহ নাই।

দলে দলে যেসব নরনারী আসিয়া এ অঞ্চলের নূতন ধরনের বাড়িগুলিতে নীড় বাঁধিতেছে, শহরতলিব পবিবর্তিত আবেষ্টনীর সঙ্গে তাদের চালচলন বেশভূষা বেশ খাপ খায়। অনেকে বাস করিতে আসিয়াছে নিজের বাড়িতে, অনেকে আসিয়াছে ভাড়াটে হইয়া। জমির দাম এত বাড়িয়া গিয়াছে যে বড়োলোক ছাড়া বাড়ি করিয়া এ অঞ্চলে বাস করা আর সম্ভব নয়। প্রথম দিকে যারা জমি কিনিয়া বাড়ি করিয়াছিল অথবা তৈরি বাড়ি কিনিয়া নিয়াছিল, তারা প্রায় অধিকাংশই না-বড়োলোক ধরনের ধনী, বাড়ি করিতেই হস্তান্তর অনেকের জীবনের সঞ্চয় ফুরাইয়া গিয়াছে। তবু এরাই প্রথমে এই শহরতলিকে ফ্যাশনেবল শহুরে রূপ দিয়াছে, এ অঞ্চলে বাস করার মর্যাদা ও সুবিধা বাড়াইয়াছে, আকর্ষণ সৃষ্টি করিয়াছে। তারপর আসিয়াছে বড়ো বড়ো চাকুরে, ব্যবসায়ী, জমিদার—দশগুণ কম দামে পাঁচ কাঠা জমি কিনিতে একদিন যাকে চোখে অন্ধকার দেখিতে হইয়াছিল তার ছোটো বাড়িখানার পাশে উঠিয়াছে বাগানঘেরা প্রাসাদ।

অনেক বস্তির িহুও লোপ পাইয়াছে, কেবল যেগুলি বড়ো রাস্তার অনেক তফাতে ভদ্রপাড়ার পিছনে পড়িয়াছে সেগুলি টিকিয়া আছে,—কোনোটা সম্পূর্ণ, কোনোটা আংশিক। যশোদার বাড়ির

তিন দিকে নতুন বাড়ি উঠিয়াছে, কেবল কুমুদিনীর বাড়ি যেদিকে সেদিকটা আগে যেমন ছিল তেমনই আছে। রূপান্তরের ঢেউ যশোদার দুটি মুখোমুখি বাড়ি পর্যন্ত আসিয়া ঠেকিয়া গিয়াছে।

যশোদা বাড়ি দুটি বিক্রি করিলে সঙ্গে সঙ্গে এদিকের আট-দশখানা বাড়ি পরিবর্তনের স্রোতে ভাসিয়া যাইত। বিক্রি করিবার জন্য এ সব বাড়ি আর ফাঁকা জমির মালিকেরা সকলেই উৎসুক হইয়া আছে, এ অঞ্চলে জমির দাম যে এত চড়িতে পারে পাঁচ-সাতবছর আগে কেহ কল্পনাও করিতে পারে নাই। সব বেচিয়া দিয়া শহরের আরও তফাতে সস্তায় জমি কিনিয়া আবার তারা বাড়িঘর তৈরি করিয়া নিবে, একটা মোটা টাকা হাতে থাকিয়া যাইবে। এখন তাদের ভয় শুধু এই, হঠাৎ জমির দাম না কমিয়া যায়।

কিন্তু যশোদার জন্য কেউ তারা বাড়ি বিক্রি করিতে পারিতেছে না। যে কোম্পানি সমস্ত পাড়াটা চড়া দামে কিনিতে চায়, মাঝখানে যশোদার বাড়ি দুটি বাদ পড়িলে তারা বেশি দাম দিবে না। সকলেই যদি বেচিতে রাজি হয়, এক কাঠা জমিও বাদ না পড়ে, তবেই যশোদার বাড়ির এ পাশের জমির দরটা তাদেরও দেওয়া চলিতে পারে—নয়তো অত দামে ছাড়া ছাড়া জমি কিনিয়া কোম্পানির কী লাভ হইবে ?

এইসব বাড়ির মালিকেরা একত্র হইয়া অনেক পরামর্শ করিয়াছে, যশোদাকে বুঝাইয়াছে, অনুরোধ করিয়াছে, ভয়ও দেখাইয়াছে। কুমুদিনী যে তাকে কত খোঁচাইয়াছে বলিবার নয়। কুমুদিনীর বাড়িটি ছোটো কিন্তু জায়গা অনেক। বাড়ির পিছনে তার একটি ছোটোখাটো বাগান আছে, পেয়ারা, লেবু, ডালিমগাছে বাগানটি ঠাসা। অনেকগুলি টাকা হাতে পাওয়ার শখটা কুমুদিনীর চিরদিনই বড়ো প্রবল। টাকা হাতে পাওয়ার শখটা অবশ্য কারও কম থাকে না, কিন্তু একসঙ্গে মোটা টাকা পাওয়ার জন্য কুমুদিনীর মনটাই বোধ হয় সকলের চেয়ে বেশি ছটফট করিতেছে।

তারপর মনের অশান্তি আর সকলের পীড়াপীড়িতে অস্থির হইয়া উঠিয়া বাড়ি বেচিতে যশোদা যদি বা রাজি হইয়াছিল, শেষ মুহূর্তে হঠাৎ আবার তার মন বদলাইয়া গেল।

সামান্য একটা উপলক্ষে।

বাড়ি বেচিতে রাজি হওয়া মাত্র যশোদা বলিল, তবে আর এ বাড়িতে আমি একটা দিনও থাকব না। আমি চললাম।

কুমুদিনী, রাজেন আর ধনঞ্জয় তিনজনেই ব্যাকুল হইয়া বলিল, চললে ? কোথায় চললে তুমি বলা নেই কওয়া নেই ?

যশোদা হাসিল। যশোদার সেই শান্ত কৌতুকভরা হাসি দেখিয়া সকলে স্বস্তি বোধ করিল। না, রাগে দুঃখে বিরক্তিতে মাথা যশোদার বিগড়াইয়া যায় নাই।

দুদিন একটু ঘরে আসব।

রাজেন বলিল, কোথায় যাবে ?

যশোদা বলিল, চুলোয়। কুঁড়ে পাও, গোয়াল পাও একটা ঠিক করে রেখো দিকি আমার জন্যে—পরশু এসেই জিনিসপত্তর নিয়ে উঠে যাব।

কুমুদিনী মুখ অন্ধকার করিয়া বলিল, হুঁ, জিনিসপত্তর ! জিনিসপত্তর বেঁধেছেঁদে রাখতে হবে তো আমাকে ?

তাকে তো আমি বলিনি সই !

কারও কাছে মনের কথা ফাঁস না করিয়া যশোদা বাড়ি ছাড়িয়া শহরের এক সস্তা হোটেলে গিয়া উঠিল। কিছুদিন হইতে যশোদা ভাবিতেছিল, রীতিমতো একটা হোটেলে খুলিয়া নিজের চারিদিকে আবার কতকগুলি মানুষ জড়ো করিয়া অনাঙ্কীয় মানুষের সুখদুঃখের সঙ্গে নিজেকে জড়াইয়া দিয়া দিন কাটাইবে। কিন্তু দুটি দিন সেই আদর্শ ও পবিত্র হোটেলে কাটাইয়াই সে বুঝিতে পারিল, এই সব

কলমপেয়া কুলিরা কারও সঙ্গে সুখদুঃখের উপভোগ ভাগাভাগি করে না, যেটুকু করে সেটুকু শুধু মৌখিক ভদ্র আলাপে চলতি শব্দের আদান-প্রদান। সহানুভূতি কাকে বলে কেউ জানে না, চায় না এবং পায়ও না।

ক্ষুধ মনে যশোদা তাই ফিরিয়া আসিল। আসিয়া দেখিল, কুমুদিনী সত্যই তাব সমস্ত জিনিসপত্র বাঁধিয়া-ছাঁদিয়া ঠিক করিয়া রাখিয়াছে। শহরের অন্যপ্রান্তে একটি বাড়িও রাজেন ঠিক করিয়াছে, সকলে মিলিয়া এখন সেখানে গিয়া উঠিবে তারপর যা ব্যবস্থা হয় করা হইবে। যশোদা চলিয়া যাইবে আর তারা এখানে পড়িয়া থাকিবে, কুমুদিনীর তা সহ্য করা অসম্ভব। শত্রু যদি চোখের আড়ালেই চলিয়া গেল, দিন তার কাটিবে কী করিয়া ?

যশোদা রাজেনকে বলিল, তোমাদের যাবার তাড়াতাড়ি কীসের ?

রাজেনের হইয়া কুমুদিনী জবাব দিল, তোমাবই বা তাড়াতাড়িটা কী শুনি।

যশোদা মুখভার করিয়া বলিল, আমার কথা আলাদা। একা মানুষ আমি, দুদিন আগে যাই পরে যাই, কারও কিছু এসে যাবে না। তোমরা কেন মিছিমিছি দু-চারমাস আগে থেকে ঘর ছাড়া হবে ?

কুমুদিনী মুচকিয়া একটু হাসিল।—আমরাও তো একা মানুষ চাঁদের মা, নই ?—দুটি একা মানুষ।

রাজেন ও কুমুদিনী চলিয়া গেলে বাড়ি ছাড়িয়া যাওয়ার জন্যে প্রস্তুত হইয়া যশোদা বাড়িব উনুনগুলি ভাঙিয়া দিতে গেল।

যশোদার লাথিতে তার রান্নাঘরের প্রকাণ্ড উনুন তিনটি ভাঙিয়া গেল। বাড়ি ছাড়িয়া যাওয়ার সময় নাকি উনুন ভাঙিয়া দিয়া যাইতে হয়।

মেয়েলি শাস্ত্রে এ সব বিধান যশোদা যে বিশেষ মানিয়া চলে তা নয়, তা ছাড়া লাথি দিয়া উনুন ভাঙিতে হইবে এমন কোনো নির্দেশও এ শাস্ত্রে নাই। তবে, মন ভাঙিয়া গেলে মানুষের পক্ষে উনুন ভাঙিবাব জন্যে এক বকম খাপছাড়া উপায় অবলম্বন করা আশ্চর্য নয়।

উনুন ভাঙিল, একটি পাও জখম হইল যশোদাব। লোহাব একটা শিক ডান পায়ের পাতায় এফোঁড়-ওফোঁড় বিধিয়া গেল। মন-ভাঙা আবেগে লাথিগুলি যশোদা একটু জোরে জোরেই মারিয়াছিল।

মেঝেতে বসিয়া নিজেই সে টান দিয়া শিক খুলিয়া ফেলিল। তখন আরম্ভ হইল বক্তপাত। কত রক্তই যে ছিল যশোদার প্রকাণ্ড শরীরটাতে, দেখিতে দেখিতে রক্তে মেঝে ভাসিয়া গেল।

বগল-লাঠিতে ভর দিয়া এক পায়ে দবজার কাছে দাঁড়াইয়া ধনঞ্জয় যশোদার কীর্তি দেখিতেছিল, তার দিকে চাহিয়া যশোদা বলিল, দেখলে ?

রক্ত দেখিয়া ধনঞ্জয় প্রথমটা থতোমতো খাইয়া যায়।

পা কাটা যাওয়ার পব কিছুদিন সে সামান্য কারণে উত্তেজিত হইয়া উঠিত, বাগারাগি চৈচামেচি করিয়া বাড়ি সরগরম করিয়া তুলিত, কত যে ছেলেমানুসি আর পাগলামি তার আসিয়াছিল হিসাব হয় না। তাবপর ধীরে ধীরে সে নিস্তেজ হইয়া পড়িয়াছে। সব সময়েই প্রায় বিষণ্ণ ও অনামনস্ক হইয়া থাকে, অথচ কোনো বিষয়ে সে গভীরভাবে চিন্তা করিতেছে তাও মনে হয় না। ডাকিলে চমকাইয়া ওঠে না, ডাক সম্বন্ধে ধীরে ধীরে সচেতন হইয়া ওঠে, সাড়া দিতে একটু সময় লাগে। মস্তিষ্কের ক্রিয়া যেন আজকাল তার একটু শ্লথগতিতে সম্পন্ন হয়। কেমন একটু বোকাহাবার মতো হইয়া পড়িয়াছে মানুষটা।

যশোদার পা জখম হইয়া দরদর করিয়া রক্ত পড়িতেছে এটা খেয়াল করিয়া উঠিতে একটু তার সময় লাগে, কিন্তু তারপর চোখের পলকে কিমানো মানুষটা যে সজীব হইয়া উঠে অতিমাত্রায়।

বগলের লাঠি ফেলিয়া দিয়া ন্যাংচাইতে ন্যাংচাইতে কাছে আগাইয়া যায়, গায়ের নতুন আলোয়ানটি দিয়া রক্ত মুছিতে মুছিতে ব্যাকুলভাবে বলে, ডাক্তার ডেকে আনি ?

আলোয়ানটি কাড়িয়া নিয়া যশোদা বলে, ডাক্তার না হাতি ডাকবে। জল আনো এক ঘটি আর খানিকটা ন্যাকড়া।

ধনঞ্জয় ব্যস্ত হইয়া উঠিয়া পড়ে, এক পায়ে দুয়ারের কাছে গিয়া বগল-লাঠি তুলিয়া নিতে গিয়া হুমড়ি খাইয়া পড়িয়া যাওয়ার উপক্রম করে। যশোদা ডাকিয়া বলে হুটোপুটি কোরো না বাবু, ধীরে সুস্থে আনো।

রক্ত পড়ছে যে গো !

কই রক্ত পড়ছে ? টিপে ধরে আছি দেখছ না ?

ধনঞ্জয় জল আর ন্যাকড়া আনিতে যায়, পায়ের পাতার ফুটা টিপিয়া ধরিয়া রাখিয়া যশোদা চাহিয়া থাকে উনুনের ভগ্নস্থূপের দিকে। একদিন দুবেলা এই উনুনে বিশ-পঁচিশজনের রান্না করিত যশোদা, কুলিমজুরের মোটা ভাত, যশোদা যাদের আপন করিতে গিয়াছিল। আজ তারা সকলেই তাকে তাগ করিয়াছে, বাড়িতে তার মানুষ নাই। পরের বাড়ির একটা মেয়েকে চুবি করিয়া ভাইটা পর্যন্ত তার কোথায় উধাও হইয়া গিয়াছে।

এদিকে ধনঞ্জয় চেষ্টামেচি আরম্ভ করে, ও চাঁদের মা, ন্যাকড়া যে পাচ্ছি না ?

ছোটো টিনের তোরঙ্গো ছেঁড়াকাপড় আছে একটা, সেইটে নিয়ে এসো।

নির্দেশ দিয়া বলিয়া যশোদা চুপ করিয়া বসিয়া থাকে। টিনের তোরঙ্গটি যে চাবিবন্ধ আছে, ধনঞ্জয় খুলিতে পারিবে না, এ কথা তার মনে আছে। তবু সে আর সাড়াশব্দ দেয় না, পায়ের ক্ষত হইতে আঙুলের ছিপি খুলিয়া রক্তপাতের পথটাও মুক্ত করিয়া দেয়। এ একটা সাময়িক মানসিক বিলাস ভাঙা-মনের। নিজেকে আঘাত করিতেও সময় বিশেষে মানুষের বড়ো ভালো লাগে, নিজের লাল রক্তের অপচয়ও ভালো লাগে।

কয়েকবার ডাকাডাকি করিয়া ধনঞ্জয়ও চুপ করিয়া যায়, খানিক পরে জলের ঘটি আর ছেঁড়া কাপড় হাতে করিয়া আসিয়া যশোদার কাণ্ড দেখিয়া আবার ব্যাকুল হইয়া পড়ে।

টিপে ধরো, টিপে ধরো, শিগগির টিপে ধরো।

যশোদা কন্ঠগভাবে একটু হাসিয়া বলে, কী করে খুললে বাস্কে ?

টেনে খুলেছি।

তার মানে বাস্কোর তালটি ভেঙেছে আমার। ধন্য তুমি।

পায়ে একটা লোহার শিক বিধিয়া যাওয়া বাধা হিসাবে গণ্য করিবার মতো গুবুতর ব্যাপাব কিছু নয়। বাড়ি ছাড়িয়া যাওয়ার আর সব ব্যবস্থাই যখন হইয়া গিয়াছে, বাড়িটা বিক্রয় করিতে পর্যন্ত বাকি আছে, কেবল হাতে টাকটা পাইয়া দলিল রেজিস্ট্রি করা, ভারী ভারী জিনিসপত্র প্রায় সমস্তই পাঠাইয়া দেওয়া হইয়াছে শহরের অপর প্রান্তের আরেক শহরতলির ভাড়াটে বাড়িতে, রঙনা হওয়ার আয়োজন শেষ, শূণ্ড বাকি আছে গাড়ি ডাকিয়া বাকি জিনিসপত্র নিয়া গাড়িতে উঠিয়া বসার, তখন পায়ে শিক বেঁধাকে উপলক্ষ করিয়া হঠাৎ বাকিয়া বসার কোনো অর্থ হয় না। যে সব কারণে যশোদা এ বাড়ি ছাড়িয়া এদিকের শহরতলি ছাড়িয়া জন্মের মতো চলিয়া যাইতেছিল, পা একটু জখম হওয়ায় তার একটিও বাতিল হইয়া যায় নাই। তবু শেষ মুহূর্তে যশোদা ওই ছুতায় যাওয়াটাই বাতিল করিয়া দিল।

ধনঞ্জয় বলিল, এ পা নিয়ে যেতে তোমার কষ্ট হবে চাঁদের মা !

যশোদা চুপ করিয়া রহিল। তার এই গাভীর ধনঞ্জয়ের কাছে চিরদিন বড়ো অস্বস্তিকর। একটু ভয়ে ভয়ে যে বলিল, খুব ব্যথা করছে তো ?

যশোদা ফোঁস করিয়া উঠিল, কীসের ব্যথা ? আমার আবার ব্যথা-বেদনা কীসের শুনি ?

ধনঞ্জয় আরও দমিয়া গেল।—পায়ের কথা বলছি গো। তোমার ওই পায়ের কথা যাতে শিক বিধেছে। কম লেগেছে তোমার পায়ে !

না লাগেনি, একটুও লাগেনি। আমার আবার লাগালাগি কী ? মুখপোড়া ভগবান আমায় লোহা দিয়ে গড়েছে জান না ?

ধনঞ্জয় বলিল, গাড়ি ডাকি তবে ?

যশোদা বলিল, থাক।

আজ যাবে না ?

না।

ধনঞ্জয় খুশি হইয়া বলিল, আমিও তো তাই বলছি। তাড়াহুড়োর কী আছে ? পায়ের ব্যথাটা কমুক, দুদিন পরে গেলেও চলবে।

বলিতে বলিতে ধনঞ্জয়ের মুখে ম্যাজিকের মেঘের মতো বিষাদের ছায়া ঘনাইয়া আসিল। তোমার পা দুদিন পরে সেরে যাবে, আমার পা কিন্তু কোনোদিন ঠিক হবে না চাঁদের মা।

অনেকদিন যশোদা ধনঞ্জয়ের মুখে তার কাটা পায়ের জন্য নালিশ শোনে নাই, বিষাদের ছাপটা যদিও চোখে পড়িয়াছে সব সময়েই। হাঁটুর নীচেই ডান পা-টি ধনঞ্জয়ের শেষ হইয়া গিয়াছে, যা শূকাইয়া খানিকটা মসৃণ হইয়াছে, বাকিটা হইয়া আছে এবড়ো-খেবড়ো। দেখিলে যশোদার এখনও বেদনা আর বিতৃষ্ণা মেশানো একটা অদ্ভুত অনুভূতি হয়, কতকটা প্রিয়জনের মৃতদের দেখিয়া বিব্রত হওয়ার মতো।

আমারও ডান পা-টা জখম হয়েছে, দেখেছ ?

এতক্ষণ খেয়াল হয় নাই, এবাব খেয়াল করিয়া এই অত্যাশ্চর্য যোগাযোগে ধনঞ্জয়ের বিস্ময়ের সীমা থাকে না।

হয়তো আমার পা-টাও তোমাব মতো কেটে বাদ দিতে হবে।

না না, তা কী হয়, কী যে বলো তুমি চাঁদের মা !

হতে পারে তো ? পা-টা যদি পেকে ফুলে ওঠে, তারপর পচে গলে যায়, তারপর ডাক্তার কবাত দিয়ে কেটে তোমার পায়ের মতো করে দেয়, বেশ হয় তা হলে, না ?

কথা শুনিলে আর কথা বলিবার ভঙ্গি দেখিলে মনে হয় যশোদার মনে বুঝি ঘোরতর বিকার আসিয়াছে। পায়ের পাতায় তার যেভাবে আঘাত লাগিয়াছে তাতে পা-টি পাকিয়া ফুলিয়া উঠিতে অবশ্য পাবে এবং শেষ পর্যন্ত কাটিয়া পায়ের খানিকটা বাদ দেওয়ার প্রয়োজন হওয়াও আশ্চর্য নয়, সামান্য আঁচড় লাগিয়াও সময় সময় ও রকম হয়। কিন্তু সেটা যে বেশ হয়, ধনঞ্জয়ের সঙ্গে তারও অঙ্গপ্রত্যঙ্গের একটা সামঞ্জস্য ঘটিবে শুধু এই জন্যই, এ রকম ছেলেমানুষি কথা যশোদার মুখে মানায় না। কথাটা সে বলে রীতিমতো আবেগের সঙ্গে, যেটা তার পক্ষে আরও বেশি অস্বাভাবিক, সেই জন্য মনে হয় সে যেন তামাশা করিতেছে।

ধনঞ্জয় খানিকক্ষণ স্তব্ধ হইয়া থাকে।

আমার সঙ্গে তামাশা করছ চাঁদের মা ?

শুনিয়া সঙ্গে সঙ্গে শান্ত ও গভীর হইয়া যশোদা বলে, না, তামাশা করিনি। মনটা ভালো নেই কিনা, তাই কী বলতে কী বলেছি। বাড়িভরা লোক ছিল আমার, তুমি ছাড়া আজ কেউ নেই, কী অদেপ্ত বলো তো আমার ?

চোখ দিয়া জল গড়াইয়া পড়ে যশোদার, আর বিশ্বলের মতো তাই দেখিতে থাকে ধনঞ্জয়। যশোদার মুখ সে গভীর হইতে দেখিয়াছে, সহানুভূতিতে কোমল হইতেও দেখিয়াছে, কিন্তু সে মুখে বিষণ্ণতা কী কোনোদিন নজরে পড়িয়াছিল তার ? যশোদা যে কাঁদিতে পারে, আর দশজন সাধারণ

স্বীলোকের মতো দুঃখে জল আসিতে পারে তারও চোখে, কেবল ধনঞ্জয় নয়, যশোদাকে যারা চেনে তাদের প্রায় সকলের পক্ষেই এটা কল্পনা করাও কঠিন ছিল।

শূন্য বাড়িতে শূন্য ঘরে খালি তক্তপোশের দুই প্রান্তে দুজনে বসিয়াছিল। তক্তপোশের বিছানাপত্র গুটাইয়া বাঁধিয়া ফেলা হইয়াছে। ঘরের জিনিসপত্র যশোদা পা জখম হওয়ার আগেই রোয়াকে টানিয়া নিয়া গিয়াছে। ধনঞ্জয় সরিয়া সরিয়া যশোদার গা ঘেঁষিয়া আসিয়া বসিল, কৌচার খুঁট দিয়া যশোদার চোখ মুছাইয়া দিল। যশোদার চোখ দিয়া জল পড়া যেমন আশ্চর্য ব্যাপার, ধনঞ্জয়ের কাণ্ডটা তার চেয়ে কম নয়। অন্য সময় এত সাহস ধনঞ্জয়ের হইত না।

মানুষটাকে ঠেলিয়া সরাইয়া দেওয়ার বদলে যশোদা তার হাত নামাইয়া ধরিয়া রাখিল, বলিল, হয়েছে। কচি খুকি না কি আমি, আদর করে কান্না থামাচ্ছ ?

ধনঞ্জয়ের জন্যই এবার যশোদার মন আরও খারাপ হইয়া যায়। বড়ো আত্মগ্লানি সে বোধ করে। নিজের উপর রাগ ধরিয়া যায়। ধনঞ্জয় ছেলেমানুষ—বয়সে না হোক মনের দিক দিয়া সতাই বড়ো ছেলেমানুষ। অতি তুচ্ছ একটু সাধারণ অন্তরঙ্গতাই যে মানুষটাকে খুশিতে গদগদ করিয়া দেয়, হাতে খেলনা পাওয়া শিশুর মতো, অনেকবার সে তার প্রমাণ পাইয়াছে। কতবার সে ভাবিয়া রাখিয়াছে, লোকটার সঙ্গে কথায় ব্যবহাবে একটু দুবড় বজায় রাখিয়া চলিতে হইবে। কোনোমতেই তো কথাটা সে মনে রাখিতে পারে না। সকলে তাকে ত্যাগ করিয়াছে শুধু ধনঞ্জয় ত্যাগ করে নাই, এই ভাবটাই শুধু মনে থাকিয়া যায়। তাকে ত্যাগ করার কারণ যে ধনঞ্জয়ের নাই, উপায়ও নাই, এটা যেন খেয়ালও থাকে না !

বেলা অনেক হইয়াছে, কিন্তু এখনও যশোদার উঠানে ভালো করিয়া রোদ আসে নাই। পূবে একটি নূতন তিনতলা বাড়ি উঠিয়াছে, যশোদার বাড়িটি পড়িয়া গিয়াছে আড়ালে। নূতন বাস্তাটির সোহাগে চারিদিকের বাড়ি যেন মাথা তুলিতেছে বর্ষাকালের আগাছার মতো। কতটুকু সময়ের মধ্যেই প্রকাণ্ড এক-একটা বাড়ি যে সম্পূর্ণ হইতেছে ! কোনো কাজেই মানুষের যেন আজকাল আর সময় লাগে না—শহরের মানুষের। নূতন যুগের নূতন মস্ত্রে ম্যাজিকের মতো কাজ হইয়া যায়।

ঘরের মধ্যে যশোদার শীত করিতেছিল আর তাকে পীড়ন করিতেছিল ঘরের রিক্ত নগ্নতা। মেঝেতে ছড়ানো পড়িয়া আছে জঞ্জাল, এক টুকরা ছেঁড়া কাগজ যশোদা ঘরে জন্মিতে দিত না, যা কিছু অকেজো, যা কিছু পরিত্যাজ্য সব যশোদা চিরদিন নির্বিকার চিন্তে ফেলিয়া দিয়াছে,—যদি কাজে লাগে ভাবিয়া ঘরের জঞ্জাল সঞ্চয় করার মতো ভীру সে কোনোদিন ছিল না। তবু, দুঃসাহসীর মনের গোপন ভীরুতার মতো এত জঞ্জাল যে ঘরের মধ্যে কোথায় লুকাইয়া ছিল !

শূন্য দেয়ালে শুধু নানারকম দাগ আর একটি পুরানো বাংলা দেয়ালপঞ্জি,—জীবনবিমা কোম্পানির বিজ্ঞাপন। দেয়ালপঞ্জির ছবিটিতে এক জোড়া নারী ও পুরুষ ও তাদের গড়াখানেক ছেলেমেয়ের দেহে স্বাস্থ্য আর মুখে আনন্দের হাসি যেন ধরিতেছে না। প্রথমে ছবিটা দেখিলেই যশোদার রাগ হইত, মনে হইত রেশারেশি করিয়া বিজ্ঞাপন দিয়া দিয়াই মানুষ আজকাল মিথ্যাকে ফেনাইয়া ফাঁপাইয়া তুলিতেছে, সর্বত্র ছড়াইয়া দিতেছে।

অনেক বিষয়ের মতো এ বিষয়েও যশোদার একটি নিজস্ব মতামত আছে। বৈজ্ঞানিক গবেষণা আর বিশ্লেষণ অবশ্য যশোদার মতামতের পিছনে নাই, পাণ্ডিত্যের ফেনা সঞ্চয় করিবার সুযোগও তার ঘটে নাই, মুখে ফেনা তুলিয়া জাবরও সে কাটে না, কাজে লাগায় শুধু নিজের উপলব্ধি ও সাধারণ বুদ্ধিকে। প্রচারের আশ্রয়ে মিথ্যা যে পুষ্ট হয় এ কথা বুঝিতে যশোদার গভীরভাবে ভাবিবার দরকার হয় নাই। তারপর ধীরে ধীরে চোখে সহিয়া আসিলে ছবিটির বিজ্ঞাপনের ছাপ যশোদার কাছে

মুছিয়া গিয়াছে, জীবনবিমা কোম্পানির দেয়ালপঞ্জির ছবি তার কাছে হইয়া দাঁড়াইয়াছে অজানা শিল্পীর আঁকা একটি অবাস্তব মধুর কল্পনা।

আগে ঘরদোর ভালো করে সাফ করিয়ে তারপর জিনিসপত্র ঘরে ঢোকাব, কেমন ?
ধনঞ্জয় সায় দিয়া বলিল, সেই ভালো। কাকে দিয়ে সাফ कराবে, তুমি তো পারবে না ?
কেন পারবে না ? কী হয়েছে আমাব ?

না না, তুমি আজ আর উঠো না চাঁদের মা। বিছানাটা এনে পেতে দি, শূয়ে থাকো।

শুইয়া থাকার প্রস্তাবে যশোদা উঠিয়া দাঁড়াইল এক পায়ে ভর দিয়া। একটু হাসিয়া বলিল, এখানে শীত করছে, রোদে বসি গে চলো বাইরে।

উঠানের একপাশে একটু রোদ আসিয়াছিল, সেইখানে একটা ভাঙা তক্তায় বসিয়াই যশোদা হঠাৎ জিজ্ঞাসা কবিল, আচ্ছা, নন্দের তো জেল হবে ?

এতবড়ো গুব্বতর বিষয়ে মত জিজ্ঞাসা কবায় খুশি হইয়া ধনঞ্জয় বলিল, মেয়েটির বাড়ির লোক যদি গোলমাল করে—

দিন চারেক আগে সুবর্ণ আর নন্দ উধাও হইয়া গিয়াছে, সুবর্ণের বাড়ির লোকেরা কী করিয়াছে যশোদা কিছুই জানে না। জ্যোতির্ময় একবার আসিয়া জিজ্ঞাসাও করে নাই, তার বোনটিকে সঙ্গে করিয়া যশোদার ভাই কোথায় গিয়াছে, এ খবরটা কি সে বাখে ? হয়তো জ্যোতির্ময় পুলিশে খবর দিয়াছে, হয়তো চারিদিকে খোঁজ করাইতেছে, দুজনের সন্ধান পাইলেই নন্দকে জেলে পাঠাইয়া ছাড়িবে। সুবর্ণের সম্বন্ধে কী ব্যবস্থা করিবে সেই জানে। হয়তো দূরে কোনো আত্মীয়ের কাছে পাঠাইয়া দিবে, হয়তো কোনো বোর্ডিংয়ে রাখিয়া লেখাপড়া শিখাইবে, হয়তো মেয়েব এই কীর্তিকথা গোপন করিয়া চুপিচুপি কারও সঙ্গে বিবাহ দিবে—তাবপর যা হবাব হোক।

এ সব কথাই যশোদা আজ কদিন ধরিয়া ভাবিতেছে। নিজেকে সে অনেকবার বলিয়াছে যে, নন্দ জেলে যাক, চুলোয় যাক, যমালয়ে যাক তাব কিছু আসিয়া যায় না। ও নচ্ছারটাব সঙ্গে আব তার কোনো সম্পর্কই নাই। তবু মাঝে মাঝে যশোদার মনে প্রশ্ন জাগিয়াছে, একা নন্দই কি দোষী ? এই কেলেঙ্কারির জন্য সুবর্ণের কি কোনো দোষ নাই ? সুবর্ণ ছেলেমানুষ কিন্তু অমন ভাবপ্রবণ, ফাজিল আর পাকা মেয়েকে ভুলাইয়া চুপ করিয়া পালানোর সাহস কি নন্দের হওয়া সম্ভব ? কাঁচপোকাকার আরশোলোকে টানিয়া নিয়া যাওয়ার মতো সুবর্ণই নন্দকে টানিয়া নিয়া গিয়াছে, দোষটা চাপিল একা নন্দের ঘাড়ে।

ফিরিয়া আসিলে দুজনের বিবাহ দিয়া দেওয়া যায় না ? জ্যোতির্ময়ের কাছে গিয়া কথাটা আগে হইতে আলোচনা করিয়া আসিলে হয়তো সে ভাবিয়া চিন্তিয়া রাজি হইয়া যাইতেও পাবে। এ বিবাহ অবশ্য সুখের হইবে না, কিন্তু এই কুৎসিত ব্যাপারের জের টানিয়া চলার চেয়ে সে সুখের অভাবও অনেক ভালো।

কিন্তু বিয়ে কি হবে ?

ধনঞ্জয় চমকাইয়া উঠিল।—বিয়ে ? কার বিয়ে ?

ধনঞ্জয়ের সেই চমক দেখিয়া, চমকের মানে বুঝিয়া, যশোদার মনের মেঘ ফাঁক হইয়া কোথা হইতে যেন খানিকটা সোনালি রোদ আসিয়া পড়িল।

ধনঞ্জয়ের হাঁটুতে টোকা দিয়া একটু হাসিয়া সে বলিল, কেন, তোমার বিয়ে ? আমাব সঙ্গে ?

এ বেলা যশোদা আর রান্নার ব্যবস্থা করিল না। একটু খোঁড়াইতে খোঁড়াইতে গিয়া দুজন লোক ডাকিয়া আনিয়া, নিজেও কোমরে আঁচল জড়াইয়া ঘরদুয়ার ধোয়ামোছা আরম্ভ করিয়া দিল। বেলা তিনটার সময় দইচিড়ার ফলাবে পেট ভরাইয়া মাটি ছানিয়া রান্নাঘরে তৈরি করিতে বসিল ছোটোখাটো একটি উনুন।

সব কাজে সাহায্য করিতে গিয়া ধনঞ্জয় সারাদিন আজ যশোদার বকুনি শুনিয়াছে, উনুন তৈরি করিতে দেখিয়া সে অবাক হইয়া বলিল, দু-চারদিনের জন্য আবার উনুন পাতছো কেন ?

ইটের উপর আড়াআড়িভাবে শিক বসাইতে বসাইতে যশোদা বলিল, দু-চারদিন কে বললে ? থাকতে হলে রেঁধেবেড়ে খেতে হবে তো ? না, ফলার করব রোজ ?

কদিন থাকবে ?

চিরদিন।

এখান থেকে যাবে না ?

কেন যাব ?

বাড়ি বেচবে না ?

কেন বেচব ?

ও বাড়িতে যে মালপত্র গেছে ?

আনিয়ে নেব। ও বেলা কেদারকে বললেই হবে। তিনটে গোরুর গাড়িতে মাল গেছে, একেবাবে একটা লরিতে মাল ফেরত আসবে।

ধনঞ্জয় ব্যাপারটা ঠিক বুঝিয়া উঠিতে পারে না। যশোদার খেয়ালের আদি-অন্ত পাওয়া ভার। বাড়ি ছাড়িয়া যাওয়া হইবে না শুনিয়া মুখখানা তার বিমর্ষ হইয়া যায়। নন্দ চলিয়া যাওয়ার পর এ বাড়িতে কেবল সে আর যশোদা কদিন বাস করিতেছে। প্রথম রাত্রে নন্দ ফিরিবে কী ফিরিবে না এ কথা কারও জানা ছিল না, কোনো কারণে ফিরিতে তার দেরি হইতেছে ভাবিয়া যে যার ঘরে গিয়া শইয়া পড়িয়াছিল, নিশ্চিত মনে প্রতিদিনের মতো ঘুমও আসিয়াছিল দুজনের। পরদিন যশোদার সেই আর শত্রু কুমুদিনী আসিয়া বলিয়াছিল, আমি থাকব ভাই তোর কাছে রাত্রে ?

যশোদা রাজি হয় নাই। ধনঞ্জয়ের সঙ্গে একা এক বাড়িতে রাত কাটানোর ভয়াবহ পরিণামের কথা বারবার মনে পড়াইয়া দিয়া কুমুদিনী যশোদাকে কাবু করিতে চাহিয়াছিল, যশোদা হাসিমুখে বলিয়াছিল, আমার সুনাম দুর্নামে কার কী আসবে যাবে বল, কে আছে আমার ? দুর্নাম হতে বাকিই বা কী আছে বল ? আমার ভাই মন্দ, আমিই বা মন্দ নই কীসে ?

শেষ পর্যন্ত রাগ করিয়া গালাগালি আর অভিশাপ দিতে দিতে কুমুদিনী চলিয়া গিয়াছিল।

অনেক ভাবিয়া উদ্ভ্রান্তের মতো কল্পনারাজ্যে অনেকক্ষণ বিচরণ করিয়া সেদিন সন্ধ্যার পর ধনঞ্জয় ভয়ে ভয়ে জিজ্ঞাসা করিয়াছিল, আমি তোমার ঘরে শোব যশোদা ? তোমার হয়তো ভয় করবে ?

ভয় করবে ?—যশোদা অবাক হইয়া গিয়াছিল, আমার ভয় করবে একা এক ঘরে শুতে ! গোটা বাড়িটাতেই আমি যে আজ একা থাকব গো ?

ধনঞ্জয় আর কথা বলিতে পারে নাই। যশোদাকে বুঝা যায় না, যশোদার খেয়ালের অন্ত পাওয়া যায় না।

যশোদা আবার বলিয়াছিল, তুমি শোবে সইয়ের বাড়িতে, পুবের ঘরে।

এই বাড়িতে যশোদার সঙ্গে রাত্রিযাপনের মধ্যে ধনঞ্জয় হয়তো অনেক কিছু রোমাঞ্চকর সম্ভাবনা আবিষ্কার করিতেছিল, কুমুদিনীর বাড়িতে তাকে রাত্রে থাকিতে হইবে শুনিয়া সে মুষড়াইয়া গেল।

সন্ধ্যার পর রাজেন আসিল। লরিতে চাপাইয়া রাতারাতি মালপত্র ফিরাইয়া আনিবার অনুরোধে সে একটু হাসিল।

রাস্তিরে হাঙ্গামা করবার দরকার কী ঠাঁদের মা ? আমি গিয়ে রাস্তিরটা থাকছি সেখানে, ভোর ভোর মালপত্র নিয়ে বেরিয়ে পড়ব ?

কেন, সেখান রাত কাটাবার তোমার দবকার ? হরনাম সিংকে বলো গে আমার নাম করে গাড়ি আর লোকজন নিয়ে গিয়ে সেই সব ব্যবস্থা করে দেবে, তুমি শুধু সঙ্গে থাকবে। সকালে ওর গাড়ি পাওয়া যাবে না।

কী বকশিশ দেবে আমাকে ?

রাস্তিরে আমাঘ পাহারা দিয়ে।

রাজেন হাসিমুখে চলিয়া গেল। চিরদিন হাসিমুখেই রাজেন তার কাজ করিয়া দেয়,— কুমুদিনীকে ফাঁকি দিয়া। যশোদার সঙ্গে রাজেন বেশি মেলামেশা করিবে কুমুদিনী এটা পছন্দ করে না, দুজনকে কথা বলিতে দেখিলে সে বাগিয়া আগুন হইয়া যায়, দু-তিনদিনের জন্য যশোদাকে একেবারে ত্যাগ কবে। তারপব নিজেই আবার ভাব করিতে আসে। তীক্ষ্ণ কথা আদান-প্রদানের ভাব। দিনান্তে একবার যশোদা কাছে না আসিলে আর খানিকক্ষণ ঝগড়া করিয়া না গেলে কুমুদিনীর ভালো লাগে না, সারারাত মেজাজ তার এমন গবম হইয়া থাকে যে রাজেনের দুর্ভোগের সীমা থাকে না।

রাজেন বাহির হইয়া যাওয়া মাত্র ধনঞ্জয় ফৌস করিয়া উঠিল, ওকে থাকতে বললে যে তোমার কাছে ?

লঠনের আলোঘ ধনঞ্জয়েব মুখ দেখিয়া যশোদা বাগ কবার বদলে শাস্তভাবেই বলিল, মাথা খারাপ না কি তোমার ? তামাশা বোঝ না ?

ধনঞ্জয় অব্বা শিশুর মতো আবদার করিয়া বলিল, ও রকম তামাশা আর কোরো না, বুঝলে ? বড়ো খারাপ লাগে শুনলে।

যশোদা কথা বলিল না। ধনঞ্জয়ের কথা শুনিয়া তারও খারাপ লাগিতেছিল।

দুই

যশোদা বাড়ি বেচিবে না শুনিয়া সবচেয়ে বেশি গোলমাল করিল কুমুদিনী।

একা এক বাড়িতে থাকার জন্য বটে, বাড়ি বিক্রি করিতে অস্বীকার কবার জন্যও বটে। প্রথম কারণটা নিয়া সকালবেলা ঘন্টা দুই ঝগড়া করিয়া ফুঁসিতে ফুঁসিতে বেচারি সবে বাড়ি গিয়া রান্না চাপাইয়াছে, অন্য ব্যাপারটা কানে আসিল। হাঁড়ি নামাইয়া আবার সে ছুটিয়া আসে যশোদার কাছে।

এটা কী শুনছি চাঁদের মা সই ? বাড়ি নাকি তুই বেচবি না ?

যশোদা উনানে হাঁড়ি চাপাইতেছিল, সংক্ষেপে জানাইল, উঁ হুঁ।

কেন শুনি ? তোর একার জন্য সবাই মবব আমরা ? আমরা তোর কী করেছি, নিজের ক্ষতি করেও আমাদের সন্ধানাশ করবি ? তুই কি পাগল নাকি চাঁদের মা সই, মাথা কি তোর খারাপ ? মাথা নয়। কপাল খারাপ।

আরও চটিয়া কত কথাই যে কুমুদিনী বলিয়া যায়। যশোদা বেশির ভাগ সময় চুপচাপ শুনিয়া যায়, মাঝে মাঝে দু-একটা মন্তব্য করে। এইমাত্র ঝাড়া দু-ঘন্টা ঝগড়া করিয়া গিয়া কুমুদিনী বোধ হয় একটু শান্ত হইয়া পড়িয়াছিল, প্রথম দিকে ক-ঝগলি তার তেমন ঝাঝালো হয় না। তারপর ক্রমে ক্রমে মেজাজ চড়িতে থাকায় সে যশোদার চোন্দোপুরুষ উদ্ধার করিতে আরম্ভ করে। মনে হয়, এতকাল শুধু যশোদার দোষের অফুরন্ত তালিকা মুখস্থ করিয়া সে দিন কাটাইয়াছে, যশোদার মতো খারাপ মেয়েমানুষ যে জগতে আর দুটি নাই এ কথাটা প্রমাণ না করিয়া সে ছাড়িবে না।

শেষে যশোদা বলে, এদিকে তুই তো আলাপ করছিস আমার সঙ্গে, আরেক জন যে না খেয়ে কাজে গেল ?

যাক। আরেক জনের জন্য তোর অত দরদ কেন শূনি ?

পিরিতের মানুষটার জন্য দরদ হবে না ?

কুমুদিনী মুখ বাঁকাইয়া বলে, তা তামাশা আর করছে কেন ? পিরিত যে তোমাদের ঢের দিন থেকে চলছে, তা কী আর জানিনে আমি।

যশোদা হাসিয়া বলে, কত গভা লোকের সঙ্গে যে তুই আমার পিরিত ঘটিয়ে দিলি ভাই ! কিন্তু আমার এমনি পোড়াকপাল—

কুমুদিনী ফোঁস করিয়া একটা অতি কুৎসিত মন্তব্য করিয়া নিজেই একটু থতোমতো খাইয়া যায়—কথাটা তার নিজের কানেই বীভৎস শোনায়। এতক্ষণ চটে নাই কিন্তু এবার যশোদা চটিয়া উঠিবে ভাবিয়া কুমুদিনীর একটু ভয়ও বুঝি হয়। চিরদিন সে যশোদাকে ভয় করিয়া আসিয়াছে। রাগ না করিয়া যতক্ষণ যশোদা আমল দেয় ততক্ষণই সে ঝগড়া করে, যশোদা রাগ করিলেই তার কান্না শুরু হইয়া যায়। তাড়াতাড়ি সামলাইয়া নরম গলায় সে অন্য কথা জিজ্ঞাসা করে, আচ্ছা, কেন বাড়ি বেচবি না বলতে তো দোষ নেই ভাই চাঁদের মা সই ?

কুমুদিনীর অকথা মন্তব্যে যশোদা রাগ করিয়াছে কিনা বোঝা যায় না, কেবল মুখখানা তার একটু গম্ভীর দেখায়। একটু ভাবিয়া সে বলে, না, বলতে আর দোষ কী ? সত্যপ্রিয় কিনে নিচ্ছে তো ঘরবাড়ি—ওকে আমি বেচব না, লাখ টাকা দিলেও নয়।

সত্যপ্রিয়বাবু তো কিনছে না ? একটা কোম্পানি থেকে কিনছে।

ওটা সত্যপ্রিয়র কোম্পানি। লোকটা আমার ঘর ভেঙেছে, আমার বদনাম রটিয়েছে, ওকে আমি বাড়িঘর বেচব ? সবাই কত ভালোবাসত আমায়, এখন একজন আসে দেখিস আমার কাছে ? কত করেছি ওদের জন্যে আমি, আজ ওরা আমায় বলছে সত্যপ্রিয়র লোক, টাকা খেয়ে ওদের বন্ধু সেজে ওদের সর্বনাশ করছি ?

এ ভাবে কোনো বিষয়ে নালিশ করা, অভিমানে এ ভাবে বিচলিত হওয়া যশোদার স্বভাব নয়। বন্ধুবৃন্দী শত্রু বলিয়া কুলিমজুরেরা ত্যাগ করিয়াছে বলিয়া মনটা কী যশোদাষ এত নরম হইয়া গিয়াছে ?

কুমুদিনী একটু ভাবিয়া বলে, তা একদিক দিয়ে তো ভালোই হয়েছে ভাই চাঁদের মা সই ? কতকগুলি কুলিমজুরদের পাল্লায় পড়ে যন্ত্রণা পাচ্ছিলে, বেঁচে গেছ। এখন অন্য ভাড়াটে রাখ বাড়িতে,—না না, ভাড়াটে রাখবে কী করে, বাড়ি তো তুমি বেচে দিচ্ছ। বলিয়া কুমুদিনী একগাল হাসিল।

কিন্তু যশোদার জীবন সে অতিষ্ঠ করিয়া তুলিল। যখন তখন যশোদার কাছে ছুটিয়া আসে, মত বদলানোর জন্য ঝগড়া করে, অভিশাপ দেয় আর মিনতি করে, মাঝে মাঝে ধনঞ্জয়কে পর্যন্ত মধ্যস্থ মানে।

ধনঞ্জয় দ্বিধাভরে বলে, আমি তো বলছি প্রথম থেকে কিন্তু—

যশোদা বলে, কী মুশকিল, তোমরা বেচ না তোমাদের ঘরবাড়ি। আমার সঙ্গে তোমাদের সম্পর্ক কী ? আমায় নিয়ে টানটানি করছ কেন ?

যশোদার বাড়ি বেচার সঙ্গে তাদের স্বার্থের সম্পর্ক কোথায়, কেবল কুমুদিনী নয় পাড়ার সকলেই অনেকেবার কথাটা তাকে বুঝাইবার চেষ্টা করিয়াছে। কিন্তু যশোদা স্বীকার করে না। সে বলে, সব সত্যপ্রিয়ের চাল। সকলে চূপ করিয়া বসিয়া থাকুক, অন্য ক্রেতা আসুক, যশোদার বাড়িসুদ্ধ কিনিতে পাইলে যে দর সত্যপ্রিয় দিবে বলিয়াছে তার চেয়ে বেশি দর দিয়া তখন কিনিয়া নিবে, যার খুশি বেচিবে না, সত্যপ্রিয় কথাটি বলিবে না।

জমির দর চড়ছে দেখছ না দিন দিন ? বেচবার জন্য ব্যস্ত হচ্ছ কেন ?

রাজেনও যশোদার কথায় সায় দেয়—চিরদিন দিয়া আসিতেছে। তবে কুমুদিনীকে জানাইয়া নয়। কুমুদিনীর কাছে সে যশোদার কথার জোরালো প্রতিবাদই করে।

তারপর একদিন দেখা যায়, যশোদার কথাই ঠিক। পেনশনভোগী এক ভদ্রলোক রাজেনের বাড়ির পাশে উমেশ তরফদারের বাড়িটা এবং ওই ভদ্রলোকেরই এক বন্ধু কানাই নন্দীও এগারো কাঠা ফাঁকা জমিটুকু কিনিতে রাজি হইয়া গেল—যশোদা বাড়ি বেচিলে সত্যপ্রিয়ের কোম্পানি যে দর দিবে বলিয়াছিল সেই দরে। কিন্তু পেনশনভোগী ভদ্রলোক ও তার বন্ধুর আর এখানে বাড়ি বা জমি কেনা হইল না। কোম্পানির লোক আসিয়া সকলকে জানাইয়া দিল, যশোদা যে শত্রুতা করিয়া নিজের বাড়িটা আটকাইয়া রাখিতেছে এটা স্পষ্টই বুঝা যাইতেছে। একজনের শয়তানিতে সকলে মারা পড়িবে কোম্পানি সহ্য করিবে না। যে বেচিতে চায় তার বাড়ি আর জমিই কোম্পানি কিনিয়া নিবে। যে বেচিবে না তার সঙ্গে বুঝাপড়া হইবে পরে।

শুনিয়া যশোদা বলিল, বুঝাপড়া ? আবার কী বুঝাপড়া করবে ওরা ? বুঝাপড়ার দেখছি শেষ নাই ওদের ?

বিনা শর্তে সকলের বাড়ি ও জমি সত্যপ্রিয়ই কিনিয়া নিল। বেচিল না কেবল কুমুদিনী।

এতকাল কয়েক হাজার কাঁচা টাকা হাতে পাওয়ার স্বপ্ন দেখিয়া, যশোদার সঙ্গে প্রতিদিন ঝগড়া করিয়া, শেষ মুহূর্তে সে ব্যিকিয়া বসিল। কৈফিয়ত দিল এই : আরও দাম চড়ুক, তখন বেচব।

তারপর কয়েকদিন কুমুদিনী আর যশোদার কাছে আসে না। রাজেনের কাছে খবর পাইয়া যশোদা অন্তর্ভুক্তি তাকে দেখিতে গেল। কুমুদিনীর সাত বছরের ছেলেটাকে এক হাতে ধরিয়া কাঁধে তুলিয়া বলিল, কী হল ভাই কুমুদিনী সই, বাড়ি যে বেচলে না ?

তুই যে বেচিলি না ? দাম চড়লে তুই যখন বেচবি, আমিও তখন বেচব।

তবে আর তুই বেচেছিস।

অনেকদিন পরে আজ যশোদার বড়ো আমোদ ও আনন্দ বোধ হয়। মানুষকে মানুষ ভালোবাসে বইকী। সকলে না হোক, নাটকীয় ভালোবাসা না হোক, দু-চারজন সতাই ভালোবাসে। কুমুদিনীর অন্তর্ভুক্তি কটুকথায় তার যে একটুও রাগ হয় না, কুমুদিনীকে সে ভালোবাসে বলিয়াই তো ? তাকে ফেলিয়া একা একা কুমুদিনী যে বাড়িঘর বেচিয়া অন্যত্র চলিয়া যাইতে পারে না, কুমুদিনী তাকে ভালোবাসে বলিয়াই তো ?

তার বেশি আর কী চাই মানুষের ?

কুমুদিনীর ঘরভরা ছেলেমেয়েদের কলরব শুনিতে শুনিতে যশোদার বিরাট দেহটি অবসন্ন হইয়া আসে। কারণটা বুঝিতে না পারিয়া সে একটু আশ্চর্য হইয়া যায়। সে তো জানে না মনের মধ্যে গভীর অশান্তির গুরুভার বহিয়া বেড়াইতে বেড়াইতে হঠাৎ মুক্তি পাইলে শুধু মন নয় শরীরটাও মানুষের আশ্চর্যরকম হালকা মনে হয়, শান্তি যেন আসে ঘুমের ছদ্মবেশে। ঘুমের মতোই হয়তো অস্থায়ী, তবু এখন যশোদার মনে যে শান্তি আসিয়াছে তার তুলনা হয় না।

ইংরাজি নববর্ষ শুরু হয় শীতকালে। রাজেন পরামর্শ দিল, ইংরাজি নববর্ষের প্রথম দিন আবার হোটেল খুলিলে কেমন হয় ? কারখানার কুলিমজুরদের জন্য না হোক, কারখানার বাহিরে যারা মাথার ঘাম পায়ে ফেলিয়া জীবিকা অর্জন করে তাদের জন্য ? যশোদারও তো জীবিকা অর্জন করিতে হইবে ! বিশেষত ধনঞ্জয়ের মতো বিরাটকায় একটি পোষা যখন তার জুটিয়াছে।

যশোদা বলিল, কিছুদিন যাক।

রাজেনও সায় দিয়া বলিল, আচ্ছা যাক কিছুদিন।

দিন যায়। নন্দ ও সুবর্ণের কোনো খবর আসে না। কোথায় কীভাবে ওরা দিন কাটাইতেছে কে জানে ! দিন ওদের চলিতেছেই বা কী করিয়া ? নন্দ কী রোজগারের কোনো উপায় করিতে পারিয়াছে ? সুবর্ণের গায়ের গহনা একটি একটি করিয়া স্যাকরার দোকানে যাইতেছে হয়তো ! নন্দর মতো ছেলে, দুদিন আগেও দিদি মুখে তুলিয়া না দিলে যে প্রায় খাইতেই জানিত না, একটা মেয়েকে চুরি করিয়া পালাইয়া এতকাল সে যে কেমন করিয়া ব্যাপারটার জের টানিয়া চলিতেছে, ভাবিলেও যশোদা অবাক হইয়া যায়।

মাঝে মাঝে নন্দর কীর্তন শুনিলে জন্য যশোদার জোরালো ইচ্ছা জাগে। কীর্তন করিলেই নন্দর শরীর খারাপ হয় বলিয়া নন্দর কীর্তন করা যশোদা আগে পছন্দ করিত না, যদিও কীর্তন শুনিতো শুনিতো সকলের মতো অনির্বচনীয় ভাবাবেগে সেও চিরদিন এক দুর্বোধ্য ব্যাকুলতা অনুভব করিয়াছে। এখন মাঝে মাঝে তার মনে হয়, নন্দ থাকিলে নিজেই নন্দকে গাইতে বলিয়া একদিন সে ভালো করিয়া তার কীর্তন শুনিত।

জ্যোতির্ময়ের সঙ্গে রাস্তায় একদিন যশোদার দেখা হইয়া গেল। একটি নূতন শ্রমিক-সমিতির সভায় যোগ দেওয়ার জন্য যশোদাকে এক রকম জোর করিয়া ধরিয়া নিয়া যাওয়া হইয়াছিল, যাওয়ার ইচ্ছা তার একেবারেই ছিল না। আবার শ্রমিকদের ব্যাপারে মাথা ঘামাইতে যাইবে, তার কি লজ্জা নাই ? পীড়াপীড়িতে শেষ পর্যন্ত তাকে যাইতে হইয়াছিল। সভায় গিয়াই সে টের পাইয়াছিল, তার অনুমানই ঠিক। সমিতিটি খাঁটি শ্রমিক-সমিতি নয়, একজন ভদ্রলোক নিজের স্বার্থের জন্য সমিতি গড়িবার চেষ্টা করিতেছেন।

সভা শেষ হওয়ার আগেই যশোদা চলিয়া আসিয়াছিল—বাঁচিয়া থাকিতেই যারা মরিয়া আছে তাদের ভালো করার নামে ব্যক্তিগত স্বার্থ-সাধনের এ সব চেষ্টা সে সহ্য করিতে পারে না।

ফিরিবার সময় তার বাড়ির গলি আর বড়ো রাস্তার মোড়ের কাছে প্রকাণ্ড তিনতলা নতুন বাড়িটার সামনে দুজনে মুখোমুখি হইয়া গেল। বড়ো বাড়িটার নীচের একটা অংশে চায়েব দোকান, জ্যোতির্ময় বোধ হয় চা খাইয়া ভিতর হইতে বাহির হইয়া আসিল। এত কাছেই বাড়ি জ্যোতির্ময়ের, দোকানে তার চা খাওয়ার কী প্রয়োজন হইয়াছে কে জানে ! বাড়িতে কি জ্যোতির্ময়ের যাইতে ইচ্ছা হয় না, যে বাড়িতে একদিন তার একটা বউ আর একটা বোন ছিল, যে বউটা মবিয়াছে হাসপাতালে আর যে বোনটাকে চুরি করিয়াছে যশোদার ভাই ?

কিছুদিন একটানা কঠিন অসুখে ভুগিলে যেমন হয় সে রকম নয়, জ্যোতির্ময় বড়ো রোগা হইয়া গিয়াছে। যশোদার সঙ্গে কথা না বলিয়াই সে চলিয়া যাইতেছিল, কী ভাবিয়া দাঁড়াইল।

কোনো খবর পাওনি, না ?

যশোদা মাথা নাড়িয়া বলিল, না।

জ্যোতির্ময় আনমনে কী যেন একটু ভাবিল। পথে মানুষ ও গাড়িঘোড়ার সংখ্যা এত বেশি বাড়িয়া গিয়াছে, পথের দুদিকের চেহারা এত বেশি বদলাইয়া গিয়াছে যে যশোদার মনে হয়, এ বুঝি তার বাড়ির কাছের সেই পথটি নয়, দূরে অন্য কোথাও আসিয়াছে।

খবর একটা পাওয়া যাবে চাঁদের মা, কী বল ?

তা পাওয়া যাবে বইকী। আজ হোক কাল হোক, নিজেরাই একটা খবর ওরা পাঠাবে।

তোমায় যদি আগে জানায়, আমাকে জানাবে তো সঙ্গে সঙ্গে ? আমায় খবর দিতে হয়তো ওদের ভয় হবে।

আপনাকে জানাবো বইকী। কিন্তু ওদের সম্বন্ধে আপনি কী করবেন।

প্রশ্ন শুনিয়াই জ্যোতির্ময় অসহিষ্ণু হইয়া উঠিল, সে সব পরে বিবেচনা করা যাবে চাঁদের মা। নিজের বোনকে তো আর ফাঁসি দেব না আমি ?

একটু চুপ করিয়া থাকিয়া অন্যমনে সে কী যেন ভাবিল। তারপর হঠাৎ বলিল, একটা কথা তোমায় জিজ্ঞাসা করি চাঁদের মা। নন্দ কোথাও বেড়াতে-টেড়াতে গেছে, এই কথা বলছে তো সবাইকে ?

যশোদা বলিল, হ্যাঁ, ওই ধরনের কথাই বলেছি। পাটনায় একটা চাকরি পেয়েছে। জ্ঞান হবার পর এই বোধ হয় প্রথম মিছে কথা বললাম জ্যোতিবাবু।

জ্যোতির্ময় খানিকক্ষণ যেন অবাক হইয়াই যশোদার মুখের দিকে চাহিয়া রহিল। তারপর কথা বলিল বড়ো খাপছাড়া।

বাহাদুরি কোরো না বেশি।

গটগট করিয়া সে চলিয়া গেল বাড়ির উলটা দিকে। গলিতে ঢুকিবার আগে মুখ ফিরাইয়া যশোদা দেখিতে পাইল, আবার সে ফিরিয়া আসিতেছে। আরও কিছু তার বলিবার আছে ভাবিয়া যশোদা একটু দাঁড়াইল, কিন্তু জ্যোতির্ময় তার দিকে চাহিয়াও দেখিল না, সোজা আগাইয়া চলিয়া গেল।

এক মুহূর্ত যশোদা অভিভূত হইয়া দাঁড়াইয়া রহিল। কী হইয়াছে জ্যোতির্ময়ের ? সে কী পাগল হইয়া যাইতেছে ? জ্যোতির্ময়ের মন যে কত দুর্বল যশোদার অজানা ছিল না। তাই তার চেহারা দেখিয়া আর কথাবার্তা চালচলনে মানসিক বিকারের স্পষ্ট লক্ষণ দেখিয়া যশোদা ভয় পাইয়া গেল। অনেকদিন পরে সত্যপ্রিয়কেও আজ যশোদা দেখিতে পাইল। জ্যোতির্ময় চলিয়া যাওয়ার একটু পরেই।

প্রথমে চোখে পড়িল সত্যপ্রিয়ের গাড়ি, পথের ধারে দাঁড়াইয়া আছে। অনেকটা আগাইয়া গিয়া দেখা গেল সত্যপ্রিয়কে। দুজন সাহেবি পোশাক পরা লোকের সঙ্গে কথা বলিতে বলিতে সে গাড়ির দিকে ফিরিয়া যাইতেছিল। খুব সম্ভব নূতন কেনা জমি ও বাড়িগুলি দেখিতে এ পাড়ায় আসিয়াছে। পথের দুই প্রান্ত ধরিয়া দুইজন চলিতেছিল, যশোদা কল্পনাও করে নাই সত্যপ্রিয় তার সঙ্গে কথা বলিবে। পরস্পরকে অতিক্রম করিয়া যাওয়ার পূর্ব মুহূর্তে সত্যপ্রিয় বলিল, কেমন আছ চাঁদের মা।

কাছে গেল না, শুধু দাঁড়াইল। যশোদাও পথের অপর প্রান্তে দাঁড়াইয়া পড়িল। শাস্ত কণ্ঠে বলিল, ভালো আছি। আপনি ভালো তো ?

সত্যপ্রিয়র সঙ্গে লোক দুজন বিস্থিত চোখে চাহিয়া আছে। একজন সাইকেল আরোহী ঘণ্টা বাজাইয়া চলিয়া গেল। পথের মাঝে এ ভাবে পীড়ন করা কেন ? এত করিয়াও কি সত্যপ্রিয়ের সাধ মেটে নাই ?

চলে যাচ্ছে এক রকম।

সত্যপ্রিয় চলিতে আরম্ভ করিল। যশোদা এক মুহূর্ত নড়িতে পারিল না। তার চোখে হঠাৎ জল আসিয়া পড়ায় পথটা ঝাপসা হইয়া গিয়াছিল।

বাড়ি ঢুকিয়া যশোদা দেখিতে পাইল, নন্দ আর সুবর্ণের বয়সি দুটি ছেলেমেয়ে ভিতরের বারান্দায় জলচৌকিতে বসিয়া আছে। অল্প দূরে দেওয়ালে ঠেস দিয়া বসিয়া বিড়ি টানিতেছে ধনঞ্জয়। যশোদাকে দেখিয়া তিনজনেই চঞ্চল হইয়া উঠিল।

ধনঞ্জয় তাড়াতাড়ি বলিল, এত শিগগির যে ফিরে এলে চাঁদের মা ?

প্রশ্নের জবাব না দিয়া যশোদা পালটা প্রশ্ন করিল, এরা কে ?

ওরা ঘর ভাড়া নিতে এসেছে। আমি বললাম এখানে ঘর ভাড়া মিলবে না—

ছেলেটি বলিল, রাজেন্দা, আমাদের বসতে বলে গেছে। কাছেই বাড়ি না রাজেন্দার ?

যশোদা বলিল, হ্যাঁ কাছেই বাড়ি।

রাজেনদা বাড়ি থেকে একটু ঘুরে আসতে গেছে। আমরা থাকলে যদি আপনার অসুবিধে হয়—
পরিষ্কার ধবধবে জামাকাপড় পরনে, সমস্তই সাদাসিধে সাধারণ, তবু দুজনের পরিচ্ছদেই যেন
মার্জিত বৃষ্টি আর সহজ ও স্বাভাবিক পরিচ্ছন্নতার ছাপ আঁকা রহিয়াছে। ছেলেটির বয়স তেইশ
চব্বিশের বেশি হইবে না, মুখখানা মেয়েদের মতো কোমল। মেয়েটির বয়স বোধ হয় ষোলো বছর,
এলোখোঁপায় আটকানো আঁচলটি খসিয়া পড়ি পড়ি করিয়াও পড়িতেছে না, সিঁথিতে সূক্ষ্ম সিঁদুরের
রেখা। মুখখানা সূত্রী, বুদ্ধিতে উজ্জ্বল চপল দুটি চোখ।

এতক্ষণ সে অবাক হইয়া যশোদার বিরাট দেহটি দেখিতেছিল,—জীবনে বোধ হয় সে এতবড়ো
লম্বাচওড়া মেয়েমানুষ দেখে নাই। এবার ছেলেটির দিকে চাহিয়া অকারণেই ফিক করিয়া একটু হাসিয়া
বলিল, তুমি থামো। আমি বুঝিয়ে বলছি।

তারপর সোজাসুজি যশোদার মুখের দিকে চাহিয়া মেয়েটি বলিল, আমরা খারাপ লোক নই,
আমাদের বিয়ে হয়েছে।

যশোদা বলিল, বিয়ে না হলে বুঝি লোক খারাপ হয় ?

মেয়েটি আবার ফিক করিয়া হাসিল, না, তা বলিনি। আপনি যদি কিছু সন্দেহ করেন, যদি
ভাবেন আমরা পালিয়ে এসেছি বাড়ি থেকে, তাই জন্যে আগে থেকে বলে রাখলাম। আমরা দুজনেই
ছেলেমানুষ তো ? আমরা এমনভাবে এসে ঘরভাড়া নিতে চাইলে আপনার কেন, সবারই মনে হতে
পারে, ভেতরে কোনো গোলমাল আছে নিশ্চয়। আপনিই বলুন, মনে হতে পারে না ? গোলমাল
অবিশ্যি আছে, তবে ও ধরনের গোলমাল নয়। আমরা চুরি করার জন্যে ওঁর হাতে হাতকড়া পড়বে
আর আপনাকে নিয়ে পুলিশ টানাটানি করবে, সে ভয় করবেন না। গোলমালটা কী হয়েছে শুনুন।
হয়েছে কী জানেন—

মুখে যেন খই ফুটিতে থাকে মেয়েটির। যশোদা অবাক হইয়া শুনিয়া যায়। এতটুকু মেয়ে, বিবাহ
নাকি হইয়াছে মোটে মাস ছয়েক আগে, কিন্তু কথায় একেবারে পাকা গিল্লি। কী তাব মুখের ভঙ্গি, কী
ভণিতা, কী ফোড়ন আর ব্যাখ্যা ! শুনিতে শুনিতে যশোদার মনে হয়, কার যেন "অনুকরণ কবিতোছে
মেয়েটি, হাত নাড়া, ঠোঁট নাড়া, চোখের পলক ফেলা, রাগ দুঃখ ক্ষোভ বিষ্ময় কৌতুক ফুটাইয়া তোলা
আর মিলাইয়া দেওয়া, সব যেন তার নকল, কথাগুলি সমস্তই শোনা কথার পুনরাবৃত্তি। কে জানে মা
না মাসি না পিসি কে নিজেকে এমনভাবে উজাড় করিয়া মেয়েটির মধ্যে ঢালিয়া দিয়াছে !

গোলমালটা অসাধারণ কিছু নয়, মধ্যবিত্ত বাঙালি পরিবারে সর্বদাই ঘটিতেছে। দাদার পছন্দ-
করা একটি মেয়েকে বাতিল করিয়া অপছন্দ-করা এই মেয়েটিকে বিবাহ করায়, বিবাহে নগদ টাকা
নিতে রাজি না হওয়ায় এবং সম্প্রতি একটা কারখানায় পঁচিশ টাকায় প্রায় কুলিমজুরের একটা কাজ
নেওয়ায়, দাদা ভয়ানক চটিয়া গিয়াছে। দাদার স্ত্রীর মতে, মায়ের পেটের ভাই তো দূরের কথা শত্রুও
মানুষের সঙ্গে এমন শত্রুতা করে না।

আসলে, আমার জাই-ই যত নষ্টের গোড়া। কদিন যা দেখেছি তাতেই বুঝেছি, ভাসুর আমার
লোক ভালো। আমরা দেখে ভাসুরের পছন্দ হয়েছিল, এক বন্ধুর কাছে বলেছিলেন উনি শুনছেন,
কিন্তু আমার জায়ের রংটা আমার চেয়ে একটু কম ফরসা কিনা, আর দেখতেও আমার মতো সুন্দর
নয় কিনা—তা, তার এখন বয়েস হয়েছে, ছেলেমেয়ে হয়েছে তিনটি, প্রথম বয়েসে যেমন ছিল
এখনও কি তেমনই চেহারা থাকে, রূপ-যৌবন মানুষের দুদিনে উবে যায়—আমায় দেখেই তাই
অপছন্দ হয়ে গেল। তারপর যে মেয়েটিকে নিজে দেখে পছন্দ করল—ওগো, বলো না সে দেখতে
কেমন ছিল ? হাসছ যে ? আমার খুব অহংকার হয়েছে ভাবছ বুঝি ? না বাপু, আমি ও সব অহংকার
বুঝি না, ন্যাকামিপনার ধার ধারি না। সত্যি কথা বলব তাতে দোষ কী, তা সে নিজের সম্বন্ধেই হোক
আর যার সম্বন্ধেই হোক ? আমি তো আর বলিনি, আমি আকাশের পরির মতো সুন্দরী ! মোটামুটি

দেখতে সুন্দর আমি, এই পর্যন্ত, ব্যাস। আমার মতো সুন্দর মেয়ে গভা গভা গড়াচ্ছে পথেঘাটে। তুমিই তো বলেছিলে, সে মেয়েটা দেখতে কালো আর চোখ একটু টারা, বলোনি ? যাক গে, যা বলছিলাম, বলি। কী কথায় কী কথা এসে পড়ল। দেখুন তো দিদি, এমনি করে পেছনে লাগলে কেউ কথা কইতে পারে ? কী যেন বলছিলাম—হ্যাঁ, সেই হল আমার জায়ের রাগ। এমন ব্যবহার শুবু করলে আমাদের সঙ্গে কী বলব। নগদ টাকা সম্বন্ধে বলতে লাগল, উনি যে নগদ নেননি সে কী আর অমনি অমনি—নগদ নিলে টাকাটা আমার ভাসুরের হাতে পড়ত, এ বেশ বউয়ের গায়ে গয়না হল। আমার পিসি—পিসিই আমায় মানুষ করেছে, বড্ড ভালোবাসে আমায়—পিসি নিজেকে আটশো টাকার গয়না বেশি দিয়ে দিল। গয়না যা দেবার কথা ছিল, তা তো দিলই, তার উপরে আরও সাড়ে আটশো টাকার গয়না, নগদ টাকার বদলিতে। ভাসুর তিনশো টাকা মাইনে পান, ও কটা টাকা নগদ পোলেই বা তিনি এমন কী বড়োলোক হয়ে যেতেন, তিন মাসের মাইনেও নয় ! কিন্তু জা আমার ওই কথা বলে বলে ভাসুরের মন ভাঙতে লাগল। তারপর ও যেই চাকরিটা নিল,— না নিয়েই বা কী করবে বলুন, ভালো একটা চাকরিও জুটিয়ে দেবে না, এদিকে ঘরে বসে থাকার জন্যও খোঁচাবে। ভাসুর নয়, আমার জা। হাতখরচের দু-চারটে পয়সা তো মানুষের লাগে ? দাদার কাছে গিয়ে চাইলে তিনি বলবেন, আহা বউদির কাছ থেকে নে না গিয়ে। বউদির কাছে চাইলে এমন করে মুখ বাঁকাবে ! একবার দ্বার চেয়ে শেষে ও আর চাইত না। আমি একটা গয়না দিলাম বেচতে, তাও বেচবে না। এদিকে নসি কেনার একটা পয়সা নেই ! তখন এই চাকরিটা নিয়ে নিল। কিন্তু আমার জায়ের সে কী বাণ ! বলে কী, লোকের কাছে দাদার মাথা হেঁট কবাবা বজনে ইচ্ছে করে এই চাকরি নিয়েছে। নইলে এতগুলো পাশ করে কেউ কুলিমজুবের কাজ নেয় ? খেটে খেলে লোকের কাছে মাথা হেঁট হবাব কী আছে বলুন তো দিদি ? রাত্রির আমার জা কী সব পরামর্শ দিল কে জানে, সকালে আমার ভাসুব ওকে বললেন কী, হয় এ কাজ ছেড়ে দাও, নয় আমার বাড়ি থেকে বেরোও। ফিক করিয়া সে আবার হাসিল, না, ঠিক ওমনিভাবে বললেন, তবে মোট কথাটা দাঁড়াল ওই। আমরাও তাই চলে এলাম।

ছেলেটিব নাম অজিত, মেয়েটিব নাম সুব্রতা।

তোমার ডাকনাম কী বোন ? সুব্রতা বলে ডাকতে পারব না।

আমার ডাকনাম নেই—সুব্রতা হাসে।

অজিত বলে, ওর ডাকনাম হল গিয়ে—

সুব্রতা চোখ পাকাইয়া বলে, দ্যাখো, ভালো হবে না কিন্তু !

অজিত হাসিমুখেই চুপ করিয়া থাকে। তখন সুব্রতা বলে, আচ্ছা, বলো। কী আর হবে, আজ হোক কাল হোক জানতে তো পাবেনই !

এই সামান্য হাসিতামাশার ব্যাপারেও মনে হয়, অজিত যেন বউয়ের বড়ো বাধ্য। সুব্রতার কৃত্রিম চোখ-পাকানো রাগকে পর্যন্ত সে সম্মান করিয়া চলে। প্রথমটা যশোদার একটু কেমন কেমন লাগিয়াছিল, তারপর দু-একটা দিন যাইতে না যাইতে সে টের পাইয়াছে, এটা দুজনের একটা ভালোবাসার খেলা মাত্র। দুজনে বড়ো মজা পায় এ খেলায়। এই বয়সের দুটি ছেলেমেয়ের মধ্যে, মিলন যাদের হইয়াছে মোটে ছ-মাস আগে, এমন একটা আশ্চর্য মিল আছে মনের যে যেটুকু যশোদা বুঝিতে পারে তাতেই সে অবাক হইয়া যায়। সুব্রতা যদি আবদার ধরে, আমায় আকাশের চাঁদ পেড়ে দাও—আদব দিলেই বউরা সময় অসময়ে যে আবদার ধরিয়া স্বামীদেব মেজাজ বিগড়াইয়া দেয়,—অজিত সঙ্গে সঙ্গে বলে, দিচ্ছি পেড়ে। সুব্রতা জানে অজিত বুঝবে এটা তার আবদার,

সুব্রতার এই জানা অজিত জানে, অজিতের এই জানাও সুব্রতা জানে, আবার সুব্রতার—দুজনের জানাজানির এই প্রক্রিয়া যশোদার মনে হয় অস্তহীন আর রহস্যময়, তবু যেন দুজনের মধ্যেই এর সর্বাঙ্গীণ পূর্ণতা ঘটিয়াছে, সহজ ও শান্ত আনন্দের গভীর অনুভূতিতে।

একেই কি বলে ভালোবাসা ? মনের মিল ?

যশোদা ভাবে।

হিংসার মতো কী যেন একটা মৃদু প্রতিক্রিয়া জাগে যশোদার মনে, ক্ষীণ একটা অস্বস্তিবোধের পীড়ন চলিতে থাকে।

সুব্রতা তার ঘর সাজায়, সকালে আর সন্ধ্যায় অজিত তাকে সাহায্য করে। তিন টাকা ভাড়া যশোদা বড়ো ঘরখানাই তাদের দিয়াছে ; একটি তোরঙ্গ আর দুটি স্যুটকেসে ঘরটা যেন খালি খালি দেখায়। সুব্রতা দেয়ালে টাঙায় ছবি আর ফটো, জানালায় দেয় পর্দা, অজিতকে দিয়া আলনা আনায় আর বেশি বেশি জামাকাপড় অকারণে বাহির করিয়া সাজাইয়া রাখে, যশোদার দেওয়া চৌকির পায়া চারটিতে রঙিন কাপড়ের ঢাকনি দেয়, টুকিটাকি আরও কত কী যে সে করে। আর সেই সঙ্গে করে অজিতের সঙ্গে নানা বিষয়ে পরামর্শ—যশোদার সামনেই। মাঝে মাঝে যশোদারও মতামত জিজ্ঞাসা করে। মাস নয়, বছর নয়, সমস্ত ভবিষ্যৎকে সে যেন এই একটি ঘরে আটক করিয়াছে। এই ঘরেই তার যেন চিরস্থায়ী বন্দোবস্ত। কোথায় টেবিল পাতিবে, কোনদিকে আলমারি রাখিবে, কথানা আর কী ধরনের চেয়ার কিনিবে, এ সব কল্পনার আর শেষ থাকে না। যে রেটে সে কল্পনায় আসবাব কিনিতে থাকে, তাতে এক বছর পরে এ ঘরে তিল ধারণের স্থান থাকিবে কী কবিয়া যশোদা ভাবিয়া পায় না।

কয়েকদিন রাঁধিয়া খাওয়ায় যশোদাই। তারপর একদিন দুপুরে সুব্রতা বলে, আমি কোথায় রাঁধব দিদি ?

আমার রান্না বুচছে না ?

ওমা, সে কী কথা ! সত্যি বলছি দিদি, এমন রান্না জীবনে খাইনি কখনও। আজ যে কুমড়োর ছক্কা খাওয়ালে, ঠিক অমৃতের মতো লাগল। কুমড়োর ছক্কার যে আবার এমন স্বাদ হয়, স্বপ্নেও ভাবতে পারিনি। তবে কী জান দিদি, আমরা হলাম ভাড়াটে, চিরকাল তো আর তোমার ঘাড়ে খাওয়া উচিত হবে না।

আমার ঘাড়ে খাবে কেন বোন ? তোমরা খরচা দিয়ো, রান্না এক জায়গাতেই হবে। চাবটি তো প্রাণী আমরা বাড়িতে, দু-জায়গায় বেঁধে কোনো লাভ আছে ? মিছেমিছি বেশি খরচ।

শুনিয়া সুব্রতা খুশি হইয়া তৎক্ষণাৎ এ প্রস্তাবে রাজি হইয়া যায়। যশোদার প্রশংসা করিয়া বলে যে, বাস্তবিক, বয়স না হইলে কী এ সব কথা মানুষের মাথায় আসে ! কিন্তু একটা বিষয় আপত্তি করে সুব্রতা, সকাল সন্ধ্যায় চা-জলখাবার সম্বন্ধে।

চা-টা কিছু আমি করব দিদি।

নিজের হাতে করে খাওয়াতে চাও, না ? বলিয়া যশোদা হাসে।

সুব্রতার সঙ্গে এমনভাবে আলাপ করে যশোদা, কখনও মা মাসির মতো, কখনও সমবয়সি সখীর মতো। কিছুক্ষণ আলাপ করিবার পরেই সব গোলমাল হইয়া যায়, সুব্রতার কথা শুনিতে শুনিতে সমবয়সি বন্ধু মনে হয় তাকে, আর মুখের দিকে চাহিয়া দেখিলে খেয়াল হয় যে সে বোলো বছরের একটি কচি মেয়ে মাত্র, যে বয়সের মেয়ে যশোদারও থাকিতে পারিত।

এরা যে তার ভাড়াটে এ কথা যশোদার মনেই থাকিতে চায় না। দুজনকে তার মনে হয় অতিথি, তার বাড়িতে বেড়াইতে আসিয়াছে ; এদের খাওয়াদাওয়ার ভালো ব্যবস্থা করা আর সুখসুবিধার দিকে নজর রাখার দায়িত্ব যেন তার।

পরদিন সকালে উনুনে আঁচ দিয়া যশোদা সুব্রতাকে ডাকিতে যায়। এ সময় রোজ সুব্রতা রান্নাঘরে উপস্থিত থাকে, আজ তাকে না দেখিয়া যশোদা একটু আশ্চর্য হইয়া গিয়াছিল।

ঘরে গিয়া যশোদা দ্যাখে কী, অজিত ছোটো টুলটিতে মুখভার করিয়া বসিয়া আছে, চৌকিতে শতরঞ্ধর উপর উপুড় হইয়া গুটানো তোশকে মুখ গুঁজিয়া সুব্রতা কাঁদিতেছে।

কী হল সকালবেলা তোমাদের ?

যশোদার সাড়া পাইয়াই সুব্রতা তাড়াতাড়ি উঠিয়া বসে। জলভরা চোখ, ভিজা গাল আর ফুলানো ঠোঁটে কী ছেলেমানুষ আর সুন্দরই তাকে দেখায় ! মনে হয় গিন্নিপনার অভ্যাসটাও যেন তার এখনকার মতো ঘুচিয়া গিয়াছে। শিশুর মতো যশোদার কাছে সে নালিশ জানায়।

চায়ের জিনিসপত্র কিনবার পয়সা পর্যন্ত নেই দিদি। বললাম, এমনি মোটা মোটা চুড়ি ছ-গাছা করে কেউ এক হাতে পরে না, দু-গাছা চুড়ি বেচে দিয়ে এসো। তা, কিছূতেই বেচবে না। কী হয় বাড়তি চুড়ি বেচলে ?

চায়ের জিনিসপত্র কেনার জন্য বউয়েব গয়না বেচব !—অজিত বলে।

কেন, বউ কি পর ?—সুব্রতা বলে।

কঠিন সমস্যা সন্দেহ নাই। বউয়েব গয়না বেচার সমস্যা যশোদার আগেব ভাড়াটেনের মধ্যেও অনেকবার দেখা দিয়াছে, কিন্তু সমস্যাটা তখন দাঁড়াইত ঠিক উলটা। গয়না বেচিতে স্বামীরই ছিল উৎসুক. বউয়েরা ছিল বিরোধী। কলহও ছিল তাদের ভিন্ন ধরনের, কথা কাটাকাটি ছিল যেন গালাগালি আর অভিশাপ, মারামারির ভূমিকার মতো। দু-একটি স্বামী যে বউকে চড়-চাপটা বসাইয়া দিত না, তাও নয়। অতীতে স্বামী-স্ত্রীর যত কলহে সে মধ্যস্থতা করিয়াছে তার সঙ্গে এই নব দম্পতির কলহের পার্থক্যটা এত বেশি স্পষ্ট হইয়া যশোদার কাছে ধরা পড়ে যে, এদের মিল ঘটানোর লাগসই উপায় সে ভাবিয়া পায় না। মিলনের চেয়ে মধুর যে বিরোধ, তার কী প্রতিবিধান আছে ?

এক রকম জোর কবিয়া রান্নাঘরে ধবিয়া নিয়া গিয়া দুজনকে সে চা আব হালুয়া খাওয়ায়। মন কাঁদিতে থাকে নন্দ আর সুবর্ণের জন্য। হয়তো এমনিভাবে কোথায় কার বাড়িতে একটি ঘর ভাড়া নিয়া তারা আছে, পয়সার টানাটানির জন্যই হয়তো তাদেরও প্রথম ঝগড়া বাধিয়াছে এমনিভাবে। প্রথম বয়সের উত্তেজনায় দুঃখকে বরণ কবাব সুখ দুদিনে ঘুচিয়া গিয়া দুর্দশাব দুজনকে সীমা থাকিবে না, এই কথাই সর্বদা সে ভাবে, কিন্তু আসলে হয়তো এদের মতোই দুর্লভ আনন্দে দিনগুলি তাদেরও ভরিয়া আছে ! ভাবিতে গিয়া সংশয় জাগে যশোদার। সুবর্ণ তো সুব্রতাব মতো নয়। সুব্রতার গিন্নিপনা আছে পাকামি নাই, লজ্জাহীনতা আছে বেহায়াপনা নাই, বুদ্ধি আছে কুটিলতা নাই, চপল হাসি মন ভুলানোর অস্ত্র নয় সুব্রতার। সুব্রতার মতো সুবর্ণ কি আপন করিতে পারে, সুব্রতাব মতো মনের মিল কি সুবর্ণের সঙ্গেও কারও হয় ?

অজিতের চা খাওয়া দেখিতে দেখিতে যশোদার মনে হয়, কে জানে নন্দও তো অজিতের মতো নয়। এদের দুজনের মতো নয় বলিয়াই হয়তো ওদের মধ্যে এদের মতো মিল হইয়াছে।

যশোদার গম্ভীর মুখ দেখিয়া অজিত আর সুব্রতা ভাবে, তাদের চুড়ি বিক্রির কথাটাই সে ভাবিতেছে। দুজনেই যশোদার দিকে তাকায় আর চোখ নামাইয়া নেয়, তারপর প্রায় একসঙ্গেই পরস্পরের দিকে মুখ ফিরানোর ফলে যেই চোখোচোখি হয়, দুজনের মুখেই মৃদু হাসি ফুটিয়া ওঠে। যশোদার প্রকাশ শরীরটা আজও তাদের চোখে অভ্যস্ত হইয়া যায় নাই, এখনও বিস্ময় আব কৌতুক জাগে।

হাসি দেখিয়া যশোদা বলে, বড়ো ছেলেমানুষ তোমরা।

দুজনে ভাবে, এ বৃষ্টি যশোদার শরীর দেখিয়া হাসার জন্য তিরস্কার। লজ্জায় অজিতের চোখ মিটমিট করে, সুব্রতার গাল দুটি লাল হইয়া যায়।

যশোদা বলে, দুটো চুড়ি বেচবে কী বেচবে না, তাই নিয়ে ঝগড়াঝাঁটি, কাঁদাকাঁটা কেন ? তেমন দরকার হলে গয়না বেচতে কোনো দোষ নেই—বেচাই বরং উচিত। মেয়েমানুষের গয়না তো শুধু শখের সামগ্রী নয়, বিপদে-আপদে কাজে লাগবে বলেই গয়না গড়ানো, ও হল এক ধরনের সঞ্চয়। তাই বলে যখন-তখন সামান্য কারণে বেচতে নেই। চায়ের জিনিসপত্র কেনার জন্যে কি আর গয়না বেচা চলে ? তবে মনে কর সুবুর—সুব্রতার একটা অসুখবিসুখ হওয়ার কথাটা যশোদার জিভের ডগায় আসিয়া পড়িয়াছিল, সামলাইয়া নিয়া সে বলে, ছেলেপিলে হবে বলে টাকার দরকার, তখন তো আর বউয়ের গয়না বেচব না বললে চলবে না। আমার কাছে ধার নাও টাকা, পরে শোধ করে দিয়ে।

সুব্রতার মুখের লালিমা, আরও বেশি গাঢ় হইয়া আসিয়াছিল, সে চূপ করিয়া থাকে।

অজিত বলে, টাকা ধার করতে কেমন যেন লাগে।

যশোদা সুব্রতার মুখখানা দেখিতে দেখিতে বলে, সে তো ভালোই। তবে দিদি বলে যখন ডাকো আমায়, নিশ্চয় শোধ করে দেবে জানো মনে মনে, তখন কটা দিনের জন্যে আমার কাছে নিতে দোষ নেই।

অজিত কাজে চলিয়া যায়। সুব্রতা রান্নাঘরে আসিয়া যশোদাকে টুকিটাকি কাজে সাহায্য করিবার সুযোগ খোঁজে আর বারবার কী যেন একটা কথা বলিতে গিয়া চূপ কবিয়া যায়। রান্না প্রায় সবই হইয়া গিয়াছে। সকাল সকাল রান্না শেষ করা যশোদার চিরদিনের অভ্যাস, ভাড়াটেরা তার নটার মধ্যে খাইয়া কাজে বাহির হইয়া যাইত। মাঝখানে বাড়িতে যখন কেউ ছিল না, শুধু সে আর ধনঞ্জয়, তখন রান্না শেষ হইত অনেক বেলায়। অজিত আসিবার পর আবার যশোদা নটার মধ্যে সকালের রান্না শেষ করিতে আরম্ভ করিয়াছে। ভালো যে যশোদার বিশেষ লাগে তা নয়। মস্ত উনুনে কত লোকের রান্না সে একদিন রাঁধিত, বাড়িতে দুবেলা যেন চলিত নিমন্ত্রণের হাঙ্গামা, এখন শুধু সিদ্ধ করা চারজনের ভাত।

জানো দিদি—

কিন্তু যশোদাকে কথাটা সুব্রতার আর বলা হয় না। রাজেন আসিঁয়া বসিতে সে ঘর ছাড়িয়া চলিয়া যায়। রাজেনের কাছে হঠাৎ তার এত লজ্জার কারণটা কেউ বুঝিতে পারে না।

ভাড়াটেরা কেমন চাঁদের মা ?

মন্দ কী !

আর এক জোড়া ভাড়াটে আছে, আনব ?

যশোদা হাসিয়া বলে, কেন, এক জোড়ায় কলঙ্ক ঠেকানো যাবে না ?

রাজেনও হাসিয়া বলে, তা কেন, রোজগারের ব্যবস্থাও তো করতে হবে ?

এদের মতো ভদ্রলোক ভাড়াটে আনবে তো ?

প্রশ্ন শুনিয়া রাজেন উৎকণ্ঠিত ব্যগ্রতার সঙ্গে জিজ্ঞাসা করে, কেন, এদের কি তোমার পছন্দ হচ্ছে না চাঁদের মা ? না তিন টাকা ভাড়ায় একখানা ঘর দিতে হয়েছে বলে ভাবছ ? আমি কী সে সব না ভেবেই তোমায় ভাড়াটে এনে দিয়েছি ! কটা মাস অপেক্ষা করো, অজিতের মাইনে ডবল হয়ে যাবে,—তখন—

যশোদা মাথা নাড়িয়া বলে, সে জন্য নয়। ভাবছি, শেষকালে কি ভদ্রলোক ভাড়াটেই শুধু রাখতে হবে আমায় যারা দু-চোখে কোনোদিন দেখতে পারেনি ?

আমি কিন্তু মানুষ চাঁদের মা।

মানুষ না ঘোড়া তুমি তা জানিনে, তবে ভদ্রলোক তুমি নও।

বি এ ফেল করেছি, সাতষটি টাকায় চাকরি করা, বিয়ে করা বউ নিয়ে ঘরসংসার করছি—
আমি যদি ভদ্রলোক নই, কে তবে ভদ্রলোক শূনি ? সত্যপ্রিয় ?

ও আবার একটা লোক নাকি যে ভদ্র হবে ? ও হল মানুষের রূপ ধরা দৈত্য—কিংবা দানোয় পাওয়া মানুষ। চাদিকে হু হু করে বাড়ি তুলে গভা গভা ভদ্রলোক এসে বাসা বাঁধছে, ভদ্রলোক কাকে বলে জানো না ? চাষা মজুরকে যারা ঘেন্না করে, বড়োলোকের পা চাটে, ন্যাকা ন্যাকা কথা কয়, আধপেটা খেয়ে দামি দামি জামাকাপড় পরে, আরাম চেয়ে চেয়ে ব্যারামে ভোগে, খালি নিজের সুখ খোঁজে, মান অপমান বোধটা থাকে টনটনে কিন্তু যত বড়ো অপমান হোক দিব্যি সয়ে যায়, কিছু না জেনে সবজাঙা হয়—আর বলব ?

রাজেন মাথা নাড়িয়া বলিল, বলতে চাও বল, তবে আর শুনবার দরকার নেই। তোমার যখন বৌক চাপে চাঁদের মা—

মুখে খই ফুটতে থাকে, না ?

ভদ্রলোকেব ওপর তোমার এত রাগ কেন যশোদা ?

ভদ্রলোকেরা কি মানুষ ?

আর একজোড়া ভাড়াটে আনিবার অনুমতি যশোদা দেয়। একজোড়া যখন আসিয়াছে, আরও আসুক। মনটা কিন্তু খুঁতখুঁত করিতে থাকে যশোদার। মনে হয়, চলিতে চলিতে সামনে একটা বাধা পাইয়াছে বলিয়া নিজের মনের দুর্বলতাব জন্য সে যেন বিপথে চলিতে আবস্ত কবিয়াছে। দুপুরবেলা কুমুদিনী আসিয়া বেড়াইয়া গেল, সুব্রতার সঙ্গে ভাবও করিয়া গেল। ইতিমধ্যে যতবাব সে আসিয়াছে, দাঁড়াইয়া দাঁড়াইয়া যশোদাব সঙ্গে কয়েক মিনিট কথা বলিয়াই চলিয়া গিয়াছে, বসিতে বলিলেও বসে নাই। আজ প্রায় সমস্তটা দুপুর এ বাড়িতে কাটাইয়া গেল।

সুব্রতার কী হইয়াছে কে জানে, সমস্ত দুপুর কুমুদিনী যে এত কথা বলিল তার সঙ্গে, কথায বা ভাবভঙ্গিতে তার এতটুকু গিন্নিপনা দেখা গেল না। কেমন যেন অন্যমনস্ক মনে হইতে লাগিল তাকে।

কুমুদিনী চলিয়া যাওয়ার পব আবার সে উশখুশ করিতে থাকে, সকালে রান্নাঘরে যেমন করিয়াছিল।

বলে, জানো দিদি, সেই যে বলছিলে না—?

যশোদা বলে, কী বলছিলাম ?

সেই যে, সে জন্য গয়না বেচা চলে ?

কিছুক্ষণ যশোদা বুঝিতেই পাবে না, অবাক হইয়া সুব্রতার মুখের দিকে চাহিয়া থাকে। তাবপর খেয়াল হয়।

ওমা, সত্যি ? বলিয়া সুব্রতাকে সে বৃকে টানিয়া নেয়।

কী হয় তখন যশোদার, প্রথম সন্তান সম্ভাবনায় উদ্ভ্রান্ত পরেব একটা মেয়েকে সজোরে বৃকে চাপিয়া ধরিয়া ? তীব্র বেদনার সম্ভাবনায় বিরাট দেহের প্রত্যেকটি অণু ভয়ার্ত ঔৎসুক্যে সজাগ হইয়া ওঠে, চাঁদকে প্রসব করার সময় যেমন হইয়াছিল। আলিঙ্গনের চাপে দম আটকাইয়া সুব্রতার প্রাণ বাহির হইয়া যাওয়ার উপক্রম হয়। জোর তো সোজা নয় যশোদার দুটি বাহুতে। সুব্রতার অশ্রুট আর্তনাদে সচেতন হইয়া সে তাকে ছাড়িয়া দেয়। ধপ করিয়া মেঝেতে বসিয়া জোরে জোরে নিশ্বাস নিতে নিতে ক্ষীণস্বরে সুব্রতা বলে, আর একটু হলেই শেষ করে দিয়েছিলে দিদি।

রাত্রি ধনঞ্জয়কে খাইতে দিয়া সামনে বসিয়া থাকিতে থাকিতে যশোদার মনে হয়, আর একজন মানুষকে খবরটা শুনাইতে না পারিলে বৃকটা তার ফাটিয়া যাইবে।

জানো, সুবুর ছেলেপিলে হবে।

বাড়িতে ভাড়াটে আসিবার পর ধনঞ্জয় কেমন মুবড়াইয়া গিয়াছে। কদিন চূপচাপ শুধু সকলকে দেখিয়া গিয়াছে, মুখে তার একটি কথা শোনা যায় নাই। যশোদার মুখে সুব্রতার সন্তান-সম্ভাবনার

খবরটা শুনিয়া এ বিষয়ে সে কিছুই বলে না, অভিমানী বালকের মতো নিজের নালিশটা জানাইয়া বসে।

রাজেনকে তুমি অত খাতির কর কেন চাঁদের মা ?

সূত্রতার নূতন খাপছাড়া অবস্থার সঙ্গে নিজেকে খাপ খাওয়ানোর ক্ষমতা দেখিয়া যশোদা আশ্চর্য হইয়া গেল। কোথায় কী ছিল, কতদূর বিভিন্ন আবেষ্টনীর মধ্যে, হঠাৎ আসিয়া পড়িয়াছে কোথায়। কিন্তু ছোটোবড়ো সব বিষয়ে অনেক ভুল করিলেও এবং নানারকম মুশকিলে পড়িলেও কখনও তাকে কাবু হইতে দেখা গেল না। নিজেই ভুল সংশোধন করিতে লাগিল, মুশকিলের আসান করিতে লাগিল। চায়ের সেট আর ওই ধরনের কয়েকটি অভাব মিটানোর জন্য সূত্রতার চুড়ি বিক্রি করার সমস্যা যশোদা সমাধান করিয়া দিয়াছিল। তবে সেটা সাময়িকভাবে কোনোরকমে কাজ চালানো গোছের সমাধান। সে সমাধান গ্রহণ করার বদলে সূত্রতা নিজের সমস্যার আরও স্থায়ী ও ব্যাপক মীমাংসা করিয়া ফেলিল। যশোদার কাছে টাকা ধার করার বদলে দামি চায়ের সেট কেনার মতো প্রয়োজনগুলিকেই বাতিল করিয়া দিল !

হাসিমুখে বলিল, প্রথমটা ঠিক বুঝতে পারিনি দিদি কন্দুর হিসেব করে চলতে হবে আমাকে।

একটি অ্যালুমিনিয়ামের কেটলি আর সস্তা কয়েকটি কাপড়িশ মাত্র কেনা হইল। আসবাব কিনিয়া ঘর বোঝাই করা তো বন্ধ হইয়া গেলই, যশোদাকে একদিন সূত্রতা জিজ্ঞাসাও করিল, বাড়তি আসবাব বিক্রি করিয়া ফেলা যায় না ?

খরচপত্রও সে হঠাৎ কমাইয়া ফেলিল। যুদ্ধের সস্তাবনা টের পাওয়া মাত্র বুদ্ধি থাকিলে একটা দেশ যেমন যুদ্ধের জন্য প্রস্তুত হয়, অদূর ভবিষ্যতে দারিদ্র্যের সঙ্গে লড়াই বাধিবে জানিয়া সূত্রতাও যেন তেমনভাবে নিজেকে প্রস্তুত করিতেছে।

সূত্রতার মধ্যে ন্যাকামি নাই। তরুণ মনের স্বাভাবিক ভাবপ্রবণতা তার মধ্যে যথেষ্টই আছে কিন্তু দমনও সে করিতে জানে। বাঁকা আলোয় চকচকে কাচকে হিরার মতো খাতির করার খেলায় হয়তো সে আনন্দ পায় এবং সে কাচের বিনিময়ে কিছু সোনাদানাও অনায়াসে দিয়া বসে কিন্তু হিরার বদলে কাচ পাইয়াছে বলিয়া কখনও আপশোষ কবে না। কাবণ, কাচ যে কাচ তা সে জানে, আসলে সে দাম দেয় শুধু আনন্দটুকুর।

যশোদা এটা আশা করে নাই। সূত্রতাকে ভালো লাগিলেও এবং একটু স্নেহ জাগিলেও প্রথমটা তাকে যশোদার মনে হইয়াছিল, তুবড়ির মতো উচ্ছাসভরা অকালে পাকা ফাজিল মেয়ে। তারপর ক্রমে ক্রমে যশোদা বুঝিতে পারিয়াছে, কথা বলা ছাড়া আব কোনো বিষয়ে সে তুবড়ি-ধর্মী নয়। ঠেকিয়া শেখা অভিজ্ঞতার পরিমাণটা তার অস্বাভাবিক রকমের বেশি নয়, কেবল দেখিয়া-শেখা অভিজ্ঞতা সঞ্চয়ের স্বাভাবিক পটুতার জন্য জ্ঞানের ভান্ডারটা বেশি রকম ভরিয়া ওঠায় তাকে একটু পাকা মনে হয়, আসলে মেয়েটা কাঁচাই আছে। মনকে সংকীর্ণ করার অপরাধে নিজেকে অপরাধী করে নাই বলিয়া সাহস ও সরলতা তার একটু বেশি, তাই তাকে মনে হয় ফাজিল।

রাজেনকে যশোদা বলে, না, এরা ঠিক ভদ্রলোক নয়।

দেখলে তো ? এমন ভাড়াটে এনে দিয়েছি, দুদিনে পছন্দ হয়ে গেল। কী তোমার ভালো লাগে না লাগে, সব জানা আছে চাঁদের মা !

যশোদা হাসিয়া বলে, মনের মানুষ তুমি, তুমি জানবে না তো কে জানবে ?

কাছে বসিয়া কুমুদিনী মুখ বাঁকায়। ধনঞ্জয় অসহায় দৃষ্টিতে যশোদার দিকে চাহিয়া থাকে।

সূত্রতার সূঠাম দেহ আর সুন্দর মুখখানা দেখিয়া একটা কথা যশোদার বারবার মনে পড়িয়া যায়। বাড়ির লোকের পছন্দ করা কুবুপা মেয়েটির বদলে তাকে বিবাহ করিয়া অজিত যে গোলমাল সৃষ্টি করিয়াছে যশোদাকে প্রথম দিন তাই ব্যাখ্যা করিয়া শোনানোর সময় অজিতকে হাসিতে দেখিয়া

সুব্রতা সবিনয়ে ঘোষণা করিয়াছিল, সে সুন্দরী বটে কিন্তু তার মতো গভা গভা সুন্দরী মেয়ে রাস্তাঘাটে গড়াগড়ি যাইতেছে। সুব্রতার কথা আর ভঙ্গিকে তখন যশোদার মনে হইয়াছিল, একেলে মেয়ের পাকামির প্যাঁচ, ঘষামাজা ন্যাকামি। তারপর যশোদা জানিতে পারিয়াছে মেয়েদের পক্ষে এ বিশ্বাস পোষণ যতই বিশ্বয়কর হোক, কথাটায় সুব্রতা সত্যসত্যই বিশ্বাস করে। তাব মতো বৃপবতী মেয়ের পক্ষে নিজের বৃপ সম্বন্ধে এমন একটা ধারণা আন্তরিকতার সহিত পোষণ কবা যে সম্ভব, এ অভিজ্ঞতা যশোদার ছিল না। রামলক্ষ্মণের মন ভুলানোর প্রতিযোগিতায় সীতা-উর্মিলার সঙ্গে পাল্লা দিতে পারে এ বিশ্বাস যে সূৰ্ণখার ছিল, সে তো সে স্ত্রীজাতীয়া জীব বলিয়াই !

স্নেহ করার সঙ্গে সুব্রতাকে যশোদা তাই একটু শ্রদ্ধাও করিতে শিখিয়াছে।

চার

সুব্রতাব চরিত্রের আব একটা দিকও ক্রমে ক্রমে যশোদার কাছে স্পষ্ট হইয়া উঠিল। মেয়েটা খুব মিশুক।

যশোদা আব কুমুদিনীর সঙ্গে ভাব জমিয়াছিল একদিনে, পাড়ার কয়েকটি বাড়ির মেয়েদের সঙ্গেও সে ভাব জমাইয়া ফেলিল কয়েক দিনের মধ্যে। প্রথমে পরিচয় করিতে গেল সবচেয়ে কাছে ব বাড়ির এবং সম্ভবত ছোটোখাটো একটা পরিধির মধ্যে সবচেয়ে গবিব ও অতি ভদ্র পরিবাবেব মেয়েদের সঙ্গে। পরিবারটি অমূল্য নামে একজন বছব পঞ্চাশেক বয়সের রোগজীর্ণ কেরানি ভদ্রলোকের। যশোদার সঙ্গে এ বাড়ির মেয়েদের ঘনিষ্ঠতা না থাকিলেও পরিচয় আছে অনেক দিনের। পবদিনই ও বাড়ির সাত হইতে চল্লিশ পর্যন্ত বিভিন্ন বয়সের আটজন মেয়ে যশোদার বাড়ি বেড়াইতে আসিল। সাত বছব বয়সের মেয়েটির রঙিন কাপড় পরার ভঙ্গি দেখিয়া মনে হইল, যৌবনে পা দিয়া তাড়াতাড়ি দলের তিনটি তবুণী মেয়ের সঙ্গে পাল্লা দিতে যেন তাব তর সহিতেছে না।

অনেকদিন আগে অমূল্যর বাড়ির মেয়েরা দু-একবার যশোদাব বাড়ি বেড়াইতে আসিয়াছিল। যশোদা তখনও কুলিমজুরদের বাড়িতে ভাড়াটে বাথিতে আবস্ত করে নাই। তারপর নানা আপদে-বিপদে মাঝে মাঝে যশোদাকে তাবা ডাকিয়াছে বটে, কিন্তু যশোদার বাড়িতে কখনও আসে নাই। আজও তাবা যশোদার কাছে আসে নাই, আসিয়াছে সুব্রতার নতুন সংসার দেখিতে।

অমূল্যর স্ত্রী আশাপূর্ণা পান চিবাইতে চিবাইতে বলিল, আমবা এলাম। কই, তোমার নতুন ভাড়াটে কই চাঁদের মা ?

যশোদা বলিল, আমার নতুন ভাড়াটেকে খুঁজছ পাঁচুর মা ? এসো, বসবে এসো।

আশাপূর্ণার পান চিবানো বন্ধ হইয়া গেল। এতকাল কুলিমজুরের সঙ্গে কারবার করিয়া প্রায় তাদের মতো বনিয়া গিয়া এখনও তাকে সমানের মতো সম্বোধন করার মতো ভদ্রতা যশোদার আছে, সে তা কল্পনাও করে নাই।

কয়েক মাসের মধ্যে দেখা গেল যশোদার বাড়িতে দুপুরবেলা রীতিমতো মেয়েদের বৈঠক বসিতে আরম্ভ করিয়াছে। দু-একটি মেয়ে নয়, উকিল, ডাক্তার, মাস্টার, প্রফেসর, কেরানি, জীবনবিমার এজেন্ট প্রভৃতি অনেক রকম ভদ্রলোকের বাড়ির অনেক মেয়ে। সকলের বাড়ি যে খুব কাছে তাও নয়। বড়ো রাস্তার ধারের কয়েকটি বাড়িতে পর্যন্ত সুব্রতা তার পরিচয়ের অভিযান আগাইয়া নিয়া গিয়াছে।

হাসি-গল্প গান-বাজনায় যশোদার বাড়ি দুপুরবেলা মুখরিত হইয়া ওঠে। সুব্রতা মোটামুটি গান জানে, একটি হারমনিয়াম আর একটি সেতার তার সঙ্গেই আসিয়াছিল। তারপর কয়েক জোড়া তাস আসিয়াছে, নগেন ডাক্তারের বাড়ির ক্যারাম বোর্ডটি আসিয়াছে। একটি করিয়া মুখ আর পরচর্চার মালমশলা তো সকলে সঙ্গে করিয়াই আনে।

একটা আড্ডা পাইয়া সকলেই খুশি। সুব্রতা যেন মেয়েদের একটা ছোটোখাটো ক্লাব সৃষ্টি করিয়া ফেলিয়াছে। কাজটা পাড়াব যে কোনো বাড়ির যে কোনো মেয়ে ইচ্ছা করিলেই করিতে পারিত কিন্তু এতদিন কারও তা খেয়ালও হয় নাই যে মাঝে মাঝে এ বাড়ি ও বাড়ি করার বদলে এক জায়গায় সকলে এক সঙ্গে মিলিয়া পাড়া বেড়ানোর সাধ মিটাইবার এ রকম একটা সহজ উপায় আছে। অবশ্য নিজের বাড়িতে রোজ এতগুলি মেয়েমানুষের সমাগম সকলের পছন্দ হইত না। তবে একত্র হইতে চাহিলে কি আর স্থানের অভাব হয় !

প্রথম প্রথম কেউ আসিয়াছিল নিছক ভদ্রতার খাতিরে, কেউ মনের খেয়ালে, কেউ কৌতূহলের বশে। আসিবার আগে কেউ ভাবেও নাই যে, তাদের জন্য তাদের নিয়াই সুব্রতা যশোদার বাড়িতে এমন একটি আকর্ষণ সৃষ্টি করিতেছে।

অল্পদিনে সুব্রতাব নামহীন, উদ্দেশ্যহীন, কমিটি প্রেসিডেন্ট সেক্রেটারি-হীন মহিলা সংঘ গড়িয়া উঠিল। যশোদা রাগ করিবে কী খুশি হইবে বুঝিয়া উঠিবার সময়ও পাইল না। ব্যাপারটা ভালো করিয়া বিবেচনা করিয়া দেখিবার আগে নিজেই সে সংঘে যোগ দিয়া বসিল। নানাবয়সি মেয়েদের মধ্যে প্রয়োজনীয় শ্রেণি বিভাগের জন্য সুব্রতাকে যে কৌশল অবলম্বন করিতে হইল, এটা হইল তার ফল।

গোবু আব বাছুর একসঙ্গে বসলে কি জমে দিদি ?

না দিদি, জমে না।

কাল তাহলে আমি বিনু, উমি, সাবু এদের আমার ঘরে ডেকে নিয়ে যাব, তুমি বড়োদের নিয়ে বসবার ঘরটাতে থাকবে, কেমন ?

সুব্রতা ভাড়া নিয়াছে একটি ঘর, কিন্তু মেয়েদের বসানোর জন্য আর একটি ঘরকে বসিবার ঘরে পরিণত করিতে তার বাধে নাই। যশোদাকে জিজ্ঞাসা করাও দরকাব মনে হবে নাই।

তারপর যশোদা বয়স্কাদের আসরে ভিড়িয়া গিয়াছে। কেউ মোটা, কেউ রোগা, কেউ দুয়ের মাঝামাঝি, কিন্তু সকলেই শিথিল। কেউ এখনও সচেতন গর্বের সঙ্গেই ফরসা চামড়ার স্তিমিত বূপের ঝাঁজ বিকীর্ণ করিতেছে, বূপের অভাব আসিয়া যাওয়ায় বয়সটা পার হইয়া কেউ স্বস্তি বোধ করিতেছে। কারও গায়ে গয়না বেশি, কারও গায়ে কম গয়নার ফ্যাশন গয়নার চেয়ে স্পষ্ট। কারও মুখে পান, কারও মুখে ভাঙা বাঁকা দাঁতগুলি রোজ সকালে কমলার গুঁড়ার ঘষামাজা পায় বলিয়া বেশ সাদা।

কয়েকটি মুখ যশোদার অপরিচিত। চাবিদিকে অনেক নতুন বাড়ি উঠিয়াছে, অনেক নতুন লোক শহরতলিতে বাস করিতে আসিয়াছে। সুব্রতা হয়তো এতদূর হইতে দু-একজনকে টানিয়া আনিয়াছে, শহরতলির পুরানো বাসিন্দা হইলেও যার মুখ চেনার সুযোগ যশোদার ঘটে নাই। চেনা হোক, অচেনা হোক, যশোদা এদের চেনে। এরা সকলেই মধ্যবিত্ত ভদ্র পরিবারের গিন্নি। কপালে থাকিলে যশোদা নিজেই হয়তো এতদিনে এদের মতো একজন গিন্নি হইয়া দাঁড়াইত।

কিন্তু কোথায় যশোদার চাঁদ ? আত্মীয়স্বজনভরা সংসার ? সংসার না থাকিলে কি গিন্নি হওয়া চলে ! মজুরদের নিয়া সে সংসার গড়িয়া গিন্নি হইয়া বসিয়াছিল, সত্যপ্রিয় সে সংসারও তার ভাঙিয়া দিয়াছে।

যশোদার দুঃখ কষ্ট অভাব অভিযোগ রাগ হেষ্টিয়া গ্লানি সব কিছুই উপব চিরদিন স্থায়ী একটা প্রলেপ থাকিত—মজা লাগার। জিভের ঘায়ে মধুমাখা মলমের প্রলেপের মতো। সেই প্রলেপের অভাবে যশোদার মনের সবগুলি আঘাতের ক্ষত আজকাল কটকট করে।

যশোদার কিছুই করিবার নাই।

সর্বদা পরের বিপদ ঘাড়ে করা, পরের সমস্যার মীমাংসা করা, বাঁচিয়া থাকার মর্মান্তিক প্রচেষ্টায় আহত অনেকগুলি অশিক্ষিত ও অমার্জিত বয়স্ক শিশুর সেবায় মশগুল থাকা, সব ঘুচিয়া গিয়াছে। রাজেন তাই তাকে শ্রমিক নেতাব কাছে টানিয়া নিয়া গিয়াছে, বাড়িতে ভাড়াটে আনিয়া দিয়াছে, কিন্তু কিছুতেই কিছু হয় নাই। যা নিয়া যশোদা ছেলেব শোক ভুলিয়াছিল, আত্মীয় পরিজনের অভাব ভুলিয়াছিল, নিজেকে বিকাশ কবার সুযোগ পাইয়াছিল, এ সব কৃত্রিম খেলনায় কি সে অভাব মেটে ?

অপরের দেখাইয়া দেওয়া আদর্শের দিকে অপরের সৃষ্টিকর্মের নালায় জীবনশ্রোতাকে বহাইয়া দিবার সাধ যশোদার কোনোদিন ছিল না। ও সব তার ধাতে সহ্য হয় না। সে যেমন আর তার যা আছে তেমনই থাকিয়া আব সেই সব নিয়া অনেকগুলি পছন্দসই পরের জীবনের ঘনিষ্ঠ আবেষ্টনীভব মধ্যে সে নিজের নিয়মে বাঁচিতে চায়।

ভদ্রলোক নামে যে এক শ্রেণিব মানুষ আছে তাদের পুত্রকন্যা প্রসব কবিয়া আব সংসার চালাইয়া মাঝ বয়সেই যে সব গিন্নিদের দেহ, মন, মুখ, এমন কী শাড়ির আঁচল আর ব্লাউজ শেমিজ পর্যন্ত শিথিল হইয়া গিয়াছে, তাদের সঙ্গে কয়েকটা দুপুর আড্ডা দিয়াই যশোদার হাঁপ ধরিয়া যাওয়া উচিত ছিল। তার বদলে হঠাৎ সে যেন আহত মনের ক্ষতে মিস্তি মলমের মৃদু একটা স্বাদ অনুভব করিতে লাগিল।

তার বাড়িতে আসিয়া তার ঘরে বসিয়া একেবারে তার চোখের সামনে পাডাব এতগুলি স্ত্রীলোক নিজেদের শ্যাওলা-ধরা জীবন মেলিয়া ধবে আর উপেক্ষা, অবহেলা বা বিতৃষ্ণার বদলে যশোদার মনে জাগে মমতা। অজানা কিছু নয়, নতুন কিছু নয়। যশোদা এদের জানে, এদের জীবন-যাত্রার পবিচয়ও রাখে। এদের দূরেও সে রাখিত সেই জনাই। তবে দূরে রাখিয়া মোটামুটি ধাবণা পোষণ করা এককথা। এক ঘরে ঘণ্টাব পর ঘণ্টা ঘনিষ্ঠভাবে বসিয়া অসংখ্য খুঁটিনাটি বিকৃতি আব ব্যর্থতা আবিষ্কার করিয়া মমতা বোধ করার সঙ্গে তার অনেক পার্থক্য।

কেবল অসুখেব সময় গিয়া সেবা করিয়া, বিপদের সময় গিয়া সাহস দিয়া আব উৎসবের সময় গিয়া খাটিয়া আসিয়া যশোদা যেন ভুলিয়াই গিয়াছিল যে এবাও মানুষ।

চাঁদ মরিয়া যাওয়ার পর সে যেমন ডাক ছাড়িয়া কাঁদিয়াছিল, নগেন ডাক্তারের ফরসা মোটা বউ অতসী ছেলের শোকে তেমনভাবে কাঁদিয়াছে।

অতসীর এখনও তিনটি ছেলে আর দুটি মেয়ে আছে। বড়ো ছেলে রমেন ডাক্তারি পড়ে। বড়ো স্নান মুখখানা ছেলেটার, বড়ো বিষয় স্তিমিত দৃষ্টি। দেখিলেই যশোদার মনটা কেমন করিয়া ওঠে। কদিন আগে দুপুরবেলা কী দরকারে সে মাকে ডাকিতে আসিয়াছিল, তখন তার চোখে যশোদা যেন দেখিতে পাইয়াছিল, একটা চাপাপড়া লাজুক ভাবপ্রবণ ক্ষুধা।

বল গে যা, আসছি বলিয়া ছেলেকে বিদায় দিয়া হাতের তাস নামাইয়া সকলের দিকে চাহিয়া অতসী তৃপ্তির হাসি হাসিয়াছিল—সর্গর্বে।—আর বছর ডাক্তারি পাশ করবে। এক বাড়িতে দুজন ডাক্তার হবে, বুগিকে আর ফিরতে হবে না—একজন বাড়ি না থাক আর একজন তো থাকবে, কী বলেন ? পাশ করেই অবিশ্যি ওনার মতো চার টাকা ফি করলে চলবে না, প্রথম দু-চারবছর দু টাকা করে, তারপর পশার বাড়লে চার টাকা। উনি হয়তো তদ্দিনে আট টাকা ফি করে ফেলবেন, এখন থেকেই বলছেন, চার টাকায় আর পোষায় না—

নন্দর কাছে রমেন কীর্তন শিখিতে আসিত। তখনও তাকে দেখিয়া যশোদার মনে হইত, ডাক্তারি বিদ্যার চাপে ছেলেটা যেন দিন দিন কুঁকড়াইয়া যাইতেছে। দেহতত্ত্ব জিজ্ঞাসু বৈষ্ণবের ছাঁচে ঢালিয়া মানুষ করিয়া ছেলেকে মড়া কাটিতে পাঠানোর জন্য অতসীর গর্ভ দেখিয়া একটা দুর্বোধ্য বন্ধনের অনুভূতিতে যশোদাকে ব্যাকুলভাবে একবার জোরে শ্বাস টানিতে হইয়াছিল।

সঙ্কার পর যশোদার মনে হইয়াছিল, কেবল রমেন তো নয়। সুন্দরী বড়ো মেয়েটাকে আই সি এস বরের উপযোগী লেখাপড়া চালচলন শিখাইয়া তার চেয়ে অশিক্ষিত মাঝবয়সি গৈয়ো রাজার রানি করিয়া দেওয়া হইয়াছে।

কেবল অতসীও তো নয়। একে একে অন্য গিন্নিদের ছেলেমেয়ের কথাও যশোদার মনে পড়িয়াছিল। মনে হইয়াছিল, যেন এক ধরনের জীবনযাপনের জন্য সকলেই যেন অন্য ধরনের জীবনযাপনের উপযোগী কবিয়া ছেলেমেয়েগুলিকে মানুষ করে।

যশোদা বড়োই মমতা বোধ করিয়াছিল। এদিক দিয়া কুলিমজুরেবাও ভালো। আধমরা পশুর মতো জীবন হোক, ছেলেমেয়েগুলি তাদের আধমরা পশুর মতো জীবনযাপনের জন্যই জন্ম হইতে তৈরি হয়।

সুকুমার উকিলের স্ত্রী বনলতাও ফরসা এবং মোটা। সর্বদা পান খায়। সুযোগ পাওয়া মাত্র রোয়াকে দাঁড়াইয়া মুখভরা পান চিবাইতে চিবাইতে চুপিচুপি সে যশোদাকে বলে, চাব টাকা না চারশো টাকা। যা মুখে আসে বললেই হল। পশার তো ভারী, সারাদিন হাঁ করে বসে থাকে বুগির জন্য, একটা টাকা দিলেই ছুটে আসবে। চাব টাকা কোথায় আদায় করে জানো চাঁদের মা ? অন্য ডাক্তার ডাকবার সময় নেই, এদিকে বুগির যায় যায় অবস্থা, তখন। আবার বলে আট টাকা করবে ! এমন হাসি পায় মাগির কথা শুনলে।

হাসিবার জন্যই বোধ হয় যশোদার ঝকঝকে উঠানের একটা কোণ পিক ফেলিয়া ভাসাইয়া দেয়। তিন-চারদিন আগে অতসী তার ডাক্তার স্বামীর ফি-র সম্পর্কে কথা বলিয়াছিল, যশোদা বকাড়ে সে কথার ফাঁকি ধরাইয়া দেওয়ার জন্য আজ পর্যন্ত বনলতা সমস্ত কথাগুলি মনে মনে পুসিয়া রাখিয়াছে। এমনই চুপিচুপি আরও কতজনকে বলিয়াছে কে জানে, হয়তো আরও সপ্তাহখানেক ধরিয়া বলিয়াই চলিবে।

যেখানে সেখানে পানের পিক ফেলার স্বভাবের জন্য একটা কড়া কথা বলিতে গিয়া যশোদা চুপ করিয়া গেল। হঠাৎ তার মনে হইয়াছে, বনলতার মাথাটা যেন একটু খারাপ। বাড়িতে যাবা আসিতেছে তাদের সকলের মানসিক অবস্থাই কমবেশি অস্বাভাবিক, কিন্তু বনলতার মন যেন স্বাভাবিকতার স্তর পার হইয়া একটু বেশি রকম আগাইয়া গিয়াছে।

অতসীর সঙ্গে বনলতার খুব ভাব, তাস খেলার লড়াইয়ে প্রায় রোজই তারা দুজনে মিলিয়া একটি পক্ষ গঠন করে। বনলতা কথা বলে না অনুরূপার সঙ্গে। অনুরূপা প্রফেসর সুনীল সেনের স্ত্রী। মানুষটা একটু হাবাগোবা ধরনের, বড়োই নিরীহ। যে যা বলে তাই সে মানিয়া নেয়, কারণও সঙ্গে ঝগড়া করে না। এ রকম গোবেচারা মানুষের সঙ্গে বনলতার কথা বন্ধ করার কারণটা যশোদা কোনোমতেই ভাবিয়া পায় না।

এ রকম খাপছাড়া যুক্তিহীন ব্যাপার যশোদাকে পীড়া দেয়। কতকটা নিজের বিরক্তি দূর করিবার উদ্দেশ্যেই সে ভাবে, কারণ যাই থাক, দুজনের মধ্যে ভাব করাইয়া দিলে দোষ কী ?

জিজ্ঞাসা করিতে বনলতা বলে, কথা বলব না কেন, বলি তো ?

যশোদা বৃষ্টিতে পারে অনুরূপার সঙ্গে সে যে কথা বলে না তাও বনলতা স্বীকার করিবে না, কথাও বলিবে না। এ চাল যশোদা জানে, তাই বনলতার সঙ্গে সময় নষ্ট না করিয়া সে ধীরে ধীরে

অনুবৃপার পাশে গিয়া বসে, বনলতা পিক ফেলিতে উঠিয়া গেলে মৃদুস্বরে জিজ্ঞাসা করে, সেনগিমির সঙ্গে বুঝি আপনার বনে না ?

অনুবৃপা অপরাধীর মতো ভয়ে ভয়ে বলে, বনবে না কেন, তবে কী জানেন—

সুব্রতার ঘরে তখন মধুর কণ্ঠে গান আরম্ভ হইয়াছে। অনুবৃপাব মেয়ে অলকা চমৎকব গান গায়। বড়ো রাস্তার কাছাকাছি সামনে ছোটো বাগানওয়ালো দোতলা বাড়িটিতে তারা উঠিয়া আসিয়াছে বছরখানেক আগে এবং আসিয়াই অলকা পাড়াব গায়িকাদের খ্যাতি ম্লান করিয়া দিয়াছে।

আপনার মেয়ে বড়ো সুন্দর গান গায়—অনুবৃপাকে এই কথা বলিবাব জন্য যশোদা মুখ খুলিয়াছে, পিক ফেলিয়া আসিয়া পানের পিকের মতোই মুখ লাল করিয়া বনলতা উদ্ভ্রান্তভাবে বলে, ওই রে, ছুঁড়ি আবার গান ধরেছে। শুনছেন ? ফের প্যানপ্যানানি শুরু কবেছে।

অবিনাশ চাটুজোর বউ প্রভা মিনতি কবিয়া বলে, আহা, একটু শুনতে দিন না ?

বনলতা যেন খেপিয়া যায়।—কী শুনবে ভাই ? ও কী গান নাকি ? মিনমিন কবে কাঁদলেই যদি গান হত—

ইনশিয়োরেন্স এজেন্ট জগদীশের দ্বিতীয় পক্ষের বউ অমলা হঠাৎ বলিয়া বসে, খুকুর চেয়ে তো ভালো গায়।

বনলতা ধপাস করিয়া বসিয়া পড়ে।—খুকুর চেয়ে ভালো গায় ? এত বড়ো বড়ো ওস্তাদ বেখে খুকুর গান শেখালাম, খুকুর চেয়ে ভালো গায় ?

বনলতা হাউহাউ করিয়া কাঁদিতে আরম্ভ করে। কাঁদিতে কাঁদিতে মোঝতে শইয়া পড়িয়া গড়াগড়ি দেয়।

অতসী তীর ভর্ৎসনার সুরে অমলাকে বলে, ওর পেছনে লাগবাব কী দরকার ছিল আপনার ?

এই সব গোলমালের মধ্যে ও ঘরে গান বন্ধ হইয়া যায় এবং যশোদা এক গেলাস জল আনিয়া বনলতার তালুতে একটু একটু করিয়া থাপড়াইতে থাকে। কিছুক্ষণ পরে বনলতা শান্ত হইয়া উঠিয়া বসে।

যশোদা জানে এ শুধু ঈর্ষা আব অহংকারের ব্যাপার নয়, নিজেব মেয়েব চেয়ে অন্য একজনেব মেয়ে ভালো গান গায় বলিয়া সুস্থ মানুষ এ বকম করে না। ভিতবে বিকাব আছে আর সেই বিকাব এই রকম খাপছাড়া উপলক্ষ অবলম্বন করিয়া বাহিব হইয়া পড়ে।

এ ধরনের বিকার শুধু এদের মধ্যেই দেখা যায়, কুলিমজুরদেব বউরা এ হিস্টিরিয়ার ধাব ধারে না। অভাবের চাপে আর ঝাঁঝালো নিষ্ঠুর বাস্তবতার তাপে তারা শূকহিয়া যায়, এদের মতো পচিতে শুরু কবে না।

যশোদার চিন্তিতভাবে মনে হয় গাণ্ডীর্থ্য। সঙ্কার পর মন খারাপ কবিয়া সে জিজ্ঞাসা করে, কী ভাবছ দিদি ?

যশোদা প্রথমে বলে, ভাবছি ? কই, কিছুই তো ভাবছি না ভাই ? তাবপর বলে, ও হাঁ, একটা কথা ভাবছি। মেয়েদের গান শেখাবার ইঙ্কলের মতো করলে হয় না একটা ? ঘরোয়া ইঙ্কলের মতো, মাইনে টাইনের দরকার নেই, দুপুরবেলা পাড়ার মেয়েরা এসে গান শিখে যাবে। যন্ত্রপাতি কিনবার যদি দরকার হয় তখন বরং সকলের কাছ থেকে চাঁদার মতো কিছু কিছু নিলেই হবে। কী বলো।

প্রস্তাবটি শুনিয়াই সুব্রতা খুশি হইয়া ওঠে, নিশ্চয়, ঠিক। আমিও ভাবছিলাম ওই রকম কিছু করতে হবে। বসে বসে শুধু গল্প করলে চলবে কেন ?

তুমি, অলকা আর খুকু গান শেখাবে।

অলকা আর খুকু ? সুব্রতার মুখে দুর্ভাবনা ঘনাইয়া আসে, তবেই তো মুশকিল !

যশোদা হাসিয়া বলে, সে আমি ঠিক করে দেব।

প্রথমে যশোদা গেল প্রফেসর সুনীল সেনের বাড়ি। অনুবুপা তার সব কথাতেই সায় দিয়া গেল, সব প্রস্তাবেই রাজি হইয়া গেল। কেবল অলকা একটু মুখভাব করিয়া বলিল, খুকু আর আমি ? ও মেয়েটা বড়ো হিংসুটে।

কিন্তু যশোদার কাছে এতটুকু মেয়ে কেন মুখভাব করিয়া থাকিতে পারিবে, বিশেষত নিজের তাগিদে একটা কিছু করার ভার গ্রহণ করিয়া হঠাৎ যখন যশোদার শরীর মন হালকা মনে হইতে আরম্ভ করিয়াছে ? অলকাকে জয় করিতে তার কয়েক মিনিট সময় মোটে লাগে। খুকু তো ঠিক হিংসুটে নয়, বোকা। তাছাড়া, অলকার গান শুনিয়া গান-জানা কোন মেয়ের না হিংসা হয় ?

খুকুকে না ডাকলেও তো চলবে না দিদি ! সারেগামা শেখানো, গলা সাধানো, সোজা গান শেখানো এ সব তো একজনের করা চাই ? এমন গান কর তুমি, তোমায় কী এ সবেের জন্য বলতে পারি ? তোমার সময়ই বা কই ? মাঝে মাঝে তুমি গিয়ে দু-একখানা ভালো গান শেখাবে, বাস—!

তেল মাখাইতেও যশোদা কম পটু নয়, গর্বে আর আনন্দে অলকার মুখখানা তেল মাখানো মুখের মতোই চকচক করিতে থাকে।

তখন যশোদা যায় বনলতার বাড়ি, মা ও মেয়েকে বুঝাইয়া বলে,—আসলে খুকুই আমাদের গান শেখাবে, সব ভার থাকবে খুকুর ওপরে। অলকা মাঝে মাঝে আসে তো আসবে, দু-একখানা গান শিখিয়ে যাবে। মিহি গলা থাকলেই তো গান শেখানো যায় না, গান শেখাতে হলে সুর তাল শেখাতে হয়, নয় দিদি ?

খুকু গদগদ ভাবে বলে, আরও কত কী আছে—গান শেখা কী সহজ !

একটি হারমনিয়াম, একটি এসরাজ আর পাঁচ-ছটি ছাত্রী নিয়া যশোদার ঘরোয়া সংগীত বিদ্যালয় আরম্ভ হয়। সকলের যে খুব বেশি উৎসাহ জাগিয়াছে তা নয়, সকলে ভাবিতেছে, যশোদার মতলবটা কী ? কিন্তু যশোদা জানে বিনা পয়সায় মেয়েদের গান শেখানোর সুযোগ কেউ ছাড়িবে না, মেয়েদের গান-বাজনার চর্চা যারা পছন্দ করে না তারাও নয়। দু-চারদিনের মধ্যে মেয়ের ভিড়ে তার ঘর ভরিয়া উঠিবে। এই তো সবে শুরুর।

সকলেই আজ এক ঘরে। অন্য সকলে এলোমেলোভাবে যে যেখানে পারে বসিয়াছে, একটি আস্ত পাটি কেবল ছাড়িয়া দেওয়া হইয়াছে গানের শিক্ষয়িত্রী আর ছাত্রীদের। হারমনিয়ামের একদিকে বসিয়াছে ছাত্রীরা, অন্যদিকে পরস্পরের যতটা পারে তফাতে সবিয়া বসিয়াছে অলকা আর খুকু। কিন্তু এত কাছে বসিয়া, একই কাজ করিতে বসিয়া, পরামর্শ না করিয়া চূপচাপ শূন্য বসিয়া থাকিলে চলিবে কেন ? বিশেষত সকলে যখন কীভাবে গান শেখানো আরম্ভ হয় দেখিবার জন্য প্রতীক্ষা করিয়া আছে। তারা যে পরস্পরের সঙ্গে কথা বলে না, তাদের মায়েরাও বলে না, এটা তাই তখনকার মতো তাদের ভুলিয়া যাইতে হয়।

প্রথমে অলকা বলে, কী শেখানো যায় ? গান ?

তখন খুকু বলে, গলা কী করে সাধতে হয় শেখালে হত না ?

অলকা বলে, গলা তো সাধবেই, একটা সোজাসুজি গান দিয়ে আরম্ভ করলে বোধ হয় ভালো হয়।

খুকু বলে, একেবারে গান দিয়ে আরম্ভ করলে—

পরামর্শের সুবিধার জন্য নিজেদের অজ্ঞাতসারেই তারা পরস্পরের একটু কাছে সরিয়া আসে।

ছয়-সাতটি নানা পর্দায় গলার বেমিল, বেসুরো, হঠাৎ-জাগা হঠাৎ-থামা আওয়াজে ঘরটা গমগম করিতে থাকিলে যশোদা বনলতা আর অনুবুপার মুখের দিকে তাকায়। এই দুটি জননীর মধ্যে ভাব জমানোর যে তুচ্ছ খেলাল হইতে এই সুরচর্চার উৎপত্তি হইয়াছে, যশোদা তা ভোলে নাই।

সুরচর্চা অবশ্য যশোদা আর খামিতে দিবে না, আরও ব্যাপক ও শৃঙ্খলাবদ্ধভাবে চর্চা করাইবে, কিন্তু ওদের দুজনের ভাব হওয়াটা তো দরকার ?

হঠাৎ যশোদা উঠিয়া যায়, ঘরের এক প্রান্ত হইতে হাত ধরিয়া অনুরূপাকে অন্যপ্রান্তে বনলতার কাছে টানিয়া আনে, বনলতার পাশে তাকে বসাইয়া দুজনের হাতে হাত মিলাইয়া দিয়া আবেগ-কম্পিত গলায় বলে, আপনাদের দুটি মেয়েই রত্ন। ওদের জন্যই আমার সাধ মিটল। ওরা যদি আমার মেয়ে হত !

বনলতা প্রায় কাঁদিয়া ফেলে।—কত ওস্তাদ রেখে কত চেষ্টায় মেয়েকে আমি গান শিখিয়েছি ! অনুরূপা বলে, আপনার মেয়ে সত্যি শেখার মতো করে শিখেছে।

বনলতা কাঁদিয়া ফেলে।—ওর গলাটা যদি তোমার মেয়ের মতো মিষ্টি হত ভাই।

তিন মাসের মধ্যে পথের ও দিকে এ বাড়ির মুখোমুখি যশোদার অন্য বাড়িতে একটি রীতিমতো সংগীত বিদ্যালয় স্থাপিত হইয়া গেল। বাড়ির সামনে ছোটো একটি কাঠের ফলকে নামটা লিখিয়া টাঙাইয়া দেওয়াও হইল। বাড়িটি যশোদা কোনোদিন আর ভাড়া দিবে না ঠিক করিয়াছিল। তবে ভাড়া দেওয়া আর কাজে লাগানোর মধ্যে তফাত আছে।

বনলতা একদিন চুপিচুপি যশোদাকে বলে, স্কুল তো দিব্যি চলছে চাঁদের মা। খুকু তো প্রাণ দিয়ে খাটছে তোমার স্কুলের জন্য, এবার ওর জন্য কিছু ব্যবস্থা করে দাও ? বনলতা পান চিবাইতে চিবাইতে হাসে, মাইনের কথা বলছি না, অত খাটছে মেয়েটা, হাতখরচ বাবদ কিছু—তারপর হঠাৎ হাসি বন্ধ করিয়া গভীর হইয়া বলে, ওস্তাদ বেখে গান শেখাতে জলের মতো টাকা ঢেলেছি কিনা, তাই বলছি।

তবু যশোদা ভুল করে না যে বনলতার মাথা আসলে সকলের চেয়ে বেশি খারাপ নয়।

পাঁচ

ছেলে বা জামাই কেউ সত্যপ্রিয়ের মনের মতো নয়। আত্মীয়-পরিজন কেউ যে তার মনের মতো তাও অবশ্য নয়, তবু সেটা কোনোক্রমে সহ্য হইয়া যায়। বড়ো ছেলে আর বড়ো মেয়ের জামাই যে তার অপদার্থ এই আপশোশ মাঝে মাঝে মানুষটাকে একেবারে কাবু করিয়া ফেলে। সকলকে বড়ো বড়ো উপদেশ দেয়, মানুষের শিক্ষাদীক্ষার মারাত্মক ত্রুটি আবিষ্কার করিয়া সকলকে জানাইয়া দেয়, মানুষকে গড়িয়া তুলিবার সহজ সরল পথ কী তাই নিয়া গবেষণা করে, আর তার ছেলে আর জামাই এমন ! না জানি লোকে কী ভাবে ? না জানি তার সব অকাটা যুক্তিগুলিকে সকলে তার ছেলে আর জামাইয়ের কথা ভাবিয়া অনায়াসে কাটিয়া টুকরা টুকরা করিয়া দেয় কিনা ?

মেয়েটি সত্যপ্রিয়ের খুব সূত্রী নয়, কিন্তু অনেক খুঁজিয়া অনেক টাকা খরচ করিয়া জামাই আনা হইয়াছে রূপবান। কী রং জামাইয়ের ! যেন সোনার ওজনে সোনার পুতুলই সত্যপ্রিয় কিনিয়া আনিয়াছে মেয়ের জন্য।

একজন আত্মীয়, যে কখনও সত্যপ্রিয়ের কাছে টাকা প্রত্যাশা করে না, সত্যপ্রিয় যাচিয়া দিতে গেলেও বোধ হয় যে বিশেষ দরকারের সময়ও তার টাকা নিবে না, সম্বন্ধ ঠিক করার সময় সে একবার বলিয়াছিল, আরেকটু চলনসই পাত্র আনলে হত না ?

সত্যপ্রিয় মুখভার করিয়া বলিয়াছিল, কেন ?

কী জানো, তোমার মেয়েকে যদি ছেলোটর পছন্দ না হয় ? নিজের চেহারার জন্যই এ সমস্ত ছেলের মাথা গরম হয়ে থাকে, টাকার লোভে যদি বা বিয়ে করে, খুব সুন্দরী মেয়ে না পেলে নিজের সম্বন্ধ মানায়নি ভেবে মনটা হয়তো খুঁতখুঁত করবে।

সবাই কি তোমার মতো ভাবপ্রবণ ভাই !

তা মানুষ একটু ভাবপ্রবণ বইকী। টাকা দিয়ে গরিবের ছেলে কিনছ, ছেলে তোমাদের সকলের অনুগত হয়ে থাকবে বটে, কিন্তু তাতে কি ছেলে আর মেয়ের মনের মিল হবে ? আর মনের মিল যদি না হল—

কিন্তু সত্যপ্রিয় বৃদ্ধিতে পারে নাই। সে যাকে কিনিয়া আনিতেছে, বাড়িতে রাখিতেছে, জীবিকার উপায় করিয়া দিতেছে, তার মেয়ের মনে কষ্ট দেওয়ার মতো স্পর্ধা কখনও তার হইতে পারে ! বিবাহের এক বছরের মধ্যে মেয়ের মুখের হাসি নিভিয়া যাইতে দেখিয়া সে তাই অবাক হইয়া গিয়াছিল। তারপর তার চোখের সামনে চিরস্থায়ী বিবাদ মেয়ের মুখকে আশ্রয় করিয়াছে, কেমন যেন উদাস চাহনি হইয়াছে মেয়ের।

অথচ যামিনীর স্বভাব খুব নম্র, তার মতো শান্তশিষ্ট নিরীহ গোবেচারি জামাই পাওয়াই কঠিন। সত্যপ্রিয়ের সঙ্গে কখনও মুখ তুলিয়া কথা বলে না। বাড়ির কারও সঙ্গে কখনও তর্ক করে না। বউয়ের সঙ্গে একটা দিনের জন্যও কোনোদিন সে কলহ করিয়াছে বলিয়া কেউ শোনে নাই। চরিত্রও তার খারাপ নয়, হঠাৎ বড়োলোকের জামাই হইয়া অনেক টাকা পাইয়াও বাহিরে স্ফূর্তি করার দিকে তার একটুকু টান দেখা যায় না।

তবে ? যোগমায়া মাঝে মাঝে লুকাইয়া কাঁদে কেন ?

নিরুপায় আপশোশে সত্যপ্রিয়ের হাত-পা কামড়াইতে ইচ্ছা করে। কিছুই করিবার নাই, কিছুই বলিবার নাই। যামিনী যদি মেয়েকে তার মারিত, মদ খাইয়া মাতলামি করিত, কিংবা অন্য কোনো স্পষ্ট অপরাধে মেয়ের চোখের জল আনিত, সে তাকে উপদেশ দিতে পারিত, শাসন করিতে পারিত, চাপ দিয়া সিধা করিয়া দিতে পারিত। কিন্তু এখানে যে কোনো পাঁচ পর্যন্ত খাতানোর উপায় নাই ! যামিনীর হাতখরচের টাকাটা কোনো ছুতায় বন্ধ করিয়া দিলে কি কিছু লাভ হইবে ? মেয়ের মনে বরং তাতে কষ্ট হইবে আরও বেশি।

তা ছাড়া সমস্যা তো ও রকম নয়। যে উদ্ধত নয় তাকে নরম করা চর্চিলবে কেমন করিয়া ?

একদিন যামিনীর একটু জ্বর হইয়াছে, সামান্য সর্দিজ্বর, ব্যস্ত হওয়াব কিছুই ছিল না। কিন্তু সত্যপ্রিয় যেন ব্যাকুল হইয়া পড়িল। ব্যাকুল হওয়াটাই সত্যপ্রিয়ের পক্ষে খাপছাড়া ব্যাপার, এমন সামান্য ব্যাপাবে তাকে ব্যাকুল হইতে দেখিয়া যামিনীও ভয় পাইয়া গেল যে, অসুখটা বৃদ্ধি তাব ভয়ানক কিছুই হইয়াছে।

নিজে মোটরে করিয়া সত্যপ্রিয় যামিনীকে ডাক্তারের কাছে নিয়া গেল।

ফোনটা তুলিয়া নিয়া একটা করিয়া হুকুম দিলে যার বাড়িতে ডাক্তারের ভিড় জমিয়া যাওয়ার কথা, জামাইকে দেখানোর জন্য সে নিজে ডাক্তারের বাড়ি যাইবে, এ ব্যাপারটা সকলের বড়োই অসাধাবণ মনে হইল। ভাবিয়া চিন্তিয়া সকলে ঠিক করিল, হয়তো যামিনীর এমন কোনো অসুখ হইয়াছে যা পরীক্ষা করিতে বিশেষ কোনো যন্ত্রপাতি লাগে, যেসব যন্ত্রপাতি নিয়া ডাক্তারের বাড়িতে আসিবার উপায় নাই। কিন্তু সত্যপ্রিয় নিজে গেল কেন ? যদি বা গেল, কাউকে সঙ্গে নিল না কেন ? এ ভাবে সে তো কখনও কোথাও যায় না !

ডাক্তারের বাড়ি দেখিয়া যামিনী অবাক। মারাত্মক রোগ হইয়াছে তার, মস্ত এক ডাক্তারের বাড়িতে তাকে নিয়া যাওয়া হইতেছে, এই ভাবনায় মুখখানা যামিনীর সর্দিজ্বরের টসটসে ভাবের মধ্যেও শুকনো দেখাইতেছিল। কিন্তু বড়ো ডাক্তার কি গলির মধ্যে এমন একটা ছোটো রংচটা বাড়িতে থাকে, এমন চেহারা হয় তার বসিবার ঘরের ? পুরানো একটা ওষুধের আলমারি, কয়েকখানা কাঠের চেয়ার আর একটা ময়লা কাপড়-ঢাকা কাঠের টেবিল, তাতে পাঁচ-ছখানা ডাক্তারি বই। ঘরের মাঝখানে সবুজ রংকরা চটের পার্টিশন দেওয়া, তার ও পাশে বোধ হয় রোগীকে পরীক্ষা করা হয়।

ডাক্তার সম্ভবত প্রতীক্ষা করিতেছিল, সত্যপ্রিয়কে দেখিয়া খুব বেশি বিস্মিত হইল না। কেবল মহাসমারোহে অভ্যর্থনা করিয়া বলিল, আসুন, আসুন, বসুন।

একজন মাত্র রোগী বসিয়াছিল, পঁচিশ-ছাব্বিশ বছর বয়সের একটি যুবক। চেহারাটি শীর্ণকায়, চোখের নীচে কালিপড়া, মুখখানা তেলতেলা। তাকে তাড়াতাড়ি বিদায় করার জন্য ডাক্তার বলিল, আচ্ছা, আপনি দিন সাতেক পরে আবার আসবেন। যা যা বললাম করবেন আর ওষুধ দুটো নিয়ম মতো খাবেন।

রাত্রে ঘুম হবে তো ডাক্তারবাবু ?

যুবকটির গলা খুব মোটা কর্কশ কিন্তু কী যে গভীর হতাশা তার প্রশ্ন আর প্রশ্নেব ভঙ্গিতে ! বাহুব্রি ঘুমের কথা ভাবিয়া, এখন, এই সকাল বেলাই, সে যেন আতঙ্কে আধমরা হইয়া গিয়াছে।

ডাক্তার বলিল, হবে। শোবার আগে যে ওষুধটা দিয়েছি, ওটাতেই ঘুম হবে। ঘুম যদি না হয় কাল সকালে একবার আসবেন।

সত্যপ্রিয় বলিল, তোমার রাত্রে ঘুম হয় না ?

অপরিচিত মানুষের অপ্রত্যাশিত প্রশ্নে ছেলেটি এমন করিয়া চমকইয়া উঠিল যেন স্নায়ুর কেন্দ্রে ঘা লাগিয়াছে, চোখের পলকে মুখখানা তার ফ্যাকাশে হইয়া গেল। সত্যপ্রিয়ের মুখের দিকে এক নজর তাকাইয়াই চোখ নিচু করিয়া বলিল, আঞ্জ্ঞে হাঁ।

সত্যপ্রিয় প্রচণ্ড একটা দীর্ঘনিশ্বাস ফেলিয়া বলিল, ছেলেবেলা থেকে ব্রহ্মচার্যের অভাব ঘটলে তো এ রকম হবেই। কত ছেলে যে এমনি করে আত্মহত্যা করছে ! তাদেরই বা দোষ কী, সব শিক্ষার দোষ। মা-বাপ যদি না খেয়াল রাখে, তারা ছেলেমানুষ, তাদের কী জ্ঞানবুদ্ধি আছে যে ভবিষ্যৎ ভেবে নিজেদের সামলে চলেবে ! কী বলেন ডাক্তারবাবু ?

আঞ্জ্ঞে হাঁ, তা বইকী।

ছেলেটি উঠিয়া দাঁড়াইয়া বলিল, আচ্ছা, আজ আসি ডাক্তারবাবু। বুঝা গেল, পালানোর জন্য সে বাস্ত হইয়া পড়িয়াছে।

সত্যপ্রিয় বলিল, নোসো একটু, তোমার ঘুমের জন্য একটা কথা বলে দিই। ওষুধের চেয়ে এতে তোমার বেশি কাজ হবে। শোয়াব আগে এক কাজ করবে, মেঝেতে জোড়াসন হয়ে মেবুদণ্ড সিধা করে বসবে। এইখানে তোমার নাভিপদ্ম আছে জানো বোধ হয় ? এখানে বাঁহাত দিয়ে এইভাবে আন্তে স্পর্শ করে থাকবে—আঙুলগুলি যেন সোজা থাকে আর পরস্পরের সঙ্গে লেগে থাকে, বুঝলে ? ডান হাতটি এইভাবে মাথার তালুতে রাখবে। তারপর চোখ বন্ধ করে ভাববে, বিশ্ব-ব্রহ্মাণ্ডে যত জীবিত প্রাণী আছে সব ধীরে ধীরে ঘুমিয়ে পড়েছে। ঘরের দরজা বন্ধ করে নিয়ো, কেউ যেন ঘরে না আসে। আর—

ছেলেটি কাতরভাবে বলিল, আঞ্জ্ঞে, আমার ঘরে আমার চারটি ভাইবোন শোয়, আমার বাপ-মাও ও ঘরে থাকেন। ঘরে সব সময় লোক থাকে।

অন্য ঘরে শোয়ার ব্যবস্থা করে নিয়ো।

আবেকটা ঘরে দাদা-বউদি শোয়। আর ঘর নেই আমাদের।

ছেলেটি আর দাঁড়াইল না, এক রকম পলাইয়া গেল। এই অবহেলাতেই সত্যপ্রিয় জ্বালা বোধ করে সবচেয়ে বেশি। কেউ শুনিতে চায় না, তার এত দামি দামি কথাগুলি সাধ করিয়া কেউ ধৈর্য ধরিয়া শুনিতে চায় না। না শুনিয়া যাদের উপায় নাই শুধু তারা শোনে, অন্য সকলে পালানোর জন্য ছটফট করে। এত হালকা মানুষের মন ? ডাক্তারের দিকে তাকাইয়া সত্যপ্রিয় বলিল, এই সব অপদার্থ ছেলের জন্যই দেশটা রসাতলে গেল।

ডাক্তার সায় দিয়া বলিল, নিশ্চয়। ওদের কথা আর বলবেন না।

তারপর পরীক্ষা হইল যামিনীর। তাকে সঙ্গে করিয়া চটের পার্টিশনের ও পাশে গিয়া মিনিট পনেরো পরে আবার ডাক্তার ফিরিয়া আসিল। যামিনীর সুন্দর মুখখানা তখন টুকটুকে লাল হইয়া গিয়াছে। এদিকে আসিয়া সে ঘাড় নিচু কবিয়া সত্যপ্রিয়ের পিছনে দাঁড়াইয়া রহিল।

সত্যপ্রিয় বলিল, তুমি গাড়িতে বোসো গিয়ে যামিনী। আমি ডাক্তারবাবুর সঙ্গে কথা বলে আসছি।

যামিনীকে পরীক্ষা করিল অজানা অচেনা গরিব এক ডাক্তার কিন্তু চিকিৎসা আরম্ভ করিল সত্যপ্রিয়ের পরিচিত মস্ত নামকরা কবিরাজ। যামিনীর জন্য নানা অনুপানের সঙ্গে পাথরের খলে কবিরাজি বড়ি পেষণ করা হইতে লাগিল, অনেক রকম সুপাচ্য ও পুষ্টিকর পথ্যের ব্যবস্থা হইল।

ওষুধ ও পথ্যের ব্যবস্থা সত্যপ্রিয় সমস্তই মানিয়া নিল, কিন্তু একটা বিষয়ে কবিরাজের সঙ্গে তার মতের মিল হইল না। চিকিৎসার সময়টা যোগামায়াকে আত্মীয়ের কাছে পাঠাইয়া দেওয়ার প্রস্তাবে কবিরাজ ঘাড় নাড়িল।

ভালোর চেয়ে তাতে মন্দই বেশি হবে মনে হয়।

কিন্তু চিকিৎসকেরও সব কথা স্বীকার করা সত্যপ্রিয়ের পক্ষে অসম্ভব, এ যুগের চিকিৎসকরা কী জানে ? জানিলেও সত্যপ্রিয়ের চেয়ে তো বেশি জানে না।

ব্রহ্মার্চ্য পালন না করলে শুধু ওষুধ আর পথ্যে কী ফল হবে কবরেজ মশায় ?

কবিরাজ মৃদু হাসিয়া বলিল, স্বামী-স্ত্রীকে গায়ের জোরে তফাত করলেই কি ব্রহ্মার্চ্য পালনের ব্যবস্থা হয়ে যায় ? ওদের দেখাসাক্ষাৎ হতে না দিলে ফলটা খারাপ হবে।

দ্রু কৃষ্ণিত করিয়া কবিরাজ একটু ভাবিল, তারপর বলিল, তা ছাড়া, আমার মনে হয় সবটাই আপনার অনুমান, আপনার জামায়ের কোনো চিকিৎসার দরকার ছিল না। শ্রীমানের স্বাস্থ্য তো এমন কিছু খারাপ নয়। ওর মানসিক স্বাস্থ্যই বরং একটু খারাপ যাচ্ছে !

তা বলতে কী বুঝাচ্ছেন ?

বুঝাচ্ছি যে শ্রীমানের মনটা একটু বিকারগ্রস্ত, কোনো আঘাত-টাঘাত পেয়েছে মনে কিংবা অনেকদিন থেকে কোনো দুঃখকষ্ট সহ্য করে আসছে। ওষুধ-পথ্যের ব্যবস্থা না করে খুব হইচই ফুর্তি করে দিন কাটাবার ব্যবস্থা করলেই বোধ হয় ভালো হত।

হইচই ফুর্তিটা কী রকম ?

এই মনের আনন্দে থাকা আর কী। বন্ধুবান্ধবের সঙ্গে হাসি-তামাশা করা, খেলাধুলা ভালো লাগলে তাই করা, দেশ-টেশ বেড়ানো, ভালো লাগলে শিকার-টিকারে যাওয়া—কী জানেন, সবাইকার তো এক জিনিস পছন্দ নয়, যার যেদিকে মন যায়। একেবারে মদটদ খেয়ে গোপ্ত্রায় যাবার ব্যাপার যদি না হয়, বেশি বাঁধাবাঁধির চেয়ে অল্পবিস্তর অসংযমও ভালো। শ্রীমান বড়ো বেশি ভয়ে ভাবনায় দিন কাটায়—

কীসের ভয় ভাবনা ?

সত্যপ্রিয়ের মুখ দেখিয়া কবিরাজ কথার মোড় ঘুরাইয়া নিল। যে চিকিৎসা চায় উপদেশ চায় না, তাকে যাচিয়া উপদেশ দিয়া লাভ কী !

কবিরাজের সঙ্গে আলোচনার কয়েক দিন পরেই সত্যপ্রিয় মেয়েকে দেশে পাঠানোর আয়োজন করে। দেশের বাড়িতে আত্মীয়স্বজন আছে। সত্যপ্রিয়ের এক পিসতুতো বোন স্বামী-পুত্র নিয়া অনেকদিন হইতে এখানে আছে, হঠাৎ তার দেশে গিয়া বাস করার শখ চাপিল। সত্যপ্রিয়ের ইতিগতে অনেকের মনে অনেক রকম শখই জাগিয়া থাকে। ঠিক হয়, যোগমায়াও এদের সঙ্গে যাইবে।

প্রথমে যোগমায়া কথাটা হাসিয়াই উড়াইয়া দেয়, তারপর যখন বুঝিতে পারে তাকে দেশে পাঠানোর ইচ্ছাটা সত্যপ্রিয়ের, তখন সে মুখভার কবিয়া বলে, না বাবা, আমি এখন কোথাও যাব না।

সত্যপ্রিয় বলে, কদিন বেড়িয়ে আয়। বিয়ের পর দেশের সবাই তোকে দেখতে চাচ্ছে।

শুনিয়া যোগমায়া আর আপত্তি করে না। মেয়েজামাইকে দেশের আত্মীয়স্বজনকে দেখাইবার ইচ্ছা যদি সত্যপ্রিয়ের হইয়া থাকে, সে তো ভালো কথা। স্বামীর সঙ্গে সর্বত্র যাইতেই সে রাজি আছে।

দুশো টাকা দেবে বাবা আমায় ?

বিয়ের পর তুই যে হরদম টাকা নিচ্ছিস !—কী কববি টাকা দিয়ে ?

নতুন রকম একটা গয়না কিনব। আজকেই দাও বাবা—আজকেই কিনব।

বিবাহের পর বাপের ভয়টা যেন যোগমায়ার একটু কমিয়াছে—সব মেয়েরই কমে। বিবাহের পর খুব কড়া মেজাজের বাপও মেয়ের সঙ্গে একটু খুশি মেজাজেই মেলামেশা কবে, মেয়েকে কিছু স্বাধীনতা দেয়। বাপ ও মেয়ের মধ্যে অতিরিক্ত একটা সম্পর্ক যেন কোথা হইতে কীভাবে গড়িয়া উঠে।

কিন্তু যোগমায়া যখন টের পায় তাকে একাই যাইতে হইবে যামিনী সঙ্গে যাইবে না, তখন সে হঠাৎ বাঁকিয়া বসে। না, তার যাইতে ইচ্ছা করিতেছে না, সে যাইবে না। শরীরটা ভালো নয় তাব। এই গা ম্যাজম্যাজ করিতেছে, মাথা ঘুরিতেছে, আরও অনেক কিছু হইয়াছে।

সন্তানের এ বকম মুখোমুখি অবাধ্যতার অভিজ্ঞতা সত্যপ্রিয়ের জীবনে এই প্রথম। প্রথমটা সে কেমন খতোমতো খাইয়া যায়। তারপর ক্রোধে পৃথিবী অন্ধকার দেখিতে থাকে।

পিসতুতো বোন বলে, কী করব দাদা, যাব ! মায়া তো কিছুতে যেতে রাজি নয়। যামিনীর এমন অসুখের সময় ওকে ফেলে কোথাও যেতে চায় না।

তোমাদের সকলের মাথায় গোবর ভবা।

নিজের দোষটা বুঝিতে না পারিলেও পিসতুতো বোন মন্তব্যাটায় সায় দিয়া চূপ করিয়া থাকে।

দিন তিনেক পরে সত্যপ্রিয় জামাইকে তার ঘরে ডাকিয়া আনিয়া বলে, যামিনী।

যামিনী বলে, আঞ্জে ?

তোমার ভালোর জনেই বলা।

আঞ্জে হ্যাঁ।

জীবনে উন্নতি করতে হলে অভিজ্ঞতা চাই।

আঞ্জে হ্যাঁ।

আমাদের দিল্লি ব্রাণ্ডের সাব-ম্যানেজার ক-মাসের ছুটি নিয়েছে। তার জায়গায় তুমি গিয়ে কাজ করে আসতে পারবে না ?

আঞ্জে হ্যাঁ, পারব বইকী।

কুদ্ধ আহত মনে যামিনীর বিনয়ে একটু শান্তি বোধ হয়। নিজের মেয়ের চেয়ে পরের ছেলেই ভালো। শ্বেতপাথরের মেঝেতেই দুজনে বসিয়াছিল, যামিনী ঘাড় নিচু করিয়া উশখুশ করিতে থাকে। কী যেন বলিতে চায় কিন্তু বলিতে পারে না।

কবে যেতে হবে ?

কালকেই রওনা হয়ে যাও। নিয়মমতো ওষুধপত্র খেয়ো। কবরেজমশায়কে বলে দেব, ডাকে ওষুধ পাঠিয়ে দেবেন। আর সকাল সন্ধ্যায় একটু যে যোগাভ্যাস শিখিয়ে দিয়েছি—

আমার কিছু টাকার দরকার ছিল।

সত্যপ্রিয় হঠাৎ চূপ করিয়া যায়। কতগুলি বিষয়ে বুদ্ধিটা খুবই ধারালো, হঠাৎ তার মনে হয় জামাইয়ের সম্বন্ধে একটা নতুন তথ্য যেন আবিষ্কার করিয়া বসিয়াছে।

কত টাকা ?

পাঁচশো।

খুব লজ্জার সঙ্গে ভয়ে ভয়েই যামিনী টাকার আবেদন জানাইয়াছে, তবু সত্যপ্রিয়ের মনে হয় মাঝে মাঝে দু-একজন তাকে ফাঁদে ফেলিয়া যেভাবে টাকা আদায় করিবার চেষ্টা করে, যামিনীর টাকার দাবিটা যেন কতকটা সেই ধরনের। আপিসে নামমাত্র কাজের জন্য হাতখরচ বাবদ যামিনীকে মাসে মাসে দুশো টাকা দেওয়া হয়। খরচ তার কী যে দুশো টাকাতোও কুলায় না ? গভীর হইয়া সত্যপ্রিয় একটু ভাবে, তারপর চেক বই বাহির করিয়া পাঁচশো টাকার চেক লিখিয়া দেয়।

সারাটা দিন তার কেবলই মনে হইতে থাকে, চঞ্চলভাবে ছুটাছুটি করিতে করিতে হঠাৎ যেন দেয়ালে মাথা ঠুকিয়া সে শান্ত হইয়া গিয়াছে। একটা অদ্ভুত স্তব্ধতাভরা শান্তির শান্ত্যভাব।

যামিনী দিল্লি রওনা হইয়া যায় আর অতদূরে অসুস্থ স্বামীকে কাজ করিতে পাঠানোর জন্য বাপের ওপর রাগ করিয়া যোগমায়া বাড়ির সকলের সঙ্গে কথা বন্ধ করিয়া দেয়। শূনিয়া সত্যপ্রিয় নিশ্বাস ফেলিয়া ভাবে, সকলে কী অকৃতজ্ঞ ! যার ভালোব জন্য যা কবি তাতেই তার রাগ হয়।

মাস দুই পরে পিসতুতো বোন একদিন সত্যপ্রিয়কে একটা খবর দেয়। শূনিয়া প্রথমটা সত্যপ্রিয় কথাটা বিশ্বাস করিতেই চায় না।

কার ছেলে হবে ?

মায়ার। এই চার মাস।

সংবাদটা এমন খাপছাড়া মনে হয় যে সত্যপ্রিয় তবু বোকার মতো আবার জিজ্ঞাসা করে, ভুল হয়নি তো তোমাদের ?

দিল্লির সাব-ম্যানেজার তিন মাসের ছুটি নিয়াছিল। যামিনী তিন মাস কাজ করিবার জন্য সেখানে গিয়াছে। দু-চারদিনের মধ্যেই তাকে সেখানে স্থায়ী করার নির্দেশপত্র পাঠানোর কথাটা সত্যপ্রিয় ভাবিতেছিল। এবার একেবারে চূপ করিয়া যায়। সহজে সত্যপ্রিয় লজ্জা পায় না, হঠাৎ যেন মেয়ের কাছে মুখ দেখাইতে তার লজ্জা করিতে থাকে। কেবল মেয়ের কাছে নয়, আরও অনেকেব কাছে। জানিয়া বুঝিয়া ইচ্ছা করিয়া সত্যপ্রিয় অনেক ব্যাপারে বাহাদুরি কবিয়াছে, এমন অনেক বিষয়ে হস্তক্ষেপ করিয়াছে যেদিকে তার তাকানোই উচিত ছিল না, কিন্তু কারও কাছে কোনোদিন এতটুকু সংকোচ বোধ করে নাই। মনে মনে বরং নিজের সর্বব্যাপী প্রভুত্বে গর্বই অনুভব করিয়াছে। কিন্তু মেয়ে আর জামাইয়ের জীবনকে নিয়ন্ত্রিত করিতে চাহিয়া এত বড়ো একটা ভুল করার জন্য সংকোচ বোধ না করার ক্ষমতা সেও নিজের মধ্যে খুঁজিয়া পায় না।

ছি, কী কদর্য ভুল !

মাসখানেক পরে যামিনী ফিরিয়া আসিল। শোনা গেল, যোগমায়ার মুখে নাকি হাসি ফুটিয়াছে।

দিন পনেরো পরে একদিন সকালে যামিনী মুখ কাঁচুমাচু করিয়া সত্যপ্রিয়ের কাছে শ-তিনেক টাকা চাহিল। তার বিশেষ দরকার।

সত্যপ্রিয় বলিল, সেদিন তোমায় পাঁচশো টাকা দিয়েছি যামিনী।

সন্ধ্যার পর যোগমায়া আসিয়া আবদার করিয়া বলিল, আমায় তিনশো টাকা দেবে বাবা ?

সত্যপ্রিয় বলিল, সেদিন তোকে দুশো টাকা দিয়েছি মায়া।

পরদিন শোনা গেল, যোগমায়ার মুখ নাকি কালো হইয়া গিয়াছে। চোখ দেখিয়া বুঝা গেল, রাত্রে খুব কাঁদিয়াছে। ঘুম ভাঙার পর হইতে যামিনীর আপিস যাওয়া পর্যন্ত একবার ধারেকাছেও ঘেঁষিল না দেখিয়া বুঝা গেল, দুজনে ঝগড়া হইয়াছে।

সন্ধ্যার পর মেয়েকে ডাকিয়া সত্যপ্রিয় তিনশো টাকার একখানা চেক তার হাতে দিল। যোগমায়া নীরবে চেক হাতে করিয়া চলিয়া গেল।

আপিসে সেদিন একজন লোক সত্যপ্রিয়ের সঙ্গে দেখা করিতে আসিয়াছিল। মহীতোষ তার কাছে সাড়ে তিন হাজার টাকা ধার নিয়াছিল, যতদিন পারে অপেক্ষা করিয়া একেবারে শেষদিন লোকটি অগত্যা সত্যপ্রিয়ের কাছে আসিয়াছে।

কোটিপতি মানুষ আপনি, আপনার ছেলের নামে এ কটা টাকার জন্য নালিশ করব ? আমি কি পাগল ? আমি জানি আপনার কাছে এসে দাঁড়ালেই টাকা পাওয়া যাবে। দুমাস ছমাস অপেক্ষা করব তাতে আর কথা কী ? তবে কী জানেন, হঠাৎ বড়ো দরকার পড়ে গেল টাকাটাব—আজকের মধ্যে না পেলে নয়।

পরদিন কোর্টে নালিশ বুজু না কবিলে দেনাটা তামাদি হইয়া যাইবে।

সত্যপ্রিয় নীরবে একটা চেক লিখিয়া দিয়াছিল।

অন্ধকার ঘবে চুপ করিয়া বসিয়া সত্যপ্রিয় ভাবিতে থাকে। দর্শন, বিজ্ঞান, রাজনীতির সমস্যার কথা নয়। অন্যাকথা।

বুদ্ধিটা সত্যপ্রিয়ের সতাই তীক্ষ্ণ। কিন্তু কতকগুলি ব্যাপারে মানুষের তীক্ষ্ণবুদ্ধি বুঝিবার কাজেই শূণ্য লাগে। মানুষ বুঝিতে চায় না। সত্যপ্রিয় জানে, একই মানুষের মধ্যে এ বকম সমাবেশ ঘটে না, তবু সে আশা করে গরিব মা-বাপকে পাঠানোর জন্য জামাই তার যদিও বা যোগমায়াকে কষ্ট দিয়া তার কাছে টাকা আদায় করার উপায়টা অবলম্বন কবিয়াছে, মানুষটা সে আসলে ভালো, মনটা তাব নিশ্চয় নবম, টাকার ব্যবস্থার জন্য ছাড়া অন্য কোনো কারণেই তার মেয়েকে হয়তো কষ্ট দেয় না। যামিনী যে বাপকে পাঠানোর জন্য টাকা আদায় কবে সম্প্রতি এটা সত্যপ্রিয় টের পাইয়াছে।

টাকা আদায় করিবার উপায় থাকিলে, তা সে স্ত্রীর উপর চাপ দিয়াই হোক আর যেভাবেই হোক, টাকা আদায় করাকে সত্যপ্রিয় বিশেষ সৃষ্টিছাড়া ব্যাপার বলিয়া মনে করে না, খুব বেশি অন্যায় বলিয়াও গণ্য করে না। যত মানুষকে সে চেনে তারা সকলেই টাকা টাকা করিয়া পাগল। কেবল নিজের মেয়েজামাইয়ের ব্যাপারে বলিয়াই তার একটু খারাপ লাগিতেছে।

নরনারীর সম্পর্কে যে মনের মিল বলিয়া একটা খুব বড়ো রকমের ব্যাপার আছে, সোজাসৃজি অবিচার অত্যাচার না করিয়া, এমনকী রীতিমতো ভালো ব্যবহার করিয়াও যে একজন আবেকজনকে অবহেলা কবিতে পারে, মিষ্টি ভদ্রতার সম্পর্ক আর স্নেহ-মমতার সম্পর্কের মধ্যে যে তফাত অনেক, সত্যপ্রিয় তা প্রায় ভুলিয়াই গিয়াছে। পুরুষমানুষ যদি অকাবণে মেয়েমানুষকে মারখোর গালাগালি না করে, তবে আর মেয়েমানুষের সুখের জন্য কী দরকার হইতে পারে সে বুঝিতে পারে না।

কিন্তু যোগমায়ার অসুখী মন আজকাল নানাদিক দিয়া নানাভাবে আসিয়া তাকে ক্রমাগত আঘাত করে। সাধারণ অবস্থায় হয়তো সে খেয়ালও করিত না, কিন্তু এদিকে এখন তার মন গিয়াছে। দেশের স্বাধীনতা চাহিলে যে স্বাধীনতা পাওয়া যায় না বরং না চাইলেই নির্দিষ্ট সময়ের মধ্যে পাওয়া যায় এই সমস্যার মতো, কন্যার বিবাহিত জীবনটাও তার কাছে এখন একটা সমস্যা দাঁড়াইয়া গিয়াছে। মেয়ে যে অসুখী হইয়াছে এর চেয়ে তার যেন বেশি যত্নগণা বোধ হয় এই ভাবিয়া যে সে মেয়েকে সুখী করিবার জন্য নিজে পাত্র ঠিক করিয়া মেয়ের বিবাহ দিয়াছে, অথচ মেয়ে সুখী হয় নাই।

ব্যবসার একটি সমস্যার মতো ব্যাপারটাকে মনের মধ্যে নাড়াচাড়া করিতে করিতে কয়েক দিনের মধ্যেই খুব ভালো একটি সমাধান আবিষ্কার করিয়া ফেলে। ব্যাপারটা তো মূলত এই। মেয়েকে সুখী করার ভার সে জামাইয়ের উপর ছাড়িয়া দিয়াছে এবং সে জন্য খরচ করিয়াছে অনেক টাকা। তার মেয়েকে সুখী করার দায়িত্বটা জামাইয়ের। জামাই যদি কাজটা না পারিয়া থাকে, তাকে বুঝাইয়া

দেওয়া দরকার দায়িত্বটা সে পালন করিতে পারে নাই। সেই সঙ্গে এটাও বুঝাইয়া দেওয়া দরকার, দায়িত্বটা ভালোভাবে পালন না করিলে তার নিজের অবস্থাটাও সুবিধা দাঁড়াইবে না। অনেক কর্মচারী আর এজেন্টের ভোঁতা মাথায় এই জ্ঞানটুকু ঢুকাইয়া দিয়া অনেক দায়িত্বপূর্ণ কঠিন কাজ সে করাইয়া নিয়াছে।

এই সহজ কথাটা এতদিন কেন মনে হয় নাই ভাবিয়া সত্যপ্রিয় একটু আশ্চর্য হইয়া যায়। একদিন যামিনীকে ডাকিয়া বলে, বাবা, তোমার মনের অবস্থাটা বড়ো খারাপ দেখছি। তোমার মুখ দেখে যোগমায়ার মুখখানাও সব সময় শুকিয়ে থাকে। তা তুমি এক কাজ করো, কদিন বাপ-মার কাছে থেকে এসো গে। আজকেই চলে যাও, এই বেলা, এইমাত্র—জিনিসপত্র থাক।

যামিনী আমতা আমতা করিয়া বলিবার চেষ্টা করে, আজে, আমার মনের অবস্থা—

পথের খরচ ব'বদ এই চার টাকা দিলাম—গাড়িভাড়া তিন টাকা চোন্দো পয়সা, নয় ? মন সুস্থ না করে, মানে, মনের অবস্থা না বদলে এসো না।

একঘণ্টার মধ্যে জামাই বিদায় হইয়া গেল।

জামাইকে তাড়াইয়া দেওয়া হইয়াছে ভাবিতে গেলে সকলের মাথা ঘুরিয়া যায়। তাও কি সম্ভব ? কিছুই বুঝিতে না পারিয়া সকলে ভাবে, ভিতরে কিছু আছে। কোনো কাজে যামিনীকে পাঠানো হইয়াছে, কোনো উদ্দেশ্যে। সত্যপ্রিয়ের অদ্ভুত কাজ আর উদ্দেশ্যের তো অন্ত নাই।

কিন্তু কাজটা কী ? কী উদ্দেশ্য সত্যপ্রিয়ের ?

রওনা হওয়ার সময় সত্যপ্রিয় যামিনীকে সাগ্রহে জিজ্ঞাসা করে, তোমায় কেন পাঠিয়ে দিচ্ছি বুঝতে পেরেছ তো বাবাজি ?

আজে না, ঠিকমতো—

এত করিয়াও যদি না বুঝানো গিয়া থাকে তবে আর এ অপদার্থের কাছে কী আশা করা যায় ! সত্যপ্রিয় বড়োই ক্ষুণ্ণ হয়।

বুঝতে পারলে লিখে জানিয়ো। আমি সঙ্গে সঙ্গে সব ব্যবস্থা কর'ব ফিবে আসাব।

আজে হ্যাঁ, জানাব বইকী, নিশ্চয়।

যামিনী চলিয়া গেলে সত্যপ্রিয় ভাবে, মাসে মাসে এতগুলি টাকা হাতে পাইয়া আর এমন আরাম ও উৎসবের মধ্যে দিন কাটাইয়া গিয়া টাকা আর আরামের অভাবটাও যদি সেখানে তাকে আসল ব্যাপারটা বুঝাইয়া দিতে না পারে, তবে আর কিছু না বুঝাইলেও চলিবে।

তবু, কয়েক দিন পরেই সে যামিনীর কাছে একখানা পত্র পাঠাইয়া দেয়। জামাইয়ের কাছে এ রকম কবিত্বপূর্ণ পত্র লেখা সত্যপ্রিয়ের মতো মানুষের পক্ষে শুধু নয়, অনেকের পক্ষেই উদ্ভট আর খাপছাড়া। সত্যপ্রিয়ের পত্রের মর্ম এই যে, বিবাহের পর হইতে মেয়ের মুখ তার বিষণ্ণ, যাই হোক, এবার যামিনী ফিরিয়া আসিবার পর বোধ হয় তার মুখে হাসি ফুটিবে : অন্তত যামিনী যে হাসি ফুটাইবে তাতে সন্দেহ নাই।

ছয়

যশোদা ভাবিয়াছিল, শ্রমিকদের সঙ্গে তার সম্পর্ক বুঝি চিরকালের জন্য চুকিয়া গিয়াছে। বহুদিন নিজের বাড়ি দুটিতে অনেকগুলি ওই শ্রেণির নরনারীকে আশ্রয় দিয়া, দুবেলা কুড়ি-বাইশজনের জন্য ভাত রান্না করিয়া, এখানে-ওখানে দু-চারজনের কাজ জুটাইয়া দিয়া, বিপদে-আপদে পরামর্শ দিয়া আর সাহায্য করিয়া তার মনে একটা ধারণা জন্মিয়া গিয়াছিল, ঠিক ও ভাবে ছাড়া এ সব মানুষের সঙ্গে আর কোনোরকম সম্পর্ক গড়িয়া উঠিতে পারে না।

সম্পর্কটা গড়িয়া উঠিয়াছিল আপনা হইতে, স্বাভাবিকভাবে। প্রথমে ওদের কেবল ভাড়াটে হিসাবে যশোদা বাড়িতে থাকিতে দিয়াছিল মাত্র, ওদের সুখদুঃখ ভালোমন্দের ভাবনাটাও যে তাকে একদিন ভাবিতে হইবে সে তখন এ কথাটা কল্পনাও করিতে পারে নাই। চোখের সামনে এই শ্রেণির জীবগুলির কয়েকজন প্রতিনিধির জীবনযাপনের প্রক্রিয়া দেখিতে দেখিতে যশোদা টের পাইয়াছিল, এরা সব বয়স্ক শিশুমাত্র, অভাবে আর চাপে খানিকটা বিগড়াইয়া গিয়াছে। একটু একটু করিয়া তখন মায়া জাগিয়াছিল যশোদার মধ্যে। একটু একটু করিয়া তারপর সে জড়াইয়া গিয়াছিল ওদের জীবনের সঙ্গে। চাঁদের জন্য সব সময় যশোদার মনটা তখন হুহু করিত, এতগুলি বয়স্ক শিশুকে পাইয়া শোকটা তার কমিয়া গিয়াছিল।

কিন্তু ওরা তাকে ত্যাগ করিয়াছে। সত্যপ্রিয়ের কারসাজিতে আর তাকে ওরা বিশ্বাস করে না। তাকে শত্রু জানিয়া, তাব সংস্পর্শে আসিলে বিপদ জানিয়া, সকলে তফাতে সবিয়া গিয়াছে। ওদের ভালোবাসিবার ভান করিয়া সে উপরওয়ালাদের স্বার্থসাধনের সাহায্য করে, ওদের ন্যায্য দাবি ত্যাগ করায়, ধর্মঘট ভাঙিয়া দেয়, কাজ হইতে তাড়ায়। এতকাল পরে যশোদার সম্বন্ধে ওদের এই ধারণা জন্মিয়াছে !

অর্থহীন অভিমানকে প্রশ্রয় দেওয়াব মানুষ যশোদা নয়, কোনো ব্যাপাবকে ব্যক্তিগত কল্পনাব বাপ্পে সে ফাঁপাইয়া তোলে না। বাঁচিয়া থাকাটাই যাদের পক্ষে একটা বীভৎস সংগ্রাম, অত কৃতজ্ঞতার ধার ধারিলে কি তাদের চলে ? কৃতজ্ঞতাও ওদের যথেষ্ট আছে। কাজ না থাকার সময় দুদিন যাকে যশোদা খাইতে দিয়াছে, কাজ পাওয়ার পরেও যশোদার একটি ধমকে সে যে কাঁদো-কাঁদো হইয়া যাইত, বসিয়া বসিয়া যশোদা দু-দণ্ড সুখদুঃখের গল্প করিলে সকলে যে কৃতার্থ বোধ করিত, এ কি কৃতজ্ঞতা নয় ? কিন্তু যখন জানা গেল যশোদা তলে তলে তাদের ক্ষতিই কবে, যশোদার বাড়িতে থাকিলে কাজ থাকে না, শ্রমিক সমিতি হইতেও যখন উপদেশ দেওয়া হইতে লাগিল যশোদাকে বর্জন করিবার, ওদের তখন আর কী করিবার ছিল ?

এ সব কথা যশোদা ভাবিয়াছে। কিন্তু মন তার অবুঝ হইয়া পড়িয়াছে, কিছুই আর মানিতে চায় না। সুবর্ণকে নিয়া উধাও হইয়া গিয়া নন্দ তাকে আরও বেশি কাবু করিয়া দিয়াছে। নিজেকে যশোদার কেমন অপবোধী মনে হয়। মনে আর জোর পায় না। যুক্তিতর্ক দিয়া মনকে বুঝাইয়া মনের জোর তো আর বাড়ানো যায় না।

তাই, কেবল শ্রমিকরা যে তাকে ত্যাগ করিয়াছে তা নয়, সেও এক রকম ওদের ত্যাগ করিয়াছে। সত্যপ্রিয় মিলের কেউ না আসুক, অন্য মিলের অনেকে মাঝে মাঝে যশোদার সঙ্গে দেখা করিতে আসিয়াছে, কেউ আসিয়াছে বিপদে পড়িয়া, কেউ আসিয়াছে কাজের সন্ধানে, কেউ আসিয়াছে নিছক দু-দণ্ড যশোদার সঙ্গে বসিয়া গল্প করিবার জন্য। সকলে যে তাকে ত্যাগ করে নাই তার এতবড়ো একটা প্রমাণও যশোদাকে কিছু খুশি করিতে পারে নাই।

সোজাসুজি কড়া সুরে জিজ্ঞাসা করিয়াছে, কী চাই ?

কী চাই অর্ধেকটা শুনিতে না শুনিতে বলিয়াছে, আমি পারব না। আমার কাছে এসেছ কেন ? মনটা যশোদার সত্যিই একটু বিগড়াইয়া গিয়াছে।

তবু মনের কোণে হয়তো যশোদার ক্ষীণ একটু আশা বা ইচ্ছা ছিল, একদিন আবার বাড়িতে তার কুলিমজুরের বাসা বাঁধিবে, আবার সে দুবেলা ওদের ভাত রাঁধিয়া খাওয়াইবে। কিন্তু রাজেনের প্ররোচনায় বাড়িতে ভদ্র ভাড়াটীদের আনিবার পর সে আশাও যশোদার ঘুচিয়া গিয়াছে। তাছাড়া, যে পরিবর্তন ঘটিয়াছে তার বাড়ির চারিদিকের শহরতলিতে, তাতে কুলিমজুরদের এখানে আর বাস

করাও বোধ হয় সম্ভব নয়। চারিদিকের শহুরে ভদ্র আবহাওয়ার চাপে বেচারাদের দম আটকাইয়া আসিবে, এক মুহূর্তের স্বস্তি থাকিবে না।

কিন্তু আবার অন্যদিক দিয়া কুলিমজুরদের সঙ্গে যশোদার যোগাযোগ টিকিয়া গেল।

একদিন রাজেন মাঝবয়সি এক ভদ্রলোককে আনিয়া হাজির, যশোদার সঙ্গে আলাপ করিবে। কেন আলাপ করিবে, মানুষটার নাম কী, কী করে, কিছুই রাজেন প্রথমে বলিল না। লোকটিও ঘণ্টাখানেক এ-বিষয়ে সে-বিষয়ে এলোমেলো আলোচনা করিয়া উঠিয়া গেল। আলাপ করিতে যে আসিয়াছে সে শুধু আলাপ করুক, যশোদার তাতে কোনো আপত্তি নাই, কিন্তু এ কোন দেশি আলাপ ? একেবারে যেন অনেকদিনের পরিচয় ছিল, খানিকক্ষণ বসিয়া বাজে গল্পে আনন্দ করিয়া চলিয়া গেল। লোকটি বসিয়া থাকিতে থাকিতে যশোদা কয়েকবার রাজেনের মুখের দিকে চাহিয়াছিল, কিন্তু লোকটি বিদায় হওয়ার আগে তার কাছে একটি কথাও শূনা গেল না।

‘আসছি’ বলিয়া লোকটির সঙ্গে উঠিয়া গিয়া রাজেন ফিরিয়া আসিল।

কেমন লাগল লোকটিকে চাঁদের মা ?

তা যেমনি লাগুক, আগে বলো তো শূনি মানুষটা কে ?

খুব নামকরা লোক গো—বিধুবাবু।

বিধুবাবুর নাম যশোদাও শুনিয়াছে, শ্রমিক নেতা হিসাবে লোকটি সতাই এতখানি বিখ্যাত যে এভাবে বাড়ি আসিয়া যশোদার সঙ্গে আলাপ করিয়া যাওয়া সতাই বিশ্বাসের ব্যাপার !

বিধুবাবু ! বিধুবাবু আমার সঙ্গে আলাপ করতে এলেন কেন ?

রাজেনের চেয়ে সে কথা বিধুবাবুই যশোদাকে ভালো করিয়া বুঝাইয়া বলিল, দিন তিনেক পরে। আবার তেমনভাবে অসময়ে আসিয়া আলগোছে একটি মোড়াতে বসিয়া বলিল, তাহলে পরশুর সভাতে যাচ্ছ তো দিদি ?

আগের দিন বিধুবাবু তাকে তুমিও বলে নাই, দিদিও বলে নাই। যশোদা আশ্চর্য হইয়া বলিল, কীসের সভা ?

বিধুবাবু আরও বেশি আশ্চর্য হইয়া বলিল, কেন, রাজেন বলেনি ?

কই, না ?

সঙ্গে সঙ্গে বিধুবাবুর হাসির শব্দে যশোদার বাড়ি সরগরম হইয়া উঠিল।—তা রাজেন ওই রকম মানুষই বটে ! আমি কে তা তো বলছে, না তাও বলেনি ?

প্রথমে বলেনি, আপনি যাওয়ার পর বলেছে।

যশোদারও হাসি আসিতেছিল। প্রথম দিন বিধুবাবুর তবে ধারণা ছিল যশোদা তার নামধাম আর দেখা করিতে আসার উদ্দেশ্য সমস্তই জানে, তাই পরিচয়ও দেয় নাই, কাজের কথাও বলে নাই। লোকটিকে যশোদার ভালো লাগিতে থাকে। এ রকম লোক ভালো, যারা অকারণে প্রথম পরিচয়ের দিন অনাবশ্যক ব্যগ্রতার সঙ্গে বড়ো বড়ো কথা বলিতে আরম্ভ করিয়া আরও বড়ো প্রয়োজন যে চেনা হওয়া, তাতে বাধা সৃষ্টি করিয়া বসে না।

দুদিন পরে শ্রমিকদের একটি সভা হইবে, সাধারণ সভা। প্রথমে কর্মীদের সভা, তারপর শ্রমিকদের। বিধুবাবু যশোদাকে নিমন্ত্রণ করিয়া নিয়া যাঁহিতে চায়, ব্যাপারটা একটু দেখিয়া শুনিয়া বুঝিয়া আসিবে। তারপর যশোদার যদি ইচ্ছা হয়, সমিতির মধ্যে ভিড়িয়া গিয়া একটু কাজ করিতে চায় সে তো আনন্দের কথা। আর ভিড়িতে যদি না চায় নাই ভিড়িবে। একবার গিয়া দেখিয়া আসিতে দোষ নাই।

সমিতি-টমিতির সঙ্গে কী আমার বনবে বিধুবাবু ? সমিতির লোকেরা আমার ওপর চটে আছে, কত কথাই রটিয়েছে আমার নামে :

ও সব লোকেশবাবুর কাজ দিদি। লোকেশবাবুর একটু বাড়াবাড়ি আছে কিনা সব বিষয়ে, সমিতির মেম্বার না হয়ে কেউ শ্রমিকদের ভালো করবে তা পর্যন্ত সহ্য হয় না। আগের কথা ভুলে যাও দিদি, তোমাকে আমাদের চাই।

অনেকগুলি প্রশ্ন করিয়া অনেকক্ষণ ভাবিয়া যশোদা সভায় যাইতে রাজি হইয়া গেল।

বিদায় নেওয়ার আগে যশোদা হঠাৎ জিজ্ঞাসা করিল, আমার কথা শুনলেন কার কাছে ? রাজেন বলেছে বুঝি ?

বিধুবাবু বলিল, সত্যপ্রিয় মিলের কাণ্ডটার সময় আমি ছিলাম পশ্চিমে। এসে অনেক রকম কথা শুনলাম। তোমার কথা তো আগে থেকে সব জানতাম দিদি, তাই শূনে মনে হল, এ তো বড়ো খাপছাড়া ব্যাপার হচ্ছে। তারপর রাজেন একদিন আমায় বললে বসে বসে মরচে ধরায় বড়ো নাকি কষ্ট পাচ্ছ। আমারও একটু দরকার ছিল, তাই তাড়াতাড়ি ছুটে এলাম। সত্যপ্রিয় মিল বড়ো করেছে জানো ?

শুনেছি।

বিধুবাবু খানিকক্ষণ তীক্ষ্ণদৃষ্টিতে যশোদার মুখের ভাব দেখিতে থাকে। বড়ো ধারালো দৃষ্টি বিধুবাবুর, দেখিলেই বুঝা যায় মানুষটা সে ভয়ানক নিষ্ঠুর। তবে এটুকু যশোদা আগেই বুঝিয়াছিল, অন্যাকে কষ্ট দিয়া আনন্দ পাওয়ার নিষ্ঠুরতা এটা নয়, এ নিষ্ঠুরতা জ্ঞান আর অভিজ্ঞতার প্রতিক্রিয়া, যে প্রতিক্রিয়ায় মনের কোমলতা আর ভাবপ্রবণতা গোড়াসুদ্ধ উপড়াইয়া যায়। সাধারণ আলাপেই এটা বেশ বোধগম্য হয়। তাছাড়া, যেভাবে বিধুবাবু হাসে তার মধ্যেও তার মনের এ পরিণতির প্রমাণ স্পষ্টই দেখিতে পাওয়া যায়। এ রকম হাসির সঙ্গে যশোদার পরিচয় আছে, তার পরিচিত আবেক জন লোক এ ভাবে হাসিত। সমস্ত ব্যাপারে যারা কৌতুক বোধ করে, মর্মান্তিক বেদনায় কাঁদিবার সময়ও একজনকে খাপছাড়া মুখের ভঙ্গি করিতে দেখিয়া যাদের হাসি পায়, কেবল তারাই এ রকম হাসি হাসিতে পারে।

এ রকম লোককে কিন্তু এক বিষয়ে নিশ্চিত মনে বিশ্বাস কবা যায়। এদের আব যাই থাক, কিছুমাত্র স্বার্থপরতা থাকে না। পরের জন্য বেশি মন না কাঁদুক, নিজের ভাবনাটা এরা একেবারেই ভাবে না।

সেদিন খাওয়ার সময় সূত্রতা বলিল, আমরাও আজ এক জায়গায় যাচ্ছি দিদি।

অজিত তাকে আজ সিনেমায় নিয়া যাইবে। খবরটা দেওয়ার সময় সূত্রতা মুচকি মুচকি হাসে। যশোদাও হাসে।

আমায় নিয়ে যাবে না ?

তুমি না কোথায় যাচ্ছ আজকে ?

ও, তাই আজ তোমরা সিনেমায় যাচ্ছ, আমায় ফাঁকি দেবার সুযোগ পেয়ে !

বলিয়া প্রচণ্ড শব্দে যশোদা হাসিতে থাকে। এই সামান্য পরিহাসে এত জোরে হাসিবার কী ছিল সেই জানে, হাসিটা বিধুবাবুর মতো হইতেছে খেয়াল করিয়া হঠাৎ সে থামিয়া যায়।

তারপর সূত্রতা যে খবরটা দেয় সেটা একটু মারাত্মক। একজনের গাড়িতে তাবা সিনেমায় যাইবে, এদিকেই কোথায় সত্যপ্রিয় বলিয়া একজন মস্ত বড়োলোক থাকে, তার ছেলের গাড়িতে। কবে যেন অজিত তার সঙ্গে কোন স্কুলে পড়িয়াছিল, হঠাৎ কদিন আগে দেখা হইয়া গিয়াছে। তারপর তাদের পরামর্শ হইয়াছে পরস্পরের বউকে নিয়া আজ তারা একসঙ্গে সিনেমায় যাইবে, আলাপ পরিচয়ও হইবে, একটু আনন্দও করা হইবে।

পাকা গিম্বির মতো মুখ করিয়া সুব্রতা বলিতে থাকে, আমার কি আর সিনেমা-টিনেমায় যাওয়ার শখ আছে দিদি ? কী করব, বন্ধু বড়ো ধরেছে। ও কী বলছিল জানো দিদি ? বন্ধুর বাপ নাকি বউকে নিয়ে ছেলের কোথাও যাওয়া দুচোখে দেখতে পারে না, ভীষণ চটে যায়। সেকলে ভূত আর কী। বাপ নাকি কোথায় গিয়েছে কদিনের জন্য, ছেলেও বউকে নিয়ে খুব বেড়িয়ে বেড়াচ্ছে।

মহীতোষকে যশোদা জানে, ছেলেটার বুদ্ধি একটু কাঁচা। সকলে তাকে সেকলে, গৈয়ো আর অসভ্য মনে করে ভাবিয়া বড়োই মনের কষ্টে সে দিন কাটায়। বাহিরের লোকের সঙ্গে কথায় ব্যবহারে সে বিনয়ের অবতার, যশোদার সঙ্গে পর্যন্ত এমন মুখ কাঁচুমাচু করিয়া কথা বলে যে দেখিলে হাসিও পায়, মমতাও হয়। রাতে ঘুমের মধ্যেও হয়তো বাপের ভয়ে মহীতোষ চমকিয়া জাগিয়া ওঠে, কিন্তু বাড়িতে যারা আশ্রিত ও আশ্রিতা, আফিসে ও কারখানায় যারা জীবিকার প্রত্যাশী তাদের সঙ্গে তার ব্যবহার বড়ো খারাপ। কথায় কথায় কারণে অকারণে রাগিয়া যায়, অপমান করে। অভিজ্ঞের সঙ্গে মহীতোষের বন্ধুত্ব না হয় আছে, কিন্তু মহীতোষ কি জানে না বন্ধু তার যশোদার বাড়িতে থাকে ? যশোদার বাড়ির ভাড়াটের সঙ্গে ঘনিষ্ঠতা করার সাহস সে পাইল কোথায় ?

শ্রমিক সমিতির সভায় গিয়া যশোদা যে বিশেষ খুশি হইল তা বলা যায় না, তবে তেমন খাবাপও তার লাগিল না। পরিচালক সমিতির সভায় বড়ো বেশি তর্ক চলে, নিজের নিজের মতামতটা জাহির করিবার জন্য অনেকে বড়ো ব্যস্ত। বড়ো বড়ো কথাও অনেক বলা হয়, একেবারে নাটকীয় ভঙ্গিতে, অববুদ্ধ একটা উত্তেজনা যেন বক্তার অসহ্য হইয়া উঠিয়াছে। তবে সকলে এ রকম নয়, শান্ত ও সংযত মানুষও কয়েকজন আছে, ভাবিয়া চিন্তিয়া হিসাব করিয়াই যারা কথা বলে। কিন্তু এদেরও আসল বক্তব্যটা যশোদা আগাগোড়া ঠিক বুঝিয়া উঠিতে পারিতেছিল না। খানিকক্ষণ হয়তো কথাগুলি জলের মতো পরিষ্কার বুঝা যাইতে লাগিল তাবপর হঠাৎ কখন-কীভাবে যে সমস্ত বিষয়টা জটিল আর দুর্বোধ্য হইয়া গেল, কিছুই যশোদার মাথায় ঢুকিল না। তবে সে জন্য এদের সে দোষ দিল না, অপরাধটা ধরিয়া নিল নিজের বুদ্ধির।

এরা সমস্ত জগতের শ্রমিকদের অবস্থা জানে, শ্রমিক সমস্যা এরা বৈজ্ঞানিক উপায়ে বিশ্লেষণ করিয়াছে, এদের সমস্ত তর্কবিতর্ক পরিষ্কার বুঝিবার মতো জ্ঞান সে কোথায় পাইবে ? তাব মতো ঠেকনা দিয়া দশ-বিশজন শ্রমিককে কোনো রকমে খাড়া রাখিবার ব্রত এদের নয়, ধনিকতন্ত্রের চোরাবালির গ্রাস হইতে সমস্ত শ্রমিককে বাঁচাইয়া শক্ত মাটিতে তাদের দাঁড়ানোর ব্যবস্থা করা এদের কাজ।

সে কাজের বিরাটত্ব কল্পনা করিয়া যশোদার মাথা ঘুরিয়া যায়। কুলিমজুরের সঙ্গে সে মিশিয়াছিল, তাঁদের কয়েকজনকে ভালো বাসিয়াছিল, একটা শ্রেণি হিসাবে তাদের কথা কখনও ভাবিয়া দ্যাখে নাই। আজ সকলের আলোচনা হইতে শ্রমিক সমস্যার স্বরূপ তার কাছে যতটুকু প্রকট হইয়া উঠিল তাতেই সে স্তম্ভিত হইয়া গেল।

শ্রমিকসভার বক্তৃতাগুলি যশোদার ভালো লাগিল না। প্রত্যেকটি বক্তা প্রচণ্ড উচ্ছ্বাসই শুধু বিতরণ করিয়া গেল, কোনো বিষয়েই একটু ব্যাখ্যা করিয়া বুঝাইয়া দিবার চেষ্টা কারও দেখা গেল না। বক্তৃতাগুলি জোরালো হইল সন্দেহ নাই, শ্রমিকদের উপর যথেষ্ট প্রভাবও দেখা গেল বক্তৃতার, কিন্তু এ রকম প্রভাব কি স্থায়ী হয় ? কাজে লাগে ?

হয়তো লাগে। যা ওদের করা উচিত সেটা কেন করা উচিত বুঝাইয়া দেওয়ার বদলে এমনি বক্তৃতার সাহায্যে করাইয়া নেওয়াই হয়তো সহজ ও সম্ভব ?

এই সব কথা ভাবিতে ভাবিতে রাত প্রায় নটার সময় বাড়ির কাছাকাছি আসিয়া যশোদার চোখে পড়িল, তাদের গলির মোড়ে দাঁড়াইয়া আছে সত্যপ্রিয়ের প্রকাশ গাড়ি। ভিতরে একা বসিয়া আছে একটি অল্পবয়সি বউ। পাশ কাটাইয়া যশোদা গলির মধ্যে ঢুকিতে যাইতেছিল, বউটি ক্ষীণস্বরে ডাকিয়া বলিল, চাঁদের মা, ও চাঁদের মা, শুনুন।

বউটি কে এবং এখানে গাড়ির মধ্যে একা কেন বসিয়া আছে যশোদা আগেই অনুমান করিয়াছিল। কাছে আসিতে মহীতোষের বউ বলিল, ওঁকে একটু শিগগির পাঠিয়ে দেবেন চাঁদের মা ?

তা দিচ্ছি, কিন্তু তোমায় একা বসিয়ে বেখে কী বলে নোমে গেল বাছা ?

কথা কইতে কইতে এগিয়ে গেছেন।

বাড়ির দরজার সামনে দাঁড়াইয়া মহীতোষ, অজিত আর সুব্রতার মধ্যে তখনও কথা চলিতেছিল। অজিত বা সুব্রতা যে মহীতোষকে আটকাইয়া রাখে নাই, মহীতোষ দাঁড়াইয়া কথা বলিতেছে বলিয়াই দুজনে তারা ভিতরে যাইতে পারিতেছে না বুঝিতে যশোদার দেরি হইল না। ছেলেমানুষ তনজনেই এবং মহীতোষের বুদ্ধিটা সতাই একটু কাঁচা। সুব্রতাই বা কী, এদিকে তো মুখে তার কথা ছোট্টে তুবড়ির মতো, ভদ্রতা বজায় রাখিয়াই একটু ইজিতেও কী সে মহীতোষের মনে পড়াইয়া দিতে পারিল না, গলির মোড়ে বউটাকে সে একা ফেলিয়া আসিয়াছে ?

যশোদাকে দেখিয়া মহীতোষ বলিল, কেমন আছেন চাঁদের মা ? আজ এঁদের নিয়ে—

একা বসে থাকতে বউমার ভয় করছে।

আঁ ? ও, হ্যাঁ, যাই।

বাড়ির ভিতরে ঢুকিয়া যে যার ঘরে কাপড় ছাড়িতে গেল। ধনঞ্জয় যশোদার বিছানা দখল কবিয়া শুইয়া আছে।

তুমি এখানে যে ?

ধনঞ্জয় জবাব দিল না।

ভাত খেয়েছ !

খেয়েছি।

সাবাদিন রাগে গজগজ করিতে করিতে কুমুদিনী আজ এখানে আসিয়া রাঁধিয়া দিয়া গিয়াছে। কথা ছিল, কুমুদিনীর নন্দ আসিয়া রাঁধিয়া দিবে, কিন্তু শত্রুর বাড়িতে নিজে রাঁধিয়া দিতে না আসিলে কুমুদিনীর বোধ হয় তৃপ্তি হয় না।

বাহিরে গিয়া কাপড় ছাড়িয়া যশোদা তিনজনের ভাত বাড়িল, তারপর ধনঞ্জয়কে ডাকিয়া বলিল, এখানে এসো না, আমাদের খাওয়া দেখবে আর গল্প শুনবে কোথায় গিছলাম ?

ধনঞ্জয় সাড়া দিল না বটে কিন্তু খানিকক্ষণ পরে মুখ অন্ধকার করিয়া উঠিয়া আসিল। সকলে তখন খাইতে বসিয়াছে। কাঠের পা ঠকঠক করিতে করিতে সে বাড়ির বাহিরে চলিয়া গেল। সুব্রতা বলিল, ওঁর ঠকঠক করে হাঁটা দেখলে এমন লাগে আমার ! কী হল দিদি তোমার ওখানে ?

কী আর হবে, কুলিমজুরের মিটিং হল। তোমরা কেমন বায়োস্কোপ দেখলে বলো।

বায়োস্কোপের চেয়ে মহীতোষ আর তার বউয়ের সঙ্গে পরিচয়ের কাহিনি বলিতে আর দুজনের সমালোচনা করিতে সুব্রতার বেশি আগ্রহ দেখা গেল, ওদের কথাতেই খাওয়া শেষ হইয়া গেল। একবার মুখ খুলিলে সুব্রতা আর খামিতে পারে না। আঁচাইয়া উঠিয়া ছবির গল্প আরম্ভ করিয়া বলিল, দেখবে দিদি বইটা ? নাম-টাম আছে, অনেকের ছবিও আছে।

বাংলা চলচ্চিত্র। সূত্রতার কথা শুনিতে শুনিতে যশোদা ছাপানো প্রোগ্রামটির পাতা উলটাইতেছিল। এক পাতায় দুজন অভিনেতা অভিনেত্রীর ছবি দেখিয়া তার চোখের পলক বন্ধ হইয়া গেল।

নন্দ আর সুবর্ণ সিনেমায় অভিনয় করিতেছে ?

সূত্রতা বলিল, কী হল দিদি ? কার ফটো দেখেছ ? ওঃ, ওই ছেলেটার ! এমন সুন্দর গান করলে দিদি ছেলেটা, কী বলব তোমায় !

সাত

যামিনী ফিরিয়া আসিল এবং পরাধীনতায় অভ্যস্ত মানুষও যেমন বড়োরকম একটা ঘা খাওয়ার সময় কিছুক্ষণের জন্য গা নাড়া দিয়া উঠিয়া স্বাধীনতার আন্দোলন আরম্ভ করিয়া দেয়, চার টাকা পথখরচ দিয়া তাড়াইয়া দেওয়ার জন্য সেইরকম একটা গোলমাল বাধাইয়া দিল।

আমাদের স্বাধীন করো বলাটাই এ ধরনের আন্দোলনের প্রচলিত প্রথা। যামিনীও রাগ করিয়া সত্যপ্রিয়ের কাছে দাবি করিয়া বসিল, সত্যপ্রিয় তার ভিন্ন থাকিবার ব্যবস্থা করিয়া দিক।

ভিন্ন থাকবে ? মেসে ?

আজ্ঞে না। অন্য একটা বাড়ি নিয়ে—

সত্যপ্রিয় সমস্তই বুঝিতে পারিতেছিল তবু জামাইয়ের ছেলেমানুষি রাগ কমানোর জন্য মুদু একটা হাসিয়া পরিহাসের সুরে বলিল, আমার তো আর বাড়ি নেই বাবা, এই একটা ছাড়া ?

ছোটোখাটো একটা বাড়ি ভাড়া নেওয়ার কথা বলছিলাম।

এবার একটু গম্ভীর হইয়া সত্যপ্রিয় বলিল, বেশ তো, সে জন্য বাস্তব হবার কী আছে ! কিছুদিন যাক না !

যামিনী একগুঁয়ের মতো বলিল, আজ্ঞে না, দু-চারদিনের মধ্যে একটা বাড়ি ঠিক করে চলে যাব ভাবছিলাম।

সত্যপ্রিয় এবার রীতিমতো গম্ভীর হইয়া গেল।

দু-চারদিনের মধ্যে চলে যাবে ভাবছিলে ? তা বেশ। একটা বাড়ি দেখে নাও, কলকাতায় বাড়ির অভাব নেই। কিন্তু, একা একজননের জন্য একটা বাড়ি না নিয়ে মেসে হোটোলে থাকলেই সুবিধে হত না ?

তখন যামিনী স্পষ্ট করিয়াই জানাইয়া দিল যে একা বাড়ি ভাড়া করিয়া থাকিবার কথা সে ভাবিতেছে না, সকলকে সঙ্গে নিয়া যাওয়াই তার ইচ্ছা।

সত্যপ্রিয় বলিল, আমাকে তার ব্যবস্থা করে দিতে হবে, এই কথা বলছ তো ? মাসে মাসে বাড়িভাড়াটাও দিতে হবে নিশ্চয় ?

আমার মাইনেটা কিছু বাড়িয়ে দিলে—

কীসের মাইনে ? একজনকে বসিয়ে বসিয়ে মাসে দুশো টাকা হাতখরচা দিলে কি আপিস চলে বাপু ? কাজকর্ম শিখলে হয়তো একদিন মাইনে হবে তোমার, এখন আমার পকেট থেকে যে হাত-খরচার টাকাটা দিচ্ছি, সেটা আর বাড়াতে পারব না। কমিয়ে দিতে হবে কিনা কে জানে,—বড়ো টাকার টানাটানি চলছে আমার।

খুব সকালে যামিনী আসিয়া পৌঁছিয়াছিল, ঝগড়ার পর না খাইয়াই আবার বাড়ি ছাড়িয়া চলিয়া গেল। বিকালে অজিভের সঙ্গে সে গেল যশোদাব বাড়ি।

সত্যপ্রিয় চার টাকা পথখরচ দিয়া জামাইকে দেশে পাঠাইয়া দিয়াছে যশোদা এ খবরটা জানিত। অজিত খবর দিয়াছিল। অজিত মহীতোষের বন্ধু, বুদ্ধিটাও মহীতোষের তেমন ধারালো নয় যে ঘরের কোনো কোনো খবর যে বন্ধুর কাছেও চাপিয়া যাওয়া উচিত এটুকু তার খেয়াল থাকিবে। সত্যপ্রিয়ের মনের কোনো কথা কেউ কোনোদিন ঘৃণাকরে টের পায় না, মহীতোষের মনের কথাগুলি বাতাসে উড়িয়া বেড়ায়।

যামিনীকে দেখিয়া যশোদা একটু অবাক হইয়া যায়, তারপর তার প্রস্তাব শুনিয়া যশোদার একেবারে চমক লাগে।

আমার এখানে থাকবেন মানে কী গো জামাইবাবু ?

অজিত বুদ্ধিমানের মতো একটু তফাতে সবিয়া গিয়াছিল। যামিনী গম্ভীরভাবে বলিল, শ্বশুরের অন্ন আর কতকাল ধ্বংস করব চাঁদের মা ? তাই ভাবছি, অজিতবাবুর মতো আপনার এখানে ঘর ভাড়া করে থাকব।

একা ?

উহুঁ, সবাইকে নিয়ে থাকব—অজিতবাবুর মতো।

যশোদা হাসিয়া ফেলিল। সত্যপ্রিয়ের মেথেকে নিয়া যামিনী তাব বাড়িতে ঘবভাড়া করিয়া থাকিবে। এমন ছেলেমানুষি কথা যশোদা জীবনে কখনও শোনে নাই।

ঝগড়া হয়েছে বুঝি শ্বশুরের সঙ্গে।

ঠাক ঝগড়া নয়, ওখানে আর বাস করা যায় না। কী কুক্ষণেই যে বড়োলোকের মেয়ে বিয়ে করেছিলাম চাঁদের মা !

প্রথমটা হাসিয়া উড়াইয়া দিলেও শেষ পর্যন্ত যশোদা ব্যাপারটার গুরুত্ব বুঝিতে পারে। একটু সহানুভূতি পাইয়াই যামিনীর মুখ খুলিয়া যায়, ফেনাইয়া ফাঁপাইয়া বাড়াইয়া কমাইয়া অবিরাম সে বড়োলোকের, বিশেষ করিয়া সত্যপ্রিয়ের মেয়েকে বিবাহ করার ট্র্যাজেডি বর্ণনা কবিয়া যায়, দুর্ভাগ্যের ইতিহাস যেন তার শেষ হইবে না।

ব্যাপারটা বুঝিতে যশোদার বিশেষ কষ্ট হয় না, সত্যপ্রিয়কে সে তো চেনেই, যামিনীর মতো ছেলেরাও তার অজানা নয় ! অন্য কারণে ঘরজামাই হইলে যামিনীকে সে আমল দিত কিনা সন্দেহ, সস্ত্রীক যামিনীকে বাড়িতে থাকিতে দিলে যে হাঙ্গামা আরম্ভ হইবে সেটা সে বেশ অনুমান করিতে পারে। তাছাড়া, বেশি দিন বড়োলোক শ্বশুরকে অবহেলা কবিয়া শ্বশুরবাড়ির আরাম ছাড়িয়া এখানে বাস করিয়া থাকিবার মানুষও যামিনী নয়, তার বড়োলোক শ্বশুরের কন্যাটিও নয়। সত্যপ্রিয়ের কাছ হইতে একবার ডাক আসিলেই দুজন ফিরিয়া যাইবে। সত্যপ্রিয়কে একটু নরম করার জন্য দুদিনেব জন্য এ বিদ্রোহ।

তবু দুদিনেব জন্যও সত্যপ্রিয়কে একটু বিপাকে ফেলা চলিবে শুধু এই জনাই যশোদা যামিনীর প্রস্তাবে রাজি হইয়া গেল।

প্রতিহিংসা ?

তাছাড়া আর কী বলা চলে ! মুখোমুখি দুটি বাড়িতে পঁচিশ-ত্রিশটি মানুষ নিয়া যশোদার ছিল গৃহানো সুখের সংসার, সত্যপ্রিয় সে সংসার ভাঙিয়া দিয়াছে। সত্যপ্রিয়কে জ্বালাতন করার সুযোগ কী সহজে ছাড়া যায়।

ক্ষতি করার জন্য মানুষকে কষ্ট দিয়া সুখ পাওয়া স্বভাব যশোদার নয়, সত্যপ্রিয়কে আঘাত দেওয়ার জন্য ভাবিয়া চিন্তিয়া কোনো উপায় আবিষ্কার করার কথাটা তার মনেও আসে নাই। যামিনী বাড়ি বইয়া আসিয়া প্রতিশোধের এ রকম একটা সুযোগ হাতে তুলিয়া না দিলে যশোদা কোনোদিন কিছু করিত না। তাছাড়া, মেয়েজামাইকে এ ভাবে বাড়িতে রাখিলে সত্যপ্রিয়ের ধনসম্পদ নষ্ট হইবে

না, হাত-পাও ভাঙিবে না। হয়তো শুধু সহ্য করিতে হইবে নিছক একটু মানসিক অশান্তি। যশোদার অশান্তির তুলনায় সেটা কিছুই নয়।

উনি কি মেয়েকে ছেড়ে দেবেন আপনার সঙ্গে ?

উনি ছেড়ে না দিন, ওঁর মেয়ে আসবে।

মেয়েকে চুরি করবেন ! বলিয়া যশোদা হাসে !

যশোদা তামাশা করুক, যামিনীর সমস্যা কিন্তু দাঁড়াইয়াছিল তাই, সত্যপ্রিয়ের মেয়েকে চুরি করিবে, অথবা সকলের সামনে বুক ফুলাইয়া তার হাত ধরিয়া সত্যপ্রিয়ের বাড়ি ছাড়িয়া চলিয়া আসিবে ? সত্যপ্রিয়কে আগে হইতে জানাইয়া তার মেয়েকে নিয়া বাড়ি ছাড়া সহজ ব্যাপার নয়, যদিও সে মেয়ে যামিনীর আইন আর শাস্ত্রসম্মত স্ত্রী।

যোগমায়ার সঙ্গে সে দেখা করে দুপুরে, সত্যপ্রিয় যখন বাড়ি থাকে না। পরপর তিনটি দুপুর পরামর্শের পর যোগমায়া মনস্থির করিতে পারে। গরিবের মতো কিন্তু স্বাধীনভাবে থাকিবার অর্থ যোগমায়ার জানা নাই, সেটা তার কাছে একটা কাল্পনিক উত্তেজনাময় নতুনত্ব মাত্র, যশোদার বাড়িতে থাকিবার কথায় সে খুঁতখুঁত করিতে থাকে। কলিকাতায় এত বাড়ি থাকিতে যশোদার বাড়িতে কেন ? তাছাড়া বাপের বাড়ির এত কাছে যশোদার বাড়িতে থাকাটা কি উচিত হইবে, না, ভালো দেখাইবে ? নাটক ছাড়া মানায় না এমন অনেক বড়ো বড়ো আবেল-তাবেল কথা বকিয়া যশোদার বাড়িতে বাস করিতে যোগমায়াকে যামিনী যদি বা রাজি করাইতে পারে, চুপিচুপি বাড়ি ছাড়িয়া যাইতে যোগমায়া কিছুতেই রাজি হয় না।

কেন, আমি কি পাপ করছি ? স্বামীর সঙ্গে স্বামীর ঘর কবতে যাব, তা লুকিয়ে চুরিয়ে যাব কেন ?

যোগমায়া এখনও স্বামীর ঘর করিতে যায় নাই, সে অভিজ্ঞতাও তার নাই। সে শুধু শুনিয়াছে, স্বামীর ঘর করিতে যাওয়াটা মেয়েদের মহা গৌরব ও সৌভাগ্যের কথা।

বাবা যেতে দেবেন না।

খুব দেবেন।

আসল কথা, যোগমায়ারও শখ চাপিয়াছিল, একটু বেড়াইয়া আসিবে, জীবনে একটু নতুনত্ব আনিবে। রাজপ্রাসাদের মতো এত বড়ো বাগানঘেরা বাড়ি, ঘরভরা গাদাগাদা আপনজন আর আত্মীয়-স্বজন, এত সব দামি আসবাব আর দাসদাসী, নানা উপলক্ষে প্রায়ই লোকজনকে খাওয়ানোর হইচই, কর্তার মেয়ে বলিয়া সকলের উপর এতখানি কর্তৃত্ব, তবু যেন যোগমায়ার সব একঘেয়ে লাগে।

বিবাহের অনেক আগে হইতেই একঘেয়ে লাগে, বাড়ির বাহিরে খেলা করিতে যাওয়া সত্যপ্রিয় যখন রদ করিয়া দিয়াছিল। বিবাহ হইলে ভালো লাগিবে ভাবিয়াছিল, যামিনীর সঙ্গে রাত কাটাইতে ভালো লাগেও বটে, কিন্তু তাতে কি মানুষের মন ওঠে, বাস্তবতার সঙ্গে সংশ্রববিহীন অল্পবয়সি একটি মেয়ের মন ?

যোগমায়ার রাগও হইয়াছিল। যামিনীকে দেশে পাঠানোর জন্য নয়, চার টাকা পথখরচ দিয়া যামিনীকে তাড়াইয়া দেওয়া হইয়াছে এই গুজবটা রটিয়াছে বলিয়া। তার স্বামীর সঙ্গে এমন ব্যবহার করে তার বাবা, সকলের কাছে তার স্বামীকে এমনভাবে অপমান করে ! স্বামীর সঙ্গে ভাঙা ঘরে সে উপবাস করিবে (কিছুদিন করিবে, সত্যপ্রিয় ব্যস্ত হইয়া ফিরাইয়া আনিতে গেলেই ফিরিয়া আসিবে) তবু আর সে এমন বাপের বাড়িতে থাকিবে না।

সূতরাং সত্যপ্রিয়ের বাড়িতে একদিন সত্যই হইচই পড়িয়া গেল।

মেয়েদের মধ্যে ফিসফাস গুজবাজের শেষ রহিল না। সকলেই বুঝিতে পারিল যে যামিনী রাগ করিয়া যোগমায়াকে নিয়া যাইতেছে, তবু যোগমায়া বাড়ির যেখানে যায় সেখানেই যেন তাকে ঘিরিয়া

জিজ্ঞাসু মেয়েদের সভা বসিতে লাগিল। কেবল সত্যপ্রিয়ের অনুমতি চাহিতে যাওয়ার সময় কেউ তার সঙ্গে গেল না।

যামিনী দুপুরবেলা তার অনুপস্থিতির সময় আসা যাওয়া করিতেছে শুনিয়া সত্যপ্রিয় মনে মনে একটু হাসিয়াছিল। আর দু-একদিনের মধ্যেই যামিনী আসিয়া পায়ে ধরিয়া ক্ষমা চাহিবে। আসল ব্যাপারটা তার কানে গিয়াছিল সকালে যোগমায়া অনুমতি চাহিতে যাওয়ার আগের দিন সন্ধ্যায়। তারপর সত্যপ্রিয় মনে মনে আর হাসে নাই বটে, মেজাজটাও গরম করে নাই।

খবরটা দিতে আসিয়াছিল তার ভগ্নিপতি, খবর দিয়া আপশোশের শব্দ করিয়া বলিয়াছিল, আচ্ছা বিপদ হল তো !

সত্যপ্রিয় আশ্চর্য হওয়ার ভান করিয়া বলিয়াছিল, কীসের বিপদ ?

তার সঙ্গে লড়াই করিবে তার টাকা দিয়া কেনা জামাই ? সত্যপ্রিয়ও লড়াই করতে জানে।

দুবুদুব বৃকে ঘরে গিয়া যোগমায়া দ্যাখে, সত্যপ্রিয় মেঝেতে যোগাসনে বসিয়া সামনে খবরের কাগজ বিছাইয়া ঝুকিয়া কাগজ পড়িতেছে।

কীভাবে কথাটা বলা যায় ? কীভাবে বাপকে জানানো যায়, আমি তোমার বাড়ি ছাড়িয়া চলিলাম ? মাথা ঘুরিয়া, গা কাঁপিয়া যোগমায়া অস্থির হইয়া পড়ে, কীভাবে যে শেষ পর্যন্ত কথাটা বলিয়া বসে নিজেই ঠিকমতো বুঝিতে পারে না।

সত্যপ্রিয় আগেই মুখ তুলিয়াছিল, সহজভাবে বলে, যামিনী নিয়ে যাবে ? আচ্ছা। কবে যাবি ? যোগমায়া বলে, আজ।

সত্যপ্রিয় বলে, বেশ।

যোগমায়ার পৃথিবী অন্ধকার হইয়া যায়। শুধু আশা নয়, যোগমায়ার বিশ্বাস ছিল সত্যপ্রিয় কখনও তাকে পাঠাইতে রাজি হইবে না, রাগ করিবে, বকুনি দিবে, তাকে বুঝাইবে—আব সে তখন কাঁদিয়া কাটিয়া অনর্থ করিবে, কাঁদিতে কাঁদিতে বলিবে যে, তোমার জন্যেই তো সব গোলমাল, তুমি কেন ওকে অপমান করলে ! তার বদলে, একী ! এককথায় তাকে অনুমতি দিয়া দিল ? এখন তো আর না গিয়া উপায় থাকিবে না।

সত্যপ্রিয় খবরের কাগজ পড়িতে মন দেয়।

কাঁদিতে কাঁদিতে যোগমায়া বলে, আমি কিন্তু আর ফিরে আসব না বাবা, আমায় আর আসতে দেবে না।

সত্যপ্রিয় অন্যমনে বলে, বেশ তো।

যামিনী আসিলে খবরটা দিয়া যোগমায়া চোখ বড়ো বড়ো করিয়া প্রশ্ন করে, কী উপায় হবে এখন ?

এত সহজে অনুমতি পাইয়া যামিনীরও ভালো লাগিতেছিল, না, তবু সে জোর করিয়া বলে, ভালোই তো হল।

ছাই হল ! তোমার মাথা হল !

যোগমায়া কাঁদিতে থাকে, কাঁদিতে কাঁদিতে মাথা নাড়িয়া বলে, আমি যাব না।

রাগ করিয়া যামিনীর সঙ্গে কদিনের জন্য চলিয়া যাওয়ার কল্পনায় যোগমায়া যত মজা আবিষ্কার করিয়াছিল তার একটাও এখন আর সে খুঁজিয়া পায় না। যা ছিল ছেলেমানুষি তাই এখন ভয়ানক বিপদ দাঁড়াইয়া গিয়াছে !

যাবে না মানে ?

না না, যাব না। কোথায় যাব আমি বাবাকে ছেড়ে ?

যামিনী আহত হইয়া বলিল, বেশ। যাওয়া ঠিক করে এখন উলটো গাইছ।

তুমিই তো কুপরামর্শ দিয়ে মাথা ঘুলিয়ে দিলে আমার ?

যামিনীর সঙ্গে যোগমায়ার ঝগড়া হইয়া যায়।

বাপকে গিয়ে যোগমায়া বলে, না বাবা, আমি যাব না। তোমাদের মনে কষ্ট দিয়ে—

সত্যপ্রিয় বলে, আমাদের আবার কষ্ট কীসের !

যোগমায়া থমকিয়া যায়। সামলাইয়া উঠিয়া আবার বলে, আমি জানি তোমার ইচ্ছে নেই বাবা, তোমার মনে ব্যথা দিয়ে—

নিজে না গলিলে এ জগতে কারও ক্ষমতা নেই সত্যপ্রিয়কে গলায়। তেমনই স্নেহহীন কণ্ঠে নির্বিকারভাবে সে বলে, আমার মনে ব্যথা দিবি কেন ?

বাপের ব্যবহারে মর্মহিত যোগমায়ার দারুণ অভিমানে আবার মনে হয়, যামিনীর সঙ্গে যাওয়াই ভালো, সত্যপ্রিয় যতদিন নিজে না আনিতে যায় ততদিন না আসাই ভালো।

তবু, কোনোরকমে চোখ-কান বুজিয়া সে বলে, তুমি যদি ওকে একটু মিষ্টি করে বুঝিয়ে বলো বাবা—

সত্যপ্রিয় বলে, তোরা দুজনেই বড়ো বেশি বাড়াবাড়ি আরম্ভ করেছিস, মাথায় চড়ে গেছিস দুজনে।

অগত্যা যামিনীর সঙ্গে যোগমায়া যশোদার বাড়িতে গিয়া উঠিল। বওনা হওয়ার সময় সত্যপ্রিয় বাড়িতেই ছিল। যোগমায়া ইচ্ছা করিয়াই দেরি করিয়া সত্যপ্রিয় বাড়ি ফিরিবার পর রওনা হইয়াছে। যাওয়ার সময় সত্যপ্রিয় যদি নরম হয় ? মেয়েকে চলিয়া যাইতে দেখিয়া মন কেমন করিয়া উঠিলে সে যদি একটু নত হইয়া যামিনীকে মিষ্টকথায় বুঝাইয়া শান্ত করিয়া যাওয়ার ব্যবস্থা বাতিল করিয়া দেয় ?

আগে পরে দুজনে সত্যপ্রিয়কে প্রণাম করিল। সত্যপ্রিয় যামিনীকে বলিল, সাবধানে থেকে। আর যোগমায়াকে বলিল, সাবধানে থাকিস।

কয়েক মিনিট পরেই যশোদার বাড়ি। যশোদা হাসিমুখে অভ্যর্থনা করিল, সূত্রতা হাত ধরিয়া যোগমায়াকে ভিতরে নিয়া গেল, পাড়ার যেসব মেয়েরা যশোদার বাড়িতে সত্যপ্রিয়ের মেয়ের পদার্পণ দেখিবার জন্য ভিড় করিয়া দাঁড়াইয়াছিল তারা হাঁ করিয়া চাহিয়া রহিল।

যশোদাকে যোগমায়া চেনে, তার বাড়িটি কোনোদিন দ্যাখে নাই। ভিতরে ঢুকিয়া সেও যেদিকে চোখ পড়িতে লাগিল সেইদিকেই হাঁ করিয়া চাহিয়া থাকিতে লাগিল। ঘর দেখিয়া সে যেন মবিয়া গেল। কী সর্বনাশ, এই ঘরে তাকে থাকিতে হইবে নাকি ? খাটপালঙ্ক, আলমাবি, ড্রেসিংটেবল এ সব না থাক, কিন্তু এ কী দেয়াল, এ কী মেঝে, এ কী দরজা জানালা ! কতটুকু ঘর !

সূত্রতা আনন্দে ডগমগ হইয়া বলিল, যাক, অ্যাদিনে একজন মনের মতো সঙ্গী জুটল। তোমার ভাইয়ের কাছে তোমার কথা এত শনেছি ভাই !

তুমি আমার ভাইকে চেনো ?

চিনি না ? কবে থেকে চিনি।

কী করে চিনলে ?

প্রশ্ন শুনিয়া মনের মতো সঙ্গী সতাই জুটিয়াছে কিনা সে বিষয়ে বড়োই সন্দেহ জাগায় সূত্রতা একটু দমিয়া গেল।

ওর সঙ্গে পরিচয় আছে। তোমার দাদা ওঁর বন্ধু।

তাই নাকি ? তা তো জানতাম না।

যশোদা যোগমায়াকে দেখিয়াই দমিয়া গিয়াছিল। পাড়ার মেয়েদের আশ্বে আশ্বে বিদায় করিয়া সে যামিনীকে নিয়া পড়িল।

আপনার কেমন ধারা বিবেচনা জামাইবাবু ?

কেন চাঁদের মা ?

দুদিন বাদে ওর ছেলেরপিলে হবে, ওকে নিয়ে এ সময় টানা হাঁচাড়া হাঙ্গামা আরম্ভ করেছেন ? প্রথমবার লোকে কত সাবধানে রাখে, মন ভালো রাখার জন্য বাপের বাড়ি পাঠিয়ে দেয়, আর আপনি এমন একটা বিচ্ছিরি কাণ্ড বাধিয়ে বসলেন। বয়স তো কম হয়নি আপনার ?

যামিনী আমতা আমতা করিয়া বলিল, এখনও দেরি আছে।

যশোদা ফৌস করিয়া উঠিল, ছাই আছে। ও দু-চারমাস সময় কোন দিক দিয়ে কেটে যাবে টেরও পাবেন না। দেরি থাকলেই বা কী, এ সময় কেউ এমনি হাঙ্গামা করে ?

যশোদার বড়ো অনুতাপ হয়। সত্যপ্রিয়কে খোঁচা দেওয়ার সুযোগ পাইয়া খুশি হওয়াব সময় তার মেয়ের কথাটা মনে রাখা উচিত ছিল। সে অবশ্য জানিত না যোগমায়ার এ রকম অবস্থা, তবু এতটুকু একটা মেয়ের মনে এই ধরনের হাঙ্গামার ব্যাপার কী রকম আঘাত দিতে পারে সেটা অনুমান করা তো তার পক্ষে কঠিন ছিল না। মানুষকে হিংসা করিলে এমনই হয়, একজনকে হিংসা করিতে গিয়া মনেও থাকে না আরও অনেকে তার ফলভোগ করিবে।

কী আর করা যায়, যোগমায়ার মনটা একটু ভালো করার জন্য যশোদা চেষ্টা আরম্ভ করে। গল্প জুড়িয়া দেয়, হাসিতামাশা করে, গম্ভীরমুখে বলে, দুদিনের জন্য বেড়াতে তো এলে দিদি, দুদিন বাদে বাপ যখন গাড়ি পাঠিয়ে ফিরিয়ে নিয়ে যাবে, ঘর যে তখন আমার খালি হয়ে যাবে বাছা ?

বাবা আর আমায় ফিরিয়ে নিয়ে যাবে না যশোদাদিদি। যোগমায়া কাতরভাবে বলে।

যশোদা হাসিয়া বলে, থামো বাছা তুমি। বাপ কখনও মেয়েকে তাগ করতে পারে ?

আমার বাবাব ভীষণ রাগ, তুমি জানো না। চলে আসতে যখন দিয়েছে, কখনো আর ফিরে যেতে দেবে না।

দেবে—আমি বলছি দেবে। বাপ-মাব রাগ কদিন টেকে ? দুদিন বাদে রাগ জল হয়ে গেলে যখন মন কেমন করতে আরম্ভ করবে, নিজে এসে ফিরিয়ে নিয়ে যাবে তোমাদেব।

কুমুদিনী প্রথম হইতে একপাশে মুখ বুজিয়া বসিয়াছিল, এবার সে সংক্ষেপে জিজ্ঞাসা কবে, রাগারাগি করে এসেছে বুঝি ?

যশোদা বলে, কীসের রাগবাগি ? সংসাবে অমন কথা কাটাকাটি হয়।

যামিনী ও সত্যপ্রিয়ের কলহের ব্যাপারটাই যশোদা একেবারে তুচ্ছ করিয়া উড়াইয়া দিতে চায়। যামিনী শ্বশুরের সঙ্গে আর সত্যপ্রিয় জামাইয়ের সঙ্গে যেন একটু ছেলোখেলা করিতেছে, যশোদাব ভাবটা এই রকম। যোগমায়াকে সাহস দেওয়ার জন্য এটা শুধু যশোদার ছলনা নয়। সত্যপ্রিয়কে সে জানে। পুতুল কথা না শুনিলে ছোটোছলে যেমন তার অত সাধের পুতুলটি ঠুকিয়া ঠুকিয়া ভাঙিয়া ফেলে, সত্যপ্রিয়ও তেমনই তার অবাধ্য প্রিয়জনকে পিষিয়া ফেলিতে পারে অনায়াসেই। তবু যশোদা বিশ্বাস করিতে পারে না সত্যপ্রিয় মেয়েকে ফিরাইয়া নেওয়ার ব্যবস্থা না করিয়া বেশিদিন চূপ করিয়া থাকিবে।

যোগমায়া যশোদার সঙ্গে যেন একেবারে আঁটিয়া যায়। অনেকদিন আগে, যশোদার বাড়িতে যখন শুধু কুলিমজুরের আন্তানা ছিল, আর সত্যপ্রিয় হঠাৎ যশোদাকে খাতির করিতে আরম্ভ করিয়াছিল, একদিন সত্যপ্রিয়ের বাড়িতে নিমন্ত্রণ খাইতে গিয়া বেয়াদবি করার জন্য যশোদা যোগমায়াকে আচ্ছা করিয়া শাসন করিয়া দিয়াছিল। সাপের মতো ফৌসফৌস করিয়াছিল সেদিন যোগমায়া। আজ যখন রাত্রির অন্ধকার ঘনাইয়া আসে বিদুতের আলো জ্বলে না, ঘরের দেয়াল সরিয়া সরিয়া আসিয়া চাপ দিতে থাকে, দম আটকাইয়া আসে, ভবিষ্যৎ অন্ধকার মনে হয়, যোগমায়া যশোদার কাছে সরিয়া সরিয়া আসে, পিছু পিছু ঘুরিয়া বেড়ায়।

ঘরটা গুছিয়ে নাও ? যশোদা বলে।

আমার কী হবে যশোদাদিদি ! যোগমায়া বলে।

ধনঞ্জয় ঘরে আর রোয়াকে বসিয়া বসিয়া সব দেখিতেছিল, একফাঁকে চুপিচুপি যশোদাকে জিজ্ঞাসা করে, ওরা এখানে থাকবে নাকি চাঁদের মা ?

যশোদা বলে, না।

পরদিন খুব ভোরে উঠিয়া যশোদা উনুন ধরাইতেছে, যামিনী উঠিয়া আসিল। মুখখানা শূকাইয়া গিয়াছে, চোখ ঘুমে ঢুলুঢুলু।

ঘুমোচ্ছে।

হ্যাঁ। এই তো ঘুমোলো চারটের সময়।

যশোদা তা জানিত।

খুব কেঁদেছে, না ?

শুধু কান্না ! কী বিপদেই যে পড়লাম চাঁদের মা।

যশোদা তাও জানিত। একটা আপশোশের শব্দ করিল।

যামিনী মুখ কাঁচুমাচু করিয়া বলিল, একটা বড়ো দেখে বাড়ি ঠিক করে উঠে যাব চাঁদের মা ?

যামিনীর কাছে শ-খানেক টাকা আছে, যোগমায়ার কাছেও আছে সাতাত্তর টাকা। যোগমায়ার গায়ে আর বাকসে গয়না আছে অনেক। কিন্তু যশোদা সংক্ষেপে বলিল, বড়ো বাড়ি দিয়ে কী হবে ? কটা দিন যাক।

যশোদা ভাবিয়াছিল, দু-একদিনের মধ্যেই সত্যপ্রিয়ের কোনো আত্মীয় মধ্যস্থ হইয়া আসিবে। কিন্তু চার-পাঁচদিন কাটিয়া যায় কারও পাক্তা মেলে না। সত্যপ্রিয় যেন সত্যই মেয়েজামাইকে ত্যাগ করিয়াছে। যোগমায়ার অবস্থা দিন দিন কাহিল হইতে তাকে, যশোদা না থাকিলে ইতিমধ্যেই হয়তো তার নার্নার্স ব্রেকডাউন ঘটয়া যাইত। যশোদা তাকে আদর করে, ধমক দেয়, নানাভাবে বুঝাইয়া শাস্ত করিয়া রাখে। কিন্তু মনের যার জোর নাই একেবারে, কতটুকু মনের জোর তার মধ্যে সংক্রামিত করা যায় ? ধার-করা মনের জোর কতক্ষণ কাজে লাগে মানুষের ?

যশোদা যখন বলে, এ রকম যদি করবে, এলে কেন ?

যোগমায়া বলে আমি আসিনি, আমায় জোর করে এনেছে।

যামিনী যখন বলে, এমন জানলে তোমায় আমি আনতাম না।

যোগমায়া বলে, আমাকে মেরে ফেলে বাবাকে কষ্ট দেবে বলে তুমি আমায় জোর করে এনেছ।

চলো তবে তোমায় রেখে আসি ?

বাবা না ডাকলে কী করে যাব ?

শুধু এই একটি বিষয়ে সত্যপ্রিয়ের মেয়ের মতোই তার তেজ দেখা যায়। অথবা সত্যপ্রিয়ের মেয়ে বলিয়াই হয়তো সে হিসাব করে যে না ডাকিতে ফিরিয়া গেলে ভবিষ্যতে প্রায় চলিয়া যাওয়ার ভয় দেখানোর সুবিধা থাকিবে না।

সাতদিনের দিন সকালে মহীতোষ আসিল। অজিত আর সুরতার সঙ্গে মহীতোষ মাঝে মাঝে আড্ডা দেয়, তবে সেটা তার নিজের গাড়িতে অথবা মাঠে ঘাটে হোটেল সিনেমায়, যশোদার বাড়ির মধ্যে নয়। এবার কোথা হইতে পায়ে হাঁটিয়া আসিয়া ভিতরে ঢুকিয়া সে একটা পিঁড়ি দখল করিয়া বসিল।

যোগমায়া তো আনন্দে প্রায় পাগল হওয়ার উপক্রম। —দাদা ! দাদা এসেছ ! তুমি কোথেকে এলে দাদা ? বাবা পাঠিয়েছে ?

মহীতোষ নিষ্ঠুরের মতো নির্বিকার হাসি হাসিয়া বলিল, বাবা পাঠাবেন বইকী ! কাউকে আসতেই বাবা আরও বারণ করে দিয়েছেন, বাবা পাঠাবেন !

যোগমায়া দমিয়া গেল।—বারণ করে দিয়েছেন !

করবেন না ? যা কীর্তিটাই তোমরা করলে !

যশোদা মৃদু প্রতিবাদের সুরে বলিল, আহা, কেন মিছে ঘাবড়ে দিচ্ছেন ওদের ? রাগ করবেন সে তো জানা কথা—ও রাগ কী টেকে ? সব ঠিক হয়ে যাবে।

মহীতোষ সায় দিয়া বলিল, তা যাবে—তা যাবে। নিশ্চয় যাবে। তবে কিনা—তা ঠিক, সব ঠিক হয়ে যাবে বইকী।

অন্য সবাই বলে না আমার কথা ?

বলে বইকী।

কী বলে বলো না দাদা ?

নিন্দে করে, আবার কী বলবে।

শুনিয়া যোগমায়া স্তব্ধ হইয়া যায়। নিন্দা করিবে বইকী, স্পর্ধা কী কম সকলের ! কবুক, যত পারে নিন্দা কবুক। ফিরিয়া গিয়া নিন্দা করার মজাটা সকলকে সে যদি টের না পাওয়াইয়া দেয়—

যোগমায়ার মন যতই খাবাপ থাক আর বাড়িঘরের অবস্থার জন্য যতই লম্বা করিয়া কান্না আসুক, এটা তো ধরিতে গেলে এক রকম তার নিজের বাড়ি, এখানকার কুঁড়েঘরেও তারই তো সংসার। মহীতোষকে যে কী দিয়া অভ্যর্থনা আর আদর-যত্ন কবিবে সে ভাবিয়া পায় না। শেষে, একরাশ বাজারের খাবার আনাইয়া তাকে খাইতে দেয় আর খুঁটিয়া খুঁটিয়া বাড়ির সব খবর জিজ্ঞাসা করে। কদিন আর সে বাড়ি ছাড়িয়াছে, কদিনের মধ্যেই কতগুলি বছর যেন কাবার হইয়া গিয়াছে। জবাব দিতে দিতে মহীতোষ বিরত আর বিরক্ত হইয়া বলে, সবাই ভালো আছে, সব ঠিক আছে। যেমন ছিল তেমন সব আছে। কেন ভাবছিস ?

যেমন ছিল সব তেমন আছে ? সে চলিয়া আসিয়াছে বলিয়া এতটুকু পরিবর্তন হয় নাই ? একটু কাঁদাকাটাও করে নাই কেউ ? যোগমায়া দুঃখে অভিমানে ফোঁসফোঁস করিয়া কাঁদিতে থাকে।

আরও বেশি বিরত হইয়া কয়েক মিনিট বসিয়াই মহীতোষ উঠিয়া পড়ে।

যোগমায়া কান্না থামাইয়া আবদার জানায় : রোজ একবার করে এসো কিন্তু দাদা।

আসব।

আর শোনো বাবা যদি জিজ্ঞেস করে আমার কথা—

বাবা কিছু জিজ্ঞেস করবেন না। আমি এসেছিলাম জানতে পেরে আমায় না খেয়ে ফেলে।

মেয়ের খোঁজখবর নিতে সকলকে বারণ করিয়াছে ? মেয়েজামাইকে ঘরে ফিরানোর চেষ্টাটা সত্যপ্রিয়ের দিক হইতে আরম্ভ হইবে এটা বোধ হয় তবে আর আশা করা যায় না। আশা কেন যশোদা করিয়াছিল, যশোদা নিজেই জানে না। মেয়েজামাই অন্য কোথাও গেলে হয়তো সত্যপ্রিয় কিছু করিত, তারা যশোদার বাড়িতে আসিয়া উঠিয়াছে বলিয়াই বোধ হয় সে গুম খাইয়া গিয়াছে। এবং হয়তো গুম খাইয়াই থাকিবে। অথবা হয়তো এমন কিছু করিবে যাতে মেয়েজামাই তার যশোদার বাড়ি ছাড়িয়া তার পায়ের উপর গিয়া হুমড়ি খাইয়া পড়িবে আর যশোদার হইবে সর্বনাশ। কীভাবে সত্যপ্রিয়ের পক্ষে এটা করা সম্ভব যশোদা ভাবিয়া না পাক, সত্যপ্রিয়ের মগজে ও রকম অনেক মতলব ঠাসা থাকে, সাধারণ মানুষের কাছে যা দুর্বোধ্য কল্পনাভীত।

কিন্তু আগে মেয়েজামাইয়ের একটা ব্যবস্থা না করিয়া সে কি যশোদার কিছু করিবে ? কে জানে, হয়তো যার উপর রাগ হইয়াছে তাকে পিবিয়া মারার জন্য মেয়েজামাইয়ের ভালোমন্দের

কথাটাও সে ভাবিবে না। মেয়েজামাইকেই হয়তো যশোদাকে জন্ম করার কাজে ব্যবহার করিবে। ওদের উপরেও তো সে কম রাগে নাই।

যশোদার মনটা খারাপ হইয়া থাকে। আবার সতাপ্রিয়ের সঙ্গে লড়াই আরম্ভ হইয়া গেল ? একটা তুচ্ছ বাজে উপলক্ষে ? আদর্শবাদের ব্যাপারটা যশোদা একেবারেই বোঝে না, তবু তার সহজ বুদ্ধিতেই সে বুঝিতে পারে, এবারকার লড়াইটা একেবারে অর্থহীন, জগতে কারও এতে কোনো উপকার হইবে না।

যোগমায়ার মনটা খারাপ হইয়া গেল বীভৎস রকমের। তার রকম-সকম দেখিয়া যশোদাও ভড়কাইয়া গেল। কোনো বিষয়ে ভড়কাইয়া যাওয়া যশোদার বড়ো অপছন্দ। বিরক্ত হইয়া যোগমায়াকে একেবারে সে আচ্ছা করিয়া ধমকাইয়া দিল, তারপর অনেক আদর করিল, তারপর নিজের বিষাদের স্বপ্ন ঝাড়িয়া ফেলার মতো মাথা ঝাঁকি দিয়া বলিল, কী মন খারাপ কবে আছি আমরা সবাই মিছি মিছি ! বাড়িতে যেন মড়া জমেছে ক-গন্ডা। এসো তো বাছা সবাই মিলে একটু ফুর্তি করি আজ। কী করা যায় বলো তো ?

সুব্রতাই ভাবিয়া চিন্তিয়া বলিল, সিনেমায় যাবে দিদি সবাই মিলে ?

সিনেমা থিয়েটার যাওয়া ছাড়া ফুর্তি করার আর কোনো উপায়ের কথা সুব্রতার জানা আছে কিনা সন্দেহ।

যশোদা না ভাবিয়াই বলিল, তাই চলো।

শহরতলিতে থাকিয়াও কতকাল যশোদা সিনেমায় যায় নাই তার নিজেরও মনে নাই। নন্দ আর সুবর্ণকে পর্দায় দেখিতে যাওয়ার ইচ্ছাটা আজকাল জোরালো হইয়া উঠিয়াছিল, যাই যাই করিয়াও এতদিন যাওয়া হয় নাই। ভাবপ্রবণ ব্যাকুলতাকে যশোদা বড়ো ভয় করে। নন্দকে পর্দায় নড়িয়া চড়িয়া কথা বলিতে দেখিলে আর তার গান শুনিলে হয়তো সে ব্যাকুল হইয়া পড়িবে। এই আশঙ্কটা যশোদাকে আটকাইয়া দিয়াছিল। সাধ করিয়া ও রকম ব্যাকুল হইয়া লাভ কী—ও তো মদ খাইয়া মাতাল হওয়ার শামিল !

আজ সে সুব্রতাকে বলিল, সেই ছবিটা দেখতে যাব—সেই যে সেদিন দেখে এসে আমায় বললে, একটা ছেলে চমৎকার গান গায় ?

সুব্রতা বলিল, সেটা তো আমি দেখেছি। একটা নতুন ছবি হচ্ছে, খুব ভালো বই, সেটা দেখবে চলো।

যশোদা বলিল, না, ওই ছবিটা দেখব। এক ছবি দুবার দেখলে তুমি মরবে না। ইচ্ছে না হয়, যেয়ো না।

আট

সকলে সিনেমায় গেল দল বাঁধিয়া। যশোদার বাড়িতে যারা বাস করিতেছিল তারা তো গেলই, বাহির হইতে আসিয়া যোগ দিল কুমুদিনী আর কেদার।

যোগমায়া শেষ মুহূর্তে হঠাৎ বাঁকিয়া বসিয়াছিল।

সকলে তখন সাজগোজ করিয়াছে, কেদার আর কুমুদিনীও আসিয়া হাজির হইয়াছে। যশোদার সিনেমায় যাওয়ার উপযুক্ত বেশভূষা করা নিয়া একটু হাঙ্গামা বাধিয়াছিল—সে রকম কাপড় কই, ব্লাউজ কই ? সুব্রতা যাচিয়া যশোদাকে কাপড় আর ব্লাউজ ধার দিতে গিয়াছিল, বলিয়াছিল, আমার এই কাপড়টা পরো না দিদি, আর এই ব্লাউজটা।

অনেকদিনের পুরানো তোরঙ্গ ঘাঁটিতে ঘাঁটিতে যশোদা বলিয়াছিল, তোমার কি মাথা খারাপ হয়েছে ? তোমার জামা আমার হাতে ঢুকবে কিনা সন্দেহ, গায়ে দেব !

আচ্ছা, কাপড়টা পরো তাহলে।

না দিদি, আমার যা আছে তাই ভালো।

সুব্রতার মুখখানা ম্লান হইয়া গিয়াছিল।

জানো দিদি, তোমার এই স্বভাবের জন্য তোমায় কেউ দেখতে পারে না।

চওড়া পাড় পরিষ্কার একখানা সাদা শাড়ি পরিয়া যশোদা নিজেই একটু হাসিয়াছিল। রঙিন কাপড় পরার বয়েস কি আর আছে বোন ? তোমার এমনি সাদাসিদে কাপড় থাকলে পরতাম। তোমার ওই কাপড় পরে বউ সাজি, আর আমায় দেখে সং ভেবে সবাই হাসুক, অত বোকা তোমার দিদিকে পাওনি।

রঙিন কাপড় পরলে লোকে হাসবে, এত বুড়ি তুমি হওনি দিদি। তোমার বয়েসে সবাই সাজগোজ করে।

জামাকাপড়ের এই আলোচনায় বোধ হয় যোগমায়ার খেয়াল হইয়াছিল, একে একে সে চাহিয়া দেখিয়াছিল সকলের দিকে। তারপর চাহিয়াছিল নিজের জমকালো শাড়িখানাব দিকে। এদেব সঙ্গে সে সিনেমা দেখিতে যাইবে, এদের সজ্জিনী হিসাবে ? কী ভাবিবে লোকে ? চেনা লোকে যদি তাকে এদেব সঙ্গে দেখিতে পায় ? এ পাড়াটা পার হইয়া যাওয়ার সময় তো অনেক চেনা লোকের চোখে পড়িয়া যাইবে, সত্যপ্রিয় চক্রবর্তীর মেয়ে সে, কে না তাকে চেনে এ পাড়ায় ?

তাড়াতাড়ি নিজের ঘরে গিয়া যোগমায়া কাপড় ছাড়িয়া ফেলিতে আরম্ভ করিল। একটু পরে রওনা হওয়ার সময়েও তাকে ঘরের বাহির হইতে না দেখিয়া সুব্রতা ডাকিতে গেল।

যোগমায়া বলিল, আমি যাব না, যেতে ইচ্ছে করছে না আমার।

কেন ? হঠাৎ তোমাব কী হল, যাবার জন্য তৈরি হয়ে ?

বললাম তো ইচ্ছে করছে না।

সুব্রতা মুখভার করিয়া ফিরিয়া আসিয়া খবর দিল, ও যাবে না দিদি। কাপড়চোপড় ছেড়ে বসে আছে।

তখন ব্যাপার বুঝিতে গেল যশোদা।

মুখভার করিয়া যোগমায়া চৌকিতে বসিয়া আছে, বিনা দোষে কে যেন তাকে তিরস্কার করিয়াছে অনেক।

কী হল হঠাৎ, যাবে না কেন ?

ভালো লাগছে না যশোদা দিদি।

যশোদা একটু হাসিল, বলিল, সেজেগুজে রওনা হওয়ার সময় হঠাৎ এ রকম ভালো না লাগা তো ভালো কথা নয়। চলো লোকে কিছু ভাববে না। যদি ভাবে তো ভাববে যে, আমরা তোমার চাকর-দাসী—তুমি কোথাকার রাজরানিটানি হবে, পাঁচ-সাতজন চাকর-দাসী নিয়ে বায়োকোপ দেখতে এসেছ।

যোগমায়া চোখও তোলে নাই, আর কথাও বলে নাই।

যশোদা গম্ভীর হইয়া বলিয়াছিল, তার চেয়ে এক কাজ কর না ? সাদাসিদে একখানা কাপড় পরে চলো, এ কাপড়টা তোলা থাক। আমাদের সঙ্গে একেবারে মিশে যাবে—মনের খুঁতখুঁতানিটা যদি চাপতে পার কোনোরকমে, কী ফুর্টিটা হবে বল তো ?

পাশে বসিয়া যোগমায়াকে বুকে জড়াইয়া ধরিয়া বলিয়াছিল, নতুন কিছু একটা করেই দ্যাখো না আমার কথায়—খেলা মনে করে করে দ্যাখো একবার ? শখ করে !

সাদাসিধে একখানা শাড়ি পরিয়াই শেষে যোগমায়া দলে ভিড়িয়াছিল। সকলেই হাসিখুশি, অল্পবিস্তর উত্তেজিত—উত্তেজনা ছাড়া তো আনন্দ হয় না। কেবল যোগমায়ার উত্তেজনার মধ্যে আনন্দ নাই, যশোদার হুকুমে সে সকলের সঙ্গে আসিয়াছে কিন্তু মন কেন খুশি হওয়ার হুকুম মানিবে ?

টিকিট আগেই করা ছিল, সকলে ভিতরে গিয়া বসিল। আরম্ভ হইতে তখনও আধঘণ্টার উপরে দেরি। তবে তাতে কিছু আসে যায় না। অজিত আর যামিনী নিয়মিত সিনেমা দ্যাখে, তারা ছাড়া, এ আধঘণ্টা সকলের কাছেই উপভোগ্য, যে আনন্দ টিকিটের দামে কেনা হইয়াছে তার ফাউ। একেবারে অপরিচিত না হোক এই আলো-ঝলমল গুঞ্জনধ্বনি-মুখরিত ঘনীভূত আধুনিকতার জগতে সময় কাটানোর অভ্যাস যশোদার নাই। সকলের আগে যশোদার মনে হয় চারিদিকের দেয়াল আর ছাদগুলি যেন শিশুকে ভুলানোর জন্যে মুখে রংমাখা সুন্দরী মেয়ের মতো অসহ্য কৌতুকের উদ্ভট মুখভঙ্গি করিয়া আছে। ঘরের দেওয়ালে আনাচে-কানাচে সর্বত্র হাস্যকর অনিয়ম। কোণগুলি কোণ নয়, রেখাগুলি সাপের মতো আঁকাবাঁকা, এখানে ওখানে দু-চারহাত সমতল স্থান যদি বা থাকিয়া গিয়াছে রঙের কায়দায় সেখানটাও দেখাইতেছে উঁচুনিচু। কেমন পছন্দ মানুষের কে জানে, এমন খাপছাড়া ভঙ্গিতে ঘর তৈরি করে আর ঘর সাজানোর মধ্যে এমন কুৎসিত অসামঞ্জস্য সৃষ্টি করে !

হল ইতিমধ্যেই প্রায় ভরিয়া গিয়াছিল, এখনও ক্রমাগত লোক ঢুকিতেছে—ছোটোবড়ো গৃহস্থ পরিবার, স্কুল কলেজের যুবক ও বৃদ্ধ। মধ্যবিত্ত পরিবারের সংখ্যাই বেশি, রঙিন শাড়ি আর গয়নায় সাজানো পুতুলের মতো বউ আর তার স্বামী, কোনো কোনো স্বামীর কোলে একটি শিশু, আবার অনেক দলে অল্পবয়সি মেয়ে বউয়ের সঙ্গে বাড়ির বয়স্কা গৃহিণীও আছে, সাজগোজটা তার একেবারে তুচ্ছ নয়।

যশোদার মনে হয়, এরা সকলেই যেন তার চেনা মানুষ—ঠিক সামনের সিটের গল্প-বিভোর প্রেমিক প্রেমিকা দুটিকে যেমন চেনে, খানিক তফাতে পাশাপাশি প্রায় তিন গভা সিট দখল করিয়া যে পরিবারটি বসিয়াছে তাদেরও তেমনই চেনে। সবাই যেন তার প্রতিবেশী, পাশের বাড়ির লোক।

কুমুদিনী বলিল, ভিড় হয়েছে তো খুব।

সুব্রতা সর্গর্বে বলিল, বলিনি ভালো ছবি ? কতদিন হল চলছে, এখনও ভিড় হয়।

যোগমায়া চুপ করিয়া বসিয়া রহিল। সে শুধু চারিদিকে চাহিতেছিল আর কেউ তার দিকে ঈর্ষার দৃষ্টিতে চাহিয়া নাই বলিয়া জ্বালা বোধ করিতেছিল। জমকালো শাড়ি গয়নার অভাবে তার মনে হইতেছিল ভিড়ের মধ্যে সে যেন একটু উলঙ্গ হইয়া বসিয়া আছে। কী ভাগ্যে চেনা কারও সঙ্গে দেখা হইয়া যায় নাই !

যশোদাও চুপ করিয়াছিল। ছবি আরম্ভ হওয়ার আগে হইতেই সে প্রতীক্ষা করিয়া আছে, কখন নন্দ পর্দায় আসিবে।

কত দেরি হবে শুরু হতে ?

এইবার শুরু হবে।

যশোদার আগ্রহে সুব্রতা মনে মনে একটু হাসিল। যারা কখনও সিনেমায় আসে না, তারা এই রকম অধীর হইয়া পড়ে।

তারপর ঘর অন্ধকার করিয়া ছবি আরম্ভ হইল। যশোদা অন্ধকারে নিশ্চিন্তমনে ব্যাকুল আগ্রহের সঙ্গে প্রতি মুহূর্তে পর্দায় নন্দের আবির্ভাবের প্রতীক্ষা করিতে লাগিল। কিন্তু কোথায় নন্দ ? এলোমেলো কতগুলি নরনারী পর্দায় নড়াচড়া করিয়া আবোল-তাবোল কী সব বলিয়া গেল, তারপর আবার আলো জ্বলিয়া উঠিল। সুব্রতা কি ভুল করিয়াছে ?

যশোদা সূত্রতাকে জিজ্ঞাসা করিল, কই সেই ছেলেটা তো গান করল না ?

সূত্রতা সবজাস্তার মতো বলিল, বই তো এখনও আরম্ভ হয়নি। বেশি বড়ো বই হলে হাফ-টাইমের আগে দেয়। ছোটো বই হলে শিগগিব হাফ-টাইম দিয়ে, পরে দেয়। কমিকটা সুন্দর হয়েছে, না ?

যোগমায়া সব-ভুলিয়া-যাওয়া উজ্জ্বল হাসির সঙ্গে বলিল, সত্যি কী জন্মই হল ছেলেটা মেয়েটার কাছে ! বিয়ে করে তবে রেহাই।

কুমুদিনী বলিল, জন্ম হল কিনা কে জানে !

যোগমায়ার হাসি আরও উছলিয়া উঠিল : সত্যি ! ঠিক ! বিয়ে করতেই তো চাইছিল।

কমিক ? বিয়ের কমিক ? যশোদা রাগ করিয়া সোজা হইয়া বসে। এমন কেন হইয়াছে আজকাল, চোখের সামনে যা ঘটে তাও চোখে পড়ে না ? মনে কষ্ট পাওয়ার কারণ ঘটিয়াছে, মনে কষ্ট হোক, তাতে যশোদার আপত্তি নাই। হাল ভাঙা নৌকার মতো দিশেহারা হইলে চলিবে কেন ?

আসল ছবি আরম্ভ হওয়ার কয়েক মিনিটের মধ্যেই নন্দের আবির্ভাব ঘটিল। নন্দই বটে, কিন্তু যেন কোন দেশি নন্দ, একেবারে চেনাই যায় না। সায়েব বাড়ির একটা ঘরে বাঙালি বাড়ির একটা মেয়ে অর্গান বাজাইয়া গান গাহিতেছিল, এমন সময় আসিল সায়েবি পোশাক পবা নন্দ। গান শেষ হওয়া পর্যন্ত মেয়েটি টেরও পাইল না কেউ ঘরে আসিয়াছে, তারপর চমকমারা, লজ্জাভরা আনন্দময় বিস্ময়ের সঙ্গে তাড়াতাড়ি অর্গান ছাড়িয়া উঠিয়া আসিল। তারপর অনেকক্ষণ একটি অতি বুদ্ধিমতী মেয়ে আর অতি বুদ্ধিমান ছেলের কথাকাটাকাটি, হাসিতামাশা অঙ্গভঙ্গি ইত্যাদি চলিতে লাগিল। প্রথমেই নন্দ একটা গান শোনানোর অনুরোধ জানাইয়াছিল এবং মেয়েটি বলিয়াছিল নন্দের মতো গায়কের সামনে সে কিছুতেই গান করিবে না ; ধেং, তাই কী সে পারে, তার লজ্জা করে না বৃষ্টি ? মনে হইতে লাগিল, এ তর্কের জের যেন তাদের মিটিবে না। কথায় কথায় অন্যকথা আরম্ভ করিয়া নিজেদের সম্বন্ধে কত কথাই যে তারা দর্শকদের জানাইয়া দিতে লাগিল, মাঝে মাঝে কত বাড়িব লোক আর বাহিরের কত বন্ধু ও বান্ধবী বাজে ছুতায় আসিয়া দর্শকদের কাছে কৌশলে নিজেদের পরিচয় জানাইয়া চলিয়া গেল, তারপরেও দুজনের মধ্যে কে আগে গান করিবে এ সমস্যা ফিরিয়া আসিতে লাগিল।

কেন শুনতে চাইছ গান ?

তোমার গান বলে।

তার মানে আমি গাইতে পারি না। আমার গান বলে কোনোরকমে শুনবে।

তোমার চেয়ে গান দামি, গানের চেয়ে তুমি দামি। গানে গানে সুরের মুর্ছনায় তুমি যখন জগৎ ভরে দাও, আমি নিজেকে ভুলে যাই।

আমিও। তুমি আগে গাও।

না, তুমি আগে।

কী মানে দুজনের এই কথা কাটাকাটির ? যশোদা ভাবিয়া পায় না। সে তো জানে না দুজনের গান সম্বন্ধে দর্শকের কৌতূহল বাড়ানোর এটা কৌশল।

তখন নন্দ বলিল, দুজনে মিলে সেই গানটা গাই এসো।

অর্গানের ধারেকাছেও কেউ গেল না, নেপথ্যে কোথায় যেন গান আরম্ভ হওয়ার আগেই বাজনা বাজিয়া উঠিল—বাঁশি, বেহালা, হারমনিয়াম, তবলা ইত্যাদির ঐকতান।

পালা করিয়া দুজনে গান গায়, কাছাকাছি আসিয়া পরস্পরকে ধরাধরি করে, চোখে চাহিয়া থাকে, হঠাৎ পাক দিয়া তফাতে সরিয়া যায়। সকলে মুগ্ধ হইয়া দ্যাখে আর শোনে।

যশোদা যাত্রায় এ রকম ডুয়েট গান অনেক শুনিয়েছে, তবে এতটা খাপছাড়া আর মার্জিত নয়। যাত্রার ডুয়েট গান যেন কাহিনি আবেষ্টনী আর অভিনয়ের সঙ্গে বেশ মানায়।

তবে এখানে নন্দ আছে।

পর্দার কাহিনি আগাইয়া চলে, কোন দেশের মানুষের কোন দেশি কাহিনি বুঝিয়া উঠিতে গিয়া যশোদার ধাঁধা লাগিয়া যায়। যে ঘটনা ঘটা উচিত সে ঘটনা ঘটে না, যার যে কথা বলা উচিত সে সে কথা বলে না, অথচ মাঝে মাঝে ঘরোয়া ঘটনা উঁকি দিয়া যায়, ঘরোয়া কথা কানে আসে।

আগাগোড়া সবটা রূপকথা হইলে বোধ হয় যশোদা এতটা বিব্রত হইয়া পড়িত না। রূপকথাতেও আগাগোড়া একটা সামঞ্জস্য থাকে। যশোদা যখন ভাবে, এইবার নন্দ রাগ করিবে, নন্দ তখন হালকা হাসি হাসে, নন্দর হাসি দেখিবার আগ্রহে যশোদা যখন সামনে একটু ঝুকিয়া পড়ে, নন্দ তখন রাগে আগুন হইয়া ওঠে।

যশোদার নিজেই তখন রাগ হয়।

তারপর দেখা দেয় সুবর্ণ। সুবর্ণ একটি অপ্রধান পার্টে নামিয়াছে, অল্পবয়সি বউয়ের পার্টে। এই পার্টটিই বোধ হয় সে ভালো অভিনয় করিতে শিখিয়াছে।

যশোদাকে সহজে চমক দেওয়া যায় না, সে ধীরে ধীরে নাড়া খায়। সুবর্ণের উপর যশোদা বিশেষ খুশি ছিল না, ছবি শেষ হওয়ার আগেই মেয়েটার জন্য তার যেন বেশ মায়া জন্মিয়া যায়। মনের তলে একটা আশা যশোদার ছিল বইকী যে একদিন নন্দ আর সুবর্ণ ফিরিয়া আসিবে, দুজনকে সে ক্ষমা করিবে আর ভাই ও ভাইয়ের বউকে নিয়া সংসার করিয়া চলিবে সুখে। এখন মনে হইতে থাকে, নন্দ যেন তার সে আশা চিরদিনের জন্য নষ্ট করিয়া দিয়াছে, তার ঘরের বউকে করিয়া দিয়াছে সিনেমার অভিনেত্রী। জীবনে আর কোনোদিন সে তার বাড়িতে বউ সাজিয়া থাকিতে আসিবে না।

যশোদা নিশ্বাস ফেলিয়া ভাবে, আমার মতো ভাগ্যবতী সংসারে কেউ নেই। আমি যা ধরতে যাই তাই ফসকে যায়। যে সুখ আমাব জোটা উচিত ছিল, তা জোটে না। মরণও হচ্ছে না সেই জন্য ?

বাড়ি ফিরিবার পথে সুরতা জিজ্ঞাসা করে, কেমন দেখলে দিদি ? যশোদা সংক্ষেপে বলে, বেশ। রাজেন গম্ভীর চিত্তিত মুখে মাঝে মাঝে যশোদার মুখের দিকে তাকায়, কিন্তু কিছু বলে না। মস্তব্য করে কুমুদিনী।

বলে, ছেলোট ঠিক আমাদের নন্দর মতো নয় ? গলার আওয়াজটা পর্যন্ত এক রকম। প্রথমটা আমি তো—

কেদার বলে, আহা, চূপ করো না ?

কুমুদিনী ফোঁস করিয়া ওঠে, কেন, চূপ করব কেন ?

যশোদা ধীরে ধীরে বলে, নন্দর মতো নয়, ওই আমাদের নন্দ।

ওমা সে কী কথা গো ?

প্রথমে খানিকক্ষণ কুমুদিনী পলক না ফেলিয়া চাহিয়া থাকে, তারপর যেন প্রকাণ্ড একটা সমস্যা সমাধান করিয়া ফেলিয়াছে এইরকমভাবে বারকয়েক মাথা নাড়িয়া বলে, হুঁ, তাই তো বলি, জানে জনে কী এমন মিল থাকে ! কেমনধারা সাজপোশাক করেছে তাই, নইলে কী আর চিনতে একদণ্ড দেরি হত। নন্দ বায়োকোপ করেছে !

যোগমায়া ধীরে ধীরে বলে, আমি দেখেই চিনেছিলাম।

এ সব আলোচনা যশোদার সহ্য হয় না। সে বিরক্ত হইয়া বলে, চেনা মানুষকে চিনবে, তাতে আশ্চর্যের কী আছে ? কী যেন আরম্ভ করে দিয়েছ তোমরা।

মনে মনে যশোদা ভাবে, নন্দকে চিনিতে পারিল, সুবর্ণকে কেউ চিনিতে পারিল না কেন ?

সমস্ত পথ গম্ভীর হইয়া কী যেন ভাবে কুমুদিনী, বাড়ি ফিরিয়া যশোদাকে একান্তে টানিয়া নিয়া বলে, বলি চাঁদের মা, একটি বউ দেখলাম জ্যোতির্ময়বাবুর বোনের মতো, সে বুঝি—

সে সুবর্ণ।

মাগো ! এ সব কী !

কুমুদিনীর মুখ দেখিয়া মনে হয় সে বুঝি শুধু আশ্চর্য হয় নাই, ভয়ও পাইয়াছে।

পরদিন সকালে রাজেনকে ডাকিয়া যশোদা বলিল, একটা কাজ করে দেবে ?

এ রকম ভূমিকা করা যশোদার স্বভাব নয়। রাজেন একটু অস্বস্তি বোধ করিতে লাগিল।

কী কাজ ?

নন্দর ঠিকানাটি জেনে আসবে ?

নন্দর ঠিকানা জেনে করবে কী চাঁদের মা ?

যশোদা হাসিল। বেশ মানুষ বটে তুমি, বেশ কথা সুধোচ্ছো।

রাজেন ইতস্তত করিয়া বলিল, মানে কী জান চাঁদের মা, আসবাব হলে নন্দ নিজেই আসত আগে। বায়োকোপে পাট করলে নাকি চের পয়সা পাওয়া যায় শুনেনি, ওব তো পয়সার অভাব নেই— পয়সার কথা নয়, নিজে থেকে ফিবে আসতে হয়তো সাহস পাচ্ছে না।

তখন নন্দর ঠিকানা সংগ্রহ করিয়া আনিবার কথা দিয়া রাজেন চলিয়া গেল, যশোদা গেল সত্যাপ্রিয়র বাড়ি।

হঠাৎ তার মনে হইয়াছে, অল্পবয়সি ছেলেমেয়ে ঝোঁকের মাথায় বাড়ি ছাড়িয়া গেলে যে অনেক সময় সাধ থাকিলেও ফিবিয়া আসিতে ভবসা পায় না, এ কথাটা সত্যপ্রিয়কে বুঝাইয়া বলা দরকার।

যামিনী স্বাধীনভাবে নিজের পায়ে ভর দিয়া দাঁড়াক, বউকে নিয়া নিজের ভিন্ন সংসার পাতুক, যশোদার তাতে কোনো আপত্তি ছিল না। মানুষের মধ্যে এ বকম তেজই সে পছন্দ করে। কেবল যোগমায়াব সন্তান সন্তাবনার জন্য এ সময়টা তাকে নিয়া এ রকম টানাহ্যাঁচড়া করা সঙ্গত নয় বলিয়া প্রথমটা সে অসন্তুষ্ট হইয়াছিল। এতকাল যে অনায়াসে শ্বশুরের অন্নধ্বংস করিয়াছে আর কয়েকটা মাস সে ধৈর্য ধরিয়া থাকিতে পাবিল না ? বীবদ্ধ বা মনুষ্যত্ব তো পাগলামি নয়। বেহিসাবি তেজ দেখানো গোঁয়াবড়মিব শামিল।

প্রথমে যামিনী বুক ফুলাইয়া বলিত, কুঁড়েঘরে না খাইয়া দিন কাটাইবে তবু আর জীবনে কখনও শ্বশুরের অন্নধ্বংস করিতে যাইবে না। কিন্তু এখন মুখেও আর সে ও সব কথা বলে না। কিছুদিন পবে সে হঠাৎ একদিন যাচিয়া গিয়া সত্যপ্রিয়ের পায়ে ধরিয়া কাঁদিয়া পড়িবে, তাকে কোনোমতেই আটকানো যাইবে না। নিজের পায়ে ভর দিয়া কুঁড়েঘরে স্বাধীন জীবনযাপন করিবার মানুষ সে নয়—একটু নরম হইয়া থাকিলেই সত্যপ্রিয়ের রাজপ্রাসাদে আবামে জীবন কাটানোর সুযোগটা অন্তত যতদিন সামনে উপস্থিত আছে। যোগমায়ারও এ জীবন সহ্য হইতেছে না। এ রকম অবস্থায় ওদের এখানে রাখিয়া কষ্ট দিয়া লাভ কী ? ফিবিয়া যদি যাইতে হয়, ক-মাস পবে যাওয়ার চেয়ে, যোগমায়ার দিক হইতে ধরিলে, এখন যাওয়াই ভালো।

তাছাড়া আর একটা কথাও যশোদার মনে হইতে থাকে—ওদের দুজনকে বাড়িতে রাখিয়া সত্যপ্রিয়কে খোঁচা দেওয়া যাইবে ভাবিয়া নিজের খুশি হওয়ার কথা। প্রতিহিংসার জন্য ওদের কেন সে কষ্ট দিবে ? এই অনায়াস কল্পনা মনে আসিয়াছিল বলিয়া এখন তাহার মনে হয়, ওদের ফিরিয়া যাওয়ার উপায়টা তারই করিয়া দেওয়া উচিত।

সত্যপ্রিয় কাগজ পড়িতেছিল, মুখ তুলিয়া একটু বিস্ময়ের সঙ্গেই বলিল, এসো চাঁদের মা।

খানিক তফাতে মেঝেতে জাঁকিয়া বসিয়া যশোদা নির্বিকারভাবে বিনা ভূমিকায় বলিল, মেয়েকে এবার ফিরিয়ে আনুন ?

মেয়েকে ফিরিয়ে আনব ? আমি ?

তাতে দোষ কী বলুন ? বাপ তো আপনি ? বড়ো কাঁদাকাটা করছে খুকি। এ সময়টা খুকির পক্ষে—ছেলেমেয়ে হবে ওর জানেন না বোধ হয় ?

জানি।

শুনিয়া যশোদা একটু চুপ করিয়া রহিল।

জেনেও ওদের যেতে দিলেন ?

আমি যেতে বলিনি। ওরা নিজেরাই গেছে।

আটকানো উচিত ছিল আপনার।

কী করে আটকাতাম ? পায়ে ধরে ?

যশোদা তাড়াতাড়ি বলিল, ছি, ও কথা বলতে নেই। অকলাণ হয়। যা হবার হয়ে গেছে, এবার ওদের ক্ষমা করুন। ছেলেমানুষ তো, ওরা কী বোঝে ? ফিরে আসবার জন্য মেয়েজামাই আপনার পাগল হয়ে আছে, কেবল না ডাকলে ভরসা পাচ্ছে না আসতে। আপনি যদি ডেকে পাঠান—

সত্যপ্রিয় তার পরিচিত মৃদু হাসির সঙ্গে বলিল, ডেকে পাঠালেই তো ওরা মাথায় চড়ে বসবে, চাঁদের মা।

যশোদা অবাক হওয়ার ভান করিয়া বলিল, মাথায় চড়ে বসবে ? আপনার ? আপনার সামনে মুখ তুলে কথা কইবার সাহস ওদের আছে কিনা সন্দেহ, মাথায় চড়বে ! তা ছাড়া, বেয়াদবি যদি একটু করেই, মেয়েজামাইকে সিধে রাখতে পারবেন না ?

সত্যপ্রিয় ভাবপ্রবণতার চিহ্নও দেখাইল না, শাস্তভাবে বলিল, ওরা নিজে থেকেই আসবে।

যশোদাও তা জানিত, কিছুক্ষণ সে আর বলিবার কিছু খুঁজিয়া পাইল না। সত্যপ্রিয়ের নির্বিচার ভাব যশোদাকে সত্যসত্যই দমাইয়া দিয়াছিল। সত্যপ্রিয়ের সঙ্গে কথা বলার এই একটা মস্ত অসুবিধা, এত সহজে সে মানুষের মধ্যে নিজের প্রয়োজনীয় অনুভূতি জাগাইয়া তুলিতে পারে, উত্তেজনা, ভয়, আনন্দ, উৎসাহ, হতাশা এ সব যেন নিজের ইচ্ছামতো পরের মধ্যে সংক্রামিত করিবার ক্ষমতা তার আছে। সত্যপ্রিয়ের উদাসীনতা দেখিয়া মনে হয়, মেয়েজামাইয়ের কথাটা আলোচনা করাও সে প্রয়োজন মনে করে না। অতি সাধারণ একটা ব্যাপার, সংসারে এমন অনেক হয়, আপনাই হইতেই সব ঠিক হইয়া যাইবে। এ জন্য মাথা ঘামানোর কিছু নাই। যশোদারও মনে হইতে থাকে, ব্যাপারটা সে যত গুরুতর মনে করিয়াছে, হয়তো তেমন কিছুই নয়। এ বিষয়ে আর কিছু না বলাই উচিত। তবে কোনো কাজ আরম্ভ করিয়া মাঝখানে হাল ছাড়িয়া দেওয়া যশোদারও স্বভাব নয়।

তা হয়তো আসবে, কিন্তু তার তো দেরি আছে। খুকির মুখ চেয়ে একটু তাড়াতাড়ি ফিরিয়ে আনাই ভালো। আপনার ছেলেকে যদি পাঠিয়ে দেন—

সত্যপ্রিয় মাথা নাড়িয়া বলিল, আমি কাউকে পাঠাতে পারব না।

কথাটা সে এমন স্পষ্টভাবেই বলিল, যে মাথা নাড়িবার কোনো প্রয়োজনই ছিল না। যশোদা হাঁটু গুটাইয়া মেঝেতে ডান হাতের তালু পাতিয়া একটু কাত হইয়া মেঝেতে মেয়েদের বসিবার চিরন্তন ভঙ্গিতে বসিয়াছিল। উঠিয়া দাঁড়ানোর ভূমিকা হিসাবে সে এবার সোজা হইয়া বসিল। আর তার কিছুই বলিবার নাই।

সত্যপ্রিয় হঠাৎ জিজ্ঞাসা করিল, ওরা বৃষ্টি তোমায় পাঠিয়েছে ?

যশোদা বলিল, না।

সত্যপ্রিয় এতক্ষণ অন্যদিকে চাহিয়াছিল, কথা বলিবার সময় সে কদাচিৎ শ্রোতার মুখের দিকে তাকায়। এবার যশোদার চোখে চোখ মিলাইয়া সে খানিকক্ষণ অপলক দৃষ্টিতে তাকাইয়া রহিল,

তারপর মৃদুস্বরে বলিল, অন্য কেউ এ কথা বললে বিশ্বাস করতাম না চাঁদের মা। তবে তোমার কথা আলাদা। তুমি কখনও মিথ্যা বল না।

সত্যপ্রিয়ের দৃষ্টি দেখিয়া যশোদা এক মুহূর্তের জন্য শিহরিয়া উঠিয়াছিল। যশোদার স্নায়ুগুলি এ রকম শিহরনের উপযোগী করিয়া তৈবি হয় নাই; বাতদুপুরে হঠাৎ বাড়ির অন্ধকারে একটা ভূত দেখিলেও সে ভালো করিয়া চমকাইয়া ওঠে কিনা সন্দেহ। কিন্তু সত্যপ্রিয়ের দৃষ্টিতে যে ভাষা তার স্পষ্ট চোখে পড়িয়াছে ভূত দেখার চেয়ে তা চমকপ্রদ। ধনঞ্জয়ের চোখে একদিন যশোদা এ ভাষা দেখিয়াছিল, তবে সত্যপ্রিয়ের চোখের এমন বিশ্বগ্রাসী মারাত্মক ক্ষুধার সঙ্গে ধনঞ্জয়ের সেই মৃদু কামনার অভিযুক্তির তুলনাই হয় না। হঠাৎ যশোদার একটা অদ্ভুত ধরনের লজ্জা বোধ হয়, অনেক দিন সে রকম লজ্জার সঙ্গে তার পরিচয় ঘুচিয়া গিয়াছিল।

চোখের অস্বাভাবিক দীপ্তি নিভাইয়া সত্যপ্রিয় বলিল, তবু, মেয়েজামাইকে ফিরিয়ে আনবার জন্য আমি কিছু করতে পারব না চাঁদের মা। তুমি নিজে যখন এসেছো, আমার মেয়ের ভালোর জন্য এসেছো, তোমার জন্য আমি এইটুকু করতে পারি—ওদের ক্ষমা করলাম। তুমি গিয়ে ওদের বলতে পার, ওরা যদি ফিরে আসে আমি ওদের কিছু বলব না।

বাড়ি ফিরিয়া যশোদা নিজের বিস্ময়ে নিজেই হতবাক হইয়া থাকে। তার জীবনে কখনও এমন সমস্যা উদয় হয় নাই। যা সে দেখিয়া আসিয়াছে সত্যপ্রিয়ের চোখে, তাই কী ঠিক? অন্য আব কী হইতে পারে? যেভাবে সত্যপ্রিয় তাকে দু-চোখ দিয়া গ্রাস করিতে চাহিয়াছিল তাব তো অন্য কোনো ব্যাখ্যা সম্ভব নয়? কিন্তু সত্যপ্রিয়ের পক্ষে কী ওটা সম্ভব? বিশেষত তাকে দেখিয়া? তাব মতো বিবাতকায় মাঝবয়সি রমণীকে সামনে বসিয়া থাকিতে দেখিয়া সত্যপ্রিয়ের মতো শ্রৌচ মানুষের মধ্যে জোয়ারবেব আকস্মিক বন্যাব মতো প্রচণ্ড কামনার উদ্রেক হইতে পারে, এ তো বিশ্বাস করার মতো কথা নয়।

চোখ বুজিয়া বাস্তবকে এড়ানোব ছেলেমানুষি যশোদার মধ্যে নাই। সে জানে, সত্যপ্রিয়ের মতো সবল সুস্থ সংযমী মানুষ শ্রৌচত্রে পৌঁছিয়াছে বলিয়াই নিভিয়া যায় না। আকস্মিক এবং হয়তো ক্ষণিক উচ্ছ্বাসের অসংযমকে একেবারে বর্জন করা মানুষের পক্ষে কঠিন। রামায়ণ মহাভারতে যশোদা মুনিঋষিরও অনেক অসংযমের কাহিনি পড়িয়াছে। কিন্তু সে সব হঠাৎ-জাগা ভালোবাসা জাগাইত অনন্যসাধারণ রূপবতী যুবতি মেয়েরা। যশোদাকে দেখিলে রাস্তার গুণ্ডাও যে ভড়কাইয়া যায়!

সত্যপ্রিয়কে যশোদা ভালো করিয়াই চেনে, এক এক সময় ব্যাপারটা তার বড়োই কৌতুকজনক মনে হয়, আবার পরক্ষণে সে বৃষ্টিতে পারে এর মধ্যে কৌতুকের কিছু নাই, বিষয়টা অতীব গুরুতর। সত্যপ্রিয় যা কিছু চায়, প্রচণ্ড আবেগের সঙ্গেই চায়। প্রত্যেকটি কামনার এ বকম অস্বাভাবিক প্রচণ্ডতাই সত্যপ্রিয়কে এ রকম হৃদযহীন, নিষ্ঠুর করিয়াছে। বিরক্তি বোধ করিলে ভূমিকম্পের জন্য সত্যপ্রিয় পৃথিবীকে পদাঘাত করিয়া ছাড়ে। পায়ে একটা কাঁটা ফুটিলে হয়তো জগতের সমস্ত কাঁটা নষ্ট করিয়া ফেলা সম্ভব কিনা এই কল্পনাকেও সে প্রশয় দেয়। কিন্তু সে ভাববিলাসী নয়, বাস্তবকে সে এড়াইয়া চলে না—তার মতো হিসাবি, দৃঢ়প্রতিজ্ঞ, ফন্দিবাজ, সংযমী আর স্বার্থপর মানুষ যশোদা খুব কমই দেখিয়াছে। মানুষকে পায়ের নীচে চাপিয়া রাখাব কামনা সম্বন্ধে হয়তো সে অসংযত, নিজের মতামত প্রচার করার স্বপ্ন দেখিবার বেলা হয়তো সে অবাস্তব, অসম্ভব কল্পনার ক্রীতদাস—কিন্তু তাও যে ইচ্ছাকৃত দুর্বলতা, জানিয়া বুঝিয়া নিজেকে একটু খেলার সুযোগ দেওয়া।

অথবা মোটের উপর মানুষটা আসলে পাগল?

এই সব চিন্তায় কয়েকটা দিন কাটিয়া গেল। তারপর একদিন সকালে পিয়ন আসিয়া একখানা খাম দিয়া গেল যশোদার নামে। খামের মধ্যে কারও ব্যক্তিগত চিঠি ছিল না, ছিল একটি নোটিশ। শহরতলির উন্নতির জন্য যশোদার বাড়ির উপর দিয়া নূতন রাস্তা যাইবে, যশোদার বাড়ি আর

শহরতলি উপন্যাস সূচনার বসড়া .